

ANTONII STORCK,
Sacrae Cæs. Reg. Apost. Majestatis Consi-
liarii Aulici, Archiatri, & in Nosocom.
Civico Pazmar. Physici,

ANNUS MEDICUS

P R I M U S,

QUO SISTUNTUR

OBSERVATIONES

Circa Morbos acutos & chronicos,
adjiciunturque eorum curationes,
& quædam anatomicæ cadaverum
sectiones.

TOMUS PRIMUS.



ANTONI STORCK,

Prætor Cæsar. Reg. Apst. Medic. Cæsar. Medic. Apst. Medic. Cæsar. Medic. Apst.

IN HONORE

HELVETIORUM COLLEGIUM,

Medic. Prætor. Cæsar. Reg. Apst. Medic. Cæsar. Medic. Apst. Medic. Cæsar. Medic. Apst.

ANIMI MEDICI,

ATQUE

OBSERVATIONES

CIRCA MORBOS ACUTOS

AC CHRONICOS,

Adhuc in prætorio Cæsar. Reg. Apst. Medic. Cæsar. Medic. Apst. Medic. Cæsar. Medic. Apst.

EDITIONE NONA, CORRECTIO.

Prætor Cæsar. Reg. Apst. Medic. Cæsar. Medic. Apst. Medic. Cæsar. Medic. Apst.

—————

TOMUS PRIMUS.

—————



AMSTELÆDAMI,

Sumptibus Prætorii DE TORNIE.

—————

M. DCC. LXXII.



VIRO ILLUSTRISSIMO

G E R A R D O

L. B. VAN SWIETEN,

AUGUSTISSIMI IMPERATORIS

& Imperatricis a Consiliis, Archia-

tror. Comiti, Bibliothecæ augustæ

Præfecto, inclyt. Facult. Medic.

Vienn. Præsidi perpetuo, necnon

Academiæ Reg. Scient. & Chirurg.

Parif. Institut. Bononiens. & Litter.

Incognitor. Membro, &c.

*Hos primos praxeos Medicæ conatus
Seque totum dat & consecrat.*

ANT. STORCK.

Storck Ann. I. Tom. I.

THE UNIVERSITY OF CHICAGO

LIBRARY

OF THE

PHYSICS

AND

Astronomy

Department

of Physics

and

Astronomy

Chicago, Ill.


1900

THE UNIVERSITY OF CHICAGO

LIBRARY

OF THE

PHYSICS



VIR ILLUSTRISIME,

TANTA Fratri meo mihiq̃ue
præstitisti beneficia, ut nullus
omnino locus superesse videatur,
quo **TIBI** sufficientes gratiæ
possent referri.


Etenim Fratrem meum primum
ex tuis Discipulis hac in alma
Universitate Professore Regium
fecisti creari; & postquam nimia
Aulæ negotia medica tibi e Ca-
thedra dicendi otium negaverunt,
tuam quoque Cathedram, tuam

*docendi Provinciam ipsi tradidisti.
An quid majus? An quid hono-
ratius sperare licuisset?*

*Mihi vero a primordio praxeos
meæ non solum consiliis, quæ
rem medicam, sed & consiliis,
quæ fortunam concernunt, lubenti
semper animo paterne succurristi,
& sensim tantam in me confiden-
tiam posuisti, ut te favente noso-
comium Pazmannianum meæ curæ
traditum fuerit.*

*Concede ergo, VIR SAPIEN-
TISSIME, ut pro aliquo saltem
gratitudinis testimonio has pa-
gellas tuo nomini inscribam;
fufcipe eas benigno (ut soles)
vultu; & me tuis gratiis ulterius
fove. Vale.*





PRÆFATIO.

SUNT, qui autumant, ægros in nosocomiis decumbentes aut negligi, aut remediis quandoque nimium violentis impugnari, & hac ratione sibi persuasum habent, Medicos de similium ægrorum vita haud multum esse sollicitos.

Dum igitur sat magnum nosocomium meæ curæ traditum fuit, putavi: officium Medicum, amorem proximi, & propriam conscientiam postulare, ut ea omnia sedulo observentur, adnotentur, atque demum fideliter describantur, quæ circa nosocomii ægros acta sunt, & aguntur; neque propterea licuit, eos reticere casus, qui sinistro eventu fuerunt terminati.

P R Æ F A T I O.

Die decimo mensis Julii 1758;
Eruditissimo Aulæ Medico JOSE-
PHO HABERMANN in rebus noso-
comii gerundis successi, & ab eo
tempore omni octiduo numerum
acuta febre decumbentium, &
acuta mortuorum conscripsi: ut
inde patefceret, has observationes
non ex uno alterove ægro desump-
tas, verum ex numerosis collectas
esse & confirmatas.

Materiem de Morbis acutis in
menses divisi, & quænam peculiaria
symptomata quolibet mense super-
venerint, quæve curandi methodus
fuffecerit, simul recensui.

Morbi chronici solummodo ii
nunc adferuntur, qui hoc anno in
nosocomio maxime communes fue-
runt; de aliis quidem plurimis varia
quoque & pulchra observata habeo,
verum, quoniam majori adhuc at-

P R Æ F A T I O.

rentione opus habent, & numerosioribus exemplis confirmari debent, ea in aliud tempus rejicienda judicavi.

Sub finem adduntur quædam anatomicæ Cadaverum Sectiones, & formulæ Medicæ in Nosocomio usitatæ.

Quæ deinceps notatu digna observavero, fideli semper calamo adnotare, & referre conabor.



NUMERUS acuta febre decumbentium,
& acuta mortuorum in Nosocomio a
10. Jul. 1758. usque ad 2. Jul. 1759.

A 10. . . . ad 17. Jul. fuerunt

Ægri acuti . . . 17.

Mort. . . . 0.

A 17. . . . 24. Jul.

Ægri . . . 15.

Mort. . . . 1.

A 24. . . . 31. Jul.

Ægri . . . 35.

Mort. . . . 4.

A 31. Jul. . . . ad 7. August.

Ægri . . . 25.

Mort. . . . 3.

A 7. . . . 14. August.

Ægri . . . 34.

Mort. . . . 3.

A 14. . . . 21. August.

Ægri . . . 15.

Mort. . . . 0.

A 21. . . . 28. August.

Ægri . . . 24.

Mort. . . . 1.

A 28. August. . . . ad 4. Septembr.

Ægri . . . 26.

Mort. . . . 1.

A 4. . . . 11. Septembr.

Ægri . . . 39.

Mort. . . . 1.

Ab 11.	18. Septembr.
Ægri	33.
Mort.	1.
A 18.	25. Septembr.
Ægri	28.
Mort.	0.
A 25. Septembr.... ad 2. Octobr.	
Ægri	32.
Mort.	0.
A 2.	9. Octobr.
Ægri	43.
Mort.	1.
A 9.	16. Octobr.
Ægri	40.
Mort.	0.
A 16.	23. Octobr.
Ægri	42.
Mort.	0.
A 23.	30. Octobr.
Ægri	37.
Mort.	2.
A 30. Octobr.... ad 7. Novembr.	
Ægri	35.
Mort.	2.
A 7.	13. Novembr.
Ægri	28.
Mort.	2.
A 13.	20. Novembr.
Ægri	40.
Mort.	0.
A 20.	27. Novembr.
Ægri	34.
Mort.	2.

A 27. Novembr. . . ad 4. Decembr.

Ægri . . . 37.

Mort. . . 1.

A 4. . . 11 Decembr.

Ægri . . . 39.

Mort. . . 2.

Ab 11 . . . 18. Decembr.

Ægri . . . 42.

Mort. . . 0.

A 18. . . 25. December.

Ægri . . . 50.

Mort. . . 1.

A 25. Dec. 1758. . . . ad 1. Jan. 1759.

Ægri . . . 39.

Mort. . . 1.

A 1 . . . 8 Jan.

Ægri . . . 48.

Mort. . . 0.

A 8. . . 15. Jan.

Ægri . . . 40.

Mort. . . 2.

A 15. . . 22. Jan.

Ægri . . . 52.

Mort. . . 4.

A 22. . . 29. Jan.

Ægri . . . 50.

Mort. . . 6.

A 29. Jan. . . . ad 5. Febr.

Ægri . . . 53.

Mort. . . 3.

A 5. . . 12 Febr.

Ægri . . . 57.

Mort. . . 2.

A 12.	19. Febr.
Ægri	82.
Mort.	4.
A 19	26 Febr.
Ægri	74.
Mort.	5.
A 26 Febr.	ad 5 Mart.
Ægri	70.
Mort.	3.
A 5.	12. Mart.
Ægri	65.
Mort.	2.
A 12.	19 Mart.
Ægri	50.
Mort.	1.
A 19.	26. Mart.
Ægri	55.
Mort.	3.
A 26 Mart.	ad 2. April.
Ægri	49.
Mort.	2.
A 2.	9. April.
Ægri	52.
Mort.	1.
A 9.	16. April.
Ægri	55.
Mort.	2.
A 16.	23. April.
Ægri	43.
Mort.	2.
A 23.	30. April.
Ægri	50.
Mort.	2.

<i>A</i>	30. April.	ad 7. Maii.	
	Ægri		48.
	Mort.		5.
<i>A</i>	7.	14. Maii.	
	Ægri		45.
	Mort.		3.
<i>A</i>	14.	21. Maii.	
	Ægri		47.
	Mort.		2.
<i>A</i>	21.	28. Maii.	
	Ægri		50.
	Mort.		3.
<i>A</i>	28. Maii.	ad 4. Jun.	
	Ægri		39.
	Mort.		2.
<i>A</i>	4.	11. Jun.	
	Ægri		42.
	Mort.		1.
<i>Ab</i>	11.	18. Jun.	
	Ægri		50.
	Mort.		3.
<i>A</i>	18.	25. Jun.	
	Ægri		44.
	Mort.		2.
<i>A</i>	25. Jun.	ad 2. Jul.	
	Ægri		35.
	Mort.		1.





DE GENERE
VERE ET EXQUISITE MEDICALI;
Q U O
OPERA ISTA SCRIBUNTUR;
DISSSERTATIO
PRÆLIMINARIS
AUCTORE

J. B. AUJÉRIE,

Barj. Doct. Med. Monsp.

Ad Artem Medicam vere ac proprie non
pertinere eam disciplinæ nostræ partem, quæ
nimium tribuit speculationibus, hominum est
prudenter ac considerate loquentium.

BAGLIVI Prax. l. I. c. I.

ARTEM Medicam sola experientia
fecit, eandem sola experientia perficiet.
Quid boni retulimus ex tot & tantis

speculationibus, meditationibus, disputationibusque systematicorum? Nil, nisi Artis remoras, temporis ingeniorumque dispendium. Tandem resipiscunt sanitatis Ministri, undique observationes & experimenta colligunt, ipsisque antiquam & bene meritam reddunt reverentiam. Inter cætera observationum monumenta, quæ ætas nostra extulit, eminent Storckii & Collini anni medici. Opera ista veram ac genuinam sapiunt medicinam. Missa enim scholarum garulitate, missis inanibus commentis, res & facta ferunt, morborum ipsis commissorum successiva phænomena fideliter narrant, ex his indicationes sumunt, medicamenta jubent, eorum effectus exponunt bonos, malos, nullos, prætereaque nihil. Quia præterea nihil est.

Nonnullis forsan speculatoribus propositio hæc nostra minus arridebit. Historiam vero praximque medicam attento animo perlustrent, ipsisque patebit, si suorum systematum amore non omnino obcœcentur, quod diagnosi, prognosis, dogmata & inventa curativa, cæteræque artis partes per sola facta stent & accrescant, nihilque aliud sint quam mera factorum historia.

Viderat Hippocrates in thaso Dealca-

dis uxorem (*a*) semper tacitam, manibus palpantem, scalpentem, pilos legentem, parum, & si commonita, bibentem, non dormientem, pauca & tenue mingentem, phrenitide emortuam. Viderat adolescentem quemdam in Mælibea (*a*); viderat alibi (*a*) alios phreniticos iisdem ferme symptomatibus vexatos. Unde statuit, quod mentis emotiones tremulæ, palpantes phreniticæ sint; quod plerique phrenitici parum bibant; quod taciturnitas, insomnia, urina tenuis & pauca sint inter signa perniciosarum mentis emotionum (*b*). Eadem via, observatione scilicet repetita Aurelianus invenit quod tenesmus sit præcipuum signum foetus in utero mortui (*c*). Repetita, Baglivius rem confirmavit (*d*). Eodem modo ab observatoribus, minime vero a theoreticis accepimus, quod in nephritide calculosa, hemicrania, stupor crurum, retractio testiculi sint e directo, in capitis vero percussionibus, hemiplegia

(*a*) Epid. lib. III. §. III. ægr. 15. 16. 4.

(*b*) Coac. prænot. sect. I. cap. I.

(*c*) Cælius Aurelianus, cap. de foet. mort.

(*d*) Baglivi prax. 1. 2. cap. 8.

aut membrorum stupor ex opposito. Ab ipsis didicimus quod dolor in imo glande penis sit inter certissima calculi vesicæ signa, quod inflammationes internæ dum febris continua in intermittentem mutatur in apostema, & suppurationem transeant (*e*), in gangrænam vero, dum perstantibus malis symptomatibus, dolor subito cessat. Ab ipsis didicimus quod fluor albus mulierum a gonorrhea præsertim dignoscatur, ex eo quod supervenientibus menstruis perseverat fluxus gonorrhicus, evanescit vero albus (*f*). Iisdem tamen autoribus hanc diagnosim circumscribemus, dum observaverint alii fluxus albos, qui e vagina erumpentes per menstruationem ac per graviditatem non cessant (*g*). Hæc & alia diagnostica omnia, quæ his adjicere facillime foret, nil sunt, nisi facta & observatorum munera. Illos nunc consideremus simili modo prognosim medicam ditantes, dum theoricæ somnia, verba ac voces excogitant, dividunt, ergotifant, ineptiunt.

(*e*) Hipp. Aretoæus. Morton. Baglivi Lugd. 1745. p. 34. 36. 145. Le Roy. du pronostic, a n^o. 474. ad 478.

(*f*) Baglivi prax. lib. 2. cap. 8.

(*g*) Mead monita & præcepta,

Hippocrates colligens celebres 42 historias libri primi & tertii morborum popularium, ac observans quod ii omnes qui coloris naturalis urinas habuerunt, invitis malis quibusque symptomatibus salvi facti sunt; practici similes casus offendentes concludere quod bonæ urinæ in diris quibusque morbis spem alant maximam. Eosdem observatio quotidiana docuit quod cruditates diurnitatem morbi, aut infelicem exitum generaliter significant. Attamen ex historiis Metonis (*h*), Herophiti, mulieris in Thaso decumbentis, virginis Larissenæ (*i*), adolescentis apud Galenum celebris (*k*), & similibus concludunt quod in ipso irritationis & cruditatis tempore largæ hemorrhagiæ, muliebriumve vacationes aliquando ardentes febres de subito tollant, aut valde imminuant (*l*). Largas etiam illas ac utiles hæmorrhagias ab ipsis præfagire disces ex capitis ac temporum gravitate, insomniis, delirio, facie & oculis rubentibus, iis dolentibus, aliquando & lacrimantibus,

(*h*) Epid. 1. I. ægr. 8.

(*i*) Epid. 1. III. §. III. ægr. 9. II. 12.

(*k*) Lib. de prænot. ad posthum. cap. 13.

(*l*) Epid. 2. §. I. Coac. §. I. prænot.

narium pruritu (*m*), pulsu dicroto (*n*). Cavebis vero largarum hemorrhagiarum laudes ad parvas & minimas extendere, si historias Philici, uxoris Dromeadis, Parionis (*o*), similesque noveris. Cum Hippocrate contra funesta quæque præsenties, dum sanguis paucus guttatim e naribus stillabit (*p*). Illa autem præfagia non ex idearum regione, non ex systematum pelago, non e scholarum argutiis deduces, sed in ipso naturæ sinu hauries, aut in paucis eorum observatorum libris, qui longa & familiari consuetudine illius mores cognoverunt & depinxerunt. Cum ipsis percurrere morbos capitis, cephalalgiam, delirium, ophthalmiam, discas quod alvi fluxus illis generaliter salutaris sit (*q*). Percurre morbos pectoris, peripneumoniam, pleuritidem, tabem pulmonarem,

(*m*) Epid. l. I. §. 2. Coac. §. 1. Galen. method. ad Glaucon. l. I. cap. ultim.

(*n*) Novæ observat. ex pulsu primum factæ a Solano, auctæ a J. Nihell, §. I. cap. I.

(*o*) Epid. l. I. ægr. I. II. liv. 3. sect. 3. ægr. I.

(*p*) Coac. præn. sect. I. & 3.

(*q*) Hipp. aphor. sect. VI. aph. 17. sect. VII. aph. 5. Baglivi, p. 102.

comperies quòd idem ille fluxus iis
tristis sit præfagii (*r*); quòd abcessus
ad crura, pedes, aures, aliasque par-
tes externas longe melioris ominis sint
(*s*); quòd illæ pulmonum inflamma-
tiones quæ anginæ succedunt (*t*),
quæ ruffis accidunt (*u*), in quibus ægri
erecti tantum sedere volunt (*x*) refor-
midandæ sint. Mera phœnomena sunt
hæc omnia, nec aliud esse possunt.
Cunctos percurrere morbos, & ut nullum
dignoscendi ita nullum præfagiendi
principium invenies, quod merum non
sit phœnomenon & observatorum mu-
nus. Principia vero curativa & remedio-
rum inventio cui debeantur? An inter
observata phœnomena annumeranda
sint? An inter imaginationis fœtus
propriis ingenii viribus & a priori pro-
ductos?

Pastor Melampus observat furentes
capellas ab helleboro purgari & sanari,

(*r*) Hipp. aphor. sect. v. aph. 14. §. vi.
aph. 16. Baglivi. p. 35.

(*s*) Baglivi, p. 34. & 37.

(*t*) Hipp. aph. sect. v. aph. 10.

(*u*) Ballonius ephemer. lettres de Guë
Patin, tom. I. lettre ci.

(*x*) Baglivi, p. 34.

eodem posthac remedio insanientes regis filias sanat. Hippocrates vidit vomitibus spontaneis diarrhæam sisti (y), inde vulgatissima praxis fluxus alvinos emeticis curandi. Vidit in pulmonibus tumores ad crura optimos esse, unde Baglivius felici successu iis partibus vesicantia admovit (z). Epilepsiam sanaverant manantia capitis ulcera, unde & artificialia profutura conclusit Tulpus (a). Jamque remedium hoc Celsus commendaverat (b). His vero enumerandis supersedeamus, ac generaliter cum hoc medicorum Cicerone dicamus: *Hæc similiaque cum quotidie inciderent, diligentes homines notasse quæ plerumque melius responderent, deinde ægrotantibus ea præbere cœpisse, sic Medicinam orram* (c), sicque nunc permanet; neque scientia nostra de medicamentorum operationibus ultra sensuum captum extenditur. Veri practici a solis juvantibus, & lædentibus huc usque illorum inventionem promovent. Continuo cum

(y) Aph. sect. vi. aph. 15.

(z) Pag. 37.

(a) Observ. med. observ. 8.

(b) Medicin. l. III. cap. 23.

(c) Ibid. in præf.

Hippocrate dicunt: *Si conducat bonum* (d). Cum Sydenhamo, *nil ultra quam res loquitur sapere audeo* (e).

Qui minus cauti istos humani ingenii limites transcendere volunt, misere hinc inde offenduntur, seque suaque illidunt. Riverius, cui apud nos magni cognomen, longe major est in observationibus cum curationes suas simplici calamo profert, quam cum in suis institutionibus, sui temporis hypotheses immenso volumine exponit. Dum loquitur de vaporibus tetrīs, qui per cauterii emissarium velut è vulcano quodam difflantur, dum in extremitatum doloribus fingit fumos per crura descendentes, cachinnos libenter tollerent neoterici. Non est tamen quod hunc irrideant, cum ipsos explicationum malefana cupiditas teneat, neque in his condendis feliciores evadant.

Jamdudum Medici spiritum cornu cervi, spiritum salis ammoniaci, alcali fluidum, fluentem, *fluorem*, si velis, quid de nomine? In affectibus synco- palibus, soporosis, paraliticis aliisque

(d) Aphor. sect. I. passim.

(e) Sydenh. oper. apud fr. de Tournes, ult. edit. vol. I. p. 146.

adhibebant ; celeberrime supervenit Chymicus , *Sapiens* dicam , necne ? qui remedium hoc , felici & invidendo successu in diversis asphyxiæ casibus adhibuit. Quæ est vero hominum lævitas ! agere non contenti , garrere pruriunt , ipsisque non sufficit solida factorum gloria , ni huic explicationum gloriola accedat. Is alcali volatilis in asphyctos effectus a sola acidi in pulmonibus suppositi saturatione deduxit. Hæc vero explicatio , si nostram sententiam in medium proferre licet , & contra scientiarum fundamentale principium , & contra principia chymica , & contra phænomena medica peccat.

Principium in colendis scientiis fundamentale est , ut phænomena alterius non transferantur in alteram. *Dans toute science naturelle ,* ait Monspeliensis cancellarius , *les hypothèses qui ne sont point déduites des faits propres à cette science , doivent être regardées comme étrangères à la bonne méthode de philosopher* (f). Jam Baglivius conquestus erat de istis scientiarum profitentibus , qui solent de altera per præcepta leges-

(f) *Elémens de la science de l'hom. disc. prélim. p. 2.*

que alterius judicare (g), nostrosque Chymicos sæpissime hoc vitio affectos palam redarguit D. Majault (h). Si Chymicis dicerem : Gas fermentationis & effervescentiæ acidum est, quia ut acida antisepticos effectus edit in corpore. Subito responderent tua probatio non admittenda, quia non chymica. Sibi pari jure dicant : Acidi & alcali saturatio non est factum medicum, non est phænomenon ex œconomia animalis desumptum, ergo in corporis profundo non transferenda (i).

(g) Prax. med. lib. I. cap. 7. n°. 3.

(h) Observations critiques & pratiques sur les contrepoisons, lues à l'assemblée publique de la faculté de méd. de Paris, par M. Majault.

(i) Hic non loquimur de saturationibus illis, quæ in corporis peripheria aut etiam in ventriculo locum habere possunt, quæ aliquo modo externæ, cum proprio corporis gubernio nil commune habent. De corporis profundo loquimur, de intimis recessibus ubi actiones modis vitalibus, id est inexplicabilibus, non chymicis, œconomiae animalis heterogeneis execuntur.

Fermentatio est aliud exemplum illorum phænomenorum quæ Chymici, ex corporibus mortuis ad viventia transferre voluerunt. D. Roux publice Parisiis per multos annos docuit, alimentorum digestionem in ventri-

Peccat deinde hæc hypothesis contra principia chymica. Chymia nullam saturationem sive dissolutionem admittit, nisi substantiæ saturandæ in contractu sint. Hic vero una substantia in pulmonibus supponitur, dum alia aquæ immixta ad ventriculum defertur. Et certe alcali volatile haustum cum aqua non magis tracheam-arteriam ingreditur, quam Gas sive acidum volatile antiemetici Riveriani, in ipsa effervescentia exhibiti. Attendas vero, ais, quod alcali volatile naribus etiam admovetur. Attendas ipse, quod ex una parte pulmones spasmio clausos constrictosque ponis, &

culo meram esse fermentationem. Ejus hypothesis, ex factis physiologiæ heterogeneis traducta, manifeste a digestionis phænomenis contradicatur. Duo viri uvas similiave alimenta facile fermentantia sumunt. Unus relative, ad ventriculi sui vires sumit, brevi digerit, nihilque incommodi patitur. Alter in edendo viribus non consulit, oppressæ vires alimentum suo genio permittunt, fermentatio excitatur, suisque phænomenis se prodit, intestinis scilicet motibus, flatibus, ructibus, quibus miser excrucietur. Pessimam operam hominibus, præstarent Chymici, si fermentatio, ad illorum vota, digestionis locum in uno quoquesumeret.

ex alia effectus instantaneos dicis ; attendas quod omnis respiratio cessavit : atqui alcali sine respiratione pulmones subire nequit , atqui respiratio excitatur ante saturandorum contactum ; in isto igitur exhibendi modo alcali in naribus agit , ut in alio , in œsophago & ventriculo egit.

Peccat insuper hæc hypothesis contra facta medica. Medici ad vitam revocant asphyctos cum diversis remediis , imo & oppositis ; D. Portal cum aceto (*k*) , à quo morbus augeretur , si quid veri esset in ista saturationis theoria ; D. Buquet cum spirituosis quibuscumque (*k*) ; D. Dupau , sola in plantis pedum irritatione (*l*). Iis omnibus modis asphyxia absque saturatione curatur. Sed & ipse alcali in multos agit casus , ad quos nequidem ab ipso systematis autore , saturatio extenderetur. Apud Sauvagesium (*m*) puella catalepsi detenta odorem spiritûs salis ammoniaci ad decem pedum distantiam percipiebat ,

(*k*) Mémoires imprimés à ce sujet , & lus dans des assemblées publiques.

(*l*) Gazette salulaire , 1779. n°. 17. Journal encyclopéd. prem. avril.

(*m*) Nosolog. method. in-4°. t. I. p. 825.

& manibus utens, ab affectu consequenter libera, nares arctabat. Singulis diebus asphyxias à pathemate eodem modo sanantur, ut leipothymias histericarum solo ustæ plumulæ odore. Et si mihi offerretur neophitus propter debilitatem primæ inspirationis privatus, cognitis remediis adungere non recusarem alcali volatile prudenter naribus admotum. Agit ergo illud alcali ubi nequidem ulla suspicio est acidi fatu-
randi.

Si hujus facti explicatio a me peteretur, responderem quòd irritatio pedum, frigida projectio per corporis peripheriam, spirituosorum, sive altalium, sive acidorum oblatio unum & idem sint remedium, scilicet excitatio virium suffocatarum, aut si malint, principii vitæ sopiti. Hæc autem mea explicatio nihil aliud est quam facti sub verbis aliis repetitio, sive traductio. Faten-
dumque quòd explicationes medicæ quæ nil opinioni concedunt, nihil aliud sint quam similem factorum traductionem, ut & notiones multæ, sic reputatæ de quibus homines sibi plaudunt. *Celui qui dit que deux & deux font quatre, a-t-il une connoissance de plus que celui qui se contenteroit de dire que deux & deux*

font deux & deux (n) ? De similibus explicationibus tanquam de splendidissimo lumine leviora ingenia sibi gratulantur, sagaciora in his nihil ultra facta deprehendentes, factorumque contenta, has tantum negligunt, dum cæteras omnes aut opinionibus aut heterogeneis factis fundatas omnino spernunt & projiciunt.

Explicationes vero & explicatores linquamus, atque ex tædio quòd sola unius discussio hîc peperit, & de quo lectori veniam libenter peterem, concludamus quam noseosi sint libri ab apice ad calcem iis refarcti. Ad observatores redeamus, plus emolumenti ac voluptatis a paucis Storckii paginis accepturi, quam ab immensis systematum voluminibus. Jam ostendimus quod ipsis diagnosim, prognosim, principia & inventa curativa ipsis debeantur, idemque faciliter ostenderetur de cæteris omnibus medicorum notionibus. Sed est & aliquid majus. Notiones, ut ut amplæ sint, non solæ medicum efformant. Illi insuper acquirendum est professionis mens & ingenium, sublimis

(n) D'Alembert, mélanges, tom. I. p. 46.

illa facultas celeriter & iuste judicandi, unumque consilium ex multiplicatis & diversis indicationibus simul capiendi, quæ in quibusdam casibus inspirationis characterem assumit hominemque a mortalibus ad deos evehit. Nequicquam divinam illam artem a theoreticorum disputationibus repeteres. Solo usu, ac nocturna diurnaque observationum meditatione acquiritur.

Ars igitur medica in merum empirismum abibit & faceffet? Si juxta nativum nominis tenorem per empirismum experientiam intelligis, fatemur, imo & gloriamur, quod legitima Medicina sit scientia experimentalis. Si ex nominis abusu, empirismum confundis cum vaniloqua illa agyrtarum & circumforaneorum arte, quam Galli *Charlatanisme* dicunt; a pessima ista fraude toto cœlo distat methodus tractandi medicinam, quam cum optimis quibusque, proponimus. Dum præcipuus nobis scopus sit factorum veritatem & verborum sobrietatem sectandi, & juxta ingeniosi Gui Patini verba, *de décharlataner la médecine*.

In nostra methodo Medici de œconomia physica scribent, ut D. de la Bruyere de œconomia morali. Cum ipso

hominem minus coloribus & verbis quam factis pingent. Cum ipso physicorum affectuum characteres sive mores libros suos inscribere poterunt, cum ipso dicere: *Je rends au public ce qu'il m'a prêté, j'ai emprunté de lui la matiere de cet ouvrage* (o). Non hypotheses condo, non opiniones vendito, quod video scribo. Nullus annus est qui novi voluminis scribendi materiam non offerat. In nostro genere, qui facta naturalia observat & refert, autor est; qui hæc caste exprimit, bene scribit. Hypotheses ut gothicam architecturam habe. Barbara hæc ornamenta barbaris linque. Ionicus, Doricus, Corinthius fias, aut potius Cous. Tunc de te dicent, quod de ipso Coo Baglivius: naturæ non hominis lingua loquitur (p).

At historica ista Medicina nimis simplicior erit? Aiunt multi. Non adeo forsan simplex labor est constans observatio, istius adæquata expressio, coordinatio & ad suos usus adaptatio. Optandum tamen quod simplicissimus

(o) Les Caract. de la Bruyere, in proemio. Quæ sequuntur passim colliges ex eodem & cap. 1^o.

(p) Prax. lib. I. cap. I. n^o. 3.

evadat. Num propterea ars erit minus docta? e contra longe major scientia requiritur a medico observatore quam a systematico. Is simulac morbi cujusdam systema sibi fixit, casus omnes similes putat, unoque curandos remedio. Atque ea facie pravis istis empiricis, juxta neotericorum nominis acceptionem, inscie similis evadit. Observator autem sciens, quod vix ulla praecepta perpetua in arte sint (*q*), quod centena & millena sint quæ casus quoscumque velut peculiare reddunt, peculiaria ista sibi in artis exercitio continuo præsentiā sistit, & necessario numerosissima facta simul animo amplectitur. Ex quibus nunc illam, nunc aliam viam ingreditur. Systematicus uni opinioni adhærens unicam viam calcit, sua scientia in brevi formulario continetur. Hic semper venam secit, hic semper alvum ducit, hic semper agit, hic semper expectat. Percurre vero Sydenhamum, nunc illum, nunc alium invenies; in prima constitutione natura ducitur, in secunda naturam ducit. Unde hoc? an secum pugnat?

(*q*) Cornel. Celsi Medic. libro I. in præfat.

an a se discrepat vir ille eximius? nullo modo. Cum vero systematicus non sit, neque ulli opinioni præ aliis adhæreat, methodum ad circumstantias, non circumstantias ad methodum inflectit. In prima constitutione naturæ conamina felicissima erant, unde ipsi tantum favere studebat. In secunda tumores pestilentiales naturalem sed funestam solutionem præbebant, & experientiâ deprehenderat feliciores esse in artis potestate (r); atque diversas illas methodos a posteriori tantum amplexus erat. Et quomodo a prejudicata quadam opinione eas mutuasset, ille qui censet morborum diversitatem non magis a propriis symptomatibus quam a peculiari & diversa medendi ratione, quam sibi vindicant illucescere, illam autem rationem adeo variare ut, quâ corrente anno ægros liberaveris eâdem ipsâ anno vertente de medio tollas. Qui fatetur, quod aliquando anceps hæserit quâ viâ insisteret, neque efficere potuisse ut qui se primi curæ suæ commiserint vitâ periclitarentur; quod tunc soleret cunctari,

(r) De morb. epid. constitutiones annor.
a 1661 ad 1666.

*ad magna præsertim remedia non nisi suspenso pede procedere, diligenter interim morborum ingenium atque morem observare, atque a juvantibus & lædenti-
bus consilium petere; denique quod alias ingenuinam methodum velut casu,
& auspicato sorte inciderit (s).*

Quid tandem? casu ducetur medicus, nullis principiis regetur, nullo filo, nulla theoria dirigetur? ne quid nimis. Si cum Celso (t), obscura omnia ab arte rejicimus, cum illo admittimus rationem evidentibus & propriis phœnomenis Medicinam, aut si mavis ejus theoriam, instruentem & efformantem. Theoria autem illa rationalis accurate & religiose distinguenda est a temerariis illis theoriis, quæ hypothesebus ex præconcepta opinione vel ex phœnomenis arti heterogeneis constant, aut quæ angustis cujusdam systematis finibus naturam circumscribunt. Theoriæ istæ (u), improprie sic nominantur, nihil sunt nisi

(s) Totius oper. cap. 2. de morb. epid. passim.

(t) Corn. Celsi medic. lib. I. in fine præfationis.

(u) Sub pravo illo, & tamen vulgari sensu multoties theoriam superius damnavi-

systemata & hypotheses eandemque censuram merentur.

Vera artium theoria, sive philosophia nihil opinioni tribuens, tota est in factis & phœnomenis sub principiorum formâ & nomine traductis. Omne principium quod phœnomeni non est expressio, cujus phœnomenon non est exemplar, quodque analysi & camino subjectum in phœnomenon non liquatur & resolvitur, theoriæ veræ non pertinet, sed opinioni, hypothese, systemati. Inde unicum veri theorici negotium erit in inveniendis & colligendis primis illis phœnomenis, sive quod idem est, principiis ad artifices in praxi dirigendos idoneis. Ea autem principia inveniuntur per gradatam ascensionem ex observatione in observationem, per factorum aut phœnomenorum successionem & continuitatem. Ubi factorum continuitas cessat, ubi catena rumpitur, ibi sistimur, & phœnomena illa quæ catenæ primas tenent, quæ in capite aliorum sunt, principia nobis erunt. Donec felicior observator annulos quosdam catenæ adjiciat. Tunc phœnomena quæ prin-

mus, non autem sub vera significatione hîc exponenda.

cipia erant, recenter inventis submittentur, veritates inferioris & subjecti ordinis fient, & nova inventa phœnomena principia dices. Eo modo efformata principia certa simul & inexplicabilia erunt. Certa, cum sint facta sensibus exposita; inexplicabilia, cum sint in extrema sensuum prospectione posita, ultra quam in physicis nil cernitur, nihil scitur. Ut autem artis cujusdam theoria perfecta foret, requireretur non solum principiorum veritas & practica utilitas, sed etiam illorum collectionem universalem, absolutam, integram, qua ad omnes casus practicos obvios extenderentur & sufficerent. Requireretur etiam talis ipsorum continuïtas & concatenatio, qua in unicum corpus coirent, sub uno aut paucis phœnomenis principibus.

Ars omnis, quæ solis operariis & fabris non omnino committitur, partem illam philosophicam aut theoreticam plus minusve promotam, plus minusve perfectam habet. Antecedentis seculi Chymicis nulla aut fere nulla erat theoria. Vel mere mechanice & quasi automaticè operabantur, vel deliramenta pro principiis sumebant. Ipsis nunc affulget vera philosophia, optimique generis theoriâ condunt, cujus ima-

ginem in primo volumine elementorum D. Macquer videre est (α). Hujus operis principia sunt phænomena numerosissimis observationibus & experimentis confirmata, breviter enarrata, ad praxim ducentia, & nexus quosdam inter se efformantia. Quoad illorum

(α) Non sic verisimiliter censeret quemdam physices professorem, quem Parisiis audivi. Hic in publica lectione dicebat: Chymici nihil desiderant & ultimæ quæstioni satis fecisse putant, ubi tandem dixerunt, quòd duo corpora in unum coeant mediantibus affinitatibus. Hæ sunt illis Herculeæ columnæ. Eosque redarguebat, quòd non ultra egrederentur. Hæc verba suspectam viri illius philosophiam produnt. Optasset igitur, ut Chymici tempus nugis infumerent, verba darent ubi factis destituuntur, & ex tutis observationum viis, in opinionum dumetis evagarentur. Doctrina affinitatum est theoria juxta optimam nominis significationem hîc expositam. Affinitas est phænomenon certe observatum, phænomenon chymicum, phænomenon ultimum, hoc est hominibus inexplicabile & principium. Ut tamen verum dicamus, qui dicit, quòd alcali & acidum coeant propter affinitatem, nihil magis profert quam qui diceret: Coeunt quia coeunt, quia coire amant. Sed veri physici sciunt, & jam satis ostendimus, quòd theoriæ admittendæ nihil sint nisi variæ phænomenorum traductiones & expressiones. In proposita quæstione mira veteres docuissent de

principiorum universalitatem attinet ; hæc qualitas est temporis filia , lente progreditur , ac magis exoptanda est quam expectanda in Chymia , Medicina , iisque artibus quarum objecta immensa & infinita sunt. Artes quibus objectum circumscriptum est ac minus late patet , facilius ad ipsam pervenient.

Proponamus nobis litterarum cultores , artis scribendi theoriam fundantes , Homerum , Virgilium , aliosque hujus notæ auctores manibus terunt , quidquid in legendo ipsos jucunde commovet calamo signant. Post alias & alias similes lucubrations , iter relegunt , hinc inde notata colligunt , inter se conferunt , neque sine quadam admiratione vident , adeo multiplicatas prima fronte sensationes ad paucas & principes quasdam sensationes reduci , quarum cæteræ repetitiones & velut accessiones sunt , aut quibus submittuntur ac famulantur. Codex in quo illa sensationum capita colligerentur , & qui illarum tabellam sisteret , litteraturæ theoriam præberet. Et eâ ipsâ viâ in litterarum renovatione artes progressæ

vaginis , spiculis , similibusque somniis. Nos , heu ! hæc dediscimus , & retro scientiæ limites abducimus.

sunt.

sunt. Præcessit eruditio, tunc satis erat selecta autorum loca colligere & memoriæ mandare, deinde comparationi & analyfi subiciebantur, tandem ætas castè, candidè, lepidè, nervosè scribendi successit.

Eâdem via insistere debent Medici qui artis perfectionem, a quâ longè distant, sectantur. Varia medicorum scripta simul considerata sunt, veluti quoddam cahos, ubi œconomix animalis phœnomena opinionibus, hypothefibus, systematibus, deliramentis, fomniis, nugis, promiscuè obruuntur. Ex illo confusarum rerum pelago eruanda sunt phœnomena illa. Quod opus unius hominis vires superat. Et nunquam nisi ex confociatis multorum laboribus expectandam. Societas autem illa (cujus felix aurora illufcescit) societas illa margaritas e sterquilinio eruens, non explicationem explicationi substitueret, sibi vero melius & unicè proponeret, primo phœnomena collatis autorum observationibus necnon propriis confirmare & augere, deinde ita inter se juxta naturalem ipsorum connexionis & subjectionis ordinem disponere, ut ex uno ad aliud, sine continuitatis solutione, gradatim ascenderetur ad prima illa phœnomena, conspicua simul

& inexplicabilia, homini principia donec novo aut meliori sensu donetur. Tandem ex ipsis phœnomenis principiis utiliora ex minus utilibus distingueret illaque praxi applicuaret.

At vero in coordinandis & concate-
nandis factis, ut ad superiora ascenda-
mus, maximè cavendum ne ipsis vim
inferamus, dum ipsis parendum est.
Mens humana convenientias, & con-
sensus amans sibimetipsi indulget, &
classes generaue condit, ubi natura
individua & soluta phœnomena pro-
ducit. Febris ardens, putrida, maligna
constantioribus & invariabilibus colori-
bus ubique depingitur, etsi in singulis
regionibus apud le Roy (y), in singulis
constitutionibus apud Sydenham & Jam.
Sims (z), summa & individualis sym-
ptomatum diversitas observetur. Isti pro-
pensione resistendum. Quod solutum est,
solutum offeratur, ubi catena cessat,
ubi annuli non concatenantur, incate-
nati producantur. In describendo la-
tissimo imperio, ubi regiones incognitæ
jacent, ibi vacua loca posteris linquan-

(y) Mémoires sur les fièvres aiguës.

(z) Sydenh. observ. circa morb. acut.
Observat. sur les malad. Epidemiques, tra-
duites de l'Anglois, par M. Jaubert.

tur. Talis erit necessario theoria medica nostri temporis. Catenam exhibebit hinc inde solutam, annulos multos incohærentes, tabellam geographicam numerosissimis locis intersectam. Miserum quidem! sed lubenter decipi, sed fallaces nugas instar utilis doctrinæ habere, sed sub scientiæ nomine errores consecrare, quam longè miserrimum! multo melius est pauca scire, quam scire dediscenda, vel omnino nescire. Pauca autem illa dummodo firmis innitantur principiis, constantioribus phœnomenis dico, erunt fundamenta, quibus subsequaturæ ætates inædificabunt. Hæc videtur fuisse Hippocratis mens in condendis suis aphorismis. Fatendum tamen quod non satis severè probata & ordinata fuere, hujus collectionis principia, cum plurima contra veritatem & coordinationem peccent; ita ut an ruinam, an apparatus summi ædificii in hoc opere possideamus, dubitandi sit locus.

Dissertationem collige. Pauca quæ Medici sciunt, phœnomena sunt quæ deinceps scient, phœnomena erunt, & theoria artis, genere ac naturâ experimentalis aut, si mavis, empirici, nihil erit nisi summa rerum observatarum fastigia & capita simpliciter & aphoristicè enarrata, nunc cohærentia, nunc sejuncta,

prout observatio plus minusve processerit.

Verum eo usque procedat observatio, ut fastigiata illa principia in unum corpus regulare coagmententur. Utilissimis, inconcussis, universalibus, ad casus omnes sufficientibus principiis gaudeat ars nostra. Aurea tabella in quâ fidei stilo hæc omnia exarabuntur, cibum optimi nutrimenti & exquisiti succi adultis Medicis offeret, iis dico, qui usu & studio efformati scientiæ virilitatem attigerunt. Delicatuli vero discipulorum ventriculi lacte nutriendi semper erunt. Validiori & spirituosiori illâ principiorum abstractorum doctrinâ enecarentur. Jam initiatis patentia & aperta hæc principia forent, initiandis sacra & clausa mysteria. Iis semper via observationum & historiarum calcanda erit, ut artis sanctuarium ingrediantur. Historia igitur philosophica & rationalis factorum medicalium, & quamdiu vera theoria languescet, & si quando firmior evadat, semper studii Medici caput erit, primusque magister; ut historia civilis est optimus ac primus magister morum: & utriusque generis historiographis maximè congruet, quod Horatius de Trojani belli scriptore ait:

*Qui, quid utile, quid non,
Plenius ac melius Chrysippo & Crantore dicit.*



DE

MORBIS ACUTIS.

MENSIS JULIUS.

2758.

LERISQUE, acuta laborantibus, circa septimum, quibusdam circa quartum, paucis circa, undecimum diem proruperunt vel milliaria, vel petechiæ, vel ambo genera simul; idque fere semper cum ægri levamine contigit. Etenim somnolentia, & capitis gravitas multum imminuebantur, respiratio, quæ prius erat celeris & gravis, reddebatur longe liberior, pulsus fortior & magis æqualis.

Si septimo die fuit perfecta exanthematum eruptio, tunc eodem die Symp-
Storck Ann. I. Tome I.

A

tomata omnia, ex hoc morbo dependentia, in melius mutata sunt; circa undecimum diem jam ceperunt exanthemata exsiccari, vel numero minui; circa decimum quartum evanuerunt penitus, & æger à periculo liber fuit.

Si vero septimo die exanthematum eruptio non fuit perfecta, tunc symptomata fere in eodem statu permanserunt, donec undecimo vel subinde nono die, facta eruptione, mitiora, reddita sunt.

His decimo quarto die exanthemata ceperunt minui, & decimo septimo facta est integra judicatio.

Raro ultra decimum septimum diem se se morbus extendit.

Quibus vero vel quarto vel septimo die pauca prodierunt exanthemata citra omnem symptomatum allevationem, quibusque in sequente die critico non plura supervenerunt, aut supervenientia brevi iterum disparuerunt; ii sudarunt continuo sudorem foetidum, mox frigus, mox calorem conquesti sunt, sitim vel intolerabilem, vel plane nullam habuerunt, caput fuit grave, oculi tristes, lingua glutinosa, humida, plumbei coloris, vires de die in diem minores, respiratio celeris, inæqualis cum tussicula

ficca, pulsus parvus, velox, inæqualis; facies mox rosea, mox palida, urina vel naturali paululum coloratior cum nubecula suspensa, vel naturalis, vel tenuis; nullum medicamentum sive externum, sive internum notabilem in melius mutationem effecit; unde circa undecimum, aut decimum quartum diem judicatio ad mortem facta est.

Ternos solummodo tales ægros hoc mense habui.

Febre continua simplici decumbentes fere nulla mala signa habuerunt, levem sitim, exiguum calorem, appetitum deletum, & leves capitis dolores conquerantur.

Quidam quarto, plurimi vero septimo die, orto sudore, & prodeunte urina crassa cum sedimento albo, crasso, a febre liberati sunt.

Rarus morbus undecimum aut decimum quartum diem adtigit. Nullus simplici febre continua hoc mense mortuus est.

Cura in omnibus acutis sequenti modo instituebatur: pulsus ægri dum naturali longe celeriores, fortiores, dures, vel & suppressi deprehendi, venam curavi, tundi, idque pro ratione circumstantiarum repetitis vicibus. Verum raro contigit occasio sæpius iterandæ venæ

4 *De Morbis acutis.*

sectionis; imo multis plane non secui, nam frequenti observatione didici, quod venæ sectio etiam unica facta in homine, cujus pulsus nec suppressus, nec naturali multo plenior, fortiorve fuit, vires dejecerit, quod supervenientibus exanthematibus medicamenta stimulantia, quibus alias opus non fuisset, debuerint adhiberi, quodque æger, superato morbo, ad vires recuperandas multo longiore tempore indiguerit.

Hæc observatio tamen minus valet, dum æger localem quamdam inflammationem habet, vel dum caput aut pulmo sanguine obruitur.

Facta vel omissa venæ sectione dum saburram ex ægri querelis in ventriculo judicavi, eam vomitorio ilico ejeci, nunquam tamen præter necessitatem sola regionis consuetudine adductus vomitorio ægrum divexavi.

Dum vidi vires ægri sufficientes, pulsum satis elevatum & fortem, tunc pro medicamento & potu ordinario copiosissimum decoctum rad. Scorzon. acetos. hordei crudi cum stib. diaph. non abl. aut nitro puro & oxymelle simplici tepide sumendum exhibui, simili modo pergendo die septimo, præcedente pectoris anxietate, frequenter apparuerunt

exanthemata , æger melius habuit , remisitque febris.

Quoniam sola natura tunc opus suum adeo bene peregit , eam aliis medicamentis turbare non licuit ; sed eadem vel simillima methodo ad finem usque continuandum fuit.

Hac ratione morbus exanthematicus simplex simplicissimis remediis a perito citra ullum negotium solo naturæ ductu feliciter curatur , ab imperito autem , qui malignum a non maligno haud novit distinguere , facile turbatur.

Ubi vero pulsus fuit debilis , & vires languidæ , tunc datum est , vel emulsum N. 8. vel Claret. N. 1. idque magna vel parva copia , prout vel ægri natura , vel symptomatum circumstantiæ postularunt. Camphora erat feminis magis amica , & utilis ; viris autem vinum.

Sopores , deliria , convulsiones sæpe bina , sæpe quatuor , aut quinque vesicantia exigebant , quæ allevando caput , pulsum liberiores reddendo , & sæpissime exanthemata expellendo egregios effectus præstiterunt.

Convulsis Camphora , prudenti dosi exhibita , maxime conduxit , non quidem semper promovendo exanthematum eruptionem (etenim non omnes , qui

ea usi sunt, exanthemata habuerunt) sed & virtute sua, qua vires erigit, atque irritatis nervis quietem conciliat.

Quibus noctes erant inquietæ & insomnes, ii vesperi unc. i. syrup. diacod. assumpserunt; majori vero dosi opus habebant ii, qui camphora utebantur. An camphora opii viribus resistit?

Multis acuta decumbentibus adfuit tussis molesta, frequens, unde in similibus ægris pectori erat ilico in principio prospiciendum; decocta emollientia, expectorantia cum Stib. Diaph. non abluto, & oxymell. simpl. aut subinde scillitico, hoc in statu plurimum præstiterunt, atque sputa copiosa & facilia effecerunt, quæ omni possibili modo promovenda erant; hoc enim neglecto tussis inanis ægri vires debilitavit, cursum morbi turbavit, & eruptionem exanthematum impedivit; si vero sputa manserunt mobilia, tunc cætera omnia symptomata, licet subinde pessima, minus periculosa facta sunt.

Lingua sicca aceto & melle sæpe abluetur.

Quibus vero methodus, hucusque descripta vel huic similis, non profuit, ii plerumque pro desperatis habiti sunt;

quoniam symptomata mere lethalia eos comitabantur.

Nihilominus dum magnæ in his ægris mutationes observatæ sunt, dum pulsus per aliquot tempus valde intensus, & fortis tandem remisit, & molis atque debilis factus est; dum horrores & rigores citra inflammationis suppurationisve signum cum insequente calore ægri extrema, & spinam dorsi frequenter perreperunt, dum sitis, diverso tempore multum aucta, denuo imminuta est, &c. Dumque hæc symptomata alternatim certis fere horis redierunt, & iterum evanuerunt, tunc mistura N. 16. omni hora ad unc. β. aut unc. i. assumpta sæpissime summo in periculo versantes ægros ex mortis faucibus eripuit. Etenim hæc mutationes brevi cessarunt, & ægrorum vires increverunt, &c.

Similes ægri famam medici multum sæpe ædere possunt; etenim per vices redeunt ad se, pulsus & reliqua signa (si fors respirationem & oculos exceperis) pro circumstantiis sat bona videntur, eaque sæpe durant per horam, & ultra, sæpe vero derepente in pejus mutantur; & æger qui ante pauca minuta sibi, & adstantibus spem dedit, subito fere moribundus anhelat: unde

si Medicus, in intervallo lucido præsens, ægro & adstantibus quid certi promittit, se fallit, & famæ detrimentum patitur.

Qui vero ægri citra similes manifestas mutationes in summa debilitate jacuerunt, & in quibus pulsus mollissimus, atque sudor continuus summam humorum dissolutionem, & in putridum propensionem designarunt, iis mistura N. 27. sæpe numero salutem adtulit.

Ex acuta convalescentes fere omnes surdastri fuerunt, verum sola natura, & dieta reficiente plerique curati sunt.

Quibus autem hæc auditus gravitas, restitutis sufficienter viribus, permansit, iis vesicans nuchæ est adpositum, atque, dum hoc cepit dolorem excitare, datum est ægro purgans, ut eodem tempore per hæc bina remedia revulsio à capite fieret; quo facto omnibus, quos novi auditus rediit.

Post morbum acutum rite curatum, paucos habui, qui recidivam passi sunt, & erant tantum ii, qui in diæta errorem commiserunt. Etenim omnes circa præcordia anxietatem, horrorem à cibis, leves vertigines, ructus amaros, aut putridos conquesti sunt.

Datum lenè vomitorium fere semper

Mensis Julius.

9

recidivam ex integro sustulit, aut saltem admodum mitem reddidit.

Urina ab initio morbi semper ruffa fuit cum nubecula innatante; morbo autem stante erat crassa, & densam ad fundum nubem exhibuit, morbo decrefcente color sensim in naturalem, dein in tenuem cum foetore mutabatur; raro sedimentum crassum, & grave observatum est.

Alvus immorigera enemate, aut suppositorio (si opus fuit) movebatur; sæpius vero exanthematibus aut bene prodeuntibus, aut rite prostantibus, dum neque hypochondriorum tensiones, neque ventris dolores gravantes, aut borborygmi advertiebantur, per binos ternosve dies relicta fuit.

Sudores nocturni post morbum acutum supervenientes diæta reficiente, & infuso N. 20. fugati sunt.

Qui, cessante jam per aliquot dies febre, non appetierunt, & os glutinosum, atque circa præcordia pondus conquesti sunt, iis data drach. i. rhei appetitum restituit, & omne malum amovit.

Pedum tumores post morbum vel sponte sua abierunt, vel leni frictione facile dispulsi sunt.

Inter primos nosocomii ægros mihi occurrit Juvenis 15 ann. qui toto corpore rigidus & inflexibilis fuit.

Adstantes narrabant : quod ante aliquot dies per omnes artus dolorem lancinantem sit conquestus , quodque post paucas horas citra causam vel sibi vel aliis cognitam totus rigidus evaserit , & quod tunc dolores cessarint.

Corpus ægri examinando inveni brachia & manus secundum trunci longitudinem extensas , rigidissimas , & trunco firmissime adpressas , crura & pedes eodem modo se habebant ; venter fuit tenuis , contractus , & lapidis instar durus , adtactu non dolens , spina dorsi rigidissima , collum immobile , maxilla inferior superiori pertinaciter adplicata , muscoli masseteres , & temporales , quasi vi fortissima agentes erant tumidi , & duri ; inter dentes incisivos effractus exiguum spatium relinquebatur , per quod pauca jusculi , aut medicamenti copia ingeri potuit.

Lingua tamen mansit volubilis , oculi vivi , mens non oppressa , respiratio satis bona.

Pulsus fuit æqualis , naturali non celerior , liber.

Conjicere igitur licuit vasa majora

sanguinea esse libera, & forsan in Lymphaticis esse humorum stagnationem, in nervis spasmus.

Quapropter spasmus solvendus, & stagnans in motum ducendum indicabatur.

Balneum emolliens, discutiens, & ejusmodi fomenta toti corpori continuo adplicata optime & citissime profuissent: verum nausocomii circumstantiæ simile tentamen non admiserunt.

De maxilla mobili reddenda cogitabatur primo, atque hunc in finem cataplasma ex stercore equino in cerevisia cocto calidum diligenter adplicatum est.

Per aperturam inter dentes incisivos præter tenuia alimenta mistura N. 12. cochleatim ingerebatur.

Bis de die spina dorsi inuncta, & perfricta est linimento ex ol. verbasci unc. ij. β. spirit. sal. ammon. dr. i. & alterno die humeris & toti spinæ dorsi cucurbitæ siccae adpositæ sunt.

Quarto die æger jam movit sat libere maxillam, solidiora momordit, deglutivit; reliqua vero in priori statu persistere.

Quinto die ingratum Cataplasmatidis odorem amplius ferre non potuit, atque ab ejus vaporibus tussim siccam defati-

gantem conquestus est ; unde id , maxilla jam satis mobili , amovi ; atque totum collum , musculos masseteres , temporales , & maxillæ articulationem priori linimento bis de die perfricari jussi.

Omni die facta est maxilla liberior , æger singulo bihorio unc. β. ex mist. N. 12. assumpsit , & præter juscula , ac alia tenuia alimenta serum lactis copiose hausit.

Intestina quotidie enemate ex solo oleo lini emolliebantur , unde dura fecum scybala educta sunt.

Octavo die æger jam movit manus , & brachia , intra paucos dies movit & pedes.

Intermissi tunc cucurbitas , etenim dolores magnos excitarunt , sed reliqua medicamenta continuari curavi.

Vigesimo quinto die auxilio famuli jam cepit ambulare.

Trigesimo die jam solus ambulavit.

Posthac solo fero lactis & diæta benenutrientem intra paucos dies pinguedinem , & vires integras recuperavit.



MENSIS AUGUSTUS.

1758.

SYMP TOMATA in morbis acutis occurrentia hoc mense erant prorsus eadem, quæ mense præcedente, numerus eorum, qui exanthematibus laborarunt, paulo minor fuit.

Paucissimi febre miliari decubuerunt, plures vero petechiis; erant autem petechiæ satis mites, & plerumque optimi coloris.

Emuls. N. 8. raro in usum venit, etenim in febre petechiali longe magis conduxit claret. N. 1.

Cæteroquin methodus curandi erat eadem, quæ mense Julio.

Per medium mensem Jun. per integrum Jul. & August. dum doctissimus Medicus Castrensis JOANN. KOLLMAN ægrotabat, mihi ILLUST. VAN SWIETEN nosocomii militaris, in leopoldina sui, curam confidit.

Nosocomium erat semper ægris plenissimum.

Inter alios morbos, militibus communes, plurimas petechias inveni, quæ

à medio Jul. usque ad finem August. maxime grassabantur, ita quidem, ut hoc tempore quingentos circiter sola febre petechiali decumbentes numeraverim.

Ex his ægris ultra duodecim non sunt mortui, fere nullus incidit in alium morbum; omnes convalescentes intra paucos dies vires integras recuperarunt.

Morbus ultra decimum septimum diem vix unquam duravit.

Multis symptomata satis mitia erant; complures vero periculosa symptomata comitabantur; ut sunt: pulsus inæqualis, sitis ingens, respirandi summa anxietas, sopor, delirium perpetuum, convulsiones, membrorum jactationes, &c.

Circa quartum morbi diem plerumque in pectore, collo, & cordis scrobiculo paucæ petechiæ apparuerunt, & septimo die, prægressa majori vel minori anxietate, per totum corpus, maxime autem in pectore eruperunt; & tunc signa mala vix non semper evanescere, vel saltem longe minus periculosa visa sunt.

Color petechiarum fuit in plurimis læte ruber; in paucis purpureus; lividus & subniger admodum raro.

Septimo die apparentes petechiæ immutatae perstiterunt usque ad undecimum, quo fiebant tenuiores, pallidae, & usque ad decimum quartum sensim disparuere.

Hoc die vel febris cessavit, vel adeo mitis facta est, ut febris nomen vix mereretur; circa decimum septimum diem ad naturalem rythmum vel naturali paulo tardiozem rediit pulsus.

Subinde quarto die paucae videbantur petechiæ, & neque septimo, neque undecimo numerosiores conspectæ sunt; aut quandoque undecimo die plures hinc inde prodierunt, sed brevi iterum disparuere.

His permanebant, imo augebantur subinde mala symptomata usque in decimum quartum diem, quo persæpe ortus est copiosus sudor; atque tunc citra exanthematum eruptionem febris imminuta fuit, & symptomata remiserunt. Raro hæc mutatio undecimo die accidit.

Si autem similibus ægris decimo quarto die sudor non fuit copiosus; sed sudoris loco, prægressa levi horripilatione, orta est pectoris oppressio, & anxietas, tunc petechiis supervenerunt copiosissima miliaria alba, & ægri

magnum levamen perceperunt; quibus vero prægressa anxietate non eruperunt miliaria, iis crassissima urina profluxit, aut hac non profluente lenis, & levans diarrhæa accessit.

Talibus in circumstantiis rarissime decimo septimo die febris abiit, sed plerumque duravit ad vigesimum, subinde ad vigesimum quartum diem.

Si respiratio non fuit nimium difficilis, anxia, & inæqualis, atque pulsus satis liber, nil unquam timendum erat.

Similes ægri, licet cæteroquin pessima symptomata habuerint, simplicissima methodo conservati sunt fere omnes.

Sub initium morbi conquesti sunt immanem capitis dolorem, qui tentatis omnibus vix potuit mitigari, donec apparuerunt exanthemata, & tunc sponte evanuit.

Cura circa hos ægros instituta fuit sequens:

Valde Plethoricis, inflammatione affectis, & pulsum durum habentibus pro ratione necessitatis sanguinem e vena misi. Si autem causæ venæ sectionem suadentes non fuerunt satis graves, tunc eam neglexi; quoniam denuo id observavi, quod mense Julio dictum est. Imo iis, qui plethora non admodum magna

laborarant, conduxit magis per decoc-
tum tamarindorum, cremorem tart.
atque alia antiphlogistica remedia al-
vum aliquoties movere, & ita pulsus
vim & velocitatem mitigare, quam
venæ sectione sanguinem detrahere.

Multi saburram in ventriculo gesse-
runt, unde iis vomitorium statim in
initio datum magnum levamen adtulit.

Quidam neque vomitorio, neque
purgante antiphlogistico, neque venæ
sectione opus habuerunt; quoniam eo-
rum pulsus ita moderatus, & ad mor-
bum ferendum adaptatus fuit, ut neque
debilitate, ægri vires prostratas, indi-
caverit, neque robore excefferit adeo,
ut quid in corpore destruere, aut mor-
bum turbare potuerit.

Pulsu igitur vel ex natura ægri ita
existente, vel arte ad tale moderamen
reducto, requirebatur remedium diluens,
putredini resistens, naturam in nulla
evacuatione turbans, & vires conservans.

Tale erat serum lactis vinosum N. 28.
nam solo hoc, tam pro potu ordinario,
quam medicamento largissime ingesto,
fere omnes curavi.

Milites id grate assumpserunt, neque
ullum inde incommodum deprehendi.

Ubi pulsus debilis stimulo indiguit,

auxi vini copiam, vel præter serum lactis emulsum Camphoratum exhibui.

Dum maculæ purpureæ, lividæ, & subnigræ signa putredinis manifestarunt, tunc addidi libris quatuor feri lactis vinosi, unc. iij. syrup. diacod. & drach. i. spirit. sulph. per camp. atque ægris omni hora unc. iij. aut iv. tepide hauriendas præbui.

Optato tunc effectu maculæ brevi alium colorem induerunt, debito tempore disparuere, & ægri symptomata sensim in melius iverunt.

Absque syrup. diacod. in fero lactis vinoso datus spiritus sulph. per camp. strangurias, aut diarrhæas debilitantes excitavit.

Sopor, delirium, convulsiones, vigiliæ, &c. Epispasticis, sinapismis, aut vesicantibus, & paregoricis ad debitum moderamen ducebantur.

In convulsionibus, quæ etiam subinde aderant petechiis bene prostantibus, vesicantia, & paregorica sine camphora nil effecerunt, sed semper debuit camphora præter alia medicamenta ad aliquod grana simul exhiberi; nihilominus etiam camphora sine paregoricis & vesicantibus debitum scopum non adtigit.

Quidam nullis fere malis symptoma-

tibus affecti tota nocte quietum somnum capiebant, alii autem vigilarunt; & his uncia una syrup. diacod. vesperi exhibita debitam quietem conciliavit.

Si ob vehementiam symptomatum uncia una syrup. diacod. vesperi nihil effecit, tunc hæc dosis omni sexta vel quinta hora iterata est.

Fuit unicus æger, cui syrupus diacod. ne minimum somnum, vel signum somni adtulit. Petechiæ, quarto die prodeuntes, erant optimi coloris, neque æger anxie respiravit, neque oculos rubros aut torvos habuit, sitis fuit mediocris, &c. Septimo die inter signa optima incepit canere, clamare, diversas historiolas instar hominis sanissimi enarrare; imo easdem sine hæsitatione accuratissime sæpius repetiit; ad rogata subinde apte, inepte subinde respondit, oblata omnia lubens assumpsit; verum noctu, diuque indefinenter cecinit, & clamavit; noctu in lecto manere noluit; pulsus fuit æqualis, non multum febrilis.

Omni quarta hora syrup. diacod. ad unciam integram exhibitus per duos & medium diem nullo modo mutavit ægrum; demum consideratis omnibus judicavi, has vigiliæ, & clamores a solo inordinato spirituum motu depen-

dere, unde major opii copia unica dosi exhibenda indicabatur

Remedium sequens :

R. aq. menth. unc. j.

Syrup. diacod. unc. β.

Laud. liq. sydenh. gutt. XL.

M.

unica dosi deglutitum, tandem clamores inhibuit.

Etenim post aliquot minuta ab assumpto hoc remedio voce languit æger, oculi erant minus vivi & semiclausi, atque paulo post reficiens somnus secutus est.

Post sex horas evigilans nil conquerebatur, & sibi omnino præsens præterita ignoravit. Post-hac sine ullo pægorico tranquillæ noctes habuit.

Decimo quarto die a morbo penitus liber fuit, & vires mox tantas recuperavit, ut intra paucos dies legionem suam adire potuerit.

Hicce æger præter serum lactis vinosum, quod potum, & medicamentum simul præbuit, nihil assumpsit.

Simplex igitur methodus feбри petechiali curandæ suffecit; etenim raro quis mortuus est, & plurimi facile, & cito periculoso ex morbo convaluerunt.

Mala , morbis supervenientia , pauca observata sunt.

Bini ægri a septimo ad decimum quartum morbi diem in continuo sopore, delirio, & sudore foetido decubuerunt, pulsum habentes debilem, & respirationem difficilem; petechiæ copiosæ, & optimi coloris toto in corpore videndæ erant; tandem parotides intumuerunt, quæ nullum levamen adferentes ægrorum vires magis dejecerunt; adplicata quæcunque juverunt nihil; demum hi tumores mole & duritie de repente aucti deglutitionem impediverunt, & ambos ægros intra tres dies suffocarunt.

Alius æger, in quo omnia signa, septimo die prodituras petechias, præfagiebant, septimo die malam crisin expertus est.

Nox hunc diem præcedens anxia fuit; mane caput vehementer doluit, dein subito intumuit nasus, & totus purpureus factus est; post paucas horas nasi color subniger apparuit, & manifesta gangrænæ signa imminuerunt.

Quoniam hic æger a principio morbi usque ad septimum diem nullum peculiare, aut periculofum symptoma habuit, solum serum lactis vinosum pro

potu & medicamento exhibitum est : instante autem Gangræna quotidie unc. j. β. cort. peruv. præter serum lactis assumpsit, & naso externe adplicata sunt linteamina Spiritu Salis acido, aqua rosarum diluto, madida.

Unde malo limites ponebantur, naso ultra semi pollicis longitudinem, ab apice incipiendo, naturalis color rediit, reliqua vero nasi pars ex subnigra læte rubra facta est.

Pulsus ægri fuit liber, vix febrilis, nullum cæteroquin aderat lethale symptoma.

His remediis ægrum ad undecimum diem in eodem statu inter spem & metum conservavi ; tunc autem delirare cepit, subito vires amisit, pulsum habuit inæqualem, exilem, intermittentem, faciem hippocraticam, & eodem die convulsus obiit.

An gangræna occupavit cerebrum ? an materies petechialis, quæ per totam corporis peripheriam in maculas debuisset dispergi, in caput est deposita ?

Alios ægros, qui mortui sunt, symptomata mala cum virium dejectione, pulsu debili, inæquali, & respiratione difficili vel ilico ab initio morbi, vel a quarto morbi die incipiendo comitaban-

tur, semperque ruerunt in pejus; per vices quidem hi ægri dormiverunt, sed somnus fuit inquietus, non reficiens, in somniis defatigans.

Dum vidi, quod serum lactis vinosum inter talia symptomata non sufficeret, alia ab autoribus commendata remedia exhibui.

Verum a nullo levamen, minus curationem obtinui.

Stimulantia, & alexipharmaca omnis generis (si similia vires debiles postulabant) nimium sudorem, & anxietatem excitando ægros magis debilitaverunt.

Acida mineralia saturatissima nec sistim mitigarunt.

Ipse cortex peruvianus, præter alia largiter exhibitus, profecit nihil.

Verum tales casus ad omnia rebelles rari erant.

Binis ægris ex febre petechiali convalescentibus, dum omnes actiones & vires bonæ videbantur, subito orti sunt abscessus: uni ad humerum dextrum, alteri ad ambo femora.

Fluctuatione percepta ilico pertundebantur; unde magna puris boni copia effluxit: aliquandiu hæc loca aperta,

& fluentia conservata sunt, & ægris pro medicamento ac potu datum est serum lactis, quod vires conservavit, & omne impurum, quod adhuc in sanguine hæsit, quacunque data via ejecit.

Fere omnes ex acuta convalescentes longe saniores, robustioresque sunt redditi post morbum, quam erant antea.

Paucis post acutam pedes tumuerunt, sed lenes frictiones aromaticæ tempore matutino adhibitæ, & unum alterumve purgans hos tumores brevi abstulerunt.

Qui convalescentes nullum in diæta errorem commiserunt, nunquam passi sunt recidivam.

Recidiva autem, ex mala diæta, vomitorio, aut purgante, aut diæta per triduum strictissima facili negotio curabatur.

Qui curati diutius in nosocomio morabantur, vires denuo amiserunt, pulsus iis lentus factus est, & facies pallida; tandem gingivæ, oris labia, totaque facies, imo subinde & manus, & pedes lento tumore inflabantur; post paucos dies maculæ latæ, lividæ, vere scorbuticæ

ſcorbuticæ hinc inde in corpore apparuerunt, & gingivæ, ſanguinem fundentes, foetidum odorem ſparſere.

Sub initium ſolum ſerum lactis vinolum, & Medicamentum N°. 5. aliquoties pro rerum circumſtantiis abſumptum, atque motus Corporis in aëre libero curam omnem abſolverunt.

Dum vero maculæ lividæ, & oris foetor putredinem ſanguini inductam manifeſtarunt, tunc ſeri lactis libris tribus admixta eſt dr. β. ſpirit. ſulph. per camp. atque hac ratione largiter potandum præbebatur præter ſequens remedium.

R. ſal polychr. dr. j.

Conſerv. naſt. aq.

—— Cochlear. aa. unc. ij.

Spirit. ſulph. per camp. dr. j.

M.

S. ſumat æger omni hora parvum cochlear.

Gingivæ melle roſarum, mixto cum ſpiritu ſalis acido, ſæpius illiniebantur: os ſero lactis vinoſo ſpiritu ſulphur: acidulo reddito frequenter elutum eſt.

Hac methodo aliquandiu continuando, & corpus in liberiore aëre movendo, atque dato omni quarto, quintove die purgante plurimi ſanati ſunt.

Storck Ann. I. Tome I.

B

Qui autem vitæ militaris pertæsi, & pusillanimes lecto continuo inhæserunt, ii tentatis omnibus semper in pejus ruabant, sensim toto corpore intumuerunt, hinc inde ortæ sunt plagæ latissimæ, purpureæ, aut lividæ, tandem nigræ & foetido ichore manantes; ex ore & naribus sanguis corruptus, semi-putridus effluxit, nil fere amplius potuere deglutire, hinc semi-putridi in foetidissima sua atmosphæra immobiles jacebant, nec ab aliis citra vitæ periculum potuerant moveri; ubicunque vel leviter ad tacti sunt, ibi epidermis rupta fudit liquamen foetidum.

Hoc in statu miserrimi hi ægri sæpe per tres, per quinque aut plures dies semi-cadaverosi anhelabant, tandem orta putridissima diarrhæa, intra paucas horas exspirarunt animam.

Similia cadavera brevi post mortem terræ mandabantur.

Scabies post morbum acutum superveniens plerumque solo remedio N^o. 5. & fero lactis curata est. Si tamen huic remedio non integre cessit, tunc balneum badense maxime profuit.



MENSIS SEPTEMBER.

1758.

ACUTA decumbentes fere omnes vel miliari febre, vel petechiali laborarunt.

Plerisque 14. aut 17. die febris valedixit.

Simplicissima curandi methodus erat & hoc mense sufficiens.

Fuerunt tamen binæ fœminæ, quæ erumpentibus septimo die numerosissimis petechiis nullum levamen perceperunt, & ultra viginti dies manserunt debiles, somnolentæ, delirantes; febris fuit mediocris, & petechiæ, optimi coloris, steterunt toto hoc tempore immutatæ.

Vesicantia, licet bene fuerint operata, nil mutarunt.

Emul. N°. 8. & claret. N°. 1. alternatim exhibita morbum non turbarunt, & ægrarum vires sat bono in statu conservarunt.

Camphoræ dosis aucta, vel alia medicamenta magis stimulantia tentata, auxerunt delirium, anxietatem, & sitim, &c.

Unde ratio jussit ea continuare, quæ

naturam ad Morbum ferendum aptam reddiderunt, & conservarunt.

Hæ foeminæ urinam, & fœces inscie dimiserunt; sed respirarunt citra magnam difficultatem, & continua, æquali, leni transpiratione gaudebant; somnus (quamvis paregorico vespertino semper productus fuit) erat quietus, reficiens; & pulsus sat liber, non multum febrilis, nec nimium debilis, nec mollis; unde hæc spem foverunt.

Tandem petechiæ, boni semper coloris, vigesimo ab eruptione die, sensim ceperunt evanescere, cessavit delirium, intra tres dies febris tota disparuit, rediit appetitus, & absque notabili evacuatione critica ambabus his foeminis intra breve tempus prior sanitas restituta est.

Medicamenta igitur præter rationem non sunt mutanda; neque natura absque ægri detrimento sibi vim inferri patitur.

Id hoc mense peculiare observatum est, quod multis, febre exanthematica decumbentibus, febris quotidiana intermittens simul juncta fuerit, quæ morbum, & curationem turbavit.

Similis febris intermittens ilico cortice peruvino suffocanda erat, secus ægrorum vires adeo debilitavit, ut tales ægri, redeunte sæpius paroxysmo, tan-

dem occubuerint, qui morbum acutum solum facili negotio superassent.

Fugata hac febre morbus exanthematicus plerumque valde mitis fuit.

Dum magna cardialgia, pectoris angustia, renum ingentes dolores cum urinæ retentione, aut somnus profundus similes paroxysmos comitabatur, tunc tertius paroxysmus nunquam erat expectandus, is enim vel ægrum occidit, vel ejus vires adeo prostravit, ut dein cortex nil amplius effecerit. Tales ægri plerumque eo tempore, quo quartus paroxysmus accedere debuisset, in synopen delapsi sunt, & obierunt, aut inciderunt in delirium, ex quo non amplius redivere.

Præterea hoc mense singultus ante exanthematum eruptionem circa septimum morbi diem frequenter observatus est, verum post eruptionem cessavit sponte.

Unicus æger, toto corpore numerosissimis petechiis oblitus, undecimo morbi die singultire cepit; singultus erat frequens, neque ullo remedio sisti potuit; unde morbi periculum auxit, & ægri vires imminuendo vix non omnem vitæ spem abstulit. Verum decimo quarto morbi die, orta pectoris anxie-

tate, petechiis copiosissima miliaria alba cum magno ægri levamine supervenerunt, & cessavit singultus.

Undecimo aut decimo quarto die disparentibus exanthematibus haud raro levis diarrhæa subsecuta est, qua ægri perfecte judicati sunt.

Quidam citra errorem in diætâ commissum hoc mense recidivam passi sunt.

Febris ex recidiva semper ad 20. 24. aut 30. diem protracta fuit.

Fœmina 18. ann., ex febre miliaria convalescens, sæpius per diem toto corpore misere convulsa est; cessante convulsione remanserunt enormes inguinum, lumborum, & ossis sacri dolores.

Ægra hæcce menses suos adhuc nunquam habuit; unde habitis instantium mensium signis, pilulæ sequentes præscribebantur.

℞. gummi galb. dr. j.

Camph.

Castor. aa. dr. β.

Aloës lot. gr. XX.

Bals. peruv. q. S.

M. f. pil. gr. IV.

S. sumat ter de die duas pil., superbibat infus. ruth. & vesperi infideat per horam balneo pedum.

Altero die convulsiones jam erant

minus violentæ, quarto die prodiit fluxus menstruus, & foemina sana fuit.

Morbi inflammatorii hoc mense in nosocomio non sunt observati; unicus æger hepatitide & levi ictero laboravit.

Hypochriondum dextrum mane, & vesperi linimento ex ol. verbasc. unc. ij. camphr. gr. XV. probe perfrictum, dein cataplasmate emolliente continuo fectum est.

Reliqua cura fuit antiphlogistica.

Sub initium quarti diei ortus est horror, & dolor ingens in Lumbis, & osse sacro, & paulo post hæmorrhoides intumuerunt; unde dolor in hypochondrio dextro penitus evanuit, & febris facta est longe mitior.

Eodem die urina crassa crassum & subflavum sedimentum deposuit; septimo die urina fere naturalis esse cepit, & febris cessavit.

Solus ventriculus posthac aliquantulum languit, verum, data unica drachma rhei, appetitus, & vires redierunt.





MENSIS OCTOBER.

1758.

PLURES simplici febre acuta, quam miliari, aut petechiali decubuerunt.

Symptomata fuerunt mitia, & cura antiphlogistica in plerisque suffecit; stimulantibus raro opus erat.

In binis solummodo foeminis insoliti tendinum subsultus per totum corpus ilico ab initio morbi observabantur.

Reliqua symptomata simillima erant iis, quæ proditura exanthemata præfagebant; etenim oculi erant turbidi, facies rubra, respiratio difficilis, inæqualis cum tussicula sicca, & rara, præcordia erant anxia, caput & lumbi vehementi dolore vexabantur, &c.

Hi tendinum subsultus ægras statim in morbi principio debilitarunt, neque ullo remedio nervino, Camphorato, aut opiato, aut cortice peruviano his juncto, aut vesicantibus, &c. ad moderamen redigi potuere.

Pulsus fuit inæqualis, debilis, multum febrilis, lingua humida, glutine fusco obducta, sitis magna, mens subinde præsens, subinde turbata.

Tendinum subsultus, eadem vehementia semper durantes, demebant omnem somnum & vires, atque morbum lethalem effecerunt.

Remedia alexipharmaca excitarunt sudorem debilitantem, & majora deliria; lenia stimulantia ægras non mutant; sola diluentia, refrigerantia frequentes leipothymias produxere.

Unde una ex his ægris sub initium quarti diei inter tendinum subsultus, & convulsiones, apparentibus paucis petechiis, exspiravit. Altera quarto die copiosas petechias habuit absque ullo levamine, & sub finem diei sexti, existentibus adhuc iisdem symptomatibus, orto horrore obiit.

Omnes ex febre acuta convalescentes brevi tempore vires priores recuperarunt, exceptis tribus foeminis, quæ per integrum fere mensem languebant, nihil omnino præter debilitatem conquerentes, pulsus iis erat æqualis, nullo modo febrilis, appetitus bonus, alvus quotidie prodiit naturalis, neque ab assumptis gravamen aut pondus perceperunt, vesperi autem absque febre paulisper delirarunt, somnus insequens fuit quietus, longus.

Nutrientibus, & lenissime stimulan-

tibus, & potu feri lactis, aut pro libitu; ipsius lactis recentis binæ ex his foeminis conservatæ sunt, atque post longam moram vires priores iterum obtinuerunt.

Tertia vero neque ex his, neque ex sola cura lactea, neque ex roborantibus, &c. ullum levamen percepit; stimulantia paululum fortiora nocuerunt; cortex peruvianus, quacunque forma datus, nauseas & vomitus excitavit; hinc tota emaciata accedente diarrhæa fato cessit.

Cadaver apertum nullum notabile vitium exhibuit, nisi, quod omnia viscera, & partes carnosæ pallidæ, & albæ fuerint. An peculiaris quædam malignitas in his ægris latuit? an ea subtilissimis nervis firmiter impacta hæsit? an in tertia ægra vasa quædam subtilissima destruxit adeo, ut nutritio fieri non potuerit?

Omnes qui post morbum acutum gravem auditum habuere, recuperatis viribus absque remedio curati sunt.

Conserva N^o. 7. tempore intercalari absumpta febrem intermittentem acutæ junctam optime suppressit; ne tamen a levi quacunque causa accedente denuo rediret, jussi, ut præter alia remedia, morbo acuto convenientia, subinde

parvum cochleare hujus conservæ ægris ingereretur.

Hoc mense Tusses glutinosæ febres exanthematicas frequenter comitabantur, unde decocta expectorantia, quibus addebatur syrup. s. rad. aper. vel oxymel simplex, aut scillit. stib. diaph. non abl. &c. alternatim cum stimulantibus (dum iis opus fuit) exhiberi debuerunt.

Dum vero stimulantia ad vires erigendas, aut ad expellenda exanthemata non requirebantur, tunc hæc decocta expectorantia toti morbo curando suffecerunt.

Fœmina, tussi molesta a multis annis jam divexata, tandem febre acutaprehenditur. Symptomata febris acutæ erant admodum mitia, vires bonæ, pulsus liber, sputa copiosa, facilia; hinc remedia expectorantia, diluentia omni indicationi satisfacere videbantur.

Sub finem sexti diei absque ullo assumpto remedio alexipharmaco apparent in pectore miliaria alba; ægra fit anxiosa, sputum difficile. Septimo die numerosissima erumpunt miliaria, ægra non levatur, supervenit sudor copiosus, debilitans, sistuntur sputa.

Vesicantia, & remedia fortissime expectorantia nihil effecerunt.

Unde orta est summa anxietas, & ægra sublimè respiravit, pulsus fuit debilissimus & inæqualis; tandem subsecutus est sopor, delirium, convulsio, & nono die mors.

Miliaria copiosissima semper, & optime elevata erant; sed sudor, præterea continuus, erat adeo largus, ut totus lectus inde maduerit. An natura vires subito nimias ad expellenda exanthemata impendit, atque hac ratione pulmoni vires ademit, sputa inspissavit?

Error nullus in sex rebus non naturalibus est commissus.



MENSIS NOVEMBER.

1758.

PAUCISSIMI ægri exanthemata habebant febris acuta putrida multos detinuit.

Symptomata fuerunt mitia, & maxime communia.

Quinque fœminas ex febre putrida convalescentes scorbutus prehendit: facies, pedes, & manus intumuerunt;

dein labia oris & gingivæ pessimo cum fœtore exulceratæ sunt.

Quatuor ex his ægris methodo, post-hac de scorbuto enarranda, integre curatæ sunt. Quinta vero non ita felix fuit; nam abeunte scorbuto abscessus ingens femur dextrum occupavit; & ægra anxie respirare, frequenter tussire, & copiosam purulentam materiem sputis rejicere cepit. Abscessus ad femur apertus ingentem puris tenuis copiam exhibuit. Aperto abscessu ægra vires amisit, sputa minus facile egressit; tandem ad femur accessit gangræna, & ægra mortua est. Cortex peruvianus, licet quotidie ad unicum j. aut j. β. præter alia remedia fuerit exhibitus, gangrænam non potuit impedire.

Per multi hoc mense pleuritide decubuerunt.

Venæ sectionibus, pro necessitate repetitis, remediis antiphlogisticis, decoctis emollientibus, quibus mel, vel oxymel simpl. vel scilliticum &c. nit. pur. stib. diaph. non abl. &c. addebantur, & cataplasmatibus, loco dolenti continuo adplicatis, plerumque cura omnis absoluta est.

Si tussis sicca in initio morbi nimis molesta ægros defatigavit, tunc syrupo

diacod. cochleatim exhibito mitigari debuit, non vero suppressi.

Si dolor punctorius, factis necessariis venæ sectionibus, & pulsu moderate febrili existente, atque alvo libera, non remisit, tunc nulla diei habita ratione vesicans, æque latum ac plago dolens, appositum dolores mox sedavit.

Si dolore punctorio unum locum relinqueret, & occupante alium, aut in eodem loco incrementum febris iterum major facta est, tunc denuo cura venæ sectionibus, & remediis antiphlogisticis &c. inchoanda fuit.

Plurimi sputis judicati sunt, pauci alvo.

Nulli pleuriticorum post pleuritidem alius morbus supervenit. Nullus ex pleuritide hoc mense mortuus est.

Si a tussi molesta noctes turbatæ fuerunt, tunc vesperi datus haustus ex ol: lini unc. iij. laud. pur. gr. j. β. tussim sedando somnum conciliavit, & sputa matutino tempore facilius & largius prodire fecit.





MENSIS DECEMBER.

1758.

FEBRES petechiales & miliares erant frequentiores quam mense præcedenti.

Mortalitas non fuit magna, licet symptomata fuerint sat mala.

Vix non omnes ægri medicamentis stimulantibus erigi debebant, quoniam eorum pulsus, & vires debiles deprehensæ sunt.

Stupidi, profunde soporosi, & delirantes per plures dies plerique jacebant: lingua iis erat sicca, pulsus debilis, sed æqualis, aliis respiratio difficilis, aliis facilis; sitis omnibus magna.

Quidam alvum immorigeram habuerunt, quidam leni diarrhæa non debilitante jam ab initio morbi vexati sunt.

Diarrhæa talis non debilitans sibi relinquebatur; alvus immorigera, si nulli borborygmi, ventris dolores, hypochondriorum tensiones, aut deponendi conatus observati sunt, nullo medicamento irritata est, etenim ipsa natura sine ulla turbatione se semper juvit.

Convulsiones, & tendinum subsultus rarissime conspiciebantur.

Iis, qui febre miliari decubuere, emuls. N^o. 8. aut mist. N^o. 10. maxime profuit: claret, N^o. 1. vero iis, qui febrem petechialem habuerunt.

Qui non erant soporosi, omni vespera unc. j. syrupi diacod. optimo cum effectu assumpserunt.

Soporosi, & pectore anxii pro ratione circumstantiarum vel binis, vel quaternis, vel pluribus vesicantibus excitari debuerunt, & ex his maxima salutis pars pependit.

Surgentes ex morbo acuto plerique vires suas brevi recuperarunt.

Ii vero, qui ob luem veneream mercurio antehac usi sunt, non tantum durante febre acuta pejus se se habuerunt, quam alii eodem morbo affecti, sed & convalescentes diu mansuerunt debiles, & languidi, & præterea pectoris siccitatem, anhelosam respirationem, membrorum tremorem sunt conquesti.

Pulsus iis post morbum mansit debilis, & omni vespera levis horripilatio, & lenis febricula observata est.

Sola cura lactea, & decoctis emollientibus largiter haustis sensim caro & vires his ægris redierunt; & si tunc

adhuc quid luosi superfuit, remedia necessaria tuto exhiberi potuerunt.

In initio morbi acuti, si similibus ægris sanguis fuit e vena missus, erat is rutilus, & mansit penitus solutus; atque sanguine alius ægri longe citius putrescere, & foetere cœpit.

Claret N^o. 1. & alia remedia probe stimulantia, quibus magna spiritus sulphuris per camp. copia admista est, his ægris maximum levamen adtulerunt.

Sola stimulantia sine acido minerali sudorem copiosum, foetidum, & defatigantem protrudere, & ægros in pessimum periculum conjecerunt.

Similium ægrorum exanthemata erant plerumque petechiæ profunde rubræ; miliaria numquam sola in his ægris observata sunt, raro petechiis intermixta conspiciebantur.

Unicus ex his venereis: etenim spatio quatuordecim dierum sex tales ægros acuta affectos habui, mortuus est febre petechiali.

Et erat is jam in principio morbi soporosus, & statim deliravit, pulsum habuit inæqualem, parvum, oculos tristes, respirationem difficilem; petechiæ debito tempore comparuerunt, sed earum color fuit lividus, subniger.

Vesicantia paucum serum adtraxerunt, et, ablata pellicula, plaga ilico profunde exulcerata est.

Circa mortem tubercula in facie prodierunt, magnum pisum figura & mole æquantia, coloris fere nigri; & omnia citissime in pessimam putredinem abi-vere.

Remedia quæcumque in hoc ægro tentata, ne quidem mali progressum impedire, multo minus malum auferre potuerunt.

Alvum & urinam semper inscie dimisit; alvus fuit subviridis, & admodum foetida, verum neque copiosa, nec frequens.

Mirum: quod tanta acrimonia in hoc corpore latens dysenteriam non produxerit.

Quidam ægri circa tempus eruptionis exanthematum singultu, quidam inani vomendi conatu vexati sunt.

Si sola irritatio hæc symptomata produxit, tunc lenibus narcoticis facile compesci potuerunt.

Si autem vomitus a materie in ventriculo hærente excitatus fuit, tunc aqua tepida mellita, aut leni ypecacuanhæ dosi promoveri debuit, quod semper cum maximo ægrorum levamine contigit.

Dum ab initio morbi, hærente in ventriculo magna vel parva saburra, vomitorium non fuit neglectum, tunc similes vomitus nunquam ægris supervererunt.

Negligi tamen subinde debuit in foeminis, quæ circa graviditatem suspectæ habebantur.

Verum tales post morbum diu manserunt debiles, nec appetitus illis rediit; unde rheo una alterave vice purgandæ erant.

Quibus, morbo fugato, languit ventriculus, ii fere semper habuerunt urinas tenues, foetidæ, subinde turbidas, & flocculentas, ab assumptis pondus circa ventriculum conquesti sunt.

Et his pulvis N^o. 21. appetitum & vires restituit.

Ex mala diæta multi recidivam passi sunt.

Ex recidiva denuo convalescentes diu languerunt.

Binis ægris ex acuta optime convalescentibus, & nosocomio jam fere valedicturis ad femur dextrum orti sunt dolores ingentes, sine tumore manifesto, sine febre & siti.

Fomenta externa; diluentia, & resolventia medicamenta interne exhibita,

atque interposita purgantia vix dolorem mitigarunt ; & si dolor per diem paululum remisit , vesperi denuo exacerbatum est.

Hi ægri a nullo medicamento levamen percipientes sensim contabuerunt , & febre hectica atque sudore nocturno consumpti sunt.

Femur in utroque erat cariosum. An imperfecta in his ægris crisis facta est ? licet petechiæ pulchre apparuerint , nullumque signum id manifestaverit. An materies ex morbo superstes restauratis viribus ad has partes fuit deposita ?

Fœmina ictero ab aliquot diebus laborans corripitur horripilationibus , dolore capitis, siti magna ; pulsus fit celer, plenus , respiratio difficilis.

Pulsus plenus , & continuo febrilis venæ sectionem , & remedia antiphlogistica , putredini resistentia indicavit.

Urina fuit ex flavo ruffa, chartam tingens. Circa quartum diem ægra fuit anxiosa , debilis , & hinc inde pauca miliaria apparuerunt.

Suris ilico apponebantur vesicantia , & præter potum ordinarium , qui erat serum lactis, exhibebatur alternis vicibus vel claret. N^o. 1. vel emulsum N^o. 8.

noctes diacodio tranquillæ factæ sunt.

Septimo die copiosissima miliaria alba proruperunt, vires tamen mansuerunt debiles, respiratio fuit liberior; verum eodem die accessit delirium, & capitis gravitas.

Nuchæ igitur vesicans appositum est, & medicamenta priora continuata sunt.

Undecimo die adhuc deliravit, jactavit membra, fuit debilis, anxia; sitiivit multum, subdormivit oculis semiclausis, urina fuit ex fusco ruffa, chartam profunde tingens, nullum sedimentum ponens; fœces albæ.

Sub finem diei undecimi subsequetur sudor copiosus, disparuerunt fere omnia miliaria, & ægra paulo post melius habuit.

Sudor usque ad decimum quartum diem subinde admodum lenis, subinde magnus fuit, ægram autem nunquam defatigavit.

Decimo quarto die mens facta est ferenior, febris mitior.

Decimo septimo die febris desiit; & vires sensim auctæ sunt.

Vigesimo quarto die actiones fere omnes erant bonæ, urina tamen ex flavo fusca mansit; fœces fuerunt adhuc albæ, & cutis tota icterico colore profunde tincta.

Sequente die ad icterum curandum exhibebatur mist. N^o. 11., qua bis absumpta icterus disparuit, & ægra fuit sana.

Exanthemata miliaria in hac ægra observata, æque alba fuerunt ac in aliis ægris, licet cutis per universum corpus profunde flavo colore tincta apparuerit.



MENSIS JANUARIUS.

1759.

PERIPNEUMONIA multi decumbebant, symptomata fuerunt mitia.

Sub initium omnes conquerebantur horripilationes, calores alternantes, dolorem capitis, spinæ dorsi, subinde dolorem per omnia membra lancinantem, & sitim magnam.

Tussis plerumque fuit sicca; respiratio magis, vel minus læsa; pulsus multum febrilis, subdurus. Febris, sitis, tussis, dolor capitis, respiratio læsa, & reliqua symptomata fere semper usque in tertium diem immutata perstiterunt, & tunc omnia reddebantur mitiora, sputumque glutinosum prodire cepit.

Quarto die sputa fiebant copiosa, cocta, febris mitis, sitis mediocris, respiratio longe liberior, & urina, quæ sub initium fuit multum colorata, ruffa, & in medio nubeculam gessit, comparuit turbida & mox copiosum, crassum, ruffum, vel albidum sedimentum deposuit.

Alvus aut enemate, aut natura promota est.

Circa septimum diem plerumque à febre judicati sunt omnes; sputa dein adhuc per aliquot dies citra difficultatem cocta prodiverunt.

A septimo die rediit appetitus, redierunt vires.

Solis decoctis emollientibus, expectorantibus, quibus additum est oxymel simpl. aut scillit. stib. diaph. non abl. &c. tepide haustis, integra cura absoluta fuit.

Ob dolorem capitis epispastica plantis pedum applicata sunt.

Venæ sectio unica fere in omnibus suffecit; imo quibus ab initio sputa fuerunt facilia, & copiosa iis vena non est aperta.

Pulmo a tussi sicca nimium agiratus diacodio pacari debuit, quo factum est, ut sputa citius cocta, & copiosa prodierint.

Si tamen procedentibus sputis dolor capitis, spinæ dorsi & membrorum in quartum diem permanfit; si pulsus fuit suppressus & inæqualis, respiratio celeris citra inflammationis signum, pectus anxium; si oculi fuerunt tristes, vel obscuri, aut torvi, sitis magna, urina ruffa, tunc suspicari licuit, latere exanthemata.

Et similibus ægris plerumque quarto die prodierant vel copiosissimæ petechiæ, vel miliaria alba, aut rubra, aut maculæ morbilis haud absimiles.

Hæc si ita contingerunt, & si sputa non sunt suppressa, sique ægri vires suas conservarunt, tunc eadem die omnia symptomata remiserunt, & urina crassum sedimentum posuit.

Tales ægri solo decocto hord. alth. decoct. pectoral. vel infus. veron. heder. terr. fl. verbasc. rhæad. cum melle, vel oxymell. simpl. addito nit. pur. stib. diaph. non abl. sal polychr. &c. percurari potuerunt.

Dum vero vires languerunt, tunc præter expectorantia decocta omni bi-horio cochlear unum ex mistura N°. 14. exhiberi debuit.

Vesicantibus raro opus fuit; neque ullus est mortuus, cui quarto die exanthemata,

themata , qualiacunque , rite & cum levamine prodierunt.

Dum vero quarto die vel nulla vel paucissima exanthemata apparuerunt , tunc febris cum reliquis symptomatibus mansit æque intensa , vel omnia ruerunt in pejus.

Quinto & sexto die plerumque stetit morbus.

Circa diem septimum ortus est rigor , anxietas , dein supervenit sudor copiosus ; atque si tunc comparuerunt numerosa boni coloris , aut rite elevata exanthemata , æger plerumque magnum levamen percepit.

Verum si circa septimum diem orto rigore , & anxietate , atque superveniente sudore , aut notabili transpiratione pauca tantum exanthemata conspecta sunt , æger vix levatus est.

Quibus autem , his circa septimum diem prægressis , nec ortus est sudor , neque eruperunt exanthemata , neque sputa cocta puriformia , copiosa , facilia prodierunt , aut quibus pauca quarto die apparentia exanthemata septimo die derepente recesserunt cum sputorum , & pectoris oppressione , ii facti sunt soporosi , aphoni , sitis vel est penitus deleta , vel aucta immaniter ; lingua ex

fusco viridi glutine obducta & tremula erat, pulsus omnes suas vires amisit, & comparuit mollis, exilis, & maxime inæqualis, atque respiratio anhelosa, laboriosa, densa, subinde rara; unde mors certo certius prædici potuit. Octavo die eadem symptomata videbantur, quæ die septimo.

Nono die frequentes coloris & caloris atque omnium symptomatum excepto sopore, qui idem semper mansit, jam in pejus mutationes observatæ sunt.

Decimus dies fuit nono persimilis in aliquibus ægris, in aliquibus vero sub initium decimi diei exanthemata copiosa visa sunt cum levamine omnium symptomatum excepto pulsu, qui molliissimus, undulosus, exilis, atque multum inæqualis semper exstitit, quique medicum in mortis prælagio confirmavit, licet reliqua omnia ægro & adstantibus spem aliquam sponderint.

Sub finem diei decimi, vel subinde circa medietatem hujus diei denuo disparuerunt exanthemata, & paucae solummodo maculæ purpureæ, aut lividæ conspiciendæ erant. Sopor factus est gravior, respiratio sublimis, pulsus longe minor, pejor; supervenit sudor viscidus, defatigans, extrema jam frigi-

da, jam urentia deprehensa sunt, facies collapsa, oculi concavi, fordidi, lachrymantes, apex nasi, & lobuli aurium pallidi, frigidi, labia & genæ mox purpureæ, lividæ, mox pallidæ.

Tandem summa est orta anxietas, jactatio membrorum, respiratio minima, pulsus fere evanuit, demum similes ægri fœces foetidissimas, & urinam citra ullum signum dimiserunt, mox dein venter intumuit, & circa undecimum diem subsecuta est mors.

Rarissime inter has vicissitudines ægri finem diei decimi tertii, aut initium decimi quarti adtigere.

Nullum novi, qui vitam ultra protulit. Epispastica, & vesicantia, quamvis bene operata sunt, nil tamen ægros similes juverunt, vel si inter ipsam operationem aliquot levamen adtulerunt, illud mox iterum evanuit.

Fortia alexipharmaca excitarunt delirium ferox, immanem sitim, magnam pectoris anxietatem, sudorem foetidum, nec erexerunt pulsum, sed auxerunt periculum.

Lenia camphorata, vinosa, infusa lenia aromatica addito multo spiritu sulph. per camp. & interposita paregorica, quæ motus nimios, & inordina-

tos compescebant, maxime prodesse videbantur; imo similia remedia magnum sæpe levamen ægris dedere, verum hoc non diu duravit.

Acetum quadrupla copia aquæ dilutum, ad gratum saporem syrup. diacod. edulcoratum, & largiter potatum ægris quoque gratum & utile fuit.

Cortex Peruvianus jam a tertio aut quarto morbi die, dum nimirum ex signis præsentibus adeo mala symptomata superventura conjiciebantur, quotidie ad unciam unam, & ultra, diversa in forma datus, hæc pericula quoque superare non valuit.

Similes ægri per totum morbi decursum quotidie bis, ter, aut quater alvum ex fusco viridem, foetidam, & incoctam inscie dimiserunt.

Aliud morbi genus hoc mense observatum est, in quo ægri nec validam febrem, nec magnam sitim, neque appetitum penitus deletum habuerunt; sed vires a primo statim die multum languebant, & caput temulentum ac grave fuit. Urina coloris fere naturalis tenuem nubeculam in medio gessit; alvus quotidie aliquoties reddita liquida & flava fuit, & valde foetuit.

Tales ægri non credentes sibi multum

deficere volebant lecto inhærere; verum vires debiles situm erectum non admiserunt.

A primo usque ad septimum diem morbus in eo statu permanfit, tandem septimo die febris major orta est, caput, quod prius temulentum & grave fuit, acute doluit, post aliquot horas accessit profundus sopor, quo oppressi nec ad rogata responderunt, nec oblata debito modo assumpserunt.

Octavo, nono, & decimo morbi die per vices jam in hac jam, in illa corporis parte pauca miliaria alba, vel quædam petechiæ apparuerunt, & intra paucas horas disparuerunt iterum.

Sub finem decimi diei febris subito remisit, pulsus intermisit, extrema facta sunt frigida, & æger undecimo die expiravit.

Rarissime paulo ante mortem his ægris mens rediit.

In hoc morbo statim in principio, licet symptomata non adeo periculosa fuerint visa, remediis internis, externisque succurrendum fuit.

Emulsum cum pauca camphora, & lenissima infusa rad. serpent., contrajerv., angel. &c. optime conservarunt ægros, si externa non fuerunt neglecta.

Etenim jam quarto die nuchæ veficans, & plantis pedum acria epispastica debuerunt adponi, quo facto temulentia est multum imminuta, & septimo die, sine ulla fere anxietate, vel miliaria alba, vel petechiæ prodierunt, vel ambo simul.

Atque ægri tunc satis commode habuerunt, & solis infusis suprâ notatis facillime sanati sunt.

In principio morbi fortia stimulantia exhibita delirium, stridores dentium, & soporem intra paucas horas produxerunt, fecerunt ægros immorigeros; & tunc septimo die mors secuta est.

In aliis ægris acute decumbentibus observati sunt dolores vagi, qui jam extrema membrorum, jam articulos, jam scapulas, jam pleuram, pulmonem, aut caput occuparunt.

Si his pulsus fuit sat fortis, non multum inæqualis, respiratio non admodum læsa, neque sitis nimia, tunc prodeuntibus quarto die copiosis exanthematibus febris cum ægrorum levamine multum remisit, & undecimo die penitus desiit.

Si vero tertio die evanuerunt dolores, & eadem die pauca tantum exanthemata sine levamine apparuerunt, sique pulsus

inæqualis, debilis fuit, & respiratio difficilis, sudor largus, defatigans, alvus liquida, frequens, valde foetida, urina tenuis, aut fere naturalis, tunc quarto die iterum disparuerunt exanthemata, redieruntque dolores, & æger longe pejus habuit.

Quinto die, aut in principio sexti diei, denuo comparuerunt pauca exanthemata, & sudor defatigans auctus est, æger magis anxie respiravit, oculi facti sunt tristes, lachrimantes, sitis remisit.

Septimo die prægresso delirio, & sopore mors plerumque supervenit; si vero æger hoc die adhuc vitam conservavit, tunc inter summas anxietates & membrorum jactationes nono die, aut nocte undecimum præcedente mortuus est.

Si sexto die dolor valde acutus cum virium prostratione, livore labiorum & genarum in ventre ortus est; si pulsus fuit exilis & intermittens, respiratio sublimis, sitis ingens, tunc venter sensim intumuit, & septimo die æger subito obiit.

Bina talia cadavera aperui, in uno lienem totum spacelo consumptum reperi; in altero autem erat magna portio intestini coli gangrænosa, & præterea totum omentum nigrum, putridum.

An materies maligna, vaga, ad has partes deposita subitum sphacelum induxit?

Infusa diaphoretica his ægris maxime conduxerunt.

Alexipharmaca fortia ægros reddiderunt soporosos, & mortem accelerarunt.

Binos ægros imminentibus signis futuræ in ventre gangrenæ servavi mist. N^o. 16. ex qua omni semi-hora cochlear unum datum est.

In tertio tamen ægro, qui eodem modo se habuit, hæc mistura nihil effecit, nam subito venter intumuit, subsequutæ sunt frequentes Leipothymix, & tandem anxia mors.

Altero die venter hujus cadaveris fuit adhuc calidus: foetor enormis sectionem vetuit.

Aliud genus morbi hoc mense fuit, ubi debito tempore miliaria copiosissima prodierunt, sed absque ægri levamine; vires enim manserunt prostratæ, respiratio suppressa, pulsus debilis, inæqualis, caput grave, temulentum, aut profunde soporosum; & sudor viscidus, foetidus, qui maxime circa frontem & jugulum comparuit, ægros multum debilitavit.

His ægris numerus exanthematum

quotidie auctus est, ita quidem: ut sex septemve miliaria & sæpe plura sibi invicem racemorum instar adhæserint, & nihilominus tamen mansit pulsus undulosus, debilis, respiratio anxiosa, densa, mens delira.

Acida mineralia lenissimis diaphoreticis diluta, & syrupo diacod. edulcorata his ægris fuerunt utilissima.

Verum cortex peruvianus sæpe multo præstantior fuit, quam omnia hæc remedia, præsertim dum horripilationes, febrisque exacerbationes certis horis redeuntibus observatæ sunt; sed magna dosi exhiberi debuit.

Si tamen ægri admodum debiles & anxii membra continuo jactitarunt, tunc iis nec cortex peruvianus, nec ullum aliud remedium quid juvit.

Si his ægris tertio die orta est diarrhæa, tunc septimo interierunt; si vero diarrhæa non supervenit, tunc fere semper ad undecimum diem vitam protraxerunt; rarissime nono die mortui sunt.





MENSIS FEBRUARIUS.

1759.

Vix non omnes acuta decumbentes levi peripneumonia simul laborarunt.

Vires debiles in pluribus cardiaca postulabant ; unde decoctis emollientibus , expectorantibus sub finem additæ sunt herbæ leniter aromaticæ , ut sunt veron : heder. terr. tussilag. agrimon. rad. foenic. serpent. virg. contrajerv. &c. vel præter decocta expectorantia interpolatis vicibus datum est unum alterumve cochleare ex emuls. N°. 8. vel ex mist. N°. 10. aut N°. 14.

Tertio plerumque die sputa ceperunt prodire ; subinde quarto die pauca apparuerunt miliaria , & septimo die cum ægri levamine omnia eruperunt ; si tunc sputa simul copiose processerunt , æger optime habuit.

Subinde septimo , haud raro undecimo die , tussi jam fere cessante , & respiratione satis libera , ceperunt exanthemata citra turbationem comparere.

Sæpe decimo quarto die primum exanthemata visa sunt ; & tunc morbus

ad 24 diem protractus est, sed sine malis signis, si respiratio fuit libera.

Si jam quarto, vel septimo die exanthemata integre prodierunt, tunc morbus ultra decimum quartum, aut decimum septimum diem duravit nunquam.

Sputum coctum sæpe oxymelle scillit. gumm. ammon. acet. scill. soluto, kermes mineral., & aliis fortioribus expectorantibus propelli debuit, quoniam ægri vires solæ haud sufficiebant.

Aliquoties circa tempus criseos orta est tussis frequentissima, sicca, ægrum & morbum turbans; unde sedari debuit. Granum unum opii exhibitum plerumque placidum somnum conciliavit, atque tunc exanthemata pulchre prodierunt; & post somnum sputa optime cocta facillime ejecta sunt.

Permuli ægri hoc mense, vel quarto, vel quinto vel sexto die, circa hypochondria tensiones conquerebantur, quibus subsecuta est diarrhæa biliosa.

Hæc, si non nimia fuit, tunc nec morbum, nec usum medicamentorum mutavit; & ideo sibi relicta est.

Si vero nimia fuit, & ægrum debilitavit, tunc laudano liq. sydenh. bis de die ad gtt. X. vel XV. exhibito mitigari debuit.

Suppressere eam non licuit; etenim, ea suppressa, ortæ sunt circa præcordia anxietates, deliria, & vomitus.

Unde enematibus alvus iterum fluxilis reddenda fuit.

Si peculiaris quædam acrimonia in intestinis hærens talem diarrhæam produxit, tunc saturatissimum decoctum rad. alth. cum paucio opio, vel emulf. N^o. 19. vel alia medicamenta involventia optimos effectus præstiterunt. Purgante acrimoniam expellere exanthemata, & sputa rite procedentia prohibuerunt.

Urina aliquando naturalis fuit, licet febris fuerit magna, aliquando ruffa cum nubecula fundum petente, aliquando crassa sine sedimento, aliquando posuit sedimentum crassum, fuscum, aut subalbidum, aut flocculentum.

Si sudore copioso, & pulsu unduloso ac debili existente, atque respiratione difficili, urina tenuis fuit, tunc male cum ægro agebatur.

Urina crassa, non multum foetens, & copiosum grave sedimentum dimittens, majorem spem dedit; præsertim si respiratio non admodum mala fuit; cæteroquin ex urina firmum præsagium nunquam formari potuit.

Quibus pullus fuit mollis, exilis, inæqualis, respiratio difficilis, corporis jactatio frequens, lingua arida, sitis ingens aut nulla, ii mortui sunt.

Qui animo tristes, & melancholici in febrem acutam inciderunt, ii durante morbo pejus habuerunt, quam alii, & morbo superato, viribus & appetitu longo diutius caruerunt.

Vir febre acuta decumbens satis benigna symptomata habuit, & sexto die pauca apparuerunt miliaria; unde spes erat sequenti die omnia eruptura.

Verum Vires erant solito debiliores, hinc furis adposita sunt vesicantia, & omni bihorio datum est cochlear unum ex mist. N^o. 14.

Nox fuit inquieta, licet æger unc. i. ꝑ. syrup. diacod. assumpserit; mane non plura comparuerunt exanthemata, vesicantia nil operata sunt, vires manserunt admodum debiles; tandem circa meridiem totum corpus, præsertim vero artus & spinam dorsi immanis dilacerans dolor occupavit, dein accesserunt validæ convulsiones, & subita mors. Æger hicce arthritide vaga sæpius laboravit, antequam hoc morbo acuto prehensus fuit; an igitur dolores arthritici supervenientes naturæ cona-

men impediverunt, & ægro adtulerunt necem?

Fœmina ex acuta febre convalescens perfectam amaurosim in oculo sinistro habuit.

In aliquibus post morbum acutum observavi visum admodum debilem, aut leve delirium sine pulsus agitatione, viribus autem incrementibus hæc mala sensim disparuerunt; unde & in hac fœmina simile quid futurum speravi: at vero spe deceptus fui; etenim, viribus jam integris, amaurosis æque pertinax mansit. Hinc ilico nuchæ iterata vesicantia applicari jussi, & alterno die purgans drasticum exhibui; quo factum est, ut spatio decem dierum ægra utroque oculo optime objecta viderit, distinxerit.

Ægra quidem per hæc evacuantia vires suas amisit, verum cortex Peruvianus & diæta probe nutriens brevi optimam sanitatem restituerunt.

Post morbum acutum multi scabie pruriginosa divexati sunt, sed dato uno alterove purgante aut absumpta aliquoties conserv. N. 5. & decocto radicis Bardanæ copiose hausto, hoc malum feliciter curatum est.

Surditas & pedum tumores œdema-

rosi orti post acutam redeuntibus viribus sponte disparuerunt.

Aliquibus ægris cessante febre acuta facies tota tumore albo, molli inflata est, pulsus præterea debilis, tardus fuit.

Verum vesicans nuchæ adpositum, & medicamenta leniter stimulantia, roborantia hos tumores brevi tempore dispulerunt.



MENSIS MARTIUS.

1759:

MULTI acuta prehensi sunt; plurimi inter illos habuerunt petechias, pauci miliaria.

Tussis vero omnibus juncta erat; diarrhæa biliosa quoque multos divexavit.

Si tertio die (quod rarissime contingit) pauca stigmata exanthematum apparuerunt, tunc quarto die copiosiora cum quodam ægri levamine proruperunt, septimo die denuo plura supervenerunt, & æger belle habuit.

Sæpissime sexto die hinc inde quædam exanthemata conspecta sunt, & septimo prodierunt plura, undecimo facta est integra crisis, & omnia in melius mutata sunt.

64 *De Morbis acutis.*

Si ægri difficulter respirarunt, aut frequenter delirarunt, aut profundo sopore detenti sunt, tunc vesicantia sat acria furis adplicari debuerunt, & si mala symptomata non fuerunt imminuta, tunc & humeris, & nuchæ adplicata sunt.

Tussis & diarrhæa methodo, præcedenti mense enarrata, curabantur.

Dum petechiis decumbentes debiles erant, maximum levamen perceperunt ex mistura N°. 10. vel ex claret. N°. 1. qui vero miliaria habuerunt, iis magis conduxit emuls. N°. 8. vel mist. N°. 14.

Si autem nullo fere stimulo opus fuit, tunc totus morbus & omnia symptomata solis infusis herb. scab. veron. heder. terr. &c. flor. verbasc. rhæad. &c. melle edulcoratis percurari potuerunt; mellis tamen loco his infusis addi debuit syrup. flor. rhæad. aut syrup. diacod., si diarrhæa ægros debilitavit.

Si iis, qui saburram in ventriculo gesserunt, statim in initio morbi datum est emeticum, tunc durante morbo diarrhæa raro supervenit.

Si vomitorium in initio morbi neglectum fuit, tunc ægri erumpentibus exanthematibus nullum omnino leva-

men perceperunt, & continuam præcordiorum anxietatem, nauseam, ac vomituritionem conquesti sunt.

Atque ideo in medio morbo & efflorescentiis optime exstantibus sæpe vomitorium exhiberi debuit; & paulo post ab omni anxietate liberati sunt ægri, & morbum reliquum facile superarunt.

Neque tussis emeticum dare prohibuit, etenim ea non fuit peripneumonica, & post vomitum plerumque mitior reddebatur.

Quibus superveniente diarrhæa sputum suppressum est, & sudor inæqualis, mox gelidus, mox calidus vires deiecit, quibus oculi concavi facti sunt, labia oris livida, nasus & aures pallidæ, respiratio sublimis, ii fere omnes mortui sunt, licet exanthemata rite elevata, & optimi coloris apparuerint.

Si tamen in periculosis his circumstantiis observatæ sunt periodicæ horripilationes, & manifestæ febris calorisque intensiones, atque remissiones, tunc mist. N°. 16. omni semi-hora ad duo cochlearia assumpta subitum levamen adtulit.

In usu hujus misturæ sed minus frequenti persistebatur usque ad morbi

finem ; & tunc neque redierunt amplius horripilationes , febris mansit mitis , æqualis , vires ægri sensim increverunt , denuo prodiit sputum , remisit nimius fudor , nec turbata sunt exanthemata ; diarrhæa dato omni sexta hora leni paregorico admodum mitis facta est.

Si vero hæ horripilationes , & ægri mutationes ab imminente suppuratione originem duxerunt , tunc hæc mistura parum juvit. An tempore vernali diversæ febres intermittentes febribus acutis sæpe junguntur , atque eas turbant ?



MENSIS APRILIS.

1759.

NUMERUS acute decumbentium fuit sat magnus.

Omnes noctu delirarunt , de die vero sibi erant præsentēs , oculos habebant rubros , linguam siccam , fuscā , sitim mediocrem ; caput plerisque multum doluit , pauci tussicula affecti sunt , respiratio fere omnibus fuit libera.

Omnes pulsum debilem habuerunt , unde medicamentis leniter stimulantioribus opus erat.

Plurimis mist. N°. 10. profuit, quibusdam claret. N°. 1. iis vero, quos convulsiones & tendinum subsultus defatigarunt, mist. N°. 14. optime conduxit.

Vesicantia furis & nuchæ adplicata sopores & delirium mitigarunt, atque pulsum fecerunt liberiores.

Si ægri noctu inquieti fuerunt, tunc opiato somnus conciliabatur.

Febris exacerbationes observatæ, usu mist. N°. 16. semper cum ægrorum levamine suppressæ sunt.

Diarrhæam tenesmoideam, ut & singultum a solo inordinato spirituum motu productum laudan. liq. sydenh. omni tertia hora ad X. gtt. exhibitum brevi sedavit.

Diarrhæa a laxitate orta mist. N°. 18., ea vero, quæ ab acri in intestinis dependebat, emuls. N°. 19. aut decocto emollientissimo & involventi oleoso curata fuit.

Multis die 14, cessante febre acuta, accessit febris quotidiana aut tertiana, quibusdam id undecimo die accidit.

Si vires ægri fuerunt debiles, tunc ilico cortex Peruvianus in usum vocari debuit.

Si vero vires aliquot paroxysmos ferre

potuerunt, tunc æger drachma una rhei tempore intercalari purgatus fuit, antequam corticem Peruvianum assumpsit.

Si autem ægri vires sufficientes habuerunt, tunc methodo postea enarranda percurata est febris intermittens.

Parotides sub finem morbi ægris supervenientes erant admodum molestæ, & nullis fere remediis cesserunt.

Resolventia & alvum leniter moventia interne exhibita, emollientia & discutientia applicata externe longa tandem mora hos tumores aut ad suppurationem redigerunt, aut dissiparunt. In binis tamen ægris hæc nihil effecerunt, parotides durissimæ semper magis increverunt, respirationem & deglutitionem impediverunt, & hos ægros penitus suffocarunt.

Arthriticis, aut ischiaticis, aut podagricis, si in ipsa febre acuta dolor rediit, tunc sæpe improvisa mors subsequuta est, aut ægri longe peiores facti sunt; aëris vicissitudines quoque multum & derepente ægros mutarunt.



MENSIS MAIUS.

1759.

MILIARIA & petechiæ grassabantur hoc mense ; quidam ægri methodo ordinaria facile curati sunt. Quidam vero maiorem sedulitatem & curam postularunt.

Nam a principio morbi habuerunt pulsum exilem, non multum febrilem, vires dejectas, sitim paucam, appetitum deletum, caput grave, linguam fordidam ; alvus prodiit quotidie pultacea, subfusca, foetida ; somnus fuit turbatus, defatigans, urina, in morbi initio naturali paululum coloratior, morbo progrediente sensim tenuior facta est, & levem dispersam nubeculam tenuit, oculi erant plerumque turbidi, tristes, respiratio difficilis.

Vires dejectæ statim in principio mistura N°. 10. aut N°. 14. aut alio simili medicamento erigi debuerunt.

Dein furis & nuchæ applicata sunt vesicantia, & hæc si respirationem liberam, & pulsum magis elevatum & fortem reddiderunt, tunc spes erat, ægrum

evasurum. Unde in similibus remediis & arte, & ratione indicatis erat insis-
tendum.

Verum si his factis nec pulsus melior fuit, nec caput magis serenum, nec respiratio facilior, tunc spes vitæ evanuit.

Cortex Peruvianus vel solus, vel stimulantibus & diluentibus antisepticis junctus hos ægros reddidit anxios.

Circa septimum diem sæpe apparuerunt exanthemata pauca, eaque non constantia, sed mox disparentia, mox iterum apparentia; manserunt ægri debiles & anxii, atque sudarunt continuo sudorem foetidum. Acida mineralia juncta stimulantibus nullum quoque effectum præstiterunt.

Paregorica omni quarta hora exhibita præter levem & turbatum somnum effecerunt nihil. Urina semper tenuior & pallidior facta est; & subinde septimo die sequebatur diarrhæa debilitans, nullis remediis cedens.

Nono die plerumque plura prodierunt exanthemata, verum absque ægri levamine; sudor foetidus, tenax continuavit, & æger sensim vires omnes amisit.

In principio decimi diei adhuc vi-

denda erant omnia exanthemata, sub
ejus finem vero subito disparuerunt.
Atque circa undecimum diem inter
summas anxietates & membrorum jac-
tationes mors scenam clausit.

Quibusdam jam quarto die milliaria
alba eruperunt, sed symptomata non
reddebantur meliora.

Et tunc septimo die numerus exan-
thematum adeo notabiliter fuit adauc-
tus, ut plura miliaria sibi cohærentia
in racemos fuerint elevata, aut subinde
in unam vesicam confluxerint. His ægris
respiratio fuit anxiosa, pulsus debilis, inæ-
qualis, genæ mox rubebant, mox pal-
lebant, sudor continuus, viscidus caput
occupavit, oculi fuerunt rubri, lachry-
mantes.

Uncia una ex mist. N°. 16. omni semi-
hora exhibita, miros & celeres effectus
præstitit, atque usu continuato omne
mortis periculum sæpe dispulit.

Fuerunt tamen, quos nullum medi-
camentum adjuvit; atque hi nono, aut
quod frequentius accidit, undecimo die
mortui sunt.

Rarissime in similibus casibus mors
decimum quartum diem expectavit.

Qui statim sub initium morbi habue-
runt pulsum valde debilem, & inæqua-

lem , oculos tristes , turbidos , respirationem laboriosam , faciem purpuream , caput grave , sopore oppressum , urinam ruffam , linguam aridam , sitim intolerabilem , ii circa septimum diem occubuerunt , licet petechiæ satis boni coloris tunc comparere ceperint.

Fortia alexipharmaca his semper nocuisse deprehendi, mitiora nil mutarunt; vesicantia & epispastica nullum levamen adtulerunt; Qui soporosi a quarto die erant , manserunt usque ad mortem.

Similia cadavera ilico post mortem fiebant purpurea , livida , atque talia manserunt , quam diu calor tactu percipiebatur ; hoc vero disparente totum cadaver naturalem colorem induit.

Pulsus undulosus & respiratio omni morbi tempore multum læsa pessimum præsagium semper formaverunt.

Multi fuerunt , qui nauseas , vomitiones, anxietates circa præcordia, os sordidum & amarum conquesti sunt , atque his vomitorium unum alterumve præberi debuit.

Id si factum non est, tunc totus morbi cursus fuit turbatus , & æger nullo medicamento levamen percepit.

Paterfamilias mei nosocomii vir 71. ann. clarum hujus rei exemplum dedit.

Prehende-

Prehendebatur is febre continua, putrida, & inter alia mala symptomata continuas vomitiones est conquestus, imo vomuit aliquoties materiem biliosam, glutinosam. Vir hic tres hernias habuit, quæ emeticum prohibebant.

Unde diluentia, digerentia, putredini resistentia medicamenta largiter haurienda exhibui.

His non obstantibus die quarto res tota in pejus ruit, nec cessarunt vomitus, & accessit singultus.

Quinto die advocatur in consilium celeberrimus Medicus QUARIN Senior, qui (licet magnus emeticorum patronus) his tamen in circumstantiis ob tot hernias, & tantam senectutem non ausus est concedere vomitorium.

Atque ideo conclusimus remediis digestivis, salinis, & alvum leniter moventibus ventriculum exonerare.

Verum postero die æger pejus habuit, fuit febris vehementior, vomitus longe frequentior, molestior.

Unde herniis rite firmatis, & ventre fasciis ligato, emeticum exhibuimus, quod magnam glutinis, & bilis copiam eduxit, quodque tantum effectum produxit, ut binis horis ab ultimo vomitu

omnis febris, vomituriatio, & anxietas abfuerit.

Vesperis datum opiatum totam noctem quietam reddidit.

Mane evigilans æger optime habuit, rediit appetitus, & solæ vires deficiebant.

Urina, quæ prius ruffa fuit, naturalis facta est.

Post octiduum absque errore in rebus sex non naturalibus commisso in priorem morbum incidit, atque iisdem symptomatibus divexatus est.

Verum dato emetico brevi iterum convaluit.

Et modo integre sanus & robustus est.

Scabies post morbum acutum superveniens datis remediis, antiscorbuticis leniter purgantibus, & sero lactis pro potu ordinario exhibito, brevi evanuit.



MENSIS JUNIUS.

1759.

Hoc mense miliaria alba multum grassabantur; rubra fuerunt rariora; petechiæ rarissime observatæ sunt.

Omnes ægri erant debiles, leviter delirantes, vesperi soporosi.

Vesicantia plurimum juverunt, & mist. N^o. 14. fere omnes servavit.

Nulla peculiaria symptomata observata sunt, nisi: quod quibusdam, febre continua affectis, quarto die, prægressa formicatione & pruritu, per totum corpus copiosissimæ maculæ rubræ, petechiis similes, eruperint; quinto autem die jam erant maculæ iterum pauciores, & minus rubræ; sexto die disparuerunt penitus; septimo die febris desinit; & hi ægri solo infuso fl. samb. citissime convaluerunt. Fuerunt tamen, qui has maculas primo intuitu pro petechiis habuerunt, atque ideo ægris remedia alexipharmaca præbuerunt; verum ab his medicamentis morbus & longior, & periculosior factus est.



QUÆSTIONES MEDICÆ.

AN licet in morbo exanthematico indusium mutare? sæpe indusia sudore foetido, glutinoso, acri, madent, sæpe præ sorditie rigida sunt, unde:

Si exanthemata rite prostant, & æger bene habet, licet, & debet mutari indusium; sed caute, & eo tantum tempore ubi æger non sudat.

Aëri aditus per rimam , aut portam apertam debet intercludi ; indusium recenter lotum & sub humidum nocet. Nocet quoque indusium fumo aromatico lustratum ; etenim fumus ægri cutim exsiccat, poros claudit , transpirationem reprimat , anxietates producit.

Indusium per unum alterumve diem à sano homine gestatum , & naturali lecti calore calefactum sine noxa similibus ægris induitur.

Ægris vero, qui continuas mutationes patiuntur , quibus mox apparent, mox disparent exanthemata , qui frequentes habent leipothymias , præter summam necessitatem non licet mutare indusium.

Quid faciendum , si exanthemata subito retrogrediantur ?

Inveterata est methodus , qua , retrogressis exanthematibus , fortissima exhibentur alexipharmaca.

Verum hæc methodus pluribus nocuit , profuit paucis.

Perfrequentè , retrogressis exanthematibus oritur magna pectoris anxietas , respiratio difficillima , febris magna , sitis ingens , ferox delirium , aut sopor profundus , stridor dentium , &c.

Fortia stimulantia hoc in casu brevi pejora symptomata adducunt , nec re-

deunt exanthemata, aut si redeunt, ea pauca sunt, nec levant, & mox iterum evanescent.

Atque tales ægri certo certius moriuntur.

Vidi longe melius succedere, si talia corpora infusis diluentibus, lenissime aromaticis impleantur, si cruribus, & nuchæ vesicantia adponantur, & postea paregoricis somnus concilietur.

Etenim in somno exanthemata denuo erumpunt, & ægri evigilantes sese multo alacriores & robustiores sentiunt.

Retrogressis exanthematibus, si pulsus plenus & fortis est, tunc venæ sectio optimo cum eventu celebratur.

Nam eo tempore, quo sanguis e vena fluit, ægri semper levantur, & exanthemata comparere incipiunt, aliquoties hoc in meo nosocomio observavi.

Si vero pulsus parvus & inæqualis deprehenditur, & si vis naturæ nimium languet, tunc fortiora stimulantia necessario exhiberi debent, ab iis tamen ilico abstinendum est, quam primum exanthemata rite prostant.

Tincturis & essentiis spirituosis, aliisque alexipharmacis magis fixis longe semper præferenda sunt remedia illa

volatilissima, virosa dicta, ut sunt : Camphora, Zibeth. mosch. &c. etenim hæc prudenter exhibita, nec augent, nec excitant inflammationem, sed vi sua volatili mox sese expediunt, tenuissima solummodo vasa stimulant, ea permaneant, cutis poros quærunt, per eos aufugiunt, & transpirationi, exanthematumque eruptioni pandunt viam, simulque spasmis & convulsionibus resistunt, quas alia stimulantia haud raro producant.

Opiata in acutis prudenti manu debito tempore exhibita nocuerunt nunquam; imo somnum conciliando, inordinatos naturæ motus domando, ægris mentem & vires erexerunt; quod alia medicamenta nunquam præstare possunt; hinc opiatorum in acutis necessitas probatur.

Senibus tamen, & sopore detentis, opium minus convenit.

An cortex peruvianus præter robur, quod nervis, & fibris induit, sanguinem compingit, inspissat?

Binas foeminas habui, quæ in nosocomio ultra duos menses ob ossis cariem, & gangrenæ metum quotidie magnam corticis copiam assumpserunt; posthac una ex his ingentes capitis do-

lores conqueſta eſt , & pulſus fuit ſolito plenior , celerior , unde ei venam ſecari juſſi.


Sanguis e vena fluxit rutilus & tenuis , poſt horam in multum ſerum , & exiguam , levis conſiſtentia , placentam abivit.

Rutilus ſanguinis color tam in inferiore , quam ſuperiore placentæ parte , uſque in poſterum diem permanſit.

Alteri foeminae experimenti cauſa quoque aliquot uncias ſanguinis detraxi , & idem omnino expertus ſum.

Miles , qui per plures menſes cortice uſus eſt , ſimillimum ſanguinem exhibuit.





D E

MORBIS CHRONICIS.

FEBRES INTERMITTENTES.

ALIIQUOT centeni ægri, febre intermittente affecti, hoc anno in nosocomio decubuerunt.

Fuerunt autem febres vel quotidianæ, vel tertianæ, vel quartanæ; quandoque simplices, haud raro duplicatæ; semi-tertianæ quoque frequenter observatæ sunt.

Nullus ex tot ægris, febre intermittente affectis, mortuus est.

Curatio vix non semper aut vomitorio, aut purgante (quoniam plurimi ex ægris, ad nosocomium translatis, diæta cruda & inordinata antehac usi fuerant) inchoari debuit, quo factò, reliqua cura fuit longe faciliior; imo febris intermittens plus simplici vice unico vomitorio, aut purgante fugata est, aut adeo imminuta, ut insequens paroxysmus absque molestia ab ægris potuerit perferri.

Purgatis primis viis , bis aut ter de die datus est pulvis N^o. 29. superbibendo infusum quaecunque.

Hoc pulvere per aliquot dies assumpto paroxysmi plerumque multo leviores fuerunt , nec certum typum amplius ferverunt, & sensim ægris vale dixerunt.

Neque alio medicamento ultra opus fuit ; recidivæ tamen gratia cavendum erat summopere , ne convalescentes in diæta errorem committerent.

Qui pulverem N^o. 29. assumere non poterant , aut qui ex hoc pulvere molestum ardorem in ventriculo & pectore perceperunt , iis conserva , N^o. 4. æque bonum effectum præstitit.

Hac sola methodo plurimæ tam quotidianæ , quam tertianæ , & quartanæ , non modo simplices , sed & complicatæ febres perfecte curatæ sunt.

Fuerunt quidem ægri, sed pauci , qui his remediis sat diu usi æque violentos paroxysmos experti sunt, & vires sensim amiserunt.

Unde sine cortice peruviano hos curare erat fere impossibile. Verum minori corticis dosi tunc opus fuit , etenim sola conserva N. 7. aut mistura N^o. 17. tempore intercalari absumpta feбри suffocandæ semper suffecit.

Si paroxyfmi ab initio jam nimium violenti fuerunt ; aut si sub ipso paroxyfmo valde periculosa symptomata observata sunt : ut sopor apoplecticus, vehemens cardialgia, dolor colicus acutissimus, pectoris summa anxietas, aut tuffis pectus dilacerans, sanguinem educens ; aut rigiditas & tetanus totum corpus occupans, aut dolor ingens renum & lumborum, atque perpetuus & inanis mingendi conatus &c. tunc sine mora cortex peruvianus exhiberi debuit.

Non omnes paroxyfmi cum frigore inceperunt ; sed erant quidam ægri, qui ilico citra omnem horripilationem magnum æstum conquesti sunt, quo cessante copiose sudarunt.

Aliis erat frigus magnum, diu durans, calor autem exiguus, brevis ; sudor dein copiosissimus.

Habui ægros, quibus omni die determinata hora citra manifestam febrem ortæ sunt cordis palpitationes, aut magnæ pectoris anxietates, tuffes inanes, violentæ. Aliis certa hora caput totum vel pars capitis vehementer doluit ; erat in nosocomio vir, qui quotidie hora quarta pomeridiana visum subito, absque ullo præcedente signo aut do-

lore, amisit, & perfecta amaurosi affectus est; cæteroquin sanus fuit, nec unquam pulsum naturali celeriores habuit. Post binas horas demum visus iterum subito rediit. Postquam igitur per octiduum determinata hora accedere, & abire amaurosin observavi: tunc omni trihorio drachmam unam corticis peruviani exhibui, & hac ratione intra 24. horas æger perfecte curatus est.

Alia quoque mala, statis horis reverentia, unico hoc remedio curavi.

Si ante usum corticis primæ viæ à fordibus rite purgentur, & hypocondriorum obstructions resolvantur, tunc cortex nunquam nocere potest; his autem neglectis sæpe cacochymiam & pessimum hydropem producit.

Verum hæc mala longe frequentius observantur ab iis remediis arcanis, quibus agyrtæ febres ilico supprimunt.

Tales ægri redduntur pallidi, debiles, non appetunt, tandem tumet facies, hypocondria dolent, dein tenditur venter, & oritur ascites vix curanda.

Si tamen periculosa symptomata, qualia paulo superius adduxi, jubeant paroxysmos suppressere antequam primæ viæ sufficienter purgatæ sunt, &

84 *Febres intermittentes.*

hypochondriorum obstructiones resolutæ ; tunc ilico, suppressa febre, singulari cura in has partes agendum est ; imo, refocillatis ægri viribus, sæpe juvat dato purgante febrem revocare.

Multa innocua, remedia a plebe contra febres intermittentes commendata, sæpius tentavi, verum ea incerta, & minus efficacia plerumque deprehendi.

Celeb. BERRYAT. vid. mémoires de mathématique, & de physique, &c. tome second, à Paris, 1755. pag. 24. laudat pro novo contra febrem intermittentem remedio laud. liq. sydenh. in infuso centaurii minoris exhibitum.

Infantibus trium vel quinque ann. dat sex guttas, adultis vero viginti, aut triginta pro diversitate temperamenti, & ætatis.

Tempus illud exhibendi est hora ante horroris ingressum.

Hanc methodum in multis ægris magna cum attentione adhibui ; bini solummodo post profundum somnum a febre liberati sunt ; dein vero manserunt debiles, stupidi ; nec iis appetitus rediit.

Unde ad perfectam curationem medicamentis cardiacis, amaris, salinis &c.

longo adhuc tempore opus habuerunt.

In unico ægro hoc medicamentum paroxysmos minus violentos reddidit, non vero febrem integre fugavit.

Aliis omnibus induxit temulentiam, paroxysmos fecit longiores, atque alvum constipavit.

Non tamen ideo extra usum est ponendum hoc remedium, etenim sub ipso paroxysmo subinde inordinati motus in nervis fiunt, qui hoc remedio, prudenter exhibito, optime domantur.

Imo per epicrasin datum tollit febres mere nervosas, quales hystericae, & hypocondriaci quandoque habent, dum iis determinata hora quotidie, vel alternis diebus cum horrore, & pulsus agitatione revertuntur dolores colici, vomitus biliosi, clavi hysterici, pleuritis hysterica, asthma, cordis palpitationes, &c.

Si his ægris laudano liquido sydenhami hora ante paroxysmum somnus inducitur, tunc sopiuntur dolores, & omnia mala symptomata; neque advertitur febris, & post somnum tales ægri alacres sunt, & vires habent multo majores.

Remediis anti-hystericis & nervinis sedulo posthac exhibitis omnis recidiva præcaveri potest.

Cl. JOAN. CHRIST. JACOBI (vid. acta academ. elect. Mogunt. scient. util. quæ Erfordiæ est. tom. 1. pag. 216.) describit remedium feбри fugum arsenicale, quod sequenti methodo paratur :

℞. arsenic. alb. part. 1.

sal. tart. part. 12.

aq. part. 168.

Hæc mixta continuo bullitu ad dimidii aquæ consumptionem coquuntur; facta refrigeratione pars aquæ evaporata iterum additur, adjecto pauxillo spirit. vin. ad meliorem conservationem.

Ad variū generis febres hoc remedium citra noxam commendat; adultis datur ad guttas 30. infantibus vero proratione ætatis ad gutt. 6. S. 10. 16.

Paravi hoc remedium methodo præscripta, illudque homini adulto debita dosi exhibui.

Febris sistebatur. Verum postea ardorem continuum in sterno, & tussiculam siccam, defatigantem, conquestus est æger, appetitum penitus amisit, sitivit multum, secesserunt vires & carnes, demum capilli defluerunt, & supervenit febris hectica.

Hinc ægrum, maximo in vitæ periculo constitutum, vehementer dolui;

nihilominus tamen remediis emolli-
tissimis, oleosis, & cura lactea intra
duos menses integre restitutus est.

Experimenti causa idem remedium
denuo paravi, sed in parando arsenici
quantitatem $\frac{1}{3}$ diminui mitius hoc re-
medium præscripta ab authore dosi de-
nuo homini adulto dedi.

Febris inde non est suppressa, sed
paroxyfmi fuerunt paulo mitiores. Æger
autem in sterno ardorem percepit, amisit
appetitum, & tussicula sicca laboravit.

Hinc, ne vires nimium dejicerentur,
febrem cortice peruviano debellavi, &
præterea decoctis, & lacte corpus ægri
implevi: quo facto, mala symptomata
brevis evanuerunt, & æger convaluit.

His factis experimentis hoc remedium
noxium judicavi, & ab eo penitus
abstinui.

An iis, qui febre intermittente la-
borant, & simul toto corpore tument,
licet corticem peruvianum exhibere?

Si febris ægrum debilitat, & tumo-
rem auget, tunc necessario cortice
debet suppressi; & vidi pluribus vicibus
non tantum febrem fugatam, sed &
continuato usu corticis peruviani om-
nem tumorem esse dispulsum.

Hac methodo curavi asciticos, &

anasarca pessima laborantes ; verum tunc talia mala a mera vasorum, & viscerum debilitate dependebant ; unde cortex febrem sistendo, & has partes roborando, atque liquidum sæpe per alvum, haud raro autem per urinam educendo, omne malum vicit, & ægros integre sanavit ; præsertim si cortex antiscorbuticis simul junctus fuit.

An licet corticem peruvianum exhibere iis, qui ex induratione hepatis, lienis, aut alterius visceris, ascitici facti febre intermittente simul laborant ?

Si febris vehemens est, neque indurationes resolvit ; & si ob febris violentiam, & ægri debilitatem hydrops anasarca sensim incipit comparere, tunc necessario, non obstantibus obstructionibus, cortex debita dosi debet exhiberi.

Binis enim hostibus seu morbis citius occumbit æger, quam uni.

Imo haud raro ex usu corticis rediit appetitus, incipiens anasarca disparuit ; quin imo ventris moles subinde diminuta est, & æger vires recuperavit.

Atque tunc remediis necessariis licuit fortius in obstructa loca, & contra Asciten agere ; quamvis tales hydropes ab

indurationibus producti rarissime ex integro curentur.

Ex his patet, a cortice peruviano non esse tanta mala timenda, quanta a pluribus timentur: verum requiritur, ut debito tempore, & probe purgatis primis viis, præbeatur.



H Y D R O P S.

MORBUS hicce tot, tamque diversas & pertinaces causas habet, ut non raro valde difficilis, aut curatu plane impossibilis evadat.

Tempore autumnali, & incipiente vere plurimum in nosocomio grassabatur.

Verum sæpe numero dolui, ægros jam admodum debiles & morti proximios ad nosocomium fuisse allatos, quibus nulla medicina, nisi palliativa, fieri potuit.

Qui ex morbo diuturno resurgentes citra ullum vitium, in visceribus relictum, ex mera debilitate in hydropem inciderunt, ii remediis roborantibus, amaris, adstringentibus, atque leni frictione, & corporis motu, brevi & facile curati sunt.

Sæpe solus cortex peruvianus, & conservæ antiscorbuticæ hos ægros optime restituerunt. Longe tamen citius juvit vinum medicat. ex fol. Card. bened. absint. cent. min. rad. gent. pyreth. cort. peruv. cinnam. wint. limatura mart. &c.

Si vero in aliquo viscere vitium ex morbo superstes observatum est, tunc hydropis cura longe difficilior, aut sæpe impossibilis fuit.

Hydrops ex quocunque viscere suppurato ortus fere semper in lentam tabem abiit, & morte terminatus est.

Hydrops recens, à recenti viscerum obstructione productus, plerumque medicamentis resolventibus, leniter evacuantibus, & simul roborantibus facili negotio curari potuit.

Pilulæ N. 33. plurimos tales ægros integre restituerunt; harum pilularum loco eodem cum effectu misturam N. 11. aut conservam N. 5. aut alia his similia remedia exhibere licuit.

Verum corporis motus, & frictiones multum ad curationem contulerunt.

Decocta aperientia, resolventia, pauca copia data, his in circumstantiis parum effecerunt, majori vero copia exhibita flatu & anxietates excitarunt, deleveruntque appetitum.

Unde his ægris erant minus utilia.

Inveteratæ obstructions, aut scirrhi hydropem producentes raro resolvi potuerunt, hinc & hydrops ab his dependens nullis fere medicamentis cessit.

Vinum scillit. N. 23. sæpe aquas omnes per urinæ vias eduxit, verum obstructions plerumque in priori statu reliquit. Unde posthac remediis aperientibus, & resolventibus in hæc loca strenue agendum fuit.

Si tamen diuturno horum remediorum usu obstructions nequaquam mutantur, tunc potius sibi relinquendæ sunt; secus his remediis ægrorum sanguis nimium dissolvitur, debilitantur fibræ, & sensim lethalis hydrops inducitur; aut scirrhi inveterati in canculos abeunt.

Mistura N. 13. vel vinum N. 34. quandoque multo majores effectus præstiterunt, quam vinum scilliticum N. 23. etenim non tantum lympham extravasatam per urinæ vias expulerunt, sed & obstructions subinde penitus dissiparunt; unde periculosos hydropes sæpe integre curarunt.

Sæpe tamen & hæc & alia medicamenta nil omnino efficere potuerunt: nam neque moverunt urinam, neque

alvum, & quandoque sub eorum usu hydrops peior factus est.

Morbo jam ita periculoso existente lenia purgantia semper inutilia fuerunt; fortia magnam quidem aquæ copiam eduxerunt; verum ægrorum vires inde penitus prostratæ sunt, & ventris moles plerumque sequenti die major apparuit; unde morbus lethalis fuit.

Præsertim si ægri, oris & pectoris siccitatem atque continuum ardorem, in osse sterno conquesti sunt; si respiratio fuit valde laboriosa, tussiculosa, & per vices suffocativa, sitis magna, &c.

Cum his igitur ægris palliative agendum erat. Alvus vel enematibus, vel remediis purgantibus per epicrasin exhibitis aperta conservari debuit, ad urinam promovendam lenia diuretica, subacida, cardiaca, adhibita sunt. Acria diuretica pessimam stranguriam produxerunt.

Dum ventris moles nimium increvit, & suffocationem minitata est, tunc paracentesi aqua extravasataeducta fuit.

Unde ægri ingens levamen perceperunt, & medicamenta posthac ingesta facilius vires suas exserere potuerunt.

Si post paracentesin omni triduo, aut quatrIduo purgans, ægri temperamento

& viribus conveniens, exhibitum est, tunc sæpe per plures septimanas venter in naturali statu permansit.

Vinum scillit. N. 23. vel mist. N. 13. vel conserv. N. 22. &c. his in casibus quoque multum profuerunt.

Si tamen his non obstantibus venter iterum intumuit, & æger in summum vitæ periculum redactus est, tunc de-nuo necessarium fuit altera paracentesi aquam evocare; idque pro necessitate, & rerum circumstantiis quandoque repetitis vicibus in eodem ægro fieri debuit; & hac ratione multorum ægrorum vita per plures menses prolongata est.

Hoc anno quinquagesies hanc operationem optimus mei nosocomii chirurgus **GEORGIUS HAFFNER**, me suadente, instituit, nunquam inde malum eventum vidi, & ægri omnes aut magnum inde levamen habuerunt, aut integre curati sunt.

Qui ex vitio cujusdam visceris corrupti aut scirrhusi hydrope laborant, iis paracentesis est remedium mere palliativum; eos vero, qui viscera integra habent, & vires bonas, sæpe cito & perfecte curat. aliquos similes ægros sola paracentesi in nosocomio restitui.

Verum paracentesis tunc tantum debet

in usum vocari, quando medicamenta nil efficiunt. Interim tamen nimis diu differenda non est, etenim haud raro contingere solet, ut ægri nimio medicamentorum usu vires omnes amittant, & ad operationem sustinendam inepti reddantur.

In omnibus hydropicis observavi, summe necessarium esse, curationem lenioribus medicamentis inchoare, & hac ratione ægrorum vires, & naturam examinare. Leniora si quemdam effectum præstiterunt, & si ægros non reddiderunt debiles, tunc sensim ad acriora descendere licuit.

Sæpe alvus adeo pertinaciter clausa erat, ut demum fortissima purgantia debuerint adhiberi. Pulvis, N. 35. plerumque claustra rupit, & magnam lymphæ copiam cum ægrorum levamine eduxit; verum ut similia remedia sine ægrorum periculo tententur, requiruntur viscera integra, & vires sufficientes.

Si symptomata & ægrorum vires admiserunt, pulverem N. 35. omni quarto quintove die exhibui, donec ægri integre curati fuerunt.

Si vero vires inde imminutæ sunt, tunc lenioribus purgantibus, aut reme-

diis diureticis, aperta semel per hunc pulverem via, ægri facile restituebantur.

Quandoque dato omni tertio die purgante hydragogo, hydropem absque alio remedio brevi sanavi.

Quandoque vero magis conduxit purgantia per epicrasin exhibere; dum nimirum datum unica dosi fortius purgans vires nimium dejecit. Conserva N. 22. sensim per alvum & urinam aquas stagnantes promovendo, multos ab hydrope liberavit. Ægros similes quoque pulchre levat robebuli, sambuci, de spina cervina, &c. præsertim si sal polychr. aut terr. fol. tart. aut borax venet. his admisceantur.

Sola diuretica, ut vinum N. 23. aut mistura N. 13, &c. ubi humores non corrupti erant, hydropes satis periculosos sæpissime curarunt.

Si tamen sub eorum usu alvus immerigera fuit, tunc omni tertio, quartove die purgans dari debuit.

Menſe Octobri, Novembri & Decembri, hydropici male habebant, & mors sibi multos vindicavit.

Plurimi non tantum hydrope ventris laborarunt, sed & simul pessima anasarca affecti sunt. Totum enim corpus

pastaceo, lento, frigido tumore inflatum fuit, & ipsa pudenda sæpe multum intumuerunt.

Pulsus plerumque erat exilis, intermittens, respiratio brevis, difficilis; præterea ægri multa siti, & inani tussicula defatigati, perpetuum in osse sterno ardorem perceperunt.

Fere omnibus pauca urina prodiit; multis alvus fuit pertinaciter clausa, quibusdam vero tenesmoidea & fluxilis, atque cum his pejus agebatur.

Morbo hoc jam multum protracto & inveterato nullum fere medicamentum profuit; imo ægri, multis medicamentis divexati, mortem citius oppetierunt.

Si tamen sitis non fuit magna, neque respiratio nimium læsa, neque pulsus admodum parvus & intermittens; si nullæ ex somno subitæ vigiliæ & anxietates observatæ sunt, tunc curationis spes superfuit; & multi sola conserva N^o. 22. aut decocto N^o. 36. & lenibus frictionibus integre sanati sunt.

Fortia purgantia semper nocuerunt.

Dum conserva N^o. 22. aut decoctum N^o. 36. nil efficere potuerunt, tunc tentavi vinum N^o. 24. atque partes tumidas pannis, decocto eupatorii cannabini

nabini calido (quod anatica parte vin. & aq. fiebat) madidis , involvi curavi.

Vinum hocce per urinam & alvum egregie operatum est , & ægris brevi levamen adtulit , neque vires debilitavit ; fomentum vero pastaceos tumores lente dissolvit , dissipavit ; atque hac ratione multi pessimi hydropici servati , & curati sunt.

Frictiones curam multum accelerarunt , præsertim si factis frictionibus partes flaccidæ fasciis fumo aromatico imprægnatis fuerunt circumdatæ.

Idem vinum posthac in hydrope ventris optimo cum effectu frequenter exhibui.

Si hydropicorum epidermis hinc inde in vesicas elevatur , si cutis incipit serum acre , foetidum sudare , aut si penitus rumpitur , & in ulcera abit , malum est.

Si hinc inde plagæ purpureæ aut lividæ oriuntur , tunc plerumque brevi oritur gangræna , & sequitur mors.

Si mediocria evacuantia alvum sufficienter movent , & ægrum non levant , sed debilitant , tunc fortiora numquam tentanda sunt.

Quibuscunque hydropicis hydrops pectoris supervenit , fere lethale est.

Storck Ann. I. Tom. I.

E

Vidi asciticis plurimum conduxisse, si mane & vesperi venter oleo olivarum recenti illinitus, & per $\frac{1}{4}$ aut $\frac{1}{2}$ hor. manu calida probe perfrictus fuit.

Etenim urina inde copiosior prodiit, & alvus quotidie sine remediis soluta est.

Similes tamen frictiones haud conveniunt, ubi ventris moles nimium magna est, & integumenta valde tensa & tenuia, atque respiratio multum difficilis.



I C T E R U S.

QUINQUAGINTA & aliquot icterici hoc anno fuerunt in nosocomio.

Unicus mortuus est, qui erat vir 60 annorum, cui, ictero jam in sanationem vergente, febris miliaris supervenit.

Quidam intra paucos dies, quidam vero tardius curati sunt.

Omnes toto corpore profunde flavo colore tincti erant, fœces fuerunt albæ, urina ex fuscoflava, turbida, chartam tingens; appetitus semper deletus, pauci sitim conquesti sunt; pulsus fuit fere semper naturalis, aut lentus.

Tales ægri anxietatem & pondus

circa præcordia perceperunt, hypochondrium dextrum in omnibus magis vel minus induratum, raro autem dolens, deprehensum est.

Cura fuit simplicissima; etenim plurimi horum ægrorum sola mistura N. 11. bis terve assumpta, & fero lactis, pro potu ordinario largiter hausto, optime restituti sunt.

In manibus & facie prima sanationis signa apparuerunt; etenim primo in genis roseus color apparuit, & in manibus color naturalis rediit, dein fœces sensim flavo colore tinctæ sunt, & urina fuit minus fusca.

Qui vero misturam N. 11. assumere non potuerunt, aut quibus pulsus naturalis paulo celerior fuit, iis mistur. N. 30. magis conduxit; sed tunc necessarium erat omni tertio aut quarto die scrup. ij. aut dr. j. rhei alvum movere.

Quidam solo pulvere ex rhei & salis polychr. aa scrup. j. mane & vesperi exhibito, superbibendo semper feri lactis tepidi unc. IV. vel V. vel VI. &c. brevi tempore ab ictero liberati sunt.

Si Icterus a crudis ingestis, aut nimio in primis viis hærente glutine originem duxit, tunc vomitoria, & remedia digerentia salina plurimum juverunt. Ta-

lis icterus sæpe solo pulvere N. 25. intra 24 horas curatus est.

In binis tamen ictericis alia cura requirebatur.

Erat ancilla, quæ profundo ictero jam a multis septimanis laboravit, & propterea diversis remediis usa est; verum omnia fuerunt frustra.

Tandem ictero se junxit febris intermittens tertiana, unde ægra multum debilitata ad nosocomium translata fuit.

Paroxysmum febrilem in nosocomio comitabatur ingens dolor colicus, qui antehac nunquam adfuerat; quique sub hoc paroxysmo frequentes Leipothymias produxit.

Cessante paroxysmo cessavit quoque dolor colicus, sed ægra admodum debilis fuit, sensim tamen vires redierunt, alterum igitur paroxysmum adhuc expectavi.

Erat is æque vehemens ac prior, & dolor colicus eodem momento, quo paroxysmus incepit, magna cum violentia rediit.

Hinc febris nimium vehemens ilico suffocari debuit.

Conserva N. 7. tempore intercalari assumpta non tantum febrem fugavit, & dolorem colicum suppressit, sed

etiam colorem utericum multum dimi-
nuit.

Eandem conservam ad præcavendam
recidivam adhuc semel exhibui, & sub
ejus usu icterus vix non penitus dispa-
ruit.

Solo dein fero lactis ægra perfectam
sanitatem obtinuit.

Homo, 40 an. ictero pessimo decu-
buit, ructus foetidissimos conquestus est,
subinde bilem putridissimam vomuit,
præterea pessima diarrhæa laboravit;
urina fuit turbida, alcalina; fœces ni-
græ, spumantes tetrum odorem spar-
runt; vires erant penitus prostratæ, sitis
ingens.

Hoc in casu præscripsi medicamen-
tum N. 37. quo copiose hausto intra
14. dies æger penitus convaluit.

Alvus nimium fluxilis laud. liq. sy-
denh. aliquoties cohiberi debuit.



SCORBUTUS.

QUI leviori scorbuto laborarunt;
conserva N. 4. aut N. 5. facile curati
sunt.

In peiori vero gradu dum respiratio
anhelosa fuit, & membra lento tumore

inflata sunt, tunc conserva N. 22. aliquandiu adhibita omnem curam absolvit.

Si his scorbuti signis accessit sitis, & pulsus factus est celerior, atque hinc inde maculae purpureae apparuerunt, tunc conservis antiscorbuticis optimo cum effectu admista sunt remedia subacida, ut cremor. tart. pulp. tamarind. rob. samb. rob. berber. ribes. &c.

Dum ulcuscula, aut maculae lividae in ulcuscula tendentes, aut alia signa observata ostenderunt sanguinem in putridum abire, tunc his conservis dr. j. vel dr. j. β . &c. ol. vitriol. aut. spirit. sulph. per camp. addidi. Remedium N. 38. his in circumstantiis valde efficax fuit.

Omnibus scorbuticis serum lactis vel simplex, vel vinosum pro potu ordinario datum est.

Quorum vasa & viscera ab acri scorbutico eroduntur, ii fere omnes moriuntur.

Hydrops à pessimo scorbuto productus, lethalis est.





S C A B I E S.

MULTI scabie affecti in nosocomio detinebantur.

Scabies crustosa, sicca, solo remedio N. 31. plerumque curata est; verum totum ægri corpus præterea bis quotidie sapone veneto in aqua aut lacte soluto tepide lavari debuit.

Sub usu hujus remedii intra breve temporis spatium copiosissimæ crustæ deciderunt, & raro novæ recruderunt.

Lotio, ex propria urina facta, multum quoque profuit.

Tres ægros foedissima lepra laborantes hoc unico remedio N. 31. & lotionem ex sapone veneto parata perfecte sanavi. Hi ægri copiosissimum serum lactis hauserunt.

Fuerunt tamen quidam scabie crustosa affecti, qui remedio N. 31. nequaquam curari potuerunt.

His mane & vespere unc. ℞. spiritus frumenti, in cujus libra una sex grana mercurii sublim. corros. soluta sunt, exhibui, unde intra paucos dies magna

in melius mutatio observata fuit, & demum integra sanitas rediit.

At vero necessarium est, ut similes ægri sub usu hujus medicamenti magnam copiam lactis aqua diluti, aut feri lactis, aut decoct. rad. bard. lapath. acut. alth. &c. bibant; præterea requiritur, ut ægri, hoc remedio utentes, pectore firmi sint.

Hæc si non observentur, tunc in similibus ægris a spiritu frumenti febris incenditur, & ægri in magnum periculum conjiciuntur.

Scabies humida, in qua plurimæ pustulæ inflammatae & suppurantes conspiciuntur, ad sui curationem requirit remedia antiphlogistica, sanguinem diliuentia, & acre vel per sudorem, vel per urinam, aut alvum exterminantia.

Hinc decoctum tamarind. aven. rad. acetos. scorzoner. cichor. &c. aut alia similia medicamenta plurimum conducunt.

Hæc si alvum non sufficienter movent, tunc necessarium est, omni sexto vel octavo die remedium purgans antiphlogisticum exhibere.

Post binas, ternasve septimanas plerumque talis scabies humida evanescit;

subinde tamen ad omnia rebellis manet, & tunc unguenta mercurialia & sulphurea adhibenda sunt.

Balneum badense in his circumstantiis quoque merito laudatur.

Scabies, a fructibus immaturis, & austeris comestis, producta brevi tempore curatur mistura N^o. 11. aut pilulis N^o. 33.



ARTHRITIS.

MULTI à frigore subito suscepto arthritide plerumque vaga, raro fixa laborarunt.

Si pulsus non multum elevatus & febrilis fuit, tunc solis infusis leniter aromaticis copiose potatis promovi sudorem, & hac ratione similes ægros brevi liberavi.

Si vero pulsus fuit durus, multum febrilis, tunc venæ sectiones iteratæ, & cura antiphlogistica institui debuit.

Si vero, qui in locis humidis sub terraneis habitarunt, aut in similibus locis, præsertim ventis perviis, per diem sese detinuerunt, ut sunt ii qui in cellis sedent, & vina vendunt, aut qui vina acida

austera bibunt, arthritide longe pertinaciori afficiebantur.

Pilulæ N°. 33. aut mistura N°. 11. & infusum lign. sassaf. 3. fantal. rad. farfapar. chin. &c. largiter potata, atque naturalis lecti calor brevi dolores mitigarunt, & similes ægros sensim perfecte restituerunt.

Conserva fumarizæ, cochleariæ, nasturtii aquatici, & alia remedia antiscorbutica his in casibus egregios quoque effectus præstant.

Si tamen materies arthritica in unum locum deposita dolorem fixum excitat, tunc cura redditur difficilior.

Nihilominus si nulla febris similem dolorem concomitatur, sique dolor non nimium acutus est, tunc eadem remedia conveniunt, & usu continuato morbum penitus tollunt; præsertim si pars affecta pannis laneis sæpius fricetur.

Si vero dolor est valde acutus, & febris vehemens, tunc sæpe venæ sectiones iteratæ, & fortia purgantia antiphlogistica requiruntur.

Imo si dolor non brevi remittit, tunc vesicans latum & acre loco dolenti debet apponi, & posthac plaga exulcerata diu aperta & fluens servanda est, ut hoc modo materies acris versus exteriora derivetur.

Hoc si negligitur, tunc materies arrodit ligamenta, & in ipsis ossibus pessimam cariem, & lentam mortem producit. Caput ossis femoris in minutissima fragmenta corrosum aliquoties vidi.

Arthritis venerea ab arthritide vera est probe distinguenda, & debet longe aliis remediis curari.



ERYSIPELAS.

TEMPORE autumnali ultra centum foeminas in nosocomio habui, quæ erysipelate faciei divexatæ sunt.

Facies tota fuit difformis, tensa, rubella; tales ægræ quandoque per plures dies ob tumorem palpebrarum nil videre potuerunt, pleræque ardentem faciei dolorem conquerebantur.

Si pulsus fuit multum febrilis & durus (quod raro contigit) tunc opus fuit, venæ sectionibus & remediis antiphlogisticis purgantibus curam inchoare.

Si vero febris non fuit vehemens, tunc remedio N°. 26. aliquandiu continuato, & infuso florum samb. copiose hausto, erysipelas brevi curari potuit.

Externe flores sambuci sacculis insuti.

& continuo calidi locis tumentibus adplicati sunt.

Hac ratione omnes evaserunt, neque ullum malum supervenisse observatum est.

Plus periculi habet erysipelas vagum; quoniam loca frequenter mutando nobiliorem vitæ partem occupare potest.

Hoc in morbo præter remedium N^o. 26. requiritur, ut (si vires ferant) omni tertio quartove die purgans antiphlogisticum exhibeatur; utque tales ægri quotidie tempore vespertino balneo pedum per horam & ultra infideant. Præterea per noctem plantæ pedum epispasticis irritari debent, ut erysipelas versus inferiora trahatur.

Si locum minus nobilem occupat, tunc nil licet externe adplicare, ne materies aliunde mobilis & volatilis nimis cito ex hoc loco depulsa alium periculosiorem invadat; affectum tamen locum linteamine tegere convenit, ut ab aëre defendatur.

Vagum tale erysipelas sæpe per octo, decem, aut duodecim dies in eodem vigore jam hunc, jam illum locum infestat, tandem orto, levi horrore & subsequente sudore, subito disparet.

Hoc facto ægri adhuc per aliquot

dies in continua transpiratione & leni sudore conservandi sunt ; quod moderato lecti calore , & infuso flor. samp. optime fieri potest.

Quandiu erysipelas sedem mutat , & vehemens est , tandiu ægri nec sudant , nec multum transpirant , cutis plerumque sicca deprehenditur.

Binos in nosocomio ægros habui , quibus erysipelas ex brachio pulmonem invasit.

Febris inde magna orta est , & tussis continua cum pectoris anxietate.

Venam ilico pro ratione virium per-
tundi , atque cruribus & nuchæ ves-
cantia adponi jussi ; dein calidum infu-
sum flor. samb. cum nitro & syrup. 5.
rad. copiose sorbillandum præbui.

Primo adhuc die sequebatur lenis
fudor , & ægri levamen perceperunt ;
verum tussicula sicca fuit nimium vehe-
mens & molesta , unde paregoricis eam
mitigare necesse erat.

Quarto die prodierunt sputa bene
cocta cum ægrorum levamine , septimo
evanuit febris , cessavit tussis , & omne
periculum abfuit.

In alio ægro erysipelas vagum subito
cerebrum & meninges occupavit , pro-
duxit ferocissimum delirium , convulsio-

nes, & enormes capitis dolores, ac paulo post mors supervenit.

Ipsa substantia corticalis aperto cranio, rubra & inflammata deprehensa est.

Si erysipelas neglectum, aut perverse curatum in gangrænam abit, tunc cortex peruvianus interne, & externe exhibitus citam medelam adfert.

Dum epidermis in vesicas attollitur, & jam serum transudare incipit, tunc exsiccantia & absorbenta externe adplicata, ut pulvis ad erysipelas ruber, albus, &c. egregie juvant.



ASTHMA GLUTINOSUM.

ÆTATE confecti magno numero, tempore autumnali, hoc morbo decubuerunt in nosocomio.

Misturam N^o. 9. aut N^o. 15. omnibus ab initio exhibui, verum pro majori vel minori stimulo, quo similes ægri opus habuerunt, addidi certam quantitatem tincturæ helen. vel. tinct. succin. vel sal. vol. c. c. ol. sylv. vel spirit. sal. ammoniac. &c. atque his remediis gluten dividere, & impactum mobile reddere conatus sum.

Asthma glutinosum. III

Si sputa ceperunt prodire, & pulsus factus est liberior, & æqualior, tunc spes erat ægrum evasurum.

Sæpe solis his misturis, aut conserva N^o. 6. similes ægri perfecte restituti sunt.

Vesicantia furis & nuchæ adplicata demendo pectoris anxietatem, & sputa promovendo multum profuerunt.

Si tamen glutine sat mobili reddito sputa sufficientia non prodierunt, sique manus, & pedes œdematoso tumore inflati sunt, tunc his misturis omni secundo aut tertio die pulvis purgans hydragogus interponi debuit.

Talis pulvis plerumque magnam glutinis tenacis copiam per alvum eduxit, & respiratio multum emendata fuit. Verum requiritur, ut ægrorum vires adhuc bonæ sint; secus tale purgans mortem accelerat.

Hac ratione pessimos ægros perfræquenter sanavi.

Si vero hac aut simili methodo res in melius verti non potuit, tunc hi ægri aut suffocati, aut apoplectici obierunt.

Si asthmāti glutinoso asthma convulsivum supervenit, tunc morbus longe periculosior fuit, & fere omnes subito mortui sunt.



VERMES.

OMNIS generis vermes inter meos ægros observavi.

Unicum remedium N^o. 32. omnibus exhibui, nullo habito vermium discrimine, & omnes, qui alio præter vermes morbo non laborarunt, inde curati sunt.

Vidi sæpius infinitos minimos vermiculos hoc remedio prodiisse.

Fœmina, 30. annor., hoc remedio assumpto vermem latum, album, 31. uln. longum, & alios plures breviores multo cum glutine alvo rejecit.

Et ex puero 10. annor. similis vermis 12. uln. longus secessit.

Quidam hoc remedio utentes vomitu & alvo lumbricos reddiderunt.



DIARRHÆA.

SI causa diarrhææ in primis viis hæret, tunc longe facilius curatur, quam si a vitio cujusdam visceris, aut massa sanguinea corrupta dependet.

Hinc diarrhæa non levans hydropi-

cis, scorbuticis, phthificis, &c. super-
veniens semper mala.

Erant multi mense Octobr. Novembr.
& Decembr. in meo nosocomio, qui ex
massa sanguinea corrupta diarrhæam
habuerunt.

In his ægris observavi pulsum len-
tum, appetitum deletum, sitim medio-
crem, linguam plumbeo glutine ob-
ductam, colorem faciei atque totius
corporis terreum, borborygmos &
ructus putridos, urinam turbidam,
foetidissimam, fœces fuscas, tetrum
odorem spargentes, respirationem len-
tam, vires dejectas, membra omnia
languida, conquassata, oculos tristes.

Levissima purgantia ex rheo hos ægros
debilitarunt; parva ypecacuanhæ dosis
vires adhuc magis dejecit; opiata &
adstringentia cohibuerunt quidem diar-
rhæam, verum venter intumuit, ægri
anxii facti sunt, & frequenter delira-
runt.

Unde enematis alvus denuo pro-
vocari debuit.

Saturatissima decocta emollientia,
involventia primo de optime prodesse
videbantur, secundo autem vel tertio
die aucta est diarrhæa, & ægri pejus
habuerunt.

Serum lactis, & decocta diluentia, sanguinem purificantia excitarunt tormina, & diarrhæam fecerunt pejo-rem.

Perpensis omnibus signis conjici poterat, massam sanguineam in his ægris abire in alcali; hinc remediis, alcali in ipsa massa sanguinea destruentibus, agendum fuit.

Atque ideo exhibui misturam N°. 27. & fero lactis (quod pro potu communi dedi) magnam quantitatem spiritus sulph. per camp. admiscui, & tantam syrupi diocodii copiam, quanta ad gratam dulcedinem requirebatur.

Etenim sine syrupo diacod. serum lactis, & spiritus acidus produxerunt dolores colicos, & auxerunt diarrhæam.

Imo id quandoque contigit etiam addito syrupo diacod: unde vesperi semper exhibui dr. j. theriac. Andromach. aut aliquoties per diem pro ratione circumstantiarum dedi gtt. X. vel XII. vel XV. &c. laud. lig. sydenham. donec diarrhæa ad debitum moderamen redacta est; integre eam suppressere non licuit.

Hæc remedia pro morbi & ægrorum ratione copia augeri aut minui debue-

runt, quo contigit, ut continuato eorum usu similes ægri intra decem, vel quatuordecim dies, aut si morbus fuit admodum rebellis, intra tres septimanas integre convaluerint.

Fere omnibus his ægris ab usu horum medicamentorum brevi rediit appetitus, rediit somnus reficiens, oculi facti sunt magis vivaces, increverunt vires.

Tentavi in hoc morbo putrido corticem peruvianum; primis duobus diebus auxit is diarrhæam citra virium notabilem imminutionem, tertio autem quartove die pertinaciter adstrixit alvum, fecit ventrem tumere, excitavit anxietates, nauseam, & vomitus debilitantes.

Si hic morbus fuit perversa methodo tractatus, aut neglectus, aut si ipse morbus adeo malignus, & contra omnia medicamenta fuit rebellis, tunc sensim hinc inde orta sunt ulcuscula, & maculæ lividæ, vires penitus dejectæ sunt, urina reddebatur stranguriosa, alvus fuit frequentior, foetidissima, ardens, tenesmoidea; supervenerunt frequentes vomitus putridi, noctes insomnes, perpetuum delirium, fitis non extinguenda, tandem convulsiones & mors.

Levis diarrhæa sæpe unica drachma rhei,

tempore matutino data, curari potuit.

Aut si purgante opus non fuit, tunc plerumque drachma una DIASCORDII FRACAST: mane & vesperi deglutina, juvit.

Si vero ægri diarrhæa laborantes pondus circa præcordia, appetitum deletum, & nauseam conquesti sunt, tunc pulverem N°. 25. mane exhibui, & vesperi dato opiato somnum conciliavi.

Altero die multos a diarrhæa liberos inveni; quibusdam vero diarrhæa fuit mitior; aliis tamen æque violenta permansit.

Qui a diarrhæa liberi fuerunt, iis mox rediit magnus appetitus, unde summopere cavendum erat, ne in diæta errorem committerent.

Quibus vero diarrhæa mitior fuit, iis adhuc languit appetitus; verum, data mane & vesperi (si febris abfuit) drachma una theriacæ ANDROMACHI, brevi cessavit diarrhæa, & viguit appetitus.

Dum hi ægri pulsum febrilem habuerunt, & sitim, tunc theriacam non licuit exhibere; verum emulsum paregoricum magis conducit.

Qui altero die ab assumpto pulvere, N°. 25. æque violenta diarrhæa dive-

xati sunt, iis mansit appetitus cum nausea deletus.

Hoc igitur die ad vires conservandas, & ad diarrhæam paululum mitigandam his ægris vel datum est emulsum N°. 39. vel mistura N°. 40.

Tertio autem die tempore matutino hi ægri pulverem N°. 25. denuo assumere debuerunt.

Hic pulvis per vomitum, & alvum semper egregie operatus est.

Rarissime opus fuit, eum tertia vice exhibere, etenim plerumque jam prima, aut secunda dosis vel penitus inhibuit diarrhæam, vel ita mitigavit, ut solis paregoricis, & leniter adstringentibus deinceps percurari potuerit.

Subinde vero factis evacuationibus per rheum aut pulv. N°. 25. aut alia similia medicamenta, in ventriculo, & intestinis quædam laxitas observata fuit; quo in casu remed. N°. 2. aut mistu, N°. 18. alvum facile cohibuerunt, & laxis partibus reddiderunt robur.

Drachma una pulveris lysimachiae bis aut ter per diem exhibita his in circumstantiis quoque diarrhæas pulchre sedavit. Idem præstitit cortex simaruba.

Ubi factis evacuationibus interplicis intestinorum quædam acrimonia fixa

hærens dolores excitavit, & alvi fluxum fecit perseverare, ibi adstringentia semper nocuerunt.

Medicamenta mucilaginosæ, oleosæ, decocta saturatissima emollientia, involventia, ut decoct. rad. alth. consolid. maj. rad. Salab. &c. enemata oleosæ, aut emulsa spissa ut N^o. 19. in similibus casibus optimam medelam adtulerunt.

Si spasmi & inordinati liquidi nervi motus observantur, & præsertim si noctes turbatæ sunt, tunc paregorica sat magna dosi præbere convenit.

Quibus, tentatis omnibus remediis, nullum levamen adfertur, aut si levamen perceptum admodum exiguum est, neque durat, sique ægri vires continuo imminuuntur, & facies collabitur, præsertim si pulsus debilis & celerrimus hæc symptomata concomitatur; tunc nil boni sperare licet.

In his enim omnibus sub finem intumet venter, pulsus intermittit, labia oris fiunt pallida, aut livida, oritur in abdomine gangræna, accedunt convulsiones, extrema sudore gelido madent, tandem ægri admodum anxii continuo membra, & totum corpus hinc inde jactitant, anhelant, & plerumque dum alvum dimittunt, subito moriuntur.

De tussi, phthisi, &c. varia & mira observata collegi, verum ea nunc recensere nolui, quoniam de his morbis, si DEUS OPTIMUS vitam & vires benigne concesserit, paulo amplius scribere cogito.



SECTIONES ANATOMICÆ.

CADAVER PRIMUM.

HOMO quinquagenarius tussi, quam 20 annis laboravit, solito magis affectus fertur in nosocomium.

Respiratio erat laboriosa, pulsus inæqualis, naturali celerior, tussis frequens; sputa pauca prodierunt, eaque glutinosa, subflava; materies tamen sputis egerenda ex strepitu inter tussendum excitato mobilis videbatur.

Mistura No. 9. huic ægro adeo bene conduxit, ut intra paucos dies sat libere respirans, nec multa tussi vexatus nosocomio vale dixerit.

Per totam æstatem dein bene se habuit; ingruente vero autumnali tempore, & aëris vicissitudine recidivam passus nosocomium repetiit.

Anxie tunc respiravit, tussivit frequenter, sputa tenacia, ex fusco-viridia, magna cum difficultate rejecit; pulsus fuit inæqualis, vires languidæ.

Mistura N^o. 9. denuo exhibita parum juvit; qua de causa præter hanc misturam conservam N^o. 6. præscripsi, ut alternatim omni hora vel cochleare unum ex mistura vel drachmam unam ex conserva sumeret.

Unde brevi sputa copiosiora & facilia esse ceperunt.

Noctes, ob tussim continuam inquietas, paregoricis vespertinis tranquillas reddidi.

Per plures dies æger ex his remediis ingens levamen percepit, & brevi sibi integram curationem promisit. Verum contigit, ut aëris temperies sicca & calida subito in humidam & frigidam abiverit; unde denuo sublime respiravit, nec ullum sputum reddidit, & tussi inani multum defatigatus totum pectus exsiccatum conquerebatur.

Infusa igitur expectorantia cum oxymelle scillitico & stibio diaphoretico non abluto copiose ingeri jussi, & mane ac vesperi haustum ex ol. lini unc. IV. & grano uno opii tepide exhibui.

Intra tres dies sputa denuo multa, crassa

crassa & puriformia cum magno ægri levamine prodierunt.

Sputis rite procedentibus solo infuso hederæ terrestris, & pilulis, ex pulvere glycyrrhizæ & balsamo peruviano confectis, usus est, & omni vespera pargoricum assumpsit.

Ex his vires recuperavit, liberius respiravit, & tota die extra lectum esse potuit.

Appetitus semper magnus fuit, neque ingesta excitarunt anxietatem, nec observatæ sunt horripilationes vespertinæ, nec febris, nec sudor nocturnus, id tantum incommodi conquestus est æger, quod e somno frequenter anxius subito evigilet, quodque caput inter tussendum vehementer doleat. Sensim tamen omnia in melius mutata sunt.

Ast dum plurimum speravit, subito incidit in animi deliquium, & mortuus est.

Aperto abdomine omentum in frusta dilaceratum & semi-putridum inventum fuit.

Intestina tenuia omnia in pelvi latuerunt; intestinum colon, in globum convolutum, his incubuit.

Ventriculus, ingentis magnitudinis, sexdecim libras aquæ facile potuit reci-

pere ; hepar ex convexa parte a costis penitus compressum & ad sesqui pollicis profunditatem perfecte cartilagineum fuit.

Lien durus , fuscus , suo situ pelvim adtigit.

Renès plani , mole parvi , ultimis tribus lumborum vertebris adhæserunt.

Vesica urinaria fuit contractissima.

In thorace deprehendebatur pulmo sinister cum pleura firmissime concretus , totus siccus , friabilis.

Dexter vero erat niger , flaccidus , nigro , grumoso & tenaci sanguine infarctus , pleuræ quoque accretus.

In corde fuerunt magni polypi.

Ablato cranio sub dura matre conspiciebatur copiosum & valde tenax gluten. Lobos medios cerebri in superiore parte ad semi-pollicis profunditatem gangrena destruxit. Ventriculi cerebri erant penitus exsiccati , in rugas contracti.

In toto morbi decursu nullum unquam delirium observatum est.



CADAVER SECUNDUM.

HOMO, 58. an., pessima gangræna ad digitos pedis dextri affectus, & præterea tussi molesta laborans, curandus nobis offertur.

Ut gangrænæ limites ponerentur, præter alia remedia satis larga dosi datus est cortex peruvianus, & partes gangrænosæ saturato ejusdem corticis decocto continuo fovebantur.

Sputa remediis expectorantibus educata sunt.

Hac ratione intra paucos dies gangræna evanuit, & respiratio reddebatur longe liberior, & tussis minus frequens.

Post binas septimanas ægrum jam fere sanatum nova tussis subito corripuit, quæ summa vehementia fecit ilico faciem totam tumere, livere, oculos protuberare, linguam turgere, &c. & intra aliquot minuta, facta unica violentissima inspiratione, miserum enecuit.

Sectio anatomica in abdomine exhibuit omentum admodum breve & tenue, intestina tenuia arctissime contracta, crassa vero naturaliter inflata; hepar sanum.

Lien vero ex utraque parte planus, in circumferentia perfecte rotundus, mole parvus & tenuis, pondere vix unciam habuit.

Ventriculus, parvus, amplitudine vix æquabat cavitatem intestini coli; ejus substantia autem fuit admodum crassa, fortis; plicæ internæ profundæ.

Ren dexter superioribus lumborum vertebrae firmissime adnatus erat, sinister vix non totus in pelvi hæsit. Testiculi ambo intra annulos latuerunt.

Ablato sterno & costis detegebatur pulmo totus inflatus, durus, valde elasticus; aër inter membranam pulmones investientem effusus multas diversæ magnitudinis bullas efformavit.

Nulla pressione aër per asperam arteriam expelli potuit; pulmo in frustra dissectus nequaquam collabebatur, & omnia frustra æque inflata & elastica permanferunt.

An aër ruptis bronchiorum finibus universale pulmonis emphysema produxit?

Pericardium aqua limpida, insipida valde distentum reperiabatur; dexter cordis ventriculus, solito multo amplior, ex una parte fere disruptus, multum polyposum & grumosum sanguinem con-

tinuit ; in arteria pulmonali , præternaturaliter in saccum extensa , similis quoque sanguis erat.

Cor sinistrum , & arteria aorta naturalia deprehensa sunt ; venæ autem duræ matris & totius cranii varicosæ & nigro grumoso sanguine infarctæ.

CADAVER TERTIUM.

FEMINA , 60. aliquot ann. , ultimas fere vitæ horas agens in nostrum nosocomium translata est.

Faciem lividam , & corpus totum maculis subnigris & purpureis variegatum deprehendi.

Respiratio fuit frequens , parva , summe laboriosa ; pulsus minimus , inæqualis , sæpe intermittens.

Tussicula continua vires prostravit , sputum paucum , ichorosum , nigrum , pessime foetens , os & fauces erosit.

Præ debilitate ægra vix unum alterumve verbum proferre potuit.

Ex signis omnibus manifestum erat , totam sanguinis massam in putridum abiisse , & pulmonem gangræna & sphacelo consumi.

Rogabat ægra , ne in summis suis

miseriis cogeretur multa medicamenta assumere, utque solummodo pro faucium & pectoris ardore syrupus concederetur.

Paratus ei est ideo linctus ex syrup. diacod. mell. rosar. mucilagine seminum cydoniorum & paucis guttis spiritus salis acidii, ut inde fumeret, quantum placeret.

Assumpta una alterave uncia hujus linctus ardor pectoris paululum remisit, & ægra per vices dormivit, id autem semper corpore in anteriora inclinato; alius enim qualiscumque situs inter summas anxietates suffocationem minabatur.

Reliqua vero symptomata manserunt æque mala, imo subinde pejora fiebant; etenim frequenter totum corpus sudor frigidus occupavit, & tunc in extremis evanuit pulsus, & mortis signa imminuerunt; attamen natura lucando vicit sæpius; & post aliquot suspiria rediit pulsus & calor.

Inter lethales has vicissitudines tertio, quo in nosocomio fuit, die obiit.

Omentum erat putredine penitus consumptum, ventriculus parvus, in substantia sua valde crassus, hepar solito majus; cætera in abdomine sana.

Pulmo crusta tenaci, crassa, fusca, glutinosa investiebatur; qua ablata apparuit totus niger, putridus, foetens; discissus dedit saniem foetidissimam; praeterea per totam pulmonis substantiam tubercula numerosissima diversae magnitudinis inveniebantur, quorum plurima arrosa, & pro magna parte ichore consumpta fuerunt.

An pulmonis scirrhi in canculos mutati sunt? Pericardium fuit totum nigrum: cordis ventriculi sanguinem dissolutum, & pauca tenuia, polyposa filamenta gerebant.

Massa sanguinea penitus dissoluta, acris & putrida in omnibus vasis reperta est.

CADAVER QUARTUM.

VIR quinquagenarius, a pluribus annis tussi molestissima vexatus & totus emaciatus, in thorace sinistro pondus molestum, & continuum dolorem obtusum conquerebatur; praeterea admodum difficulter respiravit; sputa purulenta foetidissimo ichore mista egeffit.

Vesperi calores vagos, & horripilationes saepius repetentes habuit; noctes

fuerunt anxie , vires quotidie imminuebantur ; unde sensim vivere desiit.

In abdomine nil , notatu dignum , inventum est.

Pulmo autem dexter flaccidus , subniger & totus fere ulceribus exesus erat. Sinister in unum corpus rotundum , durum , scirrhosum concrevit , & pleuræ firmiter adhæsit , in aquam projectus gravissimi instar lapidis celerrime fundum petiit ; ex ea parte , qua pleuram adtigit , ad semi-pollicis profunditatem perfecte cartilagineus fuit : facta incisione binæ , magnæ , callosæ fistulæ detegebantur , quarum una tres largos sinus egit , & altera duos ; orificia harum fistularum cartilaginea in ramum majorem asperæ arteriæ hiarunt ; in earum cavitatibus acerrima sanies latuit.

Dexter cordis ventriculus , in magnum aneurisma extensus , valde tenuis ac debilis fuit ; columnæ carneæ capillum crassitie vix æquabant.

An hic difficilis fuisset cordis ruptura ?

In eodem ventriculo hæsit polypus magnus , albus , tenax.

Nullæ cordis palpitationes in hoc ægro observatæ fuerunt.

Pulsus semper parvus & inæqualis deprehensus est.

Sinister cordis ventriculus erat sanus.

CADAVER QUINTUM.

FEMINA, 52. ann., phthisi moritur.

Aperto thorace invenitur pulmo ubique adcretus, flaccidus & vomicis innumeris refertus.

In abdomine erat omentum tenuissimum, semi-putridum. Hepar naturalem figuram & magnitudinem habuit.

Verum in substantia sua septem, sesqui pollice latos, vere cartilagineos, & ex convexa in concavam hepatis partem penetrantes, cylindros gessit.

Cæterum totum hepar fuit sanum : ut & reliqua abdominis contenta.

CADAVER SEXTUM.

VIR, 34. ann., febris tertianæ vernalis paucos paroxysmos passus, ab empirico, dato ignoto remedio, febre liberatur.

Fugata febre incipit languere, amittit appetitum, & tandem gravitatem

atque duritiem cum obtuso dolore in hypochondrio dextro conqueritur.

Post aliquot dies hypochondrium sinistrum quoque obtuse dolere incipit, & durus quoque tumor de die in diem mole increascens advertitur.

Datur igitur ab eodem empirico purgans, quod satis fortiter operatum est.

Binis, a dato purgante, diebus venter, scrotum pedesque intumuerunt.

Tumor quotidie augebatur, atque per universum corpus sese extendit: respiratio fiebat anhelosa, cor, per vices palpitans, ægro diras sæpe anxietates excitavit; pulsus erat intermittens ac debilis; & præterea supervenit frequens leipothymia; vires omni momento minuebantur.

Æger pessimo hoc in statu fertur ad nosocomium.

Periculosissima symptomata vetabant remedia ad morbum debellandum necessaria.

Parabatur jalapium vires refocillans, & leniter diureticum; verum vix bina adhuc cochlearia assumpsit, dum mors accessit.

In abdomine magna aquæ subrubellæ, turbidæ, copia fluctuavit.

Hepar scirrhosum, innumeris granu-

lis duris, flavis, compactum erat.

Vesicula fellea vero continebat liquorem albumini ovorum, quoad consistentiam, colorem & saporem simillimum; pondus hepatis erat trium lib. & unciae unius.

Lien squamosus, tenax, mole magnus pondere, quoque tres libras habuit.

In cavitate pectoris fuerunt octo libræ aquæ limpidissimæ, insipidæ.

CADAVER SEPTIMUM.

VIR sexagenarius ante 5. circiter annos cecidit in posteriora, & lumbis in lapidem impegit; dolorem, inde natum, non multum curavit, dolentique loco emplastrum applicuit; cætera reliquit naturæ.

Per plures dies dolorem ibi acute dolentem, & continuo pulsantem habuit; neminem de consilio rogavit, solo suo emplastro fretus; tandem dolor acutus remisit, & mansit quædam sensatio ingrata, continuo formicans, rodens & subinde urens.

Hanc sensationem vir, laboribus assuetus & pauper, flocci fecit; emplastrum abiecit, & sudore panem quæsit.

Elapso circiter medio anno oritur eodem in loco tumor ruber, non admodum dolens; huic emplastrum denuo adposuit, quo facto intra paucos dies tumor rumpebatur, & effluxit copiosus ichor foetidus cum multis ossium fragmentis.

Ab eo tempore, quo tumor est apertus, uxor curam gessit; & ab initio quotidie diligenter ichorem expressit, & dein emplastrum suum domesticum superimposuit.

Postea vero rem negligere cepit, & solummodo omni biduo, aut triduo maritum suum deligavit; ichor subinde copiosus prodiit, subinde admodum paucus.

Dolor tandem per totum dorsum in diversas partes se extendit, æger frequentes habuit horripilationes, & sæpius per diem in dorso magnum ardorem percepit.

Malum hoc modo tulit absque prudenti auxilio per 5. circiter annos, demum incidit in sudorem nocturnum & tabem.

Hac in miseria constitutus nosocomium adivit.

Facto debito examine:

Optimus Chirurgus HAFFNER, &

ego ad lumborum vertebrae fistulam, copioso & foetido ichore manantem invenimus; æger fuit debilis, totus consumptus.

Symptomata lethalia omnem operationem chirurgicam prohibebant; factæ tamen sunt bis de die injectiones ex infuso herbarum vulnerariarum cum melle & pauca aloë.

Injectiones hæ nobis manifeste indicabant, fistulam per totum dorsum agere sinus; idem ex copia materiæ injectæ, & sensu ægri, & ex adtactu inter injiciendum clare apparuit.

Pro medicamento dabantur pilulæ ex oliban. pulv. glycyrrh. & bals. peruv. superbibendo infusum salv. agrimon. vig. aur. &c.

Præterea solo lacte & jusculis æger nutriebatur.

Alvus fuit admodum immorigera, & omni alterno die enemate provocari debuit; hoc si factum non est, tunc supprimebatur urina, & magno cum dolore inguinum & ventris supra pubem apparuit tumor durus, subrotundus.

Educta dein alvo liberrime prodiit urina, & cessarunt dolores.

Id incommodi jam domi suæ habuit, & ideo omni tertio die tempore

matutino infusum fol. fennæ bibit.

Per tres fere septimanas miser in vita conservabatur; primis octo diebus vires paululum augebantur, & mens fuit alacrior, postea vero quotidie omnia pejora fiebant, donec mortuus est.

Stylo exterius introducto fistulam fecuimus, & cunctis accurate confideratis, vidimus inter omnes tum dorsi, tum lumborum musculos sinus diversæ amplitudinis & figuræ esse; quidam infra scapulas penetrabant; unus circa quintam costam veram, a superiore numerando, in latere thoracis dextro perforavit muscululum intercostalem, & inter costas & pleuram varios iterum sinus formavit; pleuram tamen non perfodit.

Contenta thoracis & abdominis fuerunt naturalia.

Solum intestinum rectum binis a suo principio digitis in parte dextra extendebatur in saccum membranaceum, intestino cæco haud absimilem. Saccus hicce durissimis scybalis plenus erat. Reliqua intestini recti portio ad anum usque inveniebatur valde crassa, fungosa, & adeo angusta, ut fœces compactæ nullo modo potuerint transire.

CADAVER OCTAVUM.

FEMINA ebria cadendo fronte in durum obstaculum impingit, & paulo post moritur.

Cadavere denudato, præter levem in fronte contusionem, & ventris præter naturalem molem nil deprehensum est.

Ablatis omnibus cranii integumentis, cranium integrum erat.

Remoto cranio inveniebatur ad lobos posteriores cerebri ingens copia sanguinis grumosi, extravasati; sed longe major quantitas similis sanguinis cerebellum totum compressit.

In thorace omnia fuerunt sana.

Aperto abdomine, omentum bonum fuit, & ventriculus naturalis, dissectus autem liquidum continebat, quod ingratißimum acidum fermentationis gas spiravit.

Intestina tenuia aëre multum distendebantur, intestinum cœcum, inflatum & elasticum, tantam cavitatem habuit, ut duodecim libras aquæ facile receperit. Valvula BAUHINI, abolita, nullum sui vestigium reliquit. Intestinum colon erat in chordam durissimam contractum

usque ad eam partem, qua flexuram sigmoideam format, & in rectum abit.

Tota hæc flexura in præternaturale volumen extensa diametro spithamam superavit. Hepar sanum fuit.

Vesicula fellea $2\frac{1}{2}$. poll. ultra limbum hepatis prominuit, & in sua cavitate 250. calculos piso, mediocris magnitudinis, æquales recondidit.

CADAVER NONUM.

FÆMINA, 49. ann., a tribus mensibus ventris hydrope affecta, nullum unquam levamen habuit, licet omnis generis remedia diuretica, purgantia, &c. fuerint tentata, imo vires inde minuebantur, & venter magis increvit.

Conclusi igitur paracentesi abdominis instituere; & hac ratione LX. lib. aquæ limpidæ, insipidæ, & inodoræ eduxi.

Rite peractis omnibus, & ventre debito modo compresso, denuo remedia diuretica lenia, dein fortiora tentavi; verum omnia erant incassum.

Alvus per 6. dies sponte prodiit copiosa; septimo die autem retinebatur, & venter paululum cepit turgere; dato tunc purgante multæ fœces, & copio;

sa aqua erupit ; atvero ægra ne minimum levamen percepit , imo venter in dies notabiliter intumuit ; & vires reddebantur minores.

Medicamenta quæcunque , paulo fortius agentia , nocuerunt.

Quapropter , ne ægra nimio medicamentorum usu perderetur , cura solummodo palliativa instituenda fuit.

Quatuor à prima operatione septimanis ventris tumor & reliqua symptomata secundum paracentesin postularunt.

Aqua profluens erat priori copia & qualitate similis.

Ægra post operationem nihil omnino mali conquesta est , imo se ab onere liberatam gaudebat , & pulsus , qui erat antea parvus & inæqualis , denuo bonus reddebatur ; respiratio prius anxiosa fiebat libera ; sputis multum gluten prodiit , vires auctæ sunt.

Posthac iterum omnibus symptomatibus , quantum fieri potuit , remediis lenioribus occurrebatur. Nihilominus ventris moles denuo increvit , & post quinque septimanas ad tertiam operationem deveniendum fuit , qua sexaginta quatuor libræ aquæ insipidæ , limpidæ prodierunt ; & ægra ingens levamen habuit.

Per quatuordecim dies ægra sine ventris tumore in optimo statu permansit; dein vero amisit appetitum, cepit languere, venter celerrime intumuit, pulsus factus est debilis & intermittens, respiratio anhelosa, suffocativa, extrema frigida. Ægram igitur morti proximam vidi, & quoniam a nullo medicamento inter lethalia hæc symptomata auxilium sperare licuit, decrevi quarta vice paracentesin instituere.

Quod optimo cum eventu factum est; etenim ilico ab operatione, moribunda denuo revixit, respiravit liberius, pulsus, antea minimus & intermittens, comparuit liber, fortis, æqualis.

Per binos dies cum omnium admiratione mens ægræ admodum alacris fuit, & vires bonæ.

Verum paulo post inflabantur pedes, apparuerunt maculæ latæ, lividæ, supervenit in pede sinistro gangræna, & intra paucos dies mors secuta est.

In abdomine reperiiebatur aqua turbida, foetida. Omentum tenuissimum, ad fundum ventriculi convolutum; intestina tenuia naturalia, colon vero totum contractissimum.

Hepar magnitudine pugnum vix æquavit, penitus siccum fuit, rotun-

dum, grave, valde durum & iners.

Vesicula fellea, tota exsiccata & rigida, in sua cavitate calculum albicantem, figuram vesiculæ perfecte referentem, inclusit.

Systema igitur biliosum in hac foemina erat inutile. Nullum tamen unquam bilis vestigium in oculis, facie, aut alia corporis parte observatum est.

Nec olim ictero aut alio morbo laboravit; quod ejus cognati post mortem testabantur.

Omnia reliqua abdominis & thoracis contenta sana & naturalia inventa sunt.

CADAVER DECIMUM.

PUER decennis ex febre acuta restitutus & sanus, eo die, quo nosocomium relinquere, & suos parentes denuo voluit adire, subito languit, summa cum anxietate respiravit, continua tussicula sicca, & enormi siti vexatus est; oculi facti sunt concavi, tristes; genæ, & oris labia livere ceperunt; extrema mox gelida, mox urentia deprehensa sunt. Pulsus fuit ilico debilis & intermittens; æger tamen mente omnino præsens nulla in parte dolorem conquerebatur. Verum

præ anxietate vix unum alterumve verbum proferre potuit. Venter nec tumuit, nec ad tactu durus aut dolens videbatur.

Hinc fas erat concludere, malum in solo pectore, & maxime circa partes vitales hæerere. Manu pectori admota percipiebatur cor celerrimo tremulo motu agitari, nunquam autem debito modo contrahi, aut palpitare.

Respiratio pessima, vires penitus prostratæ, pulsus debilissimus, & alia lethalia signa primo statim die spem omnem curationis demebant.

Nihilominus tamen ea, quæ ratio & ars suaserunt, sedulo applicata & exhibita sunt.

Verum, his non obstantibus, malum semper increvit, tertio die æger factus est stertorosus, facies cadaverosa, extrema frigida.

Pulsus vix amplius percipi potuit; respiratio erat rara, minima; expirantis halitus deterreme foetuit; tandem totum corpus occupavit sudor frigidus, & adeo tenax, ut tangentis digitos, & lecti linteamina moribundi corpusculo adglutinarit; & eodem die inter anxias luctationes miser obiit.

Aperto thorace, lobus superior tam dextri quam sinistri pulmonis totus ni-

ger, & in liquamen nigrum foetidum, que corruptus reperiabatur.

Reliqui lobi sani erant, exterius autem crusta flava, densa, & $\frac{1}{3}$. poll. crassa investiebantur, atque pleuræ & diaphragmati mediante hac crusta adhæserunt.

Dissecto pericardio, cor in sacco coriaceo, flavo, tenaci, semi-pollicem crasso, exterius hirsuto, piloso, interius glabro, latuit, in utroque cordis ventriculo magni polypi fuerunt; cæteroque totum cor sanum fuit.

In abdomine erat omentum admodum breve, & tenuissimum; intestina omnia naturalia & sana.

His autem quasi superfusa incubuit copiosissima materies tenax, crustosa, similis ei, quæ pulmones investivit.

CADAVER UNDECIMUM.

VIR, 36. ann., ex quartana, ab empirico subito suppressa, fit asciticus.

Sumptis dein, tam a medicis, quam vetulis & empiricis, diversissimis remediis, nullum unquam levamen expertus est.

Morti tandem adpropinquans ad nosocomium deportatur.

Pulsus inæqualis , parvus , respiratio sublimis , anxia , sitis magna , vires prostratæ , venter valde tumidus , & durus , &c. curam impossibilem ilico præfagebant ; unde palliative agendum fuit.

Post binos dies ægro paracentesis proponebatur ; verum eam sibi fieri recusavit.

Hinc paucos post dies inter medias aquas sitibundus suffocatus est.

Facta in cadavere paracentesi , aqua copiosissima , subflava , insulsa , profluxit.

Dissectis integumentis , inveniebatur omentum fundo ventriculi adpressum & tenuissimum.

Hepar scirrhosum , magnum , pondere $11\frac{3}{4}$. libras civiles habuit. Lien durus & cæruleus 5. libras civiles ponderavit.

Intestina omnia naturalia erant , solum colon in chordam contractum repertum est.

CADAVER DUODECIMUM.

FÆMINA , 40. aliquot annor. , longo jam tempore duritiem & tumorem gravantem in hypochondrio dextro , & in

epigastrio advertit, & quoniam magnum inde incommodum non habuit, nullum auxilium quæsit.

Postea vero febre quotidiana prehensa nostrum nosocomium adiit.

Decoctum resolventissimum, quod febris nimium impetum infringeret, & naturæ conamen in solvendis his tumoribus (si eos resolvere foret possibile) adjuvaret, copiose ingerebatur.

Plures paroxysmos facile tulit, & febris mitior fuit.

Contigit tamen, ut alio die tempore paroxysmi in loco tumido & indurato epigastrii dolor valde acutus fuerit ortus, unde vires ilico prosternebantur, supervenit frequens vomitus biliosus, sitis magna, pulsus celerrimus, parvus.

Dolor levissimo adtactu fiebat longe intensior; pessima igitur inflammationis signa sese manifestarunt.

Venæ sectio ob summam virium debilitatem celebrari non potuit. Externe cataplasmata emollientissima applicata sunt. Pro usu interno emulsum cum pauco nitro, edulcoratum syrupo diacod., exhibebatur.

Vomitibus inde minus frequens fuit, & ægra poterat juscula, & infusa de-

luerant sine vomitu assumere ; imo sequabatur somnus unius horæ.

Verum vires nullo modo reficiebantur ; nulla mutatio , quæ vel minimam spem adtulisset , observata est ; e contrario accessit anxietas , respiratio sublimis , livor labiorum , faciei pallor , extremorum frigus lethale ; pulsus tangebatur minimus , inæqualis , frequenter intermittens , denique ad finem diei secundæ , remittente dolore , omnia signa gangrænam præsentem clamabant ; & obiit ægra nocte insequente.

Omentum deprehendebatur totum steatomatosum , una spithama latum , quatuor poll. longum , & quinque poll. crassum ; ex anteriore parte erat sphacelo arrosum , pondere quinque libras habuit.

Pancreas , quoque steatomatosum , pondere libras duas paululum excessit.

Hepatis lobus dexter fere naturalis fuit ; sinister autem erat colore albus , steatomatosus , solito triplo major.

Vesicula fellea materie steatomatosa penitus involuta 130. calculos cavitati suæ inclusos gessit.

Lien totus inflammatus & semi-pu-
tridus fuit.

Ex

Ex intestinis & mesenterio innumera corpora rotunda, steatomatosa, nuces juglandes magnitudine æquantia, extuberarunt.

Mesocolon erat valde magnum, & totum steatomatosum.

CADAVER DECIMUM TERTIUM.

HOMINI, 27. ann. ex pleuritide empyematico, & adeo jam a sudore nocturno emaciato, ut capilli ceperint defluere, in summo suffocationis metu paracentesis thoracis me suadente à peritissimo mei nosocomii chirurgo HAFNER instituitur, educunturque puris subfoetidi, attamen sat bene colorati, lib. X.

Educto pure suffocationis metus disparuit ilico; verum æger fuit admodum debilis, extrema frigida, pulsus exilis: sequebatur animi deliquium.

Vino bono austriaco, repetitis vicibus cochleatim exhibito, & jusculis vires denuo revocare conabamur; quod effectum non caruit; etenim sensim increvit pulsus, & calor naturalis rediit.

Storck Ann. I. Tom. I. G

Postea dato paregorico ægrum ad somnum composuimus.

Lateri vulnerato incumbenti & dormienti multum puris & sanguinis ex vulnere effluxit.

Nox tota hac ratione tranquilla fuit.

Mane æger bene habuit, pulsus fuit liber, sat fortis, respiratio multum emandata; sitis mediocris, tussis vero molestissima, & non nisi opio moderanda.

In cavitatem thoracis per vulnus mane & vesperi tenui syringa decoctum hordei cum melle & bals. peruv. nigro, vitello ovi soluto injectum est.

Prodiere semper injectiones citra ægri incommodum, mixtæ materia purulenta & sanguine.

Altera a facta paracentesi vespera æger conquerebatur, quod lateri dextro (id est lateri, operatione vulnerato) præ anxietate & suffocationis metu incumbere non possit, quodque in latere sinistro (quod ante operationem erat impossibile) longe tranquillius dormiat.

Symptoma hoc novum ilico nobis triste & suspectum videbatur.

Noctem denuo opiatis quietam reddidimus.

Mane æger sat lætus erat, pulsum bonum habuit; sedenti respiratio fuit facilis, sed in dextrum latus decumbenti revertebantur priores molestiæ & anxietates.

Nihilominus tamen ea, quæ ad ulcus pleuræ purificandum, atque sensim consolidandum erant necessaria, sedulo continuabantur.

Quarto ab operatione die, factis injectionibus, observavimus puris copiam imminui, & simul ex vulnere frustra membranacea prodire.

Res cum ulcere & vulnere cessit optime.

De die ægrum diæta leniter nutriende, infusis vulnerariis, emulso paregorico, & linctu pectus, a tussi sicca defatigatum, humectante, conservare, & reficere sumus conati.

Noctes vero paregoricis, & opiatís quietas reddere jam non amplius fuit possibile; etenim quamvis æger tranquille cepit dormire, paulo post tamen derepente evigilavit totus anxius, fere suffocatus, & dirum cordis tremorem conquerens.

Ex pessimis signis clare patebat, in cavitate thoracis sinistra hæcere quoque humorem effusum.

Proponebatur ideo viribus paululum reſectis, ſexto ab operatione die, paracenteſis lateris ſiniſtri, verum æger mori maluit, quam dubiam operationem ſubire. Hac ex parte igitur fato ſuo relictus eſt.

Ulceri vero & vulneri pro viribus ſuccurrebatur.

Nono die per vulnus in thoracis cavitate inſiſcendo advertēbatur, pulmonem loco, prius exulcerato, ſenſim adcreſcere.

Æger per diem extra lectum in ſedili quieſcens, aut lateri ſiniſtro incumbens belle ſe habuit, appetiit, non ſitivit, vires longe majores ſenſit; verumtamen pulſus ſubinde inæqualis & intermittens fuit, reſpiratio ſolito difficilior, tuſſis frequens, ſicca.

Noctes fuerunt ſemper anxie, turbatæ, ſuffocationem minitantes; præterea ſudor copioſus nocturnus ægrum debilitavit; verum ſudori huic ſaturatum ſalviæ infuſum brevi limites poſuit.

Undecimo a b operatione die, conſolidato fere ulcere, jam de ſanando vulnere cogitavimus.

Toto undecimo die æger lætus fuit, & nil omnino conqueſtus eſt; hora octava

tava vespertina hilari mente sese ad somnum composuit, & placide cepit dormire.

Verum post aliquot minuta subito evigilavit, violente corpus erexit, ore aperto & facie tumida, livida, aërem quæsit, tandem extremis friguit, & anxius cessavit vivere.

Caute aperto thorace invenimus cavitatem sinistram aqua limpida penitus repletam, distentam; pulmonis sinistri autem loco vidimus corpus rotundum, durum, colore cæruleum, magnitudine pugnum virilem vix adæquans; discissum hoc corpus penitus exsuccum, tenax & coriaceum fuit.

In cavitate dextra reperiebatur pulmo hinc inde leviter accretus, cæteroque vero integer & sanus.

Plaga ulceris, quæ spithamam fere longa, & lata erat, tenuissima subrubella membranula obducta videbatur, exceptis iis locis, ubi pulmo adhæsit.

Pericardium quoque aqua limpidissima plenum, & solito longe majus inventum est.

Cor autem sanum in suis cavitatibus nec sanguinem nec polypos habuit.

Ventriculi cerebri præternaturalem quoque lymphæ copiam continebant.

Si nullum vitium in thorace sinistro latuisset, hicce æger certo certius paracentesi fuisset salvatus.

In aliis tamen binis ægris, facta hac operatione, longe feliciores fuimus: uni idem chirurgus HAFFNER magnam boni puris copiam eduxit, & intra sexdecim dies eum integre restituit.

In altero autem ægro longiore tempore opus habuimus: etenim erat is totus emaciatus, & humores erant acres, scorbutici.

Pus operatione prodiit foetidum, valde copiosum; costa ultima vera lateris dextri, penitus cariota, abiit in numerosa fragmenta, & sensim totum ejus corpus, relictis solummodo extremis, excidit.

Vulneri, arte chirurgica facto, sese pulmo magna vi intrusit, qui colore niger & omnino gangrænosus fuit.

Diuturno tamen usu conservæ N. 7, & lacte, & sero lactis copiose hausto, magna pulmonis frustra separata sunt, injectionibus & remediis chirurgicis vulnus rite consolidatum fuit, & intra quatuor menses æger (quod nobis magno solatio fuit) vires & sanitatem recuperavit.

CADAVER DECIMUM
QUARTUM.

FÆMINA quadragenaria biennio abhinc, onus ex tergo gestans, cecidit in anteriora, & ab eo momento sæpius cordis palpitaciones, atque dolorem, in anteriore & posteriore parte thoracis sinistri pulsantem, advertit, neque onus ullum amplius portare, neque scalas citra summam anxietatem & cordis palpitacionem ascendere potuit.

Dum cor palpitabat, sentiebatur simul in hypocondrio sinistro & circa 4. 5. 6. costas, ab inferioribus numerando, in eodem latere duobus aut tribus digitis a spina dorsi pulsatio ingrata, dolens & thoracem angustans.

His in circumstantiis, ægra binis vicibus sibi sanguinem e vena misit, & unico purgante primas vias exoneravit, cætera reliquit naturæ. Post unam alteramve septimanam accessit tussicula sicca.

Elapso tandem integro anno eum ad locum, ubi in parte posteriori thoracis pulsatio percipiebatur, adparuit tuberculum molle, quod pulsando pulsui arteriæ & cordis palpitationi perfecte

respondit, tuncque ad omnes tempestatis vicissitudines majores dolores, & anxietates oriebantur.

Diversissima remedia, dein exhibita, nullum levamen adtulerunt, imo malum in dies increvit adeo, ut misera ad nullum amplius munus apta, nostrum nosocomium debuerit adire.

Tumorem ex posteriore parte thoracis pulsantem ovo gallinaceo paulo majorem tunc deprehendimus, atque ex omnibus rite perpensis aneurisma esse conclusimus.

Ægra appetitum bonum semper habuit, neque ab ingestis multumangebatur; tussi sputa purulenta, foetida rejecit.

Toto die pulsus sat æqualis & liber fuit; neque unquam intermisit; omni autem vespera accessit febris, calor, anxietas & tussis longe violentior, sicca; unde noctes fuerunt inquietæ; atque præterea ægra sudore nocturno copioso, ingrate olente multum defatigata est.

Pulsus fuit subinde nimium fortis, plenus, celer, & palpitationes atque anxietates adauxit, unde venæ sectionibus & remediis saponaceis, nitrosis, subacidis compesci debuit.

Sputa oxymelle simplici, scillitico,

Itib. diaph. non abl. &c. incisa, & educta sunt.

Dum noctes fuerunt infomnes, aut dum nimiae cordis palpitationes ægram vehementer divexarunt, tunc opium exhibitum magnum semper levamen adtulit; attamen opii dosis sensim multum augeri debuit.

Quandoque per plures dies nullæ omnino cordis palpitationes advertebantur, & tunc tumor aneurismaticus longe minor & mollior fuit; postea vero priores calamitates citra manifestam causam subito magna cum violentia rediere, & mox tumor iterum increvit.

Hæ tamen vicissitudines minus lethales fuissent, si vires febre vespertina, & sudore nocturno non fuissent consumptæ; unde ægra sputum amplius proferre non potuit, & anxie suffocata est.

Octo diebus ante mortem cordis palpitaciones penitus cessarunt, & tumor aneurismaticus fere totus disparuit, neque amplius pulsavit; ita quidem, ut ii, qui ægram antehac non viderunt, nullo modo crediderint latere aneurisma.

In pulsu nulla unquam intermissio observata fuit.

Aperto thorace vidimus pulmonem

crassa, gelatinosa crusta circumdatum; præterea in ipsa substantia numerosæ vomicæ, & multa ulcera reperta sunt.

Aspera arteria pure crasso, tenaci plena fuit, & pericardium aqua multum distendebatur.

Cor in utroque ventriculo magnos polypos habuit.

Arteria aorta a suo ex corde principio usque ad finem curvaturæ erat præternaturaliter dilatata, & valde aneurismatica, dein vero descendens circa 4. & 6. costas lateris sinistri, ab inferioribus numerando, abiit in saccum magnum, costis & partibus vicinis adhærentem.

Saccus hic intra 4. & 5. costam penetravit, & exterius in dorso tumorem, vivente ægra pulsantem, effecit.

Costa quinta inveniebatur penitus diffracta, costæ autem vicinæ, ut & vertebræ cariosæ, & saccus aneurismaticus grumoso & polyposo sanguine infarctus.

Supra hunc saccum arteria aorta binis in locis per totum circulum perfecte cartilaginosa fuit.

CADAVER DECIMUM
QUINTUM.

FEMINA, 39. annorum, hydrope ventris, tussi sicca, frequenti, & magna pectoris anxietate affecta nosocomium ingreditur.

Enormis ventris moles, & respiratio inde suffocativa paracentesin ilico exigebant; qua facta, 60. libræ aquæ subrubellæ, glutinosæ effluxerunt.

Imminuta ventris mole, respiratio fuit facilior, pulsus liberior; sed mansit tussicula sicca, frequens, & accessit id incommodi (quod ante operationem non observabatur) quod nimirum in latus sinistrum citra suffocationis metum decumbere non potuerit.

Signis & circumstantiis rite examinatis, nil suppurati in pectore se manifestavit; unde aqua effusa conjiciebatur, quoniam obscuræ fluctuationis signa simul aderant.

Timor ægræ, & vires (licet post abdominis perforationem paulisper increverint) adhuc debiles non admisere pectoris paracentesin.

Abdomen per 14. dies mansit parvum, naturale; verum duri & inæquales tu-

mores tam in epigastrio, quam in hypogastrio dextro advertebantur.

Remedia solventissima & emollientia, alvum & urinam leniter moventia, tunc sedulo data sunt, quæ quidem circa pectus levamen attulere, & auxerunt vires; nihilominus tamen venter sensim iterum tumere cepit.

Fortiora diuretica tunc in usum vocata non moverunt urinam, & majores denuo pectoris anxietates excitarunt.

Pulv. cornach. omni tertio die ad dr. i. datus cum euphoria aliquoties movit alvum; reliqua autem purgantia vel vires prostraverunt, vel præter anxietates fecerunt nihil.

Hac methodo ægra per binos menses conservata fuit, dein vero ingruente tempore pluvioso derepente mortua est.

In abdominis cavitate magna effusi serii copia fluctuavit.

Hepar fuit totum scirrhosum, pars ejusdem sinistra, ad fundum ventriculi in sarciminofum tumorem extensa, pergebat usque ad lienem & cum eo in unum continuum concrevit.

Lien, ventriculus & intestina fuerunt sana; solum colon contractum reperiatur.

Ovarium dextrum duos magnos ro-

tundos tumores, materie purulenta plenos, efformavit, uterus & ovarium sinistrum in naturali statu fuerunt.

Pectoris cavitas dextra fuit aqua limpida impleta, sinistra vacua; pulmo sinister sanissimus; dexter quoque sanus & in lobos suos rite divisus, sed mole & figura simillimus pulmoni infantis unius anni.

CADAVER DECIMUM SEXTUM.

HOMO, 49. ann., mense octob. 1758. ascite, & pessima anasarca laborans solo vino scillitico N^o. 23. curatus est, ita quidem, ut tumor omnis disparuerit, redierintque vires; sed ad fundum ventriculi mansit quædam durities immobilis, ad quam dispellendam remedia maxime solventia sunt adhibita.

Verum æger, multarum prolium pater, quoniam ab hac duritie nullum incommodum sensit, & vires satis bonas habuit, renuebat amplius in nosocomio manere.

Domi suæ lucrando pani intentus medicamenta neglexit, quo factum est,

ut post paucas septimanas prior morbus ceperit reverti.

His in miseriis denuo nosocomium repetiit.

Datum vinum scilliticum non profuit, purgantia debilitarunt vires, & licet magnam liquidi copiam eduxerint, ventris tamen molem non mutarunt; sed, quod pejus erat, eam quandoque adauxerunt.

Urina nullo remedio moveri potuit; imo quo fortius diureticum est exhibitum, eo minor urinæ copia profluxit, & orta est stranguria.

Unde paracentesis institui debuit, qua LXXX. lib. aquæ crassæ, rubræ, prodierunt.

Evacuato ventre, tangebatur in epigastrio tumor durus longe major, quam post curatum hydropem mense octobri.

Externe tunc apposita sunt fomenta emollientia, discutientia, interne datum est vinum scilliticum cum sale polychresto, terra foliata tartari, &c. verum sine effectū.

Intra paucos dies venter iterum tumere videbatur; æger tamen appetiit; remedia purgantia vires diminuerunt citra ullum levamen.

Solventia & fortia diuretica optatum finem quoque non adtigere.

Quarta a prima operatione septimana ventris moles, & anxiosa respiratio alteram paracentesin postulabant.

Aquæ æductæ copia erat æque magna, ac in prima operatione.

Tentata posthac diversissima remedia solventia, diuretica, purgantia ægrum nullo modo allevaverunt, & produxerunt anxietates.

Solum vinum N^o. 34. movendo alvum, & urinam paulo copiosius pellendo, ægro maxime conduxit.

Nihilominus tamen post quatuor circiter septimanas ad tertiam paracentesin deveniendum erat, idque in eodem ægro, interposito semper temporis spatium quatuor circiter septimanarum, octo vicibus fieri debuit. Post quamlibet paracentesin advertebatur durities volumine multo major, atque sensim infra umbilicum se extendit.

Æger stare non potuit ob ingratum hujus duritiei pondus, & inde supervenientes dolores, anxietates, animi deliquia.

Appetitus mansit semper bonus, vires tamen fuerunt mediocres, sitis subinde pauca, subinde magna, subinde

vero nulla observabatur ; corpus sensim emaciatum est.

Post septimam paracentesin æger per 14. dies citra notabilem ventris intumescentiam bene se habuit ; dein vero venter longe citius increvit , & accessit horror , febrisque vespertina , & tussis , & sudor nocturnus , vires evanuerunt , & appetitus ; atque ideo octavam paracentesin non amplius instituere licuisset , nisi suffocatio, omni momento ex enormi ventris mole & anxietate timenda , palliativum , anceps , & audax remedium postulasset.

Hac operatione 100. libræ aquæ turbidæ prodierunt , & æger ilico melius habuit , longe liberius respiravit , appetiit denuo ; siti autem magna & continua posthac vexatus est.

Vesperis semper rediit febris cum tussi molesta & sudore defatigante ; unde æger totus depastus decimo ab octava paracentesi die ex virium defectu obiit.

Ablatis prudenter ventris integumentis repertum est omentum ad pelvim usque extensum formans crassum , tenacem , membranaceum faccum , cujus pars anterior undequaque peritonæo firmissime adhæsit , posterior hinc inde cum intestinis concrevit.

Cadaver decimum-sextum. 161

Intestina fuerunt penitus compressa, contracta.

In cavitate abdominis nulla aqua fuit.

Discisso sacco effluxit aqua copiosa, rubra, foetida; dein in eodem sacco tumor steatomatosus, figuræ irregularis, & 22. libras civiles ponderans, latuit.

Renes erant adplanati, pallidi.

Hepar sanum; lien & ventriculus naturales; pulmones compressi, flaccidi.

In utroque thoracis cavo multum serum deprehensum est.

CADAVER DECIMUM
SEPTIMUM.

FEMINA, a tribus septimanis pessimo ictero affecta, tandem moribunda fertur in nosocomium, & spatio unius horæ moritur.

Non tantum cutis totius corporis profunde flava erat, sed & ungues, oculi, oris labia, palatum, & lingua eodem colore tincta conspiciebantur.

Sectione anatomica nulla pars membranacea, nulla vena aut arteria, nul-

lum in quacumque cavitate latitans viscus detectum est, quod non fuisset croceo colore tinctum. Ipsum cor, corticalis cerebri substantia, & serum, in cavitatibus cerebri repertum, eundem colorem habuerunt.

Cartilagines & omnia ossa, tam in superficie externa, quam in ipso medullio flava fuerunt.

Sanguis erat dissolutus, fuscus.

In hepate & vesicula fellea præter colorem præternaturalem nil accusari potuit, in ductu autem cystico calculus inæqualis, valde durus, scrupulum unum pondere paululum excedens, adeo pertinaciter impactus hæsit, ut nulla vi antrorsum, postrosumve premi potuerit; sectione debebat extricari. In cavitate vesiculæ felleæ fuit pauca bilis, eaque lenta, granulosa.

Tantillus igitur calculus tot calamitatum & mortis causa?



CADAVER DECIMUM
OCTAVUM.

FŒMINA , 36. annorum , dum noso-
comium intravit , debilis fuit , sputa
foetida , purulenta rejecit ; noctu febre
depascente , & copioso , foetidoque su-
dore defatigata est.

Ventrem tunc inveni tumidum , aqua
plenum ; in regione umbilici tangebatur
moles magna , rotunda , subdura ; in
epigastrio latuit corpus durum , elasti-
cum , quod intropressum resiliendo stre-
pitum excitavit.

Ægra ab omnibus cibis abhorruit ; si
bina ternave alimenti cochlearia ei in-
gesta sunt , anxia facta est , & sensim
molesto vomitu plurimam partem red-
didit.

Pulsus fuit valde debilis , inæqualis ,
& totum corpus maculis lividis , scor-
buticis variegatum.

Alvus immorigera enematibus nullo
modo promoveri potuit , etenim ea vix
injecta mox prodierunt iterum , & mag-
nos ægræ dolores excitavere.

Pessima symptomata ilico edocebant :
vitam hujus ægræ plurimum periclitari.

Ut tamen ex arte negligeretur nihil,
utque pulmoni, ventri tumido, &
dispositioni scorbuticæ paulisper iretur
obviam, præscripsi sequens remedium:

℞. pulv. rad. jalap.
sal. polychr. aa. dr. j.
conserv. nast. aq.
oxymell. scillit. aa. unc. ij.

M

S. sumat ægra omni trihorio parvum
cochleare, & superbibat tria cochlea-
ria jusculi vitulini.

Ægra hoc medicamentum, & jus-
culum retinuit, & magnum inde leva-
men advertit: nam sputa ilico fuerunt
faciliora, & tanta urinæ copia profluxit,
ut intra binos dies venter ab aqua peni-
tus liber fuerit.

Alvus autem admodum pauca, eaque
glutinosa & multum foetida educta est.

Reliqua in priori statu permanserunt.

Nihilominus vis vitæ sensim desiit,
& ægra succubuit.

Pulmonem deprehendimus totum
corruptum & plenum foetidissimis ulce-
ribus.

In medio abdomine hæserunt intes-
tina tam tenuia, quam crassa in unum
globum coalita, maculis livescentibus,
& purpureis undequaque variegata,
semi-putrida.

Cadaver decimum-octavum. 165

Ventriculus , mole parvus , & in parte convexa omnino cartilagineus , in parte concava verum lardum , duos pollices crassum , gessit ; cavitas vix ovum gallinaceum recepit.

Hepar magnum fuit ; lien colore cæruleus ; renes parvi , tenues , pallidi.

Sanguis autem hujus cadaveris erat dissolutus & valde acer ; etenim præstantissimus nosocomii civici chirurgus FERDINANDUS LEBER (quo omnibus in rebus familiarissime utor) huic sectioni interfuit , & secando sibi digitum læsit ; mox summum ardorem percepit , & vulnusculum brevi abiit in ulcus , quod per plures menses acri ichore manavit , & nullis fere medicamentis obedivit.

**CADAVER DECIMUM
NONUM.**

VIR , triginta aliquot annorum , a longo tempore sputa copiosa , purulenta egressit , & sensim emaciatus vires amisit.

Præterea conquestus est , quod in latere sinistro citra summam anxietatem & suffocationis metum decumbere non possit.

Medicamenta quæcumque ex arte indicata & exhibita parum juverunt, æger igitur mortuus est.

Sectione anatomica detegebatur in cavitate thoracis dextra faccus tenuis, pellucidus, membranaceus, pulmone incumbens, & fundo suo cohærens cum pleura.

Huic sacco libræ octo aquæ subflavæ, insipidæ, includebantur.

Bronchia asperæ arteriæ plena erant materie purulenta.

CADAVER VIGESIMUM.

FEMINA, 28. annorum, a multis annis id incommodi habuit, quod fere quotidie una alterave a prandio hora magnam alimentorum partem, & multum gluten evomuerit.

Remedia exhibita vomitum quandoque per unam, quandoque per binas & plures septimanas inhibuerunt; dein autem idem malum denuo rediit.

Tandem vomitus longe frequentior factus est, & ægra fere omnia ingesta, subinde cruda, subinde semi-cocta eiecit; unde cepit languere, & emaciari.

Enemata injecta præter paucum glu-

ten eduxerunt nihil , & ægræ vires diminuerunt.

Remedia incidentia , resolventia ; purgantia auxerunt vomitum ; paregorica produxere anxietates.

Ægra nullibi doluit ; nec adtactu externo quid duri percipi potuit.

Demum misera contabuit , & cessit fato.

Viscera omnia naturalia & sana reperta sunt ; solus pylorus erat valde crassus & perfecte cartilagineus ; ductus e ventriculo ad duodenum fuit adeo angustus , ut tenuissimus ferreus stylus vix potuerit transprimi.



FORMULÆ
IN NOSOCOMIO USITATÆ.

1) R̄. CLARET. fact. ex conserv. fl.
cord. lib. j.

Syrup. diacod. unc. i. β.

Spirit. sulph. per camp. q. s. ad
grat.

M. S. Sumat æger omni trihorio duo co-
chlearia.

2) R̄. pulv. rad. torment.

— cort. peruv.

— lap. cancr. aa. dr. j.

Theriac. Andromach. dr. j. β.

Syrup. diacod. unc. j.

M. S. Sumat æger quinquies de die
parvum cochleare.

3) R̄. pulv. rad. helen. dr. j.

— cort. peruv. dr. iij.

conserv. menth. unc. ij.

syrup. menth. unc. j. β.

M. S. Omni trihorio sumat æger drach-
mam unam.

4) R̄. sal. polychr. dr. j.

conserv. nast. aq. unc. v.

M. S. Sumat æger ter de die unc. β.

5) R̄. sal. polychr.

pulv. rad. jalap. aa. dr. j.

conserv.

in Nosocomio usitata.

169

conserv. nast. aq. unc. iv.

syrup. fumar. unc. j.

M. S. *Usus ut prioris.*

6) ℞. Stib. diaph. n. abl. dr. j. ℞.

kerm. mineral. gr. xv.

m. f. pulv. subtilissimus, cui

exacte miscendo adde

conserv. nast. aq.

— cochlear. aa. unc. ij. ℞.

M. S. *Sumat æger omni bihorio parvum cochleare.*

Conservæ antiscorbuticæ debent esse succulentæ & acres. Sunt pharmacopæi, qui has herbas multum contundunt, liquidum abjiciunt, & mera scleta inertia & inutilia conservant. Magnam laudem debeo *expertissimo ac vigilantissimo Domino Adamo Offermanns*, Chemico & Pharmacopæo ad S. Spiritum, qui non tantum has conservas, sed & reliqua medicamenta, summa cum diligentia & attentione pro ægris nosocomii curavit parari.

7) ℞. Sal. polychr. dr. j. ℞.

cort. peruv. unc. ℞.

conserv. nast. aq. unc. iv.

syrup. card. bened. unc. j. ℞.

M. S. *Absumatur tempore apyrexiae.*

Storck An. I. Tom. I. H

8) R. Camph. gr. xv.
 fem. melon. unc. iij.
 f. c. aq. hord. emulf.
 colat. lib. j. β.
 adde

syrup. papav. alb. unc. j. β.

*M. S. Exhibeantur omni trihorio unciae
 binæ.*

9) Stib. diaph. n. abl. dr. j. β.
 oxymell. scillit. unc. ij.
 aq. fænic. unc. viij.

*M. S. Sumatur omni hora cochleare
 unum.*

10) R. Sal. polychr. dr. β.
 syrup. rub. id. unc. ij.
 rob. ribes. unc. j. β.
 acet. vin. unc. j.
 vin. bon. austr. unc. ij.
 decoct. hord. lib. ij.

M. S. Sumat æger quater de die unc. iij.

11) R. Sapon. venet. unc. β.
 solv. in aq. fumar. lib. j.
 dein adde
 syrup. fumar. unc. ij.
 rhei elect. dr. j. β.

M. S. Dentur omni bihorio duo cochlearia.

12) R. Spirit. sal. ammon. dr. j.
 acet. rut. q. s. ut fiat perfecta

faturatio,

aq. rut. unc. iij.

Syrup. gran. kerm. unc. j.

M. S. *Sumatur omni bihorio cochlearum unum.*

13) \mathcal{R} . terr. fol. tart. dr. ij.

oxymell. scillit. unc. vj.

aq. fænic.

— petrosel.

— bacc. junip.

— gramin. aa. unc. iv.

M. S. *Sumatur omni trihorio binæ uncia;*

14) \mathcal{R} . Camph. gr. xx.

mucilag. gum. tragac. dr. ij.

mistis & in mort. vitr. diu tritis,

adde, miscendo,

syrup. fl. rhead. unc. j. β .

aq. fl. samb. lib. j.

nitr. antimon. dr. β .

S. *Sumatur omni bihorio cochlearum unum. Camphoræ quantitas potest proportionem augeri vel minui. Camphora cum mucilagine bene conquassata nunquam supernatat, & partem suæ graveolentiæ amittit. Si quædam guttulæ liq. anod. mineral. addantur, tunc grata redditur mistura. Fortius adhuc ligatur camphora, si aliquandiu cum æquali copia gum. traga. in mort. vitr. teritur, & dein terendo solvitur mucilagine.*

- 15) ℞. gum. ammon. acet. scillit.
 solut. dr. ij.
 oxymell. scillit. unc. ij.
 aq. majoran.
 — hyssop. aa. unc. iij.

M. S. Sumantur omni trihorio duo cochlearia.

- 16) ℞. Cort. peruv. unc. j.
 fyrup. fl. chamom. unc. ij.
 aq. fl. chamom. lib. j.
 vin. bon. austr. unc. j. β.

M. S. Sumatur omni hora cochlear unum.

- 17) ℞. Sal. polychr. dr. β.
 — ammon. scrup. j.
 Syrup. fl. chamom. unc. j.
 aq. fl. chamom. unc. viij.
 tinct. cort. peruv. dr. ij.

M. S. Absumatur tempore apyrexiae.

- 18) ℞. Syrup. diacod. unc. j.
 ap. fl. rhæad. unc. viij.
 tinct. terr. catech. dr. j. β.
 laud. liq. fydenh. gtt. xx.

M. S. Sumatur omni hora vel omni semi-hora cochlear unum.

19. ℞. Sem. melon. unc. iij.
 — cydon. unc. β.
 f. c. aq. hord. emuls.

in Nosocomio usitatæ.

173

colat. lib. j. β .

adde

bol. armen. unc. j.

syrup. diacod. unc. ij.

M. S. Sumatur omni hora duo cochlearia.

20) \mathcal{R} . fol. salv. m. ij.

consciss. infund. f. q. ac ferv.

per $\frac{1}{2}$ hor. colat. lib. j.

adde

syrup. salv. unc. ij.

M. S. Sumatur mane & vesperi pars dimidia calide.

21) \mathcal{R} . Rad. gent. dr. ij.

— helen. dr. j β .

sal. absinth.

— polychr. aa. dr. j.

m. f. pulv.

S. Sumatur quater de die dr. β .

22) \mathcal{R} . pulv. rad. helen. dr. j.

— — jalap. dr. ij.

sal. ammon. dr. j. β .

conserv. nast. aq. unc. v.

syrup. de spin. cerv. unc. j. β .

M. S. Detur omni bihorio dr. j.

23) \mathcal{R} . scill. recent. dr. vj.

pulv. cort. cinnamom.

H 3

— — winteran. aa. unc. ℥.
 — rad. helen. dr. j.
 vin. bon. austr. lib. j. ℔.
 m. f. l. a. vin. medicat.

S. *Sumat æger omni trihorio cochleare
 unum, sensim augendo dosin; si ægri
 citra vomitum hoc vinum assumere non
 possunt, tunc admiscuntur*

*fyrup. fœnic. unc. iij.
 spirit. nit. dulc. dr. ij.
 — menth. dr. j.*

24) *℞. fol. absinth.*

*— eupat. cannab. aa. unc. j.
 consciss. affund.
 vin. bon. austr. lib. iij.*

*Dein relinq. vase clauso in fervid.
 digest. per 2 horas, colaturam posthac
 leviter expressam exhibe.*

S. Usus ut prioris.

*Huic vino sæpe optimo cum effectu;
 pro ratione circumstantiarum, additur
 tinct. milleped. unc. j. vel unc. j. ℔.
 aut unc. ij.*

*Vel additur magna quantitas oxy-
 mellis scillitici.*

25) *℞. rhei. elect.*

*ypecacuanh. aa. gr. xxv.
 m. f. pulv. pro unica dosi.*

26) R. rob. samb. unc. iv.
sal. polychr. dr. j.

M. S. Sumat æger quater per diem
unc. β. superbibendo singula vice unc. vj.
infus. fl. samb.

27.) R. aq. fl. rhæad. lib. j.
syrup. diacod. unc. ij. β.
spirit. sulph. per camp. dr. j.

M. S. Sumatur omni bihorio vel triho-
rio cochleare unum.

28) R. lact. recent. lib. iv.
vin. austr. unc. viij.

*Bulliant simul per momentum, dein
colostro lactis per colaturam ablato,
serum albumine ovorum purifica, &
pro potu ordinario exhibe.*

29) R. sal. polychr. scrup. ij.
— ammon. scrup. j.
m. f. pulv.

S. Sumatur his vel ter per diem talis
pulvis superbibendo duo vascula infusi fl.
chamon. vel herb. cent. min. aut. trifol.
fibr. etc.

30) R. sal. polychr. dr. iiij.
syrup. fumar. unc. ij. β.
aq. fumar. lib. j.

M. S. Dentur omni trihorio cochlearia duo.

31) ℞. Sal. polychr. dr. j.
pulv. rad. jalap. dr. j. β.
conserv. nast. aq.
— fumar. aa. unc. ij.
syrup. de erysim. unc. j.

M. S. Sumat æger omni bihorio parvum cochleare.

32) ℞. sal. polychr.
pulv. rap. jalap.
— — valerian. five phu. aa. dr. j.
oxymell. fcillit. unc. iv.

M. S. Exhibeatur adultis quater per diem unc. β. junioribus vero dr. j. aut. dr. ij.

33) ℞. Sapon. venet.
rhei. elect. aa. dr. ij.
gum. ammon. dr. j. β.
sal. polychr. dr. β.
Bals. peruv. q. f.
m. f. pil. gr. iij.

S. Sumat æger quater de die pilulas quatuor, & singula vicesuperbibat unc. vj. infus. herb. fumar.

34) ℞. sal. tart. unc. j.
vin. austriac. lib. iv.
syrup. de spin. cerv. unc. iv.

M. S. Sumat æger omni quadrihorio cochleare unum, sensim augendo dosin.

35) *R. refin. jalap. gr. xx.*

sal. polychr.

facch. alb. aa. gr. x.

M. S. Pulv. tenuissimus, unica dosi sumendus.

36) *R. fol. pin. unc. ij.*

sal tart. gr. xx.

mist. coq. f. q. aq. vase clausa per $\frac{1}{4}$ hor.

dein adde

spirit. junip. unc. j.

& vase clauso relinq. adhuc per $\frac{1}{2}$ hor.

in ferv. digestionem, posthac colat. lib iv. exhibe

S. Sumantur omni trihorio unciae duæ tepide, sensim augendo dosin.

37) *R. Aq. meliss.*

— menth.

— fl. samb. aa. lib. j.

syrup. diacod. unc. iij.

spirit. sulph. per camp. dr. j. β.

M. S. Sumat æger omni bihorio unc. ij.

38) R. Succi nast. aq. recent. express.
lib. β.

syrup. de succo pom. acid. unc. iij.
spirit. sulph. per camp. dr. j.

M. S. *Sumatur omni bihorio cochleare
unum.*

39) R. sem. melon. unc. ij.

— papav. alb. unc. j.

f. c. f. q. decoct. hord. emuls.

colat. lib. j. β.

adde

syrup. diacod. unc. j. β.

M. S. *Dentur omni bihorio unciaē tres
tepide.*


40) R. Aq. fl. rhæad. unc. iv.

syrup. menth. unc. β.

laud. liq. sydenh. gtt. xxv.

M. S. *Sumat æger omni hora cochleare
unum, augendo sensim vel minuendo dosin,
prout opus fuerit.*




ANTONII STORCK,

Sacræ Cæsar. Reg. Apost. Majestatis
Confiliarii Aulici, Archiatri, & in
Nosocomio Civico Pazman. Physici,


ANNUS MEDICUS,
S E C U N D U S,

QUO SISTUNTUR

OBSERVATIONES

CIRCA MORBOS ACUTOS
ET CHRONICOS, adjiciunturque
eorum Curationes, & quædam
Anatomicæ Cadaverum Sec-
tiones.

ANN. II. TOMUS I.



~~THE~~
~~ANATOMY~~
ANTONI STORCK

Doctor Celsus. Reg. Apoll. Majoris
Cordillari Aulic. Archid. 1714
Nolentio Cilio Pann. P. 1714

ANUS MEDICUS
J. E. C. V. D. U. 1714

QUO SISTUNTUR
OBSERVATIONES

Circa Morbos Acutos
et Chronicos, adhibendis
eorum Curationes, & quidam
Anatomicæ Cadaverum Sec-
tiones.

J. A. L. T. 1714
~~THE~~



VIRO ILLUSTRISSIMO

G^o J^e R^a A^a R^a I^o

L. B. VAN SWIETEN,

AUGUSTISSIMI IMPERATORIS
& Imperatricis a Consiliis, Archia-
tror. Comiti, Bibliothecæ augustæ
Præfecto, inclyt. Facult. Medic.
Vienn. Præsidi perpetuo, necnon
Academiæ Reg. Scient. & Chirurg.
Parif. Institut. Bononiens. & Litter.
Incognitor. Membro, &c.

Has pagellas dedicat

ANT. STORCK.

Storck Ann. II. Tom. I.

THE UNIVERSITY OF CHICAGO

LIBRARY

OF THE

PHYSICAL SCIENCES

AND

THE

LIBRARY

OF THE

PHYSICAL SCIENCES

AND

THE

LIBRARY

OF THE

PHYSICAL SCIENCES

AND

THE


LIBRARY

OF THE

PHYSICAL SCIENCES

AND

THE



VIR ILLUSTRISIME,

*E*A OMNIA ex te solo profiscuntur, quæ ego habeo, queis fruor.

Dum enim novisti, me, per plures annos diu noctuque numerosissimos inter ægros versatum,

artem salutarem rite addidicisse,
atque eandem usu multiplici com-
probasse; dum vidisti, multos
ægros, partim jussu **NOSTRÆ**
AUGUSTÆ, partim tua benevo-
lencia mihi concreditos, ex peri-
culosissimis morbis mea ope esse
ereptos; & demum dum & tuis &
aliorum experiētiis certus fuisti,
tentamina nova, quæ circa cicu-
tam institui, misero humano
generi esse admodum utilia, salu-
taria, eaque promereri quoddam
præmium, effecisti (innato tuo
erga bonos favore) ut **SACRA-**
TISSIMÆ MAJESTATES me in
Archiatrorum numerum susce-
perint.

*Dignitas profecto! qua in re
Medica major non existit.*

*Ut autem mihi amplius artem
exercendi & ægros observandi
campus semper superesset, impe-*

trasti a CLEMENTISSIMA
NOSTRA AUGUSTA (quod ego
ex te demisse & ardenter flagitavi)
ut Nosocomii mei curam deinceps
quoque conservarem, & ægris,
dum officium Aulicum admittit,
facerem medicinam.

An majora? An utiliora mihi
potuisses præstare?

Sane! Tibi, VIR ILLUSTRIS-
SIME, Artem, Tibi honorem
debeo, & omne id quod datur vita.


Patere igitur, ut Patrem
meum te compellem; nam paterne
mecum egisti, & agis adhucdum;
patere, ut has pagellas, neque
totum pro tantis beneficiis in
æternæ gratitudinis monumen-
tum tibi dem & consecrem.

Verum ne te unquam eorum,
quæ in me contulisti, possit pœ-
nitere, promitto tibi, sancte: me

*id facturum semper, quod viri
boni, honesti, seduli, & Artis
periti officium exposcit.*

*Vale, VIR ILLUSTRIS-
SIME:
vale diu: & me tuis gratiis, quæ
& futuros vitæ dies beatos reddere
possunt, ulterius fovere, & pro-
tegere non desiste.*





PRÆFATIO.

PRODIT secundus Annus Medicus, qui ea iterum fideliter recenset, quæ a primo mensis Julii 1759, usque ad ultimum mensis Junii 1760, circa ægros, in meo Nosocomio decumbentes, acta sunt.

Ordo servatur idem, qui in Anno priori.

Promisi olim, me has observationes omni anno continuaturum, quoniam plurimi ac rarissimi casus (etenim omnis generis, ætatis, & sexus ægri in hoc Nosocomium suscipiuntur) mihi quotidie obveniunt.


Verum nunc munere Aulico impediior, quo minus Nosocomii ægris omni tempore, quo necessitas

P R Æ F A T I O

exigit, adesse possim; junctus propterea mihi est collega Dominus *Henricus J. Collin*, vir in Scientia Medica profundus, labore indefessus, observatione fidus, qui hoc Opus in posterum elaborabit, & edet in lucem.

Circa Morbos difficiles & arduos nostras mentes semper conferimus, ut negligatur nihil, quod ægris prodesset.

Hac ratione speramus, nostros labores Miseris fore salutare, nec displicituros Orbi litterato.






D E
MORBIS ACUTIS.

MENSIS JULIUS.

1759.

 **M** ORBO acuto sexcenti septuaginta & quatuor ægri hoc anno in nosocomio decubuerunt ; quinquaginta & duo inde mortui sunt ; reliqui omnes convalescere.

Febris acuta simplex multos mense Julio detinuit.

Symptomata autem erant levia : exiguus solummodo capitis dolor , sitis mediocris , sicca tussicula , & febris admodum mitis observabantur.

Lingua fuit plerumque alba , oculi vivaces , raro turbidi , respiratio naturali fere æqualis , cutis mollis.

Storck Ann. II. Tom. I.

A

2 *De Morbis acutis.*

Alvus , bonæ consistentiæ & coloris , fere quotidie sponte prodiit. Urinæ sub initium fuerunt ruffæ ; finiente tertio morbi die turbidæ , & quarto die posuerunt sedimentum copiosum , album , glutinosum (quale calculo laborantibus commune est.)

Sæpissime quarto die ortus est copiosus sudor per universum corpus , & desit tunc febris , & urinæ sensim naturales factæ sunt.

Si autem quarto die sudor nullus observatus fuit , tunc urinæ continuarunt crassum ponere sedimentum , & septimo die citra omnem sensibilem evacuationem ægri a febre liberati sunt , & vires suas brevi recuperarunt.

Ultra septimum diem febris acuta simplex nunquam duravit.

Tres tantum hoc mense ægri fuerunt , quibus septimo die miliaria alba eruperunt. Nihilominus & his eodem die febris cessavit , cœperunt redire vires , viguit appetitus , & omnis actio , & functio ; uti iis , in quibus talia non contigerant.

Undecimo die miliaria fere omnia conciderunt , & epidermis dein in squammas abiit.

Mensis Julius.

3

Alia exanthemata hoc mense in nosocomio visa non sunt.

Curatio fuit facillima, etenim præter infusa, vel decocta diluentia, paucum nitro, & melle mista, nullum fere medicamentum requirebatur.

Quibus tussis paulo molestior fuit, his decocta ex radice alth., fol. alth., malv., verbasc. &c. addito stibio diaphoretico non abluto, & syrupo alth. vel flor. rhæad. aut melle puro, quandoque oxymelle simplici, optime conduxerunt.

Subinde ob inanem tussim vesperis exhibebatur uncia una syrapi diacodii.

Aliqui habuerunt pulsum debilem, & mollem, atque hos mistura N. I. erexit, restituit.

Acuta febre hoc mense nullus est mortuus; omnes brevi convaluerunt, neque ullus in alium morbum incidit, aut passus est recidivam.



MENSIS AUGUSTUS.

1759.

FEBRIS acuta fuit, adhuc mitior quam mense præcedente, nulla omnino exan-

themata observata sunt. Curatio simplicissima omnibus satisfecit.

Tenuia carniū jūscula, infusa foliorum scabiosæ, veronicæ, hederæ terrestris &c., aliquoties per diem calide hausta, omnem scopum absolverunt.



MENSIS SEPTEMBER.

1759.

MULTI febre continua putrida decubuerunt.

Omnes ingentes capitis dolores, sitim magnam, pectoris oppressionem, & aurium tinnitum conquerebantur.

Pulsus fuit multum febrilis, raro autem inæqualis, aut intermittens, lingua subfusca, humida, oculi turbidi, facies rubra, cutis viscido sudore madida.

Quidam delirarunt, quidam fuerunt soporosi, nec ad rogata responderunt.

Vires vix non in omnibus erant dejectæ. Urinæ prodierunt subrufæ.

Alvus quibusdam fuit immorigera, & non prodiit, nisi enemate, aut supposito sollicitata.

Quidam vero quotidie deposuerunt alvum pultaceam, valde foetidam.

Mensis September.

5

A principio morbi usque ad quintum, sextum, septimumve diem symptomata omnia sine omni prorsus mutatione persisterunt; tandem absque notabili turbatione remifere & ortæ sunt parotides admodum duræ, dolentes.

His apparentibus desiit febris continua, & hujus loco multis supervenit febris quotidiana intermittens, paucis tertiana.

Hæc binis, ternisque a pastu horis incepit cum vehementi horripilatione, totum corpus, & præsertim ossa, & tendines permeante. Post medium horæ quadrantem sequebatur calor, & pulsus valde celer, dein delirium, enormis capitis dolor, & nox inquieta, insomnis; unde vires prosternebantur, & ægri iterum pejus habuerunt.

Tempore matutino pulsus fuit omnino naturalis; raro autem hi ægri sub finem paroxyfmi sudarunt.

Quidam fuere, qui quidem manifestos paroxyfmos experti non sunt, verum quotidie stata hora absque horripilatione cœperunt languere, angi.

Pulsus tunc erat parvus, contractus, non tamen motu febrili exagitatus, & noctes fuerunt inquietæ, vigiles.

Urina sub initium languoris fuit pal-

lida, dein vero crassa, foetida, & lateritium posuit sedimentum.

Septem ægris, remittente circa septimum morbi diem febre continua, proruperunt miliaria alba, & tunc his nullæ parotides comparuerunt.

Pomeridiana tamen horripilatio, dein calor, & febris exacerbatio hos quoque ægros, prostantibus licet miliaribus, æque divexarunt, ac illos, quibus parotides ortæ sunt.

Mala quamvis symptomata ab initio ad finem usque hos ægros fuerint comitata, est tamen tantum unicus, qui succubuit, & hic semper fuit valde debilis, soporosus, pulsum habuit exilem, inæqualem, intermittentem, faciem fuscā, linguam tremulam, plumbeam, oculos torvos, fulvos, urina fuit semper pallida, inodora, alvus viridis, foetidissima, ardens, frequens, debilitans &c.

Curatio simplicissima suffecit.

Remedia diluentia, leviter stimulantia, putredini resistentia, omne obstaculum removerunt.

Serum lactis vinosum N. 2. mistura N. 1. claretum N. 3. &c. ægris grata erant, & plurimum profuerunt.

Quos tussis multum divexavit, hos decocta emollientia, resolventia, expec-

torantia , juverunt ; ut & haustus oleosus paregoricus , omni vespera exhibitus.

Soporosos vesicantia erexerunt ; noctes turbatas syrupus diacodii quietas reddidit.

Dum febris continua desiit , & apparuerunt parotides , dumque accessit febris quotidiana , aut tertiana , plerumque brevi ad corticem peruvianum confugiendum erat ; secus repetiti paroxysmi ægros valde debilitarunt , & parotidum resolutionem , aut suppurationem retardarunt , aut penitus impedivere.

Ad parotides externe adponebantur cataplasmata , aut fomenta emollientia , resolventia , discutientia.

In quinque solummodo ægris benigna resolutio secuta est ; plerumque hi tumores suppurando consumpti sunt.

Dum , suppressa febre intermittente , a cortice peruviano ilico abstinencebatur , ægri languerunt , & parotides longo tempore manserunt duræ , & ægris vehementes dolores excitarunt.

Si autem corticis peruviani usus continuatus fuit , tunc sexto , septimove die fluctuatio percepta est , & dein brevi parotides ruptæ sunt , & boni puris magna quantitas prodiit.

Arte chirurgica nunquam aperti sunt hi abscessus, sed eosque fomentis & cataplasmatibus emolliti, donec sponte rupti fuerunt.

Si rupta est cutis, antequam omnis durities in pus abivit, nunc sanatio tarda, & difficilior fuit, reliquæ suppurantibus non facile consumptæ sunt, & ortum est sæpe ulcus sordidum, quod in sinus, & fistulas degeneravit; unde aliquot septimanæ quandoque ad integram curationem requirebantur.

Nihilominus licet omnia brevi tempore ad suppurationem fuerint redacta, utile tamen erat ægris ulcus tale per decem, aut quatuordecim dies apertum relinquere, ut hac ratione fonticuli instar omne impurum ex sanguine separaretur.

Quamdiu tale ulcus clausum non est, tamdiu cortice peruviano utendum fuit, hoc si neglectum est, pus bonum esse illico cessavit.

Verum drachma dimidia omni trihorio exhibita, tunc suffecit.

Præterea quoque corpus nutrientibus parca quidem dosi, sed repetitis vicibus, reficiendum erat.

Serum lactis vinosum, aut decoctum hordei, addito vino generoso austriaco

Mensis September.

& pauco succo citri, & syrupo de cinnamomo, ut gratum fieret, similibus ægris multum conduxerunt.

Ulceræ ex parotidibus orta quandoque omnibus medicamentis restiterunt, & vicinas partes arroserunt; quamprimum autem lintea carpta, infuso cicutæ madida, aliquoties per diem his imposita sunt, tunc mox omnis sordities disparuit, labia coierunt, & firma brevi cicatrix formata est.

Septem ægris, quibus miliaria proruperunt, febris intermittens cortice peruviano quoque fugari debuit; & per aliquot dies ad vires conservandas, & augendas, & ad recidivam præcavendam, eodem remedio pergendum fuit.

Quarto ab eruptione die cœperunt miliaria exsiccare, septimo disparuerunt omnia, & epidermis secessit.

Bini ægri, quibus parotides benigna resolutione dissipatæ sunt, insequente biliosa diarrhæa, sanitatem obtinuerunt.

Reliqui autem tres absque ulla sensibili evacuatione integre convaluerunt, & sani aliquamdiu retinebantur in nosocomio, ut certus essem: an nulla contingeret recidiva.



MENSIS OCTOBER.

1759.

ADMODUM numerosi erant ægri, qui hoc mense febre acuta in nosocomio decubuerunt.

Tussis fere omnibus molesta fuit.

Morbus incepit levi horripilatione, repetitis vicibus redeunte; dein sequebatur calor, dolor capitis, sitis, membrorumque debilitas, & ciborum inappetentia.

Multi vagos simul per artus dolores, & in pectore tensiones conquesti sunt.

Causa mali plerumque ex impedita transpiratione orta est; etenim tempus erat inconstans, aër humidus, & frigidus.

Qui statim in principio sese opposuerunt, & diluentibus, atque regimine moderate calido transpirationem reuocarunt, ii intra binos ternosve dies leni sudore, aut urina crassa, lateritia, iudicati.

Neceffe autem tunc fuit, ut probe se contra aëris injurias, & vicissitudines munirent, secus idem morbus rediit, & valde pertinaces egit radices.

Qui sub initium levia symptomata

floci fecerunt, neglexeruntque debita remedia, ii quotidie in pejus ruerunt, vires magis dejectæ sunt, caput vehementius doluit, rubuerunt oculi, aures tinnitu, & susurro afficiebantur, respiratio facta est difficilis, tussis frequentior, defatigans, orti sunt in thorace dolores pungentes, locum omni momento variantes, tensiones dolentes, scapulas, & totum thoracem occuparunt, intumuit ventriculus, tensa sunt hypocondria, nec præ dolore ad tactum tulerunt.

Quibusdam violentis tussis fæces & urina contra voluntatem propellebantur, quibusdam tussi eductum est sputum tenue, spumosum, multo sanguine mixtum, inflata est facies atque totum caput, & cor cœpit palpitare.

Pulsus fuit plerumque multum febrilis, sitis magna, urina fere naturalis cum nubecula in medio suspensa, aut fundum petente; alvus quibusdam erat clausa & valde dura, quibusdam vero liquida, glutinosa, quandoque spumosa, cerevisiæ fermento haud absimilis.

Curatio pro ratione symptomatum, temporis, & temperamenti debuit institui.

Quidam plethorici pulsum habuerunt

durum, valde plenum, respirationem anhelosam, tussiculam brevem, valde suppressam.

His venæ sectio repetita maximum levamen attulit; etenim mox pulsus fuit liberior, respiratio fere naturalis, & tussis pleno pectore peragi potuit.

Infusum florum rhæados, edulcoratum melle, & addito pauco nitro, sputum impactum mox mobile reddidit, & eduxit; unde tales ægri intra aliquot dies a morbo, qui sub initium valde periculosus videbatur, facile liberati sunt.

Intra parietes in moderato aëris calore aliquo tempore se continere debuerunt hi ægri, ne ex aëris frigiditate recidivam susciperent.

Qui vero liberius respirarunt, & nec plenum, nec durum, nec suppressum pulsum habuerunt, iis vena secta non est, quoniam (uti multiplici experimento constitit) sanguis, hac ratione demptus, vim naturæ debilitavit, & materiæ morbosæ coctionem, sputique maturationem retardavit, impedivit, & hoc modo ægros in periculum vitæ coniecit, vel morbi dies prolongavit.

Cum igitur pulsus nec nimis fortis, nec nimium debilis fuit, naturæ totum fere negotium relinquere poterat.

Infusa florum sambuci, rhæados, verbasci, radicis fœniculi, herbæ hederæ terrestris, veronicæ, agrimonix, addito oxymelle simplici, & stibio diaphoretico non abluto, sæpius per diem hausta, brevi magnum levamen adtulerunt, & sputa cœperunt prodire, quibus similes ægri intra aliquot dies convaluerunt.

Si vero his lingua fuit valde sicca, & fauces asperæ, atque vox rauca, tussisque ferina, tunc decoctum emolliens N. 4. ex omnibus maxime conduxit.

Quandoque tamen ante septimum aut nonum diem nulla sputa comparuerunt, urinæ manserunt crudæ, & noctes ob irritam, & frequentem tussim fuere inquietæ, insomnes.

Qua de causa, ut omni vespertino tempore paregoricum ex massa pillularum de cynoglossò, vel de styrace, aut syrup. diacod. papav. albi, aut haustu oleoso cum grano j. vel ij. opii, his præberetur, necesse fuit.

Subinde tamen paregoricum vespertinum per epicrasim datum meliores effectus præstitit, quam deglutitum unico haustu.

Unde mistura N. 5. quietum somnum conciliavit.

Dum sputum cœpit prodire, erat id glutinosum, mucosum, tenax; dein magis crassum, subflavum; demum puri simillimum, quo per unam, alteramve septimanam rite procedente, integra sanitas rediit.

Sæpe autem tempore vespertino exacerbata est febris cum levi horrore, accessit major sitis, pectoris angustia, rauco, tussis magis sicca, situs corporis valde inquietus, & genæ rubuerunt, quandoque supervenit delirium.

Calorem vero maximum ægri conquerebantur circa pedum extremitates, in vola manuum, & in capite.

Emulsum paregoricum nitrosum N. 6. circa tempus similium exacerbationum exhibitum, omnia symptomata pulchre mitigavit.

Verum multorum ventriculus a simili emulso gravabatur, inflata sunt hypochondria, & haud raro orti sunt dolores colici, præsertim in iis ægris, qui pectus habuerunt admodum siccum, & vocem raucam, unde tunc mistura N. 7. emulsis præferenda fuit, & magis conduxit.

Dum observavi hos paroxysmos vespertinos vehementes fieri, & ægros debilitari, tentavi corticem peruvianum

præter alia remedia superius memorata, verum paroxyfmi inde nequaquam facti sunt mitiores.

Nec tamen cortex coctionem impedit, nec ægris, repetitis licet vicibus magna dosi exhibitus, nocuit.

Erant ægri, quorum pulsus erat mollis, debilis, neque tamen tantæ pulmonum infarctionis aut inflammationis signa observabantur, ut pulsus mollities ac debilitas potuerit inde deduci; naturæ igitur vires defecerunt.

Quapropter præter infusa, & decocta, superius descripta, medicamenta leniter stimulantia postulabantur.

Unde his sub finem infusionis, aut decoctionis addita est proportionata quantitas radicis serpentariæ virginianæ, contrajervæ, angelicæ, vel herbæ hyssopi, hyperici, ruthæ, rorismarini, &c.

Quandoque tamen omnium optimos his in casibus effectus præstitit mixtura N. 8. ex qua ter, aut quater per diem data fuit uncia dimidia.

Hac ratione & vires conservatæ sunt, & sputa bene cocta, & copiosa prodierunt, & sensim febris evanuit, atque ægri convaluerunt.

Quidam ex his ægris, prodeuntibus

licet copiosis sputis, nullum levamen habuerunt; fuerunt soporosi, frequenter delirarunt, pectoris angustiam, pondus, & ingratham titillationem sunt conquesti.

Vesicantia furis applicata soporem dispulerunt; quoniam vero sputa facile egesta sunt, & nulla alia indicatio magis urfit, hinc prioribus medicamentis continuatum est.

Quo contigit, ut decimo septimo die, aut vigesimo, quandoque vigesimo quarto miliaria alba copiosissima in conspectum venerint, & tunc omnis febris desiit, sputa tamen rite procedere continuarunt, & reliqua omnia mala symptomata eodem tempore disparuerunt, neque magna turbatio hanc exanthematum eruptionem præcessit.

Mox rediit appetitus, vires in dies increverunt; nihilominus remediis expectorantibus sine intermissione adhuc dum opus fuit.

Nec similia exanthematum magna ratio habenda fuit; etenim ægri per plures horas sine ulla molestia extra lectum esse potuerunt, neque bonum erat sudorem promovere, sputa enim inde suppressa sunt, & ægrorum vires imminutæ.

Lenem tamen transpirationem con-

servare, semper necesse fuit, hac enim impedita tussis fuit violentior & pulsus magis agitatus, æger anxius.

Unde ab aëre flante per portam, vel rimam angustam, & ægrum immediate allambente summopere cavendum erat.

Ex sexaginta aliquot ægris, qui febre acuta effecti in nosocomio hoc mense decubuerunt, binæ tantum erant vetulæ, quæ non evaserunt, & hoc vel ideo, quoniam earum vires adeo debiles fuerunt, ut sputa, quamvis cocta & mobilia ejicere non valuerint.

Qui ex morbo adhuc debiles aëri frigido sese nimis cito exposuere, ii facile iterum tussi correpti sunt, & in priorem morbum inciderunt.

Multis, cessante tussi & febre, mansit, continuus vomendi conatus, appetitus cum horrore deletus, & pondus in ventriculo; & erat hoc in iis plerumque ægris, qui durante morbo magnam sputorum copiam deglutiverunt.

Simili in casu mistura N. 9. alvum admodum glutinosam eduxit, & hac ratione plurimis restituit appetitum, & ventriculi pondus abstulit.

Quandoque tamen data hac mistura N. 9. mansit adhuc ventriculi pondus, & continuus vomendi conatus, neque

hæc symptomata cessarunt , quamvis iteratis vicibus purgans fuerit exhibitum ; quare tunc vomitorio opus fuit.

Assumpto pulvere N. 10. mira tenacissimi glutinis quantitas ore rejecta est , & paulo post disparuit præcordiorum anxietas , ventriculi pondus , & ægri bene habuerunt.

Vomitibus quidem subinde pectus , a tussi jam valde defatigatum , magis irritavit , & produxit pectoris , atque præcordiorum dolores.

Si vero eadem vespera datum est remedium opiatum , tunc tranquillius supervenit somnus , & sedatæ sunt omnes turbæ , &c.

Tentavi sæpius , annon remediis salinis , & digestivis , & alvum leniter moventibus gluten posset incidi , dilui , & per inferiora educi ; verum his , longo licet tempore usurpatis , nil effeci , & manserunt continuæ nausæ , vomitiones , nec rediit appetitus , & ægri debilitati sunt.

Quare tunc credidi præstare innocenti emetico ventriculum ab onere liberare , quam lenioribus remediis morbum protrahere , & vires enervare.

His rite peractis , valde utile fuit , per aliquot dies , mane & vesperi drach-

nam unam theriac. diateff. ægris exhibere, ut appetitus conservaretur, & ventriculus priorem tonum atque robur recuperaret.



MENSIS NOVEMBER.

1759.

NUMERUS acuta febre affectorum valde magnus fuit; nec ullus erat æger hac febre decumbens, quem tussis non divexavit.

Multi ex his ægris continuum dolorem punctorium in thorace conquerebantur, hic dolor non admisit profundiores inspirationes, & tussi reddebatur adeo acutus & acerbus, ut ægris quandoque levia animi deliquia inde accesserint. Lingua fuit sicca, alba, quandoque fusca; sitis ingens, urina flammea, facies rosea.

Pulsus fuit valde febrilis, durus, quandoque inæqualis, oculi rubuerunt, in faucibus percipiebatur ardor, & vox rauca, ac debilis.

Dum ex nimia tussi, & doloris exacerbatione, animi deliquium supervenit, tunc pulsus fiebat lentus, parvus, intermittens, facies pallida; & extrema sudor gelidus occupavit,

Similes ægri, præ dolore, & anxietate nec sedere, nec decumbere potuerunt. Hinc continua corporis agitatione eorum vires defatigatæ sunt.

Vera igitur, & periculosa pleuritis hos divexavit.

Principium erat horror per totum corpus, dein successit calor, & capitis dolor, postea membra omnia reddebantur languida, atque dolor vagus ea perrepfit.

His una, alterave hora durantibus, respiratio difficilior facta est, & ægri præ dolore, totum pectus constringente, thoracem sufficienter ampliare non potuerunt; demum hæ anxietates & tensiones remiserunt, atque dolor acute pungens in diversis ægris diversas thoracis plagas occupavit, atque ibidem sedem fixit.

Orto hoc dolore febris aucta est, & tussis frequentior, atque violentior red-dita, & paulo post omnia reliqua symptomata (superius enarrata) observata sunt.

Alii ægri idem morbi principium, & eundem omnium symptomatum decursum experti fuerunt, nullum autem dolorem punctorium in thorace perceperunt; verum respiratio facta est anhelosa, sublimis.

Hinc materies morbosa in pulmonem se contulit, produxitque inflammationem; unde hi ægri erant peripneumonici.

Quandoque autem peripneumonix junctus est dolor acute pungens, & tunc similis æger, cæteris paribus, in majori periculo versabatur.

In omnibus his ægris eadem erat indicatio, hinc & eadem curandi methodus suffecit.

Repetita venæ sectio fere semper fuit summe necessaria, pleuritici inde citius levamen senserunt, quam ii, qui peripneumonia erant affecti.

Cavendum tamen fuit, ne nimia sanguinis detractio vitæ vires dejicerentur; tali enim ratione morbus & longior, & periculosior evasit, imo sub finem facile in alium morbum transivit.

Peripneumonicorum pulsus, si post venæ sectionem liberior, major, & subdurus factus est, indicavit morbum esse curatu facilem, & brevem.

Et si tunc respiratio simul liberior reddebatur, & æger alacrior, tunc opus non fuit venam denuo aperire. Si vero pulsu, meliore facto, respiratio æque laboriosa mansit, tunc venæ sectio debuit repeti.

Hoc in casu solis venæ sectionibus maxima vis morbi ablata est, & ægri cito convaluerunt.

Ubi vero facta venæ sectione pulsus fuit longe minor, inæqualis; ubi ægri in animi deliquium inciderunt, & extrema habuerunt frigida, & faciem lividam, ibi majus longe periculum fuit, & iteratæ sanguinis evacuationes lethalia symptomata brevi adtulerunt.

Unde a venæ sectionibus erat abstinendum, licet pessimæ inflammationes eas summopere desiderassent.

Pleuriticorum pulsus, si post venæ sectionem minor, mollior, & tardior fuit, & si dolor remisit, aut penitus evanuit, brevem ægris sanitatem promisit.

Si vero nec dolor remisit, nec febris violenta, nec pulsus durities imminuta est, tunc paulo post vena iterum tundenda fuit.

Si in principio ægri habuerunt pulsum valde suppressum, & durum, tunc post venæ sectionem omnia in pejus videbantur abire; auctus est dolor punctorius, aucta est febris, sitis & ægri valde inquieti fuerunt, arteriæ erant plenæ, duræ, & in omni corporis plaga ingens pulsatio & calor percipiebantur.

Ebullitio hæc, orta ex venæ sectione, novis iterum venæ sectionibus debuit sedari, compesci.

Idem fieri debuit, dum facta venæ sectione dolor punctorius quidem evanuit, sed aucta est febris, & supervenit ingens dolor capitis, vel dolor spinæ dorsi, aut lumborum, vel si respiratio magis anxia reddita est (quod haud infrequenter contigit) aut si dolor punctorius ex una thoracis plaga discessit, & aliam paulo post, eadem cum vehementia, obsedit.

Raro tamen potuit solis venæ sectionibus omnis dolor sedari; pleuriticos multum juvit, si parti dolenti cataplasmata, aut fomenta emollientia, applicata sunt.

Peripneunomicis quoque eadem fomenta, & cataplasmata toti pectori imposita plurimum profuerunt, utiliores tamen his fuerunt vapores aquæ calidæ naribus, & ore hausti.

Pro remedio interno pleuritici optimo cum effectu datum est decoctum N. 4.

Quidam solo infuso florum verbasci, & rhæados, addito sale prunellæ, & melle simplici, vel oxymelle, &c. restituti sunt.

Os, & fauces, tussi exsiccatae, linctu

N. 11. magno cum ægrorum levamine humectatæ sunt, & sputa facilia reddita.

Si tamen dolor punctorius neque debitis venæ sectionibus, neque fomentis, neque remediis mitigari potuit, tunc necesse erat, parti dolenti adponere latum vesicans, quod intra unam, alteramve horam omnem dolorem abstulit, & vires erexit, & respirationem effecit liberiores.

Unus fuit æger, quem vesicans hac ratione adplicatum non juvit, & hic suppuratus contabuit.

Plurimi pleuritici solis sputis judicati sunt, paucis diarrhæa biliosa, levans, supervenit.

Urina a tertio, quartove morbi die ad finem usque sedimentum crassum, glutinosum, subrubrum deposuit.

Decoctum N. 4. illis peripneumonicis valde utile fuit, qui facta venæ sectione liberius respirarunt, & pulsum habuerunt majorem.

Plerumque tertio die, aut in principio quarti diei sputa bene cocta prodierunt, & ab his solis salus pependit.

Pauci fuerunt, qui tussi inani, & sicca post quartum diem adhuc vexati sunt, atque his sexto die febris major
cum

cum horrore orta est , & respiratio fuit difficilior , sitis , & calor ingens , facies ruberrima &c.

Urinæ , quæ tertio , & quarto die optimæ coctionis signa præ se tulerunt , denuo fuerunt crudæ , aut flammeæ.

Verum quam primum venæ sectionibus debitis iusta sanguinis quantitas educta fuit , tunc illico tussis plenior pectore potuit peragi , sitis , & calor remiserunt , & septimo die sputa secuta sunt , atque ab eo tempore ægri sensim convaluerunt.

Hoc modo peripneumonia , periculosa licet , absque magno labore solvebatur ; majorem vero industriam exposulavit , dum respiratio venæ sectionibus aut non emendata , aut pejor facta est , & ægrorum vires imminutæ sunt.

Etenim tunc non tantum subigendæ pessimæ inflammationi , sed & viribus conservandis , ac augendis studendum erat.

Camphora rite subacta , & multo vehiculo diluta , atque parca , & prudenti dosi exhibita , mira his in casibus præstitit.

Quapropter præter decoctum N. 4. aut præter alia decocta , & infusa pectoralia pro ratione symptomatum dedi bis ,

ter , quaterve per diem cochlear unum ex mistura N. 8. & optatum finem fere semper attigi.

Si tamen horripilationes , & febris exacerbationes statim horis redeuntes observatæ sunt , tunc ad has supprimendas magna simul corticis peruviani copia data fuit.

Medicamentis hoc modo secundum iudicium , & rationem administratis pessime decumbentes præter omnem fere opinionem e mortis faucibus erepti fuerunt.

Vesicantia furis , & quandoque etiam humeris , & nuchæ applicata , delirium mitigarunt , levarunt caput , & mentem effecerunt magis serenam.

Loca autem hac ratione excoriata remediis digestivis , & paululum irritantibus debebant aliquamdiu fluentia conservari.

Dum tussis inanis ægros nimium defatigavit , & produxit dolores , aut quandoque spumofum sanguinem ; tunc omni tertia , quartave hora lene paragoricum debuit exhiberi , quo tussis remisit , & ægri fuerunt magis quieti.

Qui vero violenta , & inani tussi vexati non sunt , ii de die nullo paragorico opus habuerunt.

His in casibus sputa cocta tarde comparere coeperunt, & die plerumque incerto; ante undecimum diem sputa semper aquosa, spumosa, aut glutinosa fuerunt, nec ægros levarunt.

Dum vero crassa, flava, & puriformia prodierunt, tunc brevi vis morbi minor fuit, & dein solis remediis, sputa promoventibus, reliqua cura potuit perfici.

Quandoque tussis inanis ad decimum tertium, aut decimum quartum vel decimum quintum diem duravit, & nullum prorsus sputum comparuit, dein vero subito ortus est in pectore strepitus, & aderat materies copiosa, mobilis, quæ sputis debebat ejici.

Verum ægrorum vires fuerunt valde debiles, hinc fortioribus remediis expectorantibus agendum erat.

Uso misturæ N°. 12. vel clareti N°. 13. vel conservæ N°. 14. vel pulv. N°. 17. vel aliorum hujusmodi medicamentorum mox copiosum, & purulentum sputum magno cum ægrorum levamine educum est.

Senibus hic morbus plerumque lethalis fuit; hi enim sputis suffocati sunt, licet optima remedia fuerint exhibita.

Alia febre continua, cui violenta

tussis quoque juncta fuit , multi hoc mense ægri decubuerunt.

Aëris injuriæ hanc plerumque produxere.

Initium fuit horror per universum corpus , dein languor ; postea dolor rheumaticus , partim vagus , partim fixus , omnia membra obsedit.

Hicce dolor subinde post unam alteramve horam ex membris abiit , & tunc pectus oppressum est , & ægri cœperunt tussitare.

Neque tamen aderat magna sitis , neque pulsus admodum velox , aut durus , aut suppressus , neque ullum aliud signum , quod veram pulmonum inflammationem indicasset.

Caput simul erat affectum ; etenim quibusdam caput totum vehementer doluit ; quidam in sola fronte , & circa tempora dolorem perceperunt ; quidam hemicraniam passi sunt ; quidam capitis gravitatem & internarum partium tensiones conquerebantur , & his erant nares simul obstructæ , siccæ , quidam vero , ab omni dolore immunes , continuo & ingrato aurium susurro torquebantur.

Quandoque post plures horas de novo iterum per omnia membra diffusus est

dolor rheumaticus , & tunc illico desinit dolor capitis , evanuit pectoris oppressio , & tussis ; durante in membris dolore pulsus deprehendebatur inæqualis , contractus.

Si dolor rheumaticus subito iterum & præter rationem evanuit , tunc priora iterum symptomata observata sunt ; nam rediit pectoris oppressio , tussis , & capitis dolor.

Hæ mutationes in eodem ægro sæpius contigerunt.

An materies serosa , acris , rheumatica nunc externas , nunc internas corporis partes invasit , & hac ratione diversa symptomata produxit ?

Tussis in morbi principio semper fuit inanis , sicca ; & longa tussitatione nil prodiit , nisi aqua spumosa ; dein incerto die illud sputum cœpit lentum fieri , tandem prodiit mucus albus , viscidus , colore & consistentia albumini ovorum simillimus. Quandoque hic mucus colore subflavo tinctus est.

Sputum puriforme in his ægris raro videndum erat.

Quo crassus , & copiosius sputum prodiit , eo celerius , & majus sequebatur levamen ; si autem sputum mansit

tenue , aut paucum , tunc morbus diu protractus est.

Tussis quandoque per plures horas penitus siluit , dein magna cum violentia iterum rediit , & ægros defatigavit.

Quandoque integro die ægri a tussi fuerunt liberi , vesperi autem statim fere hora orta est anxietas , titilatio , tussis frequens , molesta.

Tempore vespertino in omnibus his ægris febris , & symptomata exacerbata sunt ; prægressa enim horripilatione aucta est pectoris anxietas , sitis , tussis ; vox erat rauca , & calor per universum corpus , urens , ac siccus percipiebatur.

Quandoque post magnas vespertinas horripilationes vires penitus prosternebantur , & sputa , alias libera & facilia , suppressa sunt , imo per omnes artus accesserunt dolores dilacerantes , & ægri pessime habuerunt.

Unde noctes fuerunt inquietæ , defatigantes , insomnes , aut si ex nimia virum debilitate tandem ægri somno cœperunt opprimi , mox deliriis , & anxiis insomniis iterum excitati sunt , & membra continuo jactitarunt.

Matutino tempore tales ægri capitis

dolorem conquesti sunt, & tumulenti ac debiles languerunt.

Pectus autem, & totum os, & fauces erant exsiccatae, asperae.

Urina ab his ægris matutino tempore reddita, plerumque crassa fuit, ac turbida, & subfuscum, aut lateritium sedimentum deposuit; per diem fuit minus crassa, sed ruffa; noctu autem accedente exacerbatione fuit aut flammea, aut tenuis.

Exacerbatio fere in omnibus his ægris foetido sudore finiebatur.

Rarissime in hoc morbo pulsus adeo plenus, & durus fuit, ut, ad vim naturæ infringendam, debuerit vena aperiri.

Imo non pauci erant inter hos ægros, quorum pulsus mollis & parvus remedia leniter stimulantia desideravit.

Morbus aliquamdiu progressus fere semper sputis judicabatur; inchoans vero leni quandoque sudori cessit.

Hinc remedia, quæ serosum lentum inciderunt, & lenem conservarunt transpirationem in morbi initio plurimum profuerunt.

Et multi ægri solis infusis ligni sassafras, vel trium santalorum, vel foliorum tussilag. virg. aur. agrimon. &c.

edulcoratis fyrup. ʒ. radic. aperient. aut
fyrupo de althea, aut melle puro, aut
oxymelle simplici, & addito simul ni-
tro, vel lap. prunell. vel stib. diaph.
non ablut. aut nitro antimoniat &c.
brevi sanitatem recuperarunt.

Fortiora stimulantia morbum reddi-
derunt pejorem.

Dum ægri a tussi frequenti, & inani
ardorem, atque siccitatem in pectore ac
faucibus conquesti sunt, vel dum ha-
buerunt temperamentum valde siccum,
tunc remedia emollientia stimulantibus
erant præferenda.

Decoctum rad. alth. fol. alth. addito
fyrup. alth. vel decoctum radicis salab.
addito melle puro tunc pectus siccum
humectarunt, tussim reddiderunt mi-
nus violentam, & ægris magnum attu-
lerunt auxilium.

Glutine jam soluto, & sputo mobili
reddito, fortiora remedia expectorantia
requirebantur: unde præter infusa, aut
decocta, mox recensita, datus est linctus
Nº. 15. vel mistura Nº. 16. vel Nº. 12.
vel pulvis Nº. 17.

Sputa inde copiosa facile ejecta sunt;
quare iisdem remediis usque ad finem
morbi continuandum fuit; dosis autem

debebat augeri , vel imminui , prout symptomata id exegerunt.

Si noctes ob solam tussim erant inquietæ & insomnes , tunc paregoricum , qualecunque datum , juvit.

Cessante tussi , & febre haud raro diarrhæa secuta est , & prodiit alvo gluten album , pellucidum , tremulum , vitreum.

Mistura N^o. 9. tunc exhibita mox excitavit appetitum , & expulso glutine diarrhæam suppressit.

Subinde post diarrhæam aderat tenesmus ; hunc vero remedia paregorica cito & facile sopiverunt , & integra tunc rediit sanitas.

Quidam , hac febre laborantes , fuerunt soporosi , & pectore anxii , neque sputis prodeuntibus levamen ullum habuerunt.

Hi delilarunt frequenter , ceperunt floccos , & circa vesperras auctum est delirium ; oculi fere semper erant turbidi , tristes , lachrymantes , fæces inscie dimittebantur , quæ erant glutinosæ , ex fusco flavæ , foetidissimæ.

Pulsus in quibusdam sat fortis fuit , unde his medicamenta prius laudata , diluentia nimirum , & expectorantia suffecerunt ; in quibusdam vero pulsus

fuit parvus, undulosus, qua de causa remediis stimulantibus simul opus erat.

Claret N^o. 3. aut mistura N^o. 8. aut N^o. 1. ægros plurimum refecerunt; furis præterea, quandoque & nuchæ vesicantia erant applicanda, ut sopor, caput nimium gravans, dissiparetur.

His ægris quandoque decimo quarto morbi die, quandoque decimo septimo, aut vigesimo, quandoque vero incerto die miliaria alba eruperunt.

Verum neque inde symptomata multum mitiora sunt reddita; solus pulsus paulo liberior, & respiratio minus anxiosa videbantur.

Sopor, delirium &c. in eodem statu permanferunt, licet sputa simul copiosa prodierint.

Exanthemata in quartum diem mansuerunt pulchre elevata, plena, pellucida, dein vero coepit humor ea replens turbari, quædam vesiculæ rumpebantur, reliquæ collapsæ sunt, & exciccatae.

Atque tunc ægri levamen sentire coeperunt, oculis rediit vivacitas, rediit mentis serenitas, desiit omne delirium, & febris.

Urina, quæ hujusque rutila fuit, nunc turbata est, & posuit sedimentum glutinosum, album, grave.

Sputa prodire continuarunt, vires sensim auctæ sunt, tandem desiit tussis, viguit appetitus, & ægri perfectam sanitatem obtinuerunt.

Inter hos ægros fuit virgo novemdecim annorum, cui miliaria alba citra ullum levamen in collo tantum, & pectore apparuerunt, in reliquis autem totius corporis partibus nec stigma erat videndum. Partes vero ab exanthematibus liberas calor ingratus, urens, & molesta siccitas, ac rigiditas occuparunt.

Quarto ab eruptione die miliaria considerunt; verum neque tunc hæc ægra levamen sensit, & mansuerunt eadem prorsus symptomata usque in septimum diem, quo partes antea aridæ cœperunt transpirare, madere, & tandem in omnibus extremitatibus, & in ventre numerosissima miliaria alba prodierunt, in pectore autem, & in collo nulla amplius visa sunt, sed ibi epidermis in squamas abiit; eodem adhuc die ægra a febre liberata est, & anxietates, & omnia mala symptomata velocissime discessere.

Vires mox increverunt, & absque multis medicamentis brevi rediit sanitas.

Qui sublime semper respirarunt, &

pauca vel plane nulla sputa potuerunt proferre, qui in continua anxietate, & æstu decubuerunt; quorum pulsus fuit undulosus, intermittens, exilis, & vires penitus dejectæ; quorum lingua fuit plumbea, aut subviridis, aut adeo sicca, ut egerit rimas; quorum facies fuit purpurea, aut livida, aut pallida, & frigida, oculi autem concavi, & sanguine suffusi; quos sudor continuus, glutinosus, defatigavit; quorum urina fuit colore naturali, vel tenuis, alvus fusca, aut subnigra, frequens, & incio ægro prodiens, mortui sunt.

Tentata quæcunque remedia hos ægros nequaquam juverunt; imo nimia solertia eos debilitavit.

Bini juvenes simili febre hoc mense in nosocomio interierunt, senes autem quinque.

Alia iterum febris continua hoc mense observata est in pluribus ægris, ubi nimirum primis tribus diebus morbus admodum mitis videbatur.

Etenim levis tantum & obtusus aderat capitis dolor, appetitus languit, pulsus fuit naturali paulo celerior, nec tamen plenus, nec durus, nec suppressus, fitis mediocris, lingua humida, alba, oculi solido minus vivaces.

Alvus quotidie naturalis prodiit, urina crassam in medio nubem gessit.

Incipiente quarto die omnia symptomatica subito exacerbata sunt.

Pulsus summa violentia exagitabatur, ita quidem, ut eodem die binæ ternæve sat largæ venæ sectiones debuerint institui, caput acutissime doluit, in pectore orta est anxietas, & respirandi magnus labor, lingua fuit aridissima, oculi rubore suffusi sunt, & protuberarunt, sitis immaniter augebatur, totum corpus, maxime vero extrema calor urens invasit; urina fuit ruberrima; crassa, quasi multo sanguine tincta, accessit delirium, sopor, corporis inquietudo.

Factis necessariis venæ sectionibus, & dato copiosissimo potu diluente, nitroso, sub finem diei quarti tota cutis aspera, seu anserina apparuit, & mox rubuit colore scarlatino.

Nullum tamen symptoma inde levatum est, & ægri frequenter tussitarunt, & noctem habuerunt admodum inquietam.

Quinto die, prægresso per universum corpus largo sudore, remisit calor urens, & tussitatio; mox pruritus cutim occupavit, dein vilæ sunt numerosæ pustulæ

albicantes, opacæ, diversæ magnitudinis & figuræ, quædam ex his confluentes sat magnas vesicas efformarunt.

Pustulæ hæc densissimo agmine collum, pectus, & abdomen obsederunt; in facie autem erant nullæ, in extremitatibus paucæ.

Factis his eruptionibus quidam ægri se multo melius habuerunt; disparuit enim sopor, abiit delirium, sitis, & pulsus velocitas imminuta est.

Imo pulsus in quibusdam fuit adeo bonus & æqualis, & omnia symptomata adeo mitia, ut totum opus soli naturæ tuto tunc potuerit committi.

Aliqui autem manserunt soporosi, continuo delirarunt, eorum pulsus fuit debilis, inæqualis, intermittens; urinam, & fæces inscie dimiserunt, tendines subsilierunt, & artus convulsionibus exagitati sunt.

Sexto die in eodem statu persistere.

In principio septimi diei ortus est horror; dein ingens frigus omnia membra perrepsit, quod ultra horam duravit, extrema reddidit gelida, rigida, & tantam induxit virium prostrationem, ut mortem allaturam videretur.

Cessante tamen hoc frigore mox ægri ad se redierunt, nec delirarunt amplius,

pulsus fuit æqualis, liber, minus velox, & ab eo tempore vires auctæ sunt, nec ullæ convulsiones, aut tendinum subsultus amplius observabantur, in quibusdam febris fere penitus desiit.

Eodem adhuc die pustulæ omnes magis elevatæ sunt, & redditæ pellucidæ, etenim limpidissima lymphæ videbantur repletæ, color scarlatinus cœpit evanescere, & sitis imminui; urina fuit crassa, turbida, & copiosissimum sedimentum subfuscum deposuit.

Ægri, qui quinto die magnum levamen perceperunt, & habuere symptomata admodum mitia, ii septimo die levem tantum horripilationem perceperunt; pulsus fuit paulo celerior, & pustulæ magis repletæ sunt, & cœperunt pellucere, reliqua autem omnia optimo in statu permanserunt.

Octavo die nil mutatum est, nisi quod iis, qui septimo die adeo male habuerunt, aliquoties alvus biliosa, liquida, foetida, cum magna euphoria prodierit, iis vero alvus fuit naturalis, qui minorem septimo die molestiam perceperunt.

Nono die febris fuit admodum exigua, urina fere naturalis, alvi profluvium siluit, color scarlatinus sensim in natu-

ralem abiit, pustulæ partim ruptæ sunt, & limpidum serum fuderunt, partim conciderunt, & exsiccatæ sunt.

Decimo die tota fere cutis naturalem colorem habuit, & omnia erant meliora, & quidam ex his ægris, ab omni febre liberi, jam per aliquot horas extra lectum fuerunt.

Undecimo die in omnibus desit febris, rediit appetitus, epidermis lamellatim secessit, intra paucos dies viguerunt vires, & valetudo fuit integerrima.

Quoniam primis morbi diebus omnia symptomata valde mitia fuerunt, nulla peculiaris cura requirebatur, neque ulla indicatio tunc venæ sectionem postulavit.

Sola decocta diluentia ex hord. crud., rad. scorzon, acetos. &c. cum paucis nitro, & oxymelle simplici omne ex parte satisfactura videbantur.

Verum orta circa principium quarti diei exacerbatione, omnibus erat sanguis detrahendus, idque pro ratione virium, & pulsus repletionem in pluribus iterato fieri debuit.

Dum cutis rubuit, & exanthemata proruperunt, omnibus optimo cum effectu exhibui infusum florum samb.
Nº. 19.

Dum vero ex his ægris quidam quinto die valde debiles fuerunt, & soporosi, & desirantes, & habentes pulsum inæqualem, parvum, intermittentem, opus erat præter hoc infusum. N^o. 19. remedia magis stimulantia præbere; ut sunt: mistura N^o. 8. vel mist. N^o. 1. maxime autem ægris profuit, & debitas vires conservavit claretum N^o. 3.

Vesicantia furis, & nuchæ quoque debuerunt applicari.

Præterea remedia paregorica omnibus erant necessaria; hac tamen differentia, quod ii, quorum vires quinto morbi die sat bonæ perstiterunt vesperi solummodo unciam unam syrupi diacodii exigerent; ii autem, qui debiles fuerunt, & quibus alia mala symptomata supervenerunt, omni quinta, sextave hora gutt. XII. vel XV. laud. liquid. SYDENHAMI opus habuerunt.

His solis remediis pro ratione auctis vel imminutis, hæc febris adeo feliciter debellata fuit, ut nullus horum ægrorum succubuerit.

Multi ægri hoc mense febre rheumatica, aut arthritica lecto affligebantur; unde hujus symptomata, & curatio hic loci esset describenda; verum quoniam idem morbus etiam mensibus se-

quentibus grassatus est, & diversa produxit symptomata, & ideo diversam sæpe curationem postulavit, putavi, quod de eo peculiari capitulo paulo inferius agendum esset.



MENSIS DECEMBER.

1759.

PERIPNEUMONIA frequenter observata est.

Symptomata fuerunt valde periculosa, etenim pessima fuit respiratio, pulsus celerrimus, suppressus, sitis ingens, facies tumida, livida, purpurea &c.

Iteratæ venæ sectiones hic locum habuerunt.

Tussis autem nimium frequens, molesta, & quasi convulsiva, paregoricis, aut opiatis, per epicrasin diversa sub forma exhibitis, statim in principio leniri debuit.

Id si factum non est, prorupit ore, & naribus copiosissimus sanguis, & ægri amiserunt vires.

Neque tunc ægro, valde debilitato, venam amplius licuit aperire.

Decoctum emol. N. 22. aut alia similia decocta resolventia, emollientia, antiphlogistica, nitrosa, mellita, maximum effectum præstiterunt.

Sputa incerto die cœperunt prodire; eaque in principio aquosa, tenuia, spumosa, haud raro striis sanguineis permista; dein facta sunt crassiora, subflava, demum penitus puriformia, & his solis rite procedentibus ægri sanitatem recuperarunt.

Decoctum N°. 4. hos ægros quoque multum juvit.

Quamprimum sputa facile prodierunt, & fuerunt copiosa, tunc illico febris remisit, neque amplius ægros tussis adeo defatigavit, & respirandi labor fuit longe minor.

Quando ægrorum vires ad egerenda sputa non suffecerunt, tunc præter decoctum N°. 4. optimo cum effectu datum est claretum N°. 13.

Nullus horum ægrorum paregorico vespertino carere potuit, hoc enim non assumpto, noctu accessit tussis sicca, frequens, quæ somnum turbavit, induxit deliria, & sputa effecit difficilia.

Plerumque hic morbus decimo septimo die integre cessavit.

Quandoque tamen tussis citra febrem

per viginti quatuor, aut triginta dies, & ultra duravit; quandoque vero per unum diem tussis aut nulla, aut pauca fuit, sequente autem die fuit iterum longe frequentior, & copiosa prodierunt sputa, idque alternis vicibus frequenter contigit.

Quandoque tota die cessavit tussis, & noctu certa hora ingruit, ægrum e somno excitavit, fecitque eum copiosa sputa egerere, tandem iterum desinit, & reliquam noctem æger tranquillam habuit.

Solis tamen remediis incidentibus, & sputa promoventibus hæc symptomata sensim suppressa sunt.

Inter tussendum quandoque summa pectoris anxietas orta est, & ægri quasi pectus constringi, & respirationem inhiberi crediderunt; neque sputa potuerunt reddere, & fere suffocati sunt.

Hæ anxietates ægris accesserunt subito, & sæpe subito iterum evanuerunt; & fere tantum in iis contingebant, qui systema nervosum admodum mobile habuerunt, unde & earum origo a spasmodis petenda videbatur.

Hoc in casu mistura N°. 12. non tantum promovit sputa, sed & spasmos solvit, & omnes anxietates brevi sustulit.

Si spasmi usu misturæ N°. 12. non cessarunt, tunc eidem misturæ addi debuerunt guttæ XX. laud. liquid. SYDENHA. quod mox omnem turbationem sedavit.

Vera peripneumonia tres ægri hoc mense obierunt.

Bini ex his statim in initio morbi vires habuerunt admodum prostratas, respirationem laboriosissimam, linguam plumbeam, sitim nullam, delirium continuum, pulsum parvum, inæqualem, mollissimum, urinam coloris penitus naturalis, oblata ægerrime assumpserunt.

Qua vehementia morbus incepit, eadem in quartum diem sine ulla mutatione perduravit.

Quarto autem die omnia pejora facta sunt, pulsus intermisit, accessit profundus sopor, respiratio fuit densissima, urina naturali longe tenuior, tussis brevis, frequens, nec vesicantia, nec medicamenta, quacunque sub forma exhibita, ullum levamen adtulerunt, neque unquam mens, sopore suppressa serenior facta est.

Sexto die respiratio solis narium alis, scapulis, & claviculis peragebatur, alvus pauca, foetidissima, nigra, fre-

quenter in lectum dimittebatur, mox ortus est sudor foetidus, glutinosus, in extremis, & facie frigidus, tandem finiente sexta die facie, tota livida, & tumida, vis vitæ subito evanuit.

Pulmones sectione anatomica, sanguine infarcti, & pro maxima parte gangrenosi, reperti sunt.

Tertius æger ad nonum usque diem sat bene se habuit, sputa rite prodierunt, & iisdem, quoniam symptomata omnia leviora fuerunt, perfecta crisis videbatur futura.

Verum nono die præter manifestam causam, tussis sicca, violentissima, hunc ægrum invasit, secuta est inde larga haimoptoë, dein summa virium prostratio, anxium & breve respirium, sopor, tandem rigor, tetanus universalis, & subita mors.

Aspera arteria fuit sanguine grumoso plenissima; inter piam matrem, & cerebrum in parte dextra capitis, sanguis quoque grumosus, copiosissimus extravasatus erat.

In facie, & in toto corpore omnes muscoli post mortem adhuc fuerunt violentissime tensi, rigidissimi.

Vesica urinaria detegebatur urina plenissima, neque ulla pressione potuit eva-

cuari, neque catheter in eam intromitti; etenim circa vesicæ collum obstaculum durissimum repertum est.

Re tamen bene considerata solo spasmō collum vesicæ in osseam fere duritiem contractum videbatur. In toto morbi decursu æger nunquam urinæ mittendæ difficultatem conquestus est.

— An circa mortem spasmus vesicæ collum occupavit?

Qui vera peripneumonia laborarunt, hi circa vespas non adeo manifestas, & magnas febris exacerbationes passi sunt, ut ii, qui febre catharrali, glutinosa decubuerunt.

Hi ægri tota die admodum mitem habuerunt febrem, neque magnam sitim conquesti sunt, neque respiratio fuit valde læsa, tussis autem fuit frequens, urina naturali paulo coloratior cum nubecula fundum petente, os glutinosum, appetitus aut deletus, aut exiguus.

Primis diebus omnia symptomata fuerunt valde levia, & ægri simplici catarrho sese affectos crediderunt, unde neque remedia assumpserunt, neque adeo sollicitè evitarunt aëris injurias.

Sensim tamen debiles facti sunt, tussis fuit frequentior, & respiratio brevis

ac difficilis ; hinc extra lectum se non amplius potuerunt sustinere.

Demum vespertino tempore omnia pejora esse cœperunt : ortæ sunt horripilationes , dein sequebatur ingens calor , sitis magna , anxia respiratio , tussis frequens , membrorum , & totius corporis inquietudo , capitis dolor acutissimus , & haud raro delirium.

Decrescente calore sentiebatur per universam cutim mador , dein foetidus & tenax sudor ; tandem remisit anxietas , sitis , tussis fuit liberior , quandoque & sputa glutinosa cum ægri levamine prodierunt.

Urina incipiente horripilatione fuit tenuis , orto calore ruffa , aut flammea , superveniente sudore fuit aut tenuis , subviridis , & valde foetida ; aut fuit turbida , crassa , & tunc crassum , tenax , glutinosum sedimentum deposuit.

Quidam cessante hoc paroxysmo sponte in profundum , & quietum somnum inciderunt , & inde multum reficiebantur , & vigiles mentem habuerunt admodum erectam , hilarem , vires bonas.

Alii autem post paroxysmum debiles , & inquieti fuerunt , & inani tussicula exagitati sunt , atque his opio somnus conciliari

conciliari debuit. Etenim insomnes si relictī erant, tunc adeo debiles reddebantur, ut in sequentibus paroxysmis fere succubuerint.

Qui durante paroxysmo habuerunt pulsum valde plenum, & durum, sitim magnam, faciem inflatam, rubram, linguam siccam, oculos sanguine suffusos, lachrymantes, protuberantes, splendentes, & multo cum labore respirarunt, quique nulla adhuc sputa cocta egresserunt, & qui cessante paroxysmo pulsum adhuc satis fortem, & plenum conservarunt, iis vena repetitis quandoque vicibus secari debuit.

Sanguis e vena missus subinde crustam gessit densam, tenacem & vere inflammatoriam.

Sæpissime autem crassa, mucosa, & variegata membrana in placentæ superficie conspiciebatur.

Qui in paroxysmo, & post paroxysmum admodum debiles fuerunt, quique pulsum semper parvum & inæqualem habuerunt, iis venæ sectio nocuit.

Vespertinæ hujus febris exacerbationes cortice peruviano nequaquam mitigari potuerunt.

Accidit autem in pluribus ægris, ut tales exacerbationes per diem sæpius

redierint, & ut ægri omnia tertia, quartave hora leve frigus, dein calorem conquesti sint.

Pulsus tunc observabatur longe celerior, sitis major, facies rubicunda, respiratio celeris, laboriosa.

Tales exacerbationes ultra horam nunquam durarunt, subinde iterum intra aliquot minuta subsederunt.

Plurimis in ægris cortex peruvianus maxime profuit; etenim licet paroxysmi non semper integre fuerint suppressi, symptomata tamen omnia adeo mitia inde sunt reddita, ut vires mox fuerint robustiores, & ægri ejecerint sputa copiosa, cocta.

Aliquibus tamen, qui sat violentos, & frequentes paroxysmos, seu exacerbationes passi sunt, cortex peruvianus nullum levamen adtulit, neque nitrosa, diluentia, antiphlogistica orgasmum potuerunt compescere, neque opiata mitigare tussim.

Imo tussis fuit adeo vehemens subinde, ut haimoptoën fuerit minitata.

Unde venæ sectionibus, subinde aliquoties iteratis, nulla diei, aut temporis habita ratione, opus fuit; ægri quidem, aliunde debiles, inde magis dejecti sunt; verum posthac minores

fuerunt exacerbationes, & opiatum somnus potuit adferri.

Sanguis e vena missus semper fuit densus, & crustam habuit inflammatoriam, licet nullius topicæ inflammationis signa essent observata.

Etenim cessante exacerbatione, respiratio satis libera fuit, & pulsus vix febrilis, neque durus, nec suppressus, sitis pauca, facies pallida, tussis tantum per vices violenta, titillatoria.

Omnes hi ægri, si prodeunte sputo cocto & copioso, levamen senserunt, sique febris remisit, solis sputis perfecte iudicati sunt.

Si vero prodeunte sputo levamen aut plane nullum, aut valde exiguum perceptum est, tunc incerto quodam die miliaria alba, vel sola, vel rubris permixta proruperunt, quibus pulchre elevatis, & copiose prostantibus, omnis anxietas evanuit, ægri statim sese longe melius habuerunt, & cessavit febris, neque sputa inde imminuta sunt, aut suppressa.

Aliqui tamen, qui sputa copiosa citra levamen ejecerunt, eo tempore, quo miliaria videbantur proditura, largo, foetido, & glutinoso sudore allevati

sunt, licet tunc nulla exanthemata comparuerint.

An in his materies exanthematica sudore dissipata fuit?

Nihilominus exanthemata supervenientia curandi rationem nequaquam mutarunt; etenim iisdem remediis, quibus antea ægri utebantur, sedulo continuandum erat.

Curatio autem in omnibus his ægris similis fuit.

Pectori ubique debebat prospici, hinc decocta emollientia, resolventia, & sputum coctum educantia ubique requirebantur; & his solis plerique sanati sunt.

In solummodo, quorum vires nimium debiles fuerunt, præter hæc decocta necesse erat, præbere medicamenta leniter stimulantia.

Tempore exacerbationis semper opus fuit remediis nitrosis, & leniter paregoricis.

Cessante hac febre & tussi, multi fuerunt ægri, qui pondus in ventriculo, nauseam & vomitiones conquesti sunt, atque ideo & his debuerunt exhiberi purgantia, aut vomitoria, &c. ut priori mense adnotatum est.

Quidam post talem febrem valde de-

biles fuerunt, magnam pectoris ficcitatem perceperunt, & continuo sudore fere diffluxere.

Remedia roborantia, & sudorem alias sistentia, nil juverunt, imo ægris majores excitarunt anxietates; sola autem nutrientia, parva quidem copia, sed repetitis vicibus exhibita, hic plurimum effecerunt.

Cremor avenæ mundatæ, cremor hordei, juscula probe nutrientia, oryza lacte vel jusculis incocta, lac bonum, & recens, optime conveniebant; his enim cessit pectoris ficcitas, sudor, & mox increverunt vires.

Pueros, juvenes, & mediæ ætatis homines pleuritis hoc mense frequenter invasit.

Vagus plerumque fuit dolor pleuriticus, ita quidem, ut jam hoc, jam illud thoracis latus occupaverit.

Quandoque dolor fuit levis, neque respiratio multum inde lædebatur, neque febris admodum vehemens fuit, neque sitis magna.

Et his in casibus venæ sectione raro opus fuit, etenim solis infusis flor. samb. rhæad. verbasc. quibus addebatur paucum nitrum, vel stibium diaphoreticum non ablutum, vel sal prunellæ, &c.

& mel purum, vel syrupus quidam emolliens, largiter exhibitis, atque moderato lecti tepore, atque applicato plagæ dolenti cataplasmate molli, totus morbus brevi potuit solvi.

Nam primo adhuc die lenis sudor sequebatur, & tunc dolor remisit, & febris fuit minor, & ægri coeperunt dormire.

Remittente dolore plerumque tussis multo mitior facta est, subinde tamen perstitit æque violenta, frequens, inanis, defatigans, & hoc si contigit, diacodiatidis per epicrasin utendum fuit, ne irritata tussi ægri nimium debilitarentur.

Urina colorem habuit plerumque naturalem, & levem in medio gessit nubesculam.

Lingua fuit humida, alba, genæ roseæ, oculi erant rubri, aut turbidi.

Secundo die nullus dolor punctorius advertebatur, tussis raro ægros exacerbavit, neque magna pulsus celeritas, aut plenitudo, aut durities observata est, urinæ manserunt naturales.

Tertius dies fuit secundo similis.

Quarto die continuatis iisdem remediis, vel similibus haud raro oriebatur levis, & vagus horror, & mox æger

sudavit , & desiit febris , tussis & sitis.

Quorundam horum ægrorum urina quarto die turbata est , & posuit sedimentum furfuraceum , album ; quorundam vero urina mansit coloris naturalis ; & febre penitus cessante tenuis reddebatur , & fœtuit.

Hi ægri pauca vel plane nulla sputa reddiderunt ; solo igitur sudore plerique judicati sunt.

Subinde tamen quarto die nulla facta est mutatio , & continuarunt eadem prorsus symptomata , quæ semper admodum levia erant usque ad sextum vel septimum diem , & tunc subito omnia ruerunt in pejus , dolor punctorius qui antea penitus siluit , denuo recrudit , & ægros majori violentia est aggressus ; tussis & frequentior , & molestior fuit , increvit sitis , & pulsus deprehendebatur plenus , & valde durus , ut & respiratio valde anxiosa , multum dolens , celeris , caput vehementissimus dolor occupavit.

Unde ilico venæ sectio sat larga erat celebranda ; præterea decocta emollientia , resolventia , antiphlogistica copiose , & frequenter exhibita sunt , & parti dolenti applicatum est cataplasma , aut fomentum emolliens , discutiens.

Si dolor & febris, facta venæ sectione non remiserunt, aut si remittentes breviterum vehementiores facti sunt, tunc denuo largiter sanguis fuit detrahendus, idque eodem die quandoque ter, quaterve, habita ratione virium, & symptomatum fieri debuit.

Evacuata debita quantitate sanguinis, dolor penitus disparuit, & febris erat longe mitior.

Tussis dein minus molesta fuit, coeperunt sputa prodire, & undecimo die febris perfecte desiit, & ægri sensim convaluerunt.

Curatio solis remediis resolventibus, & expectorantibus felicissime finita est.

Sanguis venæ sectione extractus crustam inflammatoriam valde densam habuit.

Urina, orta symptomatum exacerbatione, rufa, aut flammea fuit, dein aliquoties turbata est, & album, aut fuscum sedimentum dimisit.

Quoniam dein in pluribus ægris observavi, febris, & doloris exacerbationem circa sextum, vel septimum diem contingere, tunc in aliis experiri volui, annon facta primis statim diebus venæ sectione, similis paroxysmus posset evitari, præcaveri.

Verum ægri inde debilitati sunt, & exacerbationi sexto vel septimo die supervenienti vix sustinendi erant, & tardius sputa comparuerunt, & tussis fuit molestior, & morbus ad decimum quartum, aut decimum septimum diem protrahabatur.

Unde conclusi, dein non amplius venam tundere, donec urgeat indicatio, hinc & temporis, & diei ratio nequaquam habenda erat.

Quosdam ægros dolor pleuriticus tanta vi invasit, ut statim in principio pessima adfuerint symptomata.

Etenim prægresso horrore mox caput vehementissime doluit, respiratio fuit ilico densa, & præ nimio dolore fere impossibilis, sitis autem penitus abolita, facies sublivida, tumida, oculi protuberantes, lingua alba, cutis siccissima, pulsus contractissimus, durus.

Celerrimum remedium his in circumstantiis erat largissima venæ sectio, quæ subinde dolorem migritavit, & respirationem fecit liberiores, & magnam dein sitim ægri conquesti sunt, qui antea nullam habuerunt; subinde vero prima venæ sectio nil mutavit: unde post breve tempus denuo sanguis largissima copia debuit detrahi.

Et tunc dolor plerumque nullum remisit, & ægri longe melius habuerunt; verum intra unam alteramve horam eadem prorsus symptomata redierunt, data licet fuerint copiosissima remedia antiphlogistica, diluentia, mellita &c. & externe licet cataplasmata, unguenta, & fomenta fuerint applicata.

Qua de causa, si ægrorum vires admiserunt, venam denuo tundere fuit necesse; idque haud raro, quinquies, sexties, & aliquoties septies intra binos dies factum est.

Et hac ratione contigit aliquoties, ut facta ultima venæ sectione omnia prorsus symptomata evanuerint, & integre cessaverit febris; unde his in circumstantiis aliquoties pleuritidem solis venæ sectionibus licuit jugulare.

Erant tamen casus, ubi venæ sectionibus sopire pleuritidem non potui.

Dum nimirum, facta venæ sectione unica, vires ægrorum ilico conciderunt.

Fuerunt enim plures, qui post venæ sectionem debiles anhelarunt, nec immixtus est dolor, nec respiratio fuit faciliior, & pulsus, antea plenus, reddebatur parvus, inæqualis, & frequentes leipothymia hos ægros divexabant.

Ab ulteriore vero venæ sectione tunc summopore erat cavendum licet dolor inflammatorius, & respiratio inde valde læsa eandem dicassent.

Decoctis emollientissimis, quibus sub finem coctionis herbæ leniter aromaticæ addebantur, & cataplasmatibus aut fomentis externis tunc pugnandum erat.

Et si tussis nimium molesta fuit, aut dolor nimium magnus, tunc omni bi-horio, aut trihorio unciam dimidiam syrupi diacodii exhibere necesse erat.

Tandem si dolor intra unum, alterumve diem non cessavit, aut multum decrevit, latum vesicans plagæ dolenti applicatum est, quod intra tres, quatuorve horas omnem dolorem abstulit, aut eundem adeo levem reddidit, ut ægri vix quidquam amplius perceperint.

Virum, & puellam pessima pleuritide laborantes, nec remedia, nec vesicantia juverunt, unde inflammatio brevi abivit in suppurationem.

Vir, facta a peritissimo chirurgo HAFNER thoracis paracentesi, felicissime restitutus est.

Puella, a sacco purulento jam fere suffocata, tandem paracentesin fieri

admisit , verum pus prodiens valde foetuit.

Nihilominus per binos dies ægra multo melius habuit , liberius respiravit , quiete dormivit , & pulsus tranquillus fuit.

Verum tertio die subito sublime respiravit , pulsus factus est celerrimus , & mollis , in facie observabantur crebræ caloris , & coloris mutationes , fitis fuit ingens , tandem extrema fiebant gelida.

Periculosissima hæc signa pessimam formarunt prognosin , & septimo die mors secuta est.

In thoracis cavitate sinistra reperiebatur foetidissimus ichor , & pulmo ejusdem lateris gangrænosus.

Ægri , qui cessante dolore punctorio , & prodeunte sputo copioso continuam tamen pectoris oppressionem conquesti sunt , & tussitarunt frequenter , & delirarunt sine magna febre , nullum levamen perceperunt usque dum decimo quarto , vel decimo quinto , vel subinde vigesimo die , aut die non critico copiosa miliaria alba proruperunt.

Et tunc ilico pulsus fere naturalis factus est ; & respiratio fuit liberrima , cessavit ingrata tussitatio , tussi tamen pleniore sputa bene cocta continuarunt

prodire ; unde orto simili exanthemate his ægris adferebatur salus.

Qui debiles fuerunt , & sputa paulo difficilius egresserunt , his præter decocta , & infusa pectoralia dabatur claret. N^o. 13.

Si nulla habita pulsus , & virium ratione ob solum dolorem pleuriticum venæ sectiones nimium frequentes instituebantur , tunc ægri in pessimum periculum coniecti sunt.

Etenim licet febris fuerit valde mitigata & fere sopita , vires tamen summo-pere prostratæ sunt , & tussis reddebatur valde frequens , inanis , defatigans , ægri abhorruerunt a cibis , nec quidem dato quamvis opiato vespertino , dormiverunt , unde coeperunt contabescere.

Remedia quæcunque tentata momentaneum quidem quandoque levamen attulerunt , sed causam mali tolerare nequam potuerunt.

Quidam ex his tabe obierunt , quidam vero post violentissimam tussim & convulsivam anxietatem sputa oblonga , tenacia , polyposa , vasorum figuram referentia , & copioso sanguine mixta extorserunt ; hæc si continuarent per unum , alterumve diem , tunc cessavit

dolor obtusus, & siluit tussis, & tandem tales ægri cura lactea & cibis probe humectantibus, nutrientibus integre restituti sunt.

Vinum generosum, in quo panis biscotus aliquamdiu maceratus est, bis de die pauca dosi exhibitum ad vires restituendas, multum contulit.



MENSIS JANUARIUS.

1760.

MULTI febre continua putrida laborarunt.

Omnes habuerunt pulsum statim in principio debilem, sitim magnam, caput grave, faciem rubram, linguam albidam, tremulam.

Horrore spinam dorsi pervagante, & dolore capitis morbis incipit; appetitus erat sine nausea deletus, respiratio autem libera.

Delirium admodum leve quandoque observatum est; urina fuit ex flavo rubra, alvus quibusdam quotidie, quibusdam vero omni altero, vel tertio die prodiit; neque inde ægriangebantur, hinc non erat opus eam enemate, aut suppositorio sollicitare.

Noctes fuerunt satis pacatæ.

Ægri, a primo usque ad septimum vel undecimum diem manserunt in eodem statu, & nil in pejus, neque in melius mutatum est.

Verum septimo, vel undecimo die absque manifesta crisi omnia symptomata remiserunt, cessavit febris; pulsus fortior, & liberior deprehensus est, & rediit appetitus.

Urina nunquam posuit sedimentum, neque unquam turbata fuit.

Et eo die, quo febris desiit, naturalem habuit colorem, & odorem.

Nulli horum ægrorum vena secta est, quoniam pulsus & virium debilitas repugnavit.

Serum lactis vinosum, & mistura N. I. pro medicamento, & potu ordinario optime inserviverunt, & vires, quantum erat possibile, conservarunt.

Eadem mistura N. I. etiam cessante febre continuabatur; etenim observatum est, ejus usu continuo vires rediisse citius.

Febres catarrhales, pleuritides, peripneumonix hoc mense quoque multum grassabantur.

Peripneumonia pleuritidi perfrequenter juncta est.

64 *De Morbis acutis.*

Iteratæ venæ sectiones hic maxime locum habuerunt.

Symptomata prorsus eadem fuerunt, quæ mense præcedente enarrata sunt, hinc & eadem curandi methodus felicissimos habuit effectus.

Sputa rite procedentia multis ilico magnum levamen adtulerunt, & undecimo die, aut die decimo quarto, orto leni sudore, & prodeunte urina crassa, fœtente sequebatur perfecta judicatio.

Qui vero a sputo copioso, & bene cocto, allevati non sunt, his decimo quarto, aut decimo septimo die majori cum levamine supervenerunt miliaria alba, quæ quarto ab eruptione die in-ceperunt exsiccati, & tunc desiit febris, & increverunt vires.

Ex his tamen fuerunt sex, qui prodeuntibus copiosis exanthematibus magnum quidem habuerunt levamen, & exanthematibus exsiccatis, ac desquamata cute his quoque desiit febris, & viguit appetitus; verum nec redierunt vires adeo bonæ, ut aliis ægris; oculi manserunt minus vivaces, turbidi, & omnes adhuc pectus oppressum conquerebantur, sentiebant obtusum in sterno dolorem, & credebant os sterni torculari

versus interiora pectoris premi, & continuo tussitarunt.

Respiratio tamen non fuit valde difficilis, aut laboriosa; verum vi fortiori & pleno pectore peracta dolorem acutum ad costarum limbum, & circa hypochondria excitavit.

Optimo cum appetitu hi ægri cibos assumpserunt, neque magnum inde gravamen percepere, neque siti vexati sunt; pulsus fuit sat liber, æqualis, neque intra centum ictus magna differentia potuit observari.

Urinæ autem erant crudæ, inodoræ, & fæces duræ, nigræ.

Pondus opprimens thoracis, oculi minus vivaces, & vires semper debiles præfagiebant manifeste materiam morbosam adhuc in his ægris latere.

Qua de causa solo victu tenuiori, attamen sufficiente hos ægros sustentavi, & præter lenia infusa ex hædera terrestri, veronica, scabiosa eis exhibui misturam N. 1. & quoniam ex horum usu ægri sat bene se habuerunt, & quoniam omnia pacata videbantur, fortioribus medicamentis naturam non volui turbare.

Contigit dein, ut bini ex his ægris octavo die, quo a priore febre liberi erant, magnum dolorem capitis, sitim

86 *De Morbis acutis.*

validam, & appetitum deletum conquesti sunt, atque pulsus cœpit agitari, & urina prius tenuis & cruda, nunc crassa, & valde rubra comparuit.

Tertius æger nono die percepit symptomata eadem, reliqui tres autem die undecimo.

Hinc omnes passi sunt recidivam.

Secundus recidivæ dies erat longe peior, quam primus; nam vires penitus prostratæ sunt, febris fuit valde magna, sitis non delenda, lingua fusca, arida, respiratio laboriosa, urina crassa, jumentosa, stranguriosa.

Noctes fuerunt admodum inquietæ, anxie.

Tertio die accessit continuum delirium, sopor, & perpetua membrorum jactatio, urina, & alvus præter voluntatem in lectum dimittebantur.

Unde ilico nuchæ, & furis adplicata sunt vesicantia, & præter tenuia jufcula, & infusa leviter aromatica data est mistura N. 8.

Circa principium quarti diei lethales oriebantur anxietates, pulsus frequenter intermisit, extrema fuerunt frigida.

Verum hæc pessima signa vix per octavam horæ partem durarunt.

Nam mox rediit extremorum calor,

secutus est per universum corpus pruritus & sudor, & prodierunt copiosissima miliaria alba.

His prostrantibus disparuit sopor, delirium, respiratio fuit facillima, febris remisit, & pulsus tangebatur longe liberior, fortior, & nox insequens fuit quieta.

Omnes hi sex ægri quarta die eadem prorsus symptomata experti sunt.

Quinto, sexto, & septimo die sat bene habuerunt, & febris fere penitus abfuit, & exanthemata dein cœperunt exsiccari.

Urina tunc fuit viridescens, & post horam pessime foetuit, & signa salis alcalini exhibuit, alvus, qui tunc reddebatur, biliosa fuit, & admodum foetida.

Post quartum diem multis medicamentis hos ægros torquere, non erat necesse; levius infusa, juscula tenuia suffecerunt; ter solummodo per diem datum est cochlear unum ex mixtura N. 8.

Neque opus fuit paregoricis somnum conciliare, etenim sine his noctes erant quietæ, reficientes.

Undecimo die omnes fuerunt extra periculum, & solis nutrientibus mox

tantas recuperarunt vires , ut intra paucos dies potuerint ex nosocomio discedere.

Hoc mense unicum habuimus ægrum, qui petechiis laboravit.

Primis binis diebus obtusum capitis dolorem conquestus est, noctes fuerunt anxie, insomniis turbatae, pulsus nec nimium febrilis, nec plenus, nec fortis, vires languerunt. Lingua fuit plumbea, urina rufa, & prodeundo ardorem in urethra excitavit, appetitus penitus deletus, sitis mediocris.

Pro potu & medicamento dedi serum lactis vinosum.

Tertio die circa vespertas horror invadit ægrum, & extrema fiunt gelida, oritur major sitis, & pectoris anxietas, post horam sequitur calor ingens, dein sudor copiosus, foetidus.

Nox fuit admodum inquieta.

Quarto die æger fuit debilis, pulsus valde celer, parvus.

Circa vespertas iterum accessit horror, dein calor, demum sudor, & nox denuo fuit inquieta.

Unde ilico præter serum lactis vinosum exhibui misturam N. 20.

Quinto die inter deglutiendum æger acutum dolorem percepit, & fauces profunde rubebant.

Virium debilitas nullam admisit venæ sectionem , oculi tristes , inæqualis respiratio , & anxietas malam prognosin effecerunt.

Circa vespertas rediit horror , calor , dein sudor , verum horum symptomatum vehementia fuit longe minor.

Nox valde inquieta fuit , & æger multum deliravit , paregoricum datum nil juvit.

Sexto die in faucibus videbantur ulcera nigra , foetida , partes carnosas profunde exedentia.

Corticis peruviani dosin ideo auxi , & fero lactis addidi spiritum sulphuris per campanam , & syrupum diacodii.

Præterea saturatum infusum herbæ marubii & scordii , cui magna copia mellis rosacei , & spiritus salis acidii addebatur , syringa in fauces injici curavi , ut hac ratione ulcera mandarentur , & ab ulteriore arrosione defenderentur.

Sæpius dein per diem eadem ulcera medicamento N. 21. obliniebantur.

Vespertinæ exacerbationes erant admodum leves , nox tamen turbata , anxia.

Septimo die febris fuit mitis , verum vires debiles , sitis magna , delirium frequens , & supervenit sopor.

Dolor in deglutiendo fuit minor & ulcera fuerunt puriora, nec amplius vicinas partes arrosuerunt.

Iisdem medicamentis diligentissime continuatum est.

Vesperi nec horror rediit, nec febris exacerbata est.

Æger autem nocte erat in perpetuo delirio, urinam in scie dimisit, fuit valde soporofus.

Unde nuchæ, & furis vesicantia de-nuo applicata sunt.

Nono die fauces erant satis nitidæ, reliqua autem æque malo in statu inveniebantur.

Pulsus, licet fuerit debilis, æqualis tamen semper erat, & sat liber, neque respiratio admodum laboriosa fuit; & hæc erant, quæ aliquam contra tam gravia symptomata spem foverunt, cætera omnia mortem præfagiebant.

Etenim vesicantia, quamvis valde acria, nil operata sunt.

Decimo die fauces erant bonæ & naturalem habuerunt colorem, & deglutitio fuit satis libera, vires tamen mansuerunt languidæ, mansit profundus sopor, & æger urinam, & fæces foetidissimas in lectum dimisit.

Renuit corticem peruvianum quacunque forma exhibitum.

Quare, gangræna jam suppressa, a cortice abstinui, & exhibui claretum N. 3.

Mox pulsus videbatur major, & vires augebantur.

Nihilominus nox fuit valde inquieta, anxia.

Undecimo die absque perturbatione æger fuit plenus petechiis, & ea loca, quibus opposita sunt vesicantia, & quæ hucusque sicca erant, coeperunt serum glutinosum transudare, & secessit cuticula.

Respiratio fuit mox liberior, non tamen naturalis, & pulsus majores habuit vires, sopor videbatur minor.

Nox fuit magis pacata.

Duodecimo die æger frequenter deliravit, & fuit soporofus.

Nox dato paregorico quietâ reddebatur.

Decimus tertius dies similis fuit duodecimo.

Nox autem fuit admodum turbata, licet paregoricum daretur.

Eadem semper medicamenta data sunt.

Decimo quarto die novæ supervenerunt petechiæ, & tunc cessavit omne delirium, mens rediit, respiratio fuit

liberrima ; pulsus æqualis , vix febrilis ; vires multo majores.

Nox fuit quieta.

Decimus quintus dies pacate transigebatur , & petechiæ lætissimæ rubuerunt.

Urina , iterum vase excepta , fere naturalis fuit ; alvus autem prodiit liquida , biliosa , valde foetida.

Decimus sextus dies fuit æque bonus , & petechiæ cœperunt pallere.

Nox fuit quieta sine paregorico.

Decimo septimo die evanuerunt petechiæ , æger optime habuit , appetiit , & omnis febris cessavit.

Nihilominus clareto N^o. 3. in vigesimum diem æger uti continuavit , & pro potu dedi serum lactis vinosum.

Vires cito restaurabantur.

Vigesimo primo die exhibui haustum purgantem ; dein carnes concessi.

Vigesimo quinto die fanus nosocomium deferuit.



MENSIS FEBRUARIUS.

1760.

FEBRES catarrhales frequenter hoc quoque mense observatæ sunt.

Remedia emollientia , mellita & quandoque

doque lenia stimulantia ad omnia symptomata debellanda suffecerunt.

Quibusdam cessante tussi circa decimum quartum, aut decimum septimum, aut vigesimum diem miliaria alba apparuerunt, & mox febris cessavit, & inde ægri ab omni periculo liberi videbantur.

Neque horum exanthematum magna sollicitudo gerenda erat; sola diluentia, leniter aromatica, quibus insensibilis transpiratio conservabatur, plurimum conduxerunt.

Quibusdam vero exanthematum loco erupit sudor foetidus, lintheamina fusco & subflavo colore tingens; & tunc quoque febris remisit, disparueruntque omnia mala symptomata, & rediit salus.

Ex urina nil erat judicandum, etenim incertis diebus turbata est, & crassum posuit sedimentum sine ægrorum levamine.

Plerumque autem vel tenuis fuit, vel rufa.

Febris acuta putrida multos quoque ægros detinuit, & hi erant a tussi liberi.

Symptomata vero statim a primo die fuerunt vehementia: etenim tota facies rubuit, caput, ingens dolor prehendit, lingua fuit ficca, urina flammea, aut jumentosa, respiratio vero non multum

læsa, sitis magna, pulsus celerrimus, fortis, durus, at æqualis simul.

Hæc symptomata videbantur semper ruere in pejus, & ægri a nullo medicamento levamen habuerunt. Noctes fuerunt inquietæ.

Quarto die supervenit sopor, & continuo somno ægri opprimebantur, vi tamen excitati ea, quæ offerebantur, sine magno renixu assumpserunt, adrogata sat apte responderunt, verum sibi relictæ iterum in profundum somnum incidebant, & traxerunt ronchos.

Urinam & fœces semper inscie dimiserunt.

Pulsus autem, licet multum febrilis, nunquam tamen inæqualis deprehensus est, & fuit semper sat robustus, & respiratio mansit quoque satis libera.

Nox ante quintum diem dato paregorico fuit valde pacata.

Dies quintus autem malus.

Nox ante sextum diem quoque tranquilla fuit; dies autem sextus æque malus fuit ac quintus.

Nox ante septimum diem fuit maxime inquieta, ægri vi ex lecto surrexerunt, stragula abjecerunt, & nequaquam passi sunt tegumenta, nil assumpserunt, & totum corpus, atque omnia membra jactitarunt continuo.

Tandem debiles inceperunt profundissimo somno teneri, & per duas, tres, quatuor, & quidam per quinque horas quietissime dormiverunt, tandem exprogefatti, nullius horum symptomatum erant conscii, & optime se habuerunt.

Et eodem die fere in omnibus febris subito desiit, in paucissimis mansit quædam lævissima pulsus agitatio, quæ sensim usque ad undecimum diem penitus conquievit.

Eodem die, quo febris cessavit, rediit appetitus, ægri fuerunt alacres, & vires satis bonæ.

Nulla manifesta evacuatio critica observabatur, lenis erat septimo die transpiratio, alioquin cutis semper fuit sicca.

Hoc morbo, licet multi decubuerint, nullus tamen inde mortuus est.

Curatio sine multis medicamentis felicissime peragebatur.

Quoniam omnes in principio pulsum habuerunt plenum, fortem, & durum necesse erat omnibus, habita ratione virium, repetitis vicibus secare venam.

Remedia antiphlogistica ab initio morbi usque ad finem indicabantur; hinc solum serum lactis, decoctum hordei crudi cum nitro, & melle, decoctum

rad. scorzon., gram., acetos. &c. totum morbum potuerunt subigere.

Dum accessit profundus sopor, magna anxietas, & delirium frequens, vesicantia requirebantur.

Si autem hæc symptomata mitiora fuerunt, tunc epispastica suris applicata sufficiebant.

Paregorica vespertina ante quartum diem nil juverunt, imo magis noctes turbarunt.

Febris petechialis hoc mense frequenter observata est.

Hæc autem adferebatur à quibusdam Italis, qui ab exercitu huc advenerunt, & duxerunt mulos.

Ægri statim sub initium habuerunt levem horrorem, dein languerunt, caput totum obtuse doluit, pulsus fuit parvus, non admodum febrilis, sitis mediocris, lingua glutinosa, urina crassa, subrubra, & quidam anxia præcordia, os glutinosum, amarum, & continuum vomendi conatum conquesti sunt.

Secundo, & tertio die ægri non fiebant peiores, & alvus, sponte prodiens, fuit fusca, pultacea, foetida.

Noctes erant anxie, turbatae insomniis.

Quarto die vires magis prosterneban-

tur ; febris tamen major non est orta ; supervenit frequens delirium , sopor , & lancinans per omnia membra dolor , & anxia respiratio.

Lingua fuit plumbea , tremula , sitis ingens , urina erat crassa , fusca , alvus admodum foetida , biliosa ; verum nec copiosa , nec frequens , nisi in binis ægris , quibus quarto die accessit diarrhæa biliosa , quæ adeo sæva fuit , ut animi deliquium , & extremorum frigus , & ingentes dolores colicos produxerit.

Unde laudano liquido SYDENHAMI bis , terve per diem ad guttas XII. vel XVI. dato , mitigari debuit.

Quinto die quidam erant admodum soporosi , & delirarunt continuo , & his urina , & alvus citra voluntatem in lectum prodiit.

Aliqui vero per intervalla fuerunt sibi satis præsentēs , & petierunt matulam.

Urina fuit crassa , subfusca , alvus foetida , pultacea , in binis autem ægris diarrhæa sat mitis continuavit.

Sextus dies fuit similis diei quinto.

Septimo die in toto corpore , excepta facie , fere omnibus his ægris prodierunt petechiæ , sat boni plerumque coloris.

Paucum inde levamen perceptum est ;

sola anxietas , & respirandi labor leviores videbantur.

Qui septimo die non habuerunt petechias , iis prodierunt die undecimo.

Petechiæ septimo die prodeuntes cœperunt die undecimo disparere , & tunc jam febris penitus cessavit , rediit mens , & increverunt vires , neque ullum amplius periculum aderat ; & decimo tertio , aut decimo quarto die nulla prorsus petechiarum signa amplius supererant.

Petechiæ autem undecimo die prodeuntes disparere cœperunt die decimo quarto maximo cum levamine omnium symptomatum , & decimo septimo die aderat sanitas.

Bini ægri , qui quarto die in diarrhæam inciderunt , satis mitia semper habuerunt symptomata , & septimo die sponte sistebatur diarrhæa , & desuit febris integre.

Nec visæ sunt petechiæ , licet ex signis , & symptomatibus , quæ hi cum aliis ægris communia habuerunt , has prodituras fuerim suspicatus.

Verum hi erant per aliquot dies debiles ; dein autem appetierunt , & brevi convaluere.

Ex tot ægris , petechiis laborantibus , unus obiit , & neque hic vi morbi ,

sed vi animi pathematum suppressus est; etenim ex periculosissimo morbo convalescens, vidit se a suo socio omnibus suis pecuniis spoliatum, unde mox patiebatur recidivam, ferociter deliravit, maxime anxius fuit, neque oblata assumpsit, vires habuit debilissimas, & quarto die convulsus obiit.

Ægris, qui febre petechiali decumbebant, venam non fecui, quoniam omnium vires erant debiles, & pulsus parvus.

Emerica autem necessario dari debuerunt iis, qui nauseam, & oris amærorem, & præcordiorum anxietatem, a saburra, in ventriculo hærente, conquesti sunt, & omnes inde mox levamen perceperunt, & alacrius oblata dein medicamenta assumpserunt.

Ob vires debiles medicamenta leniter stimulantia, statim in principio morbi requirebantur; unde serum lactis vinosum, vel mistura N. 1. vel claretum N. 3. his ægris maxime profuerunt.

Qui autem admodum debiles erant, & soporosi, his præter remedia vinosa dabatur alternis vicibus mistura N^o. 8.

Inquietudines, membrorum jactationes, & noctes anxie paregoricis mitigantur.

Soporosos vesicantia excitarunt.

Remediis, a primo morbi die datis, ad finem usque continuatum est, quoniam eadem semper mansit indicatio; imo cessante febre ad vires citius restaurandas eadem remedia per plures adhuc dies optimo cum effectu sunt adhibita.

Unicus erat æger, qui superato morbo petechiali, tussi ferocissima correptus est, & raucam habuit vocem, a febre autem penitus liber fuit.

Decoctum N°. 4. datum, mitigavit tussim, dispulit raucedinem, & sputa reddidit mobilia. Verum vires ea egerendi erant debiles, hinc ortus est in pectore stridor. Dato autem clareto N°. 13. mox copiosissima prodierunt sputa, & hoc solo medicamento, & paregoricis vespertinis, intra duodecim dies æger a tussi liberatus est. Postea vero totus emaciatus usu lactis convaluit.

Antequam purgans post morbum daretur, carnibus vesci non licuit, vires enim inde languerunt, insurrexerunt ructus putridi, & deletus est appetitus cum horrore; dato autem antehac purgante ex rheo, tunc carnes, debita copia assumptæ, non nocuerunt.

Vinum quoque tunc datum multum iuvit eos, qui vino antehac erant assue-

ti; aquæ vero potatoribus calores, & anxietates excitavit.

Tempus exhibendi purgans erat plerumque sextus, vel septimus, aut octavus post morbum dies.

Bini ægri, febre continua decumbentes, primis tribus diebus adeo levibus afficiebantur symptomatibus, ut morbus nec periculofus, nec longus futurus videretur.

Verum quarto die præter rationem omnia ruerunt in pejus. Et primus ex his ægris tunc admodum anxius factus est, sitim habuit maximam, facies erat livida, lingua tumida, purpurea, oculi concavi, pulsus celerrimus, inæqualis, exiguus, respiratio densissima, membrorum jactatio perpetua, urina prius rufa, nunc tenuis prodiit & brevi pessime foetuit.

Nec ex ullo remedio æger levamen sensit, noctes erant vigiles, & ob intolerabilem cordis tremorem æger jacere non potuit, & coge batur trunco erecto, aut in anteriora inclinato, sedere, & semper gemuit, extrema plerumque frigerunt, & gelido sudore maduerunt, circa præcordia erat perpetuus ardor, nullum autem acutum dolorem conquestus est, sub finem sexti diei obiit.

Aperto cadavere reperimus pulmones, grumoso sanguine infractos, & cordis apicem sphacelo penitus corruptum.

Ventriculi cordis crassos sanguinis grumos continuerunt.

Alter autem æger nec adeo anxie respiravit, nec pulsum habuit adeo exillem, & potuit decumbere.

Verum sitis fuit æque magna, & urina quoque tenuis facta est, & in ventre oriebatur dolor acutissimus, & supervenit frequens animi deliquium cum extremorum frigore, noctes quoque ob continuum delirium, & ob perpetuam membrorum jactationem insomnes, & anxie fuerunt, respiratio autem fuit satis pacata.

Vesicantia neque in hoc, neque in priori ægro ullum effectum præstiterunt, cataplasmata ventri applicata dolorem paulisper mitigarunt, interna autem remedia juverunt nihil.

Septimo die æger soporosus fuit, & intumuit venter, nono die rediit æger ad se, nec deliravit, & se magnum sentire levamen aiebat.

Verum facies erat pallida, nasi apex frigidus, oculi concavi, vires parvæ, lingua tremula, extrema frigida, & viscido sudore madida, pulsus exilis,

inæqualis, frequenter intermittens.

Orti sunt borborygmi, & prodierunt flatus foetidissimi, tandem prodiit urina, & alvus putridissima, æger incidit in animi deliquium, & periit.

Intestina plurima erant gangrænosa.

Lobus medius pulmonis sinistri, ea parte qua dorsum spectat, quoque putridus, & gangrænosus fuit; hic tamen æger nunquam tussivit neque laboriose respiravit.

Ambobus his ægris a quarto morbi die ad finem usque datus est cortex peruvianus magna dosi, præter alia medicamenta, gangræna tamen impediri non potuit.



MENSIS MARTIUS.

1760.

FEBRE continua multi decubuerunt; vires statim in principio in plerisque fuerunt debiles, & anxia respiratio, sitis magna, lingua alba, aut fusca, & sicca, urina fere semper flammea, caput, spina dorsi, & artus dolore dilacerante continuo torquebantur.

Circa vespervas semper exacerbata sunt

symptomata, & ægri delirarunt, & jacuerunt admodum inquiete.

Omnes hi ægri leni stimulo opus habuerunt, hinc plerisque data est mixtura N. 1. aut claretum N. 3. valde debilibus autem mist. N. 8.

Lenia paregorica, vesperi, & quandoque interdiu exhibita, vim symptomatum diminuerunt, & ægris attulere levamen, attamen ante septimum diem iis somnus quietus non potuit conciliari.

Imo, si paulo fortiori dosi data sunt remedia paregorica, tunc turbarunt noctes, reddiderunt ægros magis inquietos, anxios, soporosos, & sequenti die tales ægri manserunt debiles, somnolenti, deliri.

Septimo die plurimis prodierunt miliaria alba copiosissima, prægresso sudore, & ingenti pruritu per universum corpus.

Dolor capitis, artuum, & spinæ dorsi tunc siluit, & remisit sitis, & noctes paregorico licuit quietas reddere, nec amplius ægri delirarunt.

Verum febris mansit æque magna, mansit respiratio difficilis.

Urinæ fuerunt subfuscae, flocculentæ, sine sedimento, alvus vel quotidie,

vel alterno die ſponte prodiit, bene cocta.

Iſdem remediis, quæ ſtatim in principio morbi data ſunt, ſemper continuatum fuit.

Undecimo die miliaria erant minus pellucida, & cœperunt exſicari, & tunc eodem die, vel die duodecimo, vel decimo tertio ſupervenit tuſſis ſatis violenta.

Quidam orta tuſſi ilico ſputa copioſiſſima, craſſa, glutinoſa, rejecerunt, & tunc remiſit febris, & reſpiratio multum emendata eſt. Decoctum N. 4. & paregorica vespertina hos ægros plurimum juverunt.

Qui vero ad egerendum ſputum nimis debiles fuerunt, eos juvit claretum N. 13.

Quandoque tamen ægri irritata, & frequentiſſima tuſſi vexati ſunt, conquerantur faucium, & totius pectoris ſiccitatem, & oſſis ſterni ardorem, & ortus eſt magnus dolor circa hypochondria, & reſpiratio fiebat difficiliſſima.

Decoctum N. 22. vel linctus N. 23. omnia ſymptomata brevi mitigarunt, & tuſſis fuit longe minus moleſta, & intra binos, ternosve dies cœpit materia puriformis prodire; unde tunc de-

cocto N. 22. addebatur, loco fyrupī diacodii, oxymel simplex vel oxymel scilliticum, vel hujus decocti loco dabatur decoctum N. 4. vel, si vires defecerunt, clatetum N. 13.

Durante hoc morbo nunquam licuit paregorica vespertina intermittere, nam sine his noctes fuerunt anxiae, & ægri irritata tussi defatigati sunt.

Quandoque per binos, ternosve dies sputa copiosa, & optime cocta prodierunt, postea vero pectus iterum videbatur siccum, & tussis erat inanis, & magnum in faucibus & sterno ardorem excitavit.

Unde tunc iterum redeundum fuit ad decoctum N. 22. vel ad linctum N. 23.

Verum quam primum sputa iterum mobilia fuerunt, tunc debebat exhiberi decoctum N. 4. vel claretum N. 13.

Hac ratione erat sæpius alternandum, usque dum tussis penitus cessavit, & respiratio libera fuit.

Multis ægris post diuturnam tussim supervenit sudor nocturnus, & corporis macies.

Infusum N. 24. & cremor hordei vel avenæ mundatæ, vel oryza cum lacte cocta, & juscula meraca, sæpius per

diem data, his restituerunt vires, & suppresserunt sudorem.

Quandoque opus fuit durante tussi dare purgans, dum nimirum ægri pondus circa ventriculum, nauseam, & os glutinosum conquesti sunt.

Drachma unica rhei plerumque suffecit.

Subinde tamen ægri a purgante nequaquam melius habuerunt, neque symptomata mutata sunt, hinc vomitorio hos aggredi necesse erat.

Grana viginti quinque radicis ypecacuanhæ, & quindecim grana salis absinthii magnam glutinis copiam repetito vomitu eduxerunt, quo facto, mox viguit appetitus, & anxietas præcordiorum disparuit. Cavendum tamen erat, ne nimio cibo subito ventriculus oneraretur, fecus priora mox redierunt symptomata.

Febris acuta simplex hoc quoque mense frequenter observata est; verum symptomata erant levia, & maxime communia, hinc & simplex curandi methodus administrata fuit.

Binæ solummodo feminae fuerunt, in quibus peculiare quid observare licuit.

Hæ habuerunt pulsum debilem, valde

celerem, respirationem sine tussi laboriosam, lingua fuit alba, humida.

Quaecunque his ægris offerebantur, ea lubentissimo animo assumpserunt, verum sua sponte nil petiere, nec responderunt ad rogata, nec ullum dolorem conquestæ sunt, morosissimæ videbantur.

Oculi erant torvi, semper fortiter distenti, & uni objecto pertinacissime affixi; somno tamen claudebantur; his vero magna opii dosis debuit conciliari. Inter dormiendum respiratio fuit liberior.

Post somnum eadem prorsus symptomata observabantur.

Ægræ alvum & urinam in lectum deposuerunt, nec, ut inde purgarentur, rogarunt, & in eodem, quo ponebantur ab adstantibus, situ immobiles semper jacuerunt.

Ex pulsu debili vires prostratas esse, facile concludebatur.

Hinc præter copiosa infusa & decocta diluentia ac leniter stimulantia exhibui misturam N. i.

Verum nil in pejus, nil in melius inde mutatum est, quoniam tamen eadem semper mansit indicatio, nolui præter rationem medicamenta mutare.

atque ideo eandem misturam semper præbui.

Septimo die furis vesicantia iussit adponi; verum neque his ulla mutatio facta est.

Nono die una ex his ægris circa horam sextam vespertinam toto corpore riguit, dein frequentissime gemit, & orta est major febris, & calor; post binas horas febris exacerbatio iterum remisit, & sequebatur sudor copiosus, foetidus, dein tranquillus somnus ægram occupavit.

Decimo die mane pulsus fuit parvus, & reliqua symptomata inveniebantur prorsus eadem.

Tempore vespertino circa eandem horam magna cum violentia iterum rediit paroxysmus, & hoc finito ægra valde debilis fuit.

Quapropter ilico corticem peruvianum larga copia exhibui.

Et undecimo die paroxysmus non amplius rediit; morbus autem prior nequaquam mutatus est.

Duodecimo die in usu corticis peruviani perrexī, verum vires erant admodum parvæ, & symptomata periculosa.

Decimo tertio die dedi claretum N. 3.

Decimo quarto die ægra ad se rediit,

incepit loqui, petiit cibos, & febris integre desiit, atque ab hoc die redierunt vires & valetudo.

Secunda ægra nullas febris exacerbationes passa est, neque ulla contigit mutatio usque in diem decimam septimam; & tunc pulsus erat naturalis, ægra respondit ad rogata, noctu sine paregorico dormivit, & brevi convaluit.

Hæc ægra toto morbi tempore nullum aliud remedium præter misturam N. 1. assumpsit.

Vir 34. annorum ex vehementi ira in febrem acutam incidit, vires mox prostratæ sunt, & pessima symptomata supervenerunt; tertio morbi die tendines totius corporis subsilierunt, respiratio fuit pessima, pulsus exiguus, intermittens, & cutis continuo, largo & vapido sudore maduit.

Omnis generis remedia interna, & externa summa cum sollicitudine exhibita nil prorsus levaminis adtulerunt & sub finem sexti diei, æger subito palluit, tetano universali correptus est, pessimum hoc symptoma ultra horam duravit. Triste erat videre hanc statuam immobilem; remittente tetano dirissimæ convulsiones secutæ sunt, quibus æger succubuit.

Sectione anatomica, quamvis accuratissime facta, nil potuit inveniri, in quod causam horum symptomatum & mortis licuisset transferre.



MENSIS APRILIS.

1760.

FEBRES catarrhales admodum frequentes hoc mense mecum in nosocomio observavit doctissimus Medicus Collin.

Præterea aderant multi ægri febre acuta laborantes, quibus nequaquam tussis molesta fuit.

Miliaria alba in tribus solummodo ægris hoc mense nobis obvenerunt, & his, dum miliaria cœperunt exsiccari, desinit febris, atque tunc orta est tussis, & mox prodierunt sputa puriformia, quibus rite procedentibus ægri sanitatem brevi recuperarunt.

Exanthemata petechialia hoc mense visa non sunt.

Morbo acuto nullus mortuus est, omnēs simplicissima methodo conservabantur.

Infantes, pueros, & juvenes peculiaris quædam febris acuta hoc mense detinuit.

Primis binis diebus caput his vehementer doluit, & oculi fuerunt turbidi, pulsus autem fere naturalis fuit, neque magna sitis observata est, verum vires erant solito minores.

Tertio die capitis dolor auctus est, increvit sitis, oriebatur febris, cutis tota tendebatur, & dolor dilacerans membra occupavit, & jam ægri non amplius extra lectum esse potuerunt.

Finiente tertio die universum corpus colore profunde rubro tinctum videbatur, & oculi erant torvi, rubri, ægri autem nec soporosi fuerunt, nec deliraverunt, lingua erat crassa, tenaci & alba crusta obducta.

Nox ante quartum diem fuit insomnis, anxia.

Quarto die eruperunt per totum corpus pustulæ admodum parvæ, rubræ, rotundæ, & facies erysipelatoso tumore inflata est.

Quibusdam hoc die fauces simul inflammabantur, & deglutitio reddebatur valde difficilis, dolor autem capitis & membrorum penitus evanuit.

Febris mansit æque magna, sitis autem minor fuit, & cutis prius tensa ac sicca leni transpiratione mollis & subhumida apparuit.

Urina, quæ tertio die flammea fuit, nunc turbata est, & sedimentum crassum posuit.

Alvus vero, per plures dies clausa, enemate aut suppositoio debuit provocari.

Nox dato paregorico fuit admodum tranquilla, reficiens.

Quinto die febris fuit minor, sitis pauca, urina prodiit coloris fere naturalis, & oculi fuerunt minus rubri, & magis vivaces.

Nox dato paregorico iterum quieta fuit.

Sexto die cutis rubor coepit diminui, & reliqua symptomata fuerunt mitissima. Nox fuit quieta.

Septimo die pustulæ pleræque ruptæ sunt, & cutis habuit colorem naturalem, febris desiit, & viguit appetitus, vires fuerunt longe majores.

Octavo die ægri extra lectum per plures horas esse potuerunt, in cute autem perceperunt continuum pruritum, & epidermis abiit in furfures.

Curatio solo infuso N. 19. perficiebatur.

Idem infusum gargarismatis loco datum est iis, qui quarto die angina correpti sunt.

Præterea collum cataplasmate emolliente involutum fuit.

Haud raro observavimus, ægros, ex morbo acuto convalescentes, febre intermittente quotidiana, aut tertiana correptos fuisse.

Et quidam adeo vehementes habuerunt paroxysmos, ut brevi cortice peruviano debuerint supprimi.

Reliqui vero, qui minus violenter inde afficiebantur, solis remediis salinis, & amaricantibus curati sunt.



M E N S I S M A I U S.

1760.

TUSSES hoc mense longe rariores fuerunt.

Verum febres continuo remittentes admodum frequenter observatæ sunt.

Omniibus ægris circa vespertas febris exacerbata est.

Quidam tunc valde anxii fuerunt, & dolores ingentes per omnes artus conquesti sunt, & cessante exacerbatione sudore viscido vires amiserunt.

Quibusdam sub paroxysmo prodierunt pustulæ rubræ vel maculæ purpurascences per totum corpus, quæ ingra-

tissimum pruritus excitavit, finiente autem paroxysmo sponte iterum disparuere.

Quidam vero sub exacerbatione leves tantum anxietates, & capitis dolores perceperunt, neque propterea multum debilitati sunt, & noctes habuerunt satis tranquillas.

Qui levioribus symptomatibus affiebantur, ii solo decocto hordei crudi, addito pauco nitro, & melle puro, intra septem vel undecim dies sanati sunt.

Quos autem exacerbatio febris nimium defatigavit, iis cortex peruvianus magna dosi exhiberi debuit.

Quibus ilico exacerbationes suppressæ sunt, iis neque amplius redierunt anxietates, nec pustulæ comparuerunt, nec pruritus perceptus est, pulsus tamen leniter febrilis mansit.

Et urina postea prodiit crassa, admodum foetida, & posuit sedimentum lateritium.

Atque hi ægri undecimo aut decimo quarto die a febre liberati sunt.

Quibusdam tertio, aut quarto, aut quinto morbi die diarrhæa supervenit, hæc autem mitis fuit, nec ægros defatigavit.

Quatuor ægri febre putrida admodum

periculose decubuerunt. Primo die statim valde debiles fuerunt, pulsum habuerunt inæqualem, parvum, sitim ingentem, linguam albam, & urina flammea prodiit.

Quarto die cœperunt delirare, & tendinum subsultu exagitari.

Præterea continuo sopore tenebantur, fuerunt anxii, & decubuerunt cruribus versus pectus adtractis. Oculi erant lachrymantes, turbati, vires admodum languidæ, pulsus parvus, celer, inæqualis, respiratio densa, & urina rubra, crassa, foetida, alvus viridis, cruda.

Vesicantia furis & nuchæ adposita sunt.

Quinto die vires fuerunt exiguæ, & ægri, admodum anxii, largo, viscido sudore maduerunt.

Vesicantia nil operata sunt.

Sextus dies fuit quinto similis.

Septimo die tres ex his ægris multo melius se habuerunt, etenim remisit febris, sitis, & sudor, & vires videbantur majores, oculi magis vivaces.

Undecimo die hi ab omni febre & periculo liberi fuerunt.

Quartus autem æger septimo die pejus habuit, nam reliquis pessimis symptomatibus diarrhæa larga, & defatigans

fatigans se junxit, & vires inde adeo dejectæ sunt, ut æger citra animi deliquium sese erigere non potuerit.

Octavo die usu laudani liquidi SYDENHAMI diarrhæa multo mitior fuit.

Nono die æger per vices tranquille dormivit, & inde vires paulisper auctæ sunt.

Decimo die jam petiit matulam, neque amplius passus est animi deliquium, & nox ante undecimum diem erat tranquilla.

Undecimo die febris fuit exigua, vires magis increverunt, sitis remisit.

Duodecimo & decimo tertio die omnia symptomata fuerunt valde mitia; & decimo quarto die pulsus fiebat æqualis, liber, & omnino naturalis, atque diarrhæa penitus cessavit, & æger cœpit optime convalescere.

Ex omnibus remediis optimos effectus his quatuor ægris præstitit mistura N. 25.

Vesperis semper datum est lene pægoricum.

Pro potu ordinario exhibebatur serum lactis vinosum, quo etiam post morbum ad vires restaurandas hi ægri aliquandiu usi sunt.

Miliaria alba in unica femina hoc mense visa sunt.

Petechiis vero bini viri decubuerunt.

Primus decimo quarto die orta diarrhæa biliosa, & prodeunte urina crassa, jumentosa a febre judicatus est.

Alter vero finiente die decimo obiit.

Erant autem symptomata jam a quarto morbi die lethalia, & æger se ipsum in principio neglexit.

Etenim primis diebus, licet vires habuerit valde debiles, & sitim magnam, & appetitum cum nausea deletum, & obtusum capitis membrorumque dolorem: atque frequentes horripilationes, nil tamen est conquestus, neque se in lectum contulit, & sola fame morbum enecare voluit.

Hanc curationis methodum in quartum diem protraxit, & præter tenuia iuscula, & aquam assumpsit nihil.

Verum quarto die oriebatur tanta appetentia, ut æger sese abstinere non amplius potuerit, hinc magnam ciborum copiam avidissime devoravit, & copiosum vinum hausit.

Mox inde anxius factus est, supervenit animi deliquium violentissimum, & vomitu omnes cibi iterum rejiciebantur, erat autem vomendi conatus adeo

vehemens, ut tandem copiosus sanguis prodierit.

Pulsus tunc erat inæqualis, celerissimus, admodum debilis, urina prodierit fusca, foetida.

Noctu fortiori paregorico somnus quidem potuit conciliari, verum is non fuit reficiens.

Quinto die totum corpus fuit plenum petechiis sublividis, oculi erant fulvi, lingua tremula, plumbea, sitis magna, caput obtuse doluit, & tempora & frons torculari fortissime quasi comprimi ægro videbantur, situs corporis fuit admodum inquietus, & accessit diarrhæa biliosa, foetida, defatigans, pulsus erat parvus, inæqualis, intermittens, vires valde debiles.

Nox fuit anxia.

Sextus dies fuit similis quinto.

Nox erat anxia.

Septimo die æger fuit soporosus, & fere perpetuo deliravit, floccos carpsit, frequenter electo voluit surgere, fœces, & urinam inscie dimisit, pulsus erat exiguus, inæqualis, intermittens, sitis tunc penitus deleta est, hypochondria coeperunt tendi, inflari, & frequentes borborygmi auditi sunt, diarrhæa nulli remedio obedivit, vesicantia nuchæ,

suris, tandem & humeris adplicata, nullum effectum præstitere.

Nox fuit inquieta.

Octavo die æger fuit sibi magis præfens, & sibi omnia videri leviora aiebat; interim pulsus fuit admodum inæqualis, intermittens, tremulus, diarrhæa continuavit.

Venter intumuit, & respiratio cœpit esse laboriosa, & observati sunt tendinum subsultus, convulsiones; petechiæ valde numerosæ, lividæ, latæ, & irregularis figuræ adhuc per totum corpus visæ sunt.

Nox fuit anxia, & æger fere semper deliravit, bis tamen dum lucida intervalla habuit, petiit matulam, & inter lethales anxietates ac enormes ardores reddidit urinam paucam, crassam, foetidissimam.

Nono die omnia erant valde mala, extremitates mox frigidæ, mox calidæ deprehensæ sunt, & facies nunc palluit, nunc rubuit, petechiæ cœperunt disparere.

Nox fuit anxia.

Decimo die signa mortis imminuere, pulsus frequenter evanuit, & extrema fuerunt semper gelida, & totum corpus glutinoso sudore maduit, asperam arte-

riam materies viscida replevit, unde ortus est in pectore strepitus, & respiratio sublimis.

Nox fuit pessima.

Incipiente undecimo die nullus in extremis pulsus inveniri amplius potuit, carotides tremulo & inæquali motu agitabantur, totum corpus livuit, tandem inter continuas membrorum jactationes, & anxietates suffocantes æger obiit.

Remedia antiphlogistica, lenia aromatica, vinosa, acida ex vegetabilibus, & mineralibus parata, nullatenus pro-
fuerunt, inter hæc cortex peruvianus largissima dosi a sexto morbi die ad finem usque exhibitus, ne minimam in melius mutationem effecit.

Sola paregorica momentaneum quandoque levamen adtulerunt.



MENSIS JUNIUS.

1760.

OMNES, qui febre acuta decubuerunt, circa quartum, quintum, sextum vel septimum diem diarrhæa correpti sunt.

Hæc plerumque morbum levavit.

In paucis erat vehemens & defatigans;

verum laudano liquido SYDENHAMI poterat facile inhiberi.

Binis tantum ægris ad nonum diem supervenerunt miliaria alba, & his prodeuntibus cessavit febris, & siluit diarrhæa.

Quidem post morbum acutum inciderunt in dysenteriam, quæ vires multum debilitavit.

Aderant enormes ventris dolores, borborygmi, tormina, urina fiebat stranguriosa, & oriebatur molestus alvi tenesmus.

Quidam, simili dysenteria occupati, appetierunt; quidam vero os amarum conquesti sunt, & horrorem a cibis.

Et his debebat vel rheum, vel ypecacuanha exhiberi.

Reliqui evacuante opus non habebant.

Remedia adstringentia ad dysenteriam cohibendam hoc mense non profuerunt; nam licet alvum quandoque retinuerint, orti sunt dolores, anxietates, & altero vel tertio die rediit dysenteria longe violentior, & tunc continui tenesmi ægros defatigarunt, & haud raro inducere animi deliquium.

Decocta emollientissima, mucilagino-fa, involventia, & remedia opiata hic optime conveniebant.

Dominus COLLIN , qui plurimam tunc curam habuit , solo saturato decocto radicis salab. , addita debita quantitate laudani SYDENHAMI fere omnes hos ægros facillime sanavit.

Aderat eodem tempore in nosocomio vir , triginta circiter annorum , qui phrenitide laboravit.

Facies fuit ruberrima , tensa , oculi torvi , lingua arida , fusca , pulsus inæqualis , durus , celerrimus.

Æger ferociter deliravit , spuit in adstantes , eosque manibus percussit.

Iteratæ venæ sectiones , remedia diluentia , antiphlogistica , alvumque laxantia morbum nequaquam mitiorem reddiderunt.

Neque juvabant remedia paregorica , quæ , factis necessariis evacuationibus , adhibebantur ; neque alia remedia sive interna , sive externa.

Quarto die æger languet , silet a clamore , ferocia minuitur , delirium fit admodum leve.

Hæc dum contigerunt , inflabatur facies tumore erysipelatoso.

Copiosissimum rob. sambuci cum sale polychresto & nitro tunc præter decocta antiphlogistica ingerebatur.

Lenia erant omnia symptomata , nec

æger deliravit, per intervalla dormivit, & inde videbatur refici, nec febris admodum intensa fuit.

Finiente sexto die faciei tumor subito evanuit, & æger cœpit summo cum labore respirare, tussire, delirare.

Dominus COLLIN tunc magnam febrem deprehendit, & vidit veram adesse peripneumoniam.

Unde ilico venæ sectionem instituit, eandemque ter illo die adhuc repetiit.

Præterea præscribebatur decoctum N. 4.

Octavo die prodierunt sputa copiosa, cocta, crassa, & æger melius habuit, febris mitis fuit, & respiratio longe liberior.

Undecimo die cessavit febris. Decoctum tamen N. 4. ægro adhuc datum est, quoniam copiosa sputa prodire continuarunt.

Intra paucos dies tussis desiit, æger liberrime respiravit, appetiit, & sensim optime convaleuit.

Post morbum caput erat debile, & vertiginosum: verum dum vires redierunt, sponte disparuit vertigo.

*De Febre continua Arthritica ,
& Rheumatica.*

AUTUMNO , hyeme , & vere multi aderant in nosocomio , qui febre continua arthritica aut rheumatica laborarunt.

Aër humidus , nebulosus , & frigidus hos morbos plerumque produxit.

In principio horror & frigus spinam dorsi , aut integrum quandoque corpus permearunt ; dein orta est febris & sitis , & mox prodiit urina crassa , jumentosa.

Post aliquot horas accessit dolor vagus , qui eodem adhuc die vel die sequenti sedem fixit , & jam genua , vel coxas , vel humeros , scapulas , aut vertebrae lumborum , dorsi , aut colli occupavit , quandoque invasit costas ; & pleuritidem simulavit.

Plaga dolore affecta quandoque intumuit , quandoque vero nullus tumor advertebatur , omnis autem adtactus dolorem auxit.

Hoc in statu si febris non fuit admodum vehemens , & si æger seipsum non neglexit , morbus in principio facile potuit curari.

106 *Febris continua arthritica,*

Neceſſe erat tunc, ut æger mox ſe in lectum conferret, & moderato tegmini pondere, & copioſo infuſi florum ſambuci, vel trium ſantalorum, vel ligni ſaſſafras, vel foliorum leviſtici &c. potu ſudorem provocaret, quo fere ſemper intra breve temporis ſpatium dolores multum minuebantur, & pulſus fiebat liberior.

Postquam hac ratione ſymptomata mitigata ſunt, tunc non amplius opus fuit largum promovere ſudorem, attamen debitam conſervare tranſpirationem ſumme erat neceſſarium, unde in uſu infuſorum egregie erat pergendum.

Frictiones leniores, pannis laneis calidis peractæ, multum quoque ad curæ celeritatem contulerunt.

Levior talis febris intra binos ternosve dies deferbuit.

Raro venæ ſectione opus fuit.

Quamdiu duravit febris, tamdiu prodiiit urina craſſa, turbida, fœtens, & produendo ardorem excitavit.

Ægri, ab hac febre liberi, ſumma adtentione ſibi debebant cavere, ne corpus aëri frigidiore denuo exponerent, nam erant admodum faciles ad recidivam, & recidiva fuit curatu longe difficili-
cilior.

Subinde vero hujus morbi symptomata statim primo aut secundo die fuerunt admodum gravia, & periculosa.

Etenim multos habui ægros, quibus prægresso horrore orta est ingens febris, sitis magna & dolor acutissimus articulos & artus invasit.

Secundo aut quandoque primo statim die partes dolentes tumore albo inflabantur, & inde omnia adeo erant tensa, ut ægri nullum membrum absque summo dolore potuerint movere, & propterea rogarunt adstantes, ne nimis prope accederent, aut quamdam corporis partem tangerent; a minimo enim adtactu tantus excitabatur dolor, ut miseri clamorem inhibere non potuerint.

Pulsus semper fuit admodum celer, plenus, durus, unde plerumque repetitis vicibus vena debuit tundi.

Sanguis semper tegebatur crusta, flava, crassa, tenacissima; serum a sanguine subinde per quatuor aut quinque horas non secessit, & quod secessit, paucum fuit, & crassum; & aliquoties observavi, id virgula elevatum fila egisse.

An in fero sanguinis præcipua erat mali sedes?

Remedia antiphlogistica, refrigeran-

108 *Febris continua arthritica* ,
tia, resolventia, & lenem transpirationem excitantia hic maxime locum habuerunt.

Unde infusum N. 19. utilissimum fuit.

Alvus erat semper pertinacissime clausa, quapropter omni tertio die optimo cum effectu exhibebatur haustus purgans antiphlogisticus.

Raro ante quartum, quintum, sextum, septimum, aut quandoque octavum diem ægri levamen perceperunt, dein vero remisit dolor, & tensio.

Noctes fere semper inquietæ fuerunt, imo versus vesperras dolor, qui per diem sat mitis fuit, plerumque exacerbabatur.

Quamprimum vehementia symptomatum remisit, & tumores molles & flacidi facti sunt, & ægri coeperunt membra absque magno dolore movere, tunc non amplius necesse fuit, toties repetere purgantia; ab his enim nimis frequenter exhibitis, ægri debilitati sunt, & morbus est prolongatus.

Infusa incidentia, lenia sudori fera, & frictiones reliquæ curationi absolvendæ suffecerunt.

Nunquam ante vigesimum diem omnis dolor abiit, & is quandoque ultra trigesimum aut quadagesimum diem duravit.

Quidam ægri diuturnitate morbi , continuo dolore , tussicula sicca , & sudore nocturno vires fere omnes amiserunt , & sunt penitus emaciati.

His autem symptomatibus facile occurrebatur diæta humectante , replente , nutriente ; infusum N. 24. multum profuit , ut & lac recens.

Multi ægri tumore rheumatico universali afficiebantur ; etenim tertio vel quarto morbi die cutis totius corporis coepit tendi , albo tumore elevari , & acute dolere , ipsa quoque facies tumore difformis facta est.

Curandi methodus , quæ priores ægros juvit , his quoque feliciter administrata est.

Qui tantam ex remedio N. 26. copiam potuerunt assumere , ut levis inde diarrhæa fuerit secuta , ii reliquis citius curati sunt.

Si cessante hac febre subito omnia membra detumuerunt , tunc semper materies , prius per totum corpus dispersa , in unum locum confluxit , & ingentes tumores lymphaticos efformavit.

Hi tumores plerumque genua , coxas , inguina , aut humeros occuparunt.

Unicus fuit æger , in quo hæc mate-

110 *Febris continua arthritica*,
ries intra scapulas colligebatur, & fiebat
ibi tumor, qui magnitudine caput vi-
rile excessit; aperto hoc tumore novem
libræ feri flavi viscidi effluxerunt.

Tentavimus ab initio hos tumores,
remediis externis discutientibus dissipare,
& materiem internis lenibus sudoriferis,
aut diureticis ex corpore expellere.

Verum res successu caruit, & ægri
pejus habuerunt, & emaciati sunt.

Unde Dominus HAFFNER chirurgus
& ego statuimus eos scapello aperire.

Prodiit semper serum flavum, visci-
dum, quod leni calore potuit inf-
pissari.

Ægros tunc, ex præcedente morbo
admodum debiles, nullis amplius medi-
camentis defatigavimus, sed solo sero
lactis, lacte recenti, & cibo molli eos
reficere sumus conati.

Vulnera ex discisso tali tumore re-
lictæ patientiam, & sedulitatem chi-
rurgi multum exercuerunt, quoniam
copiosissimum serum fuderunt, & con-
solidationi pertinaciter resistere.

Adstringentibus serum affluens repri-
mere non licuit, quoniam ægri anxii
inde reddebantur, & orta est nova fe-
bris.

Longo tempore diversa remedia ex-

terne tentavit Dominus HAFFNER, operatam tamen metam numquam potuit adtingere.

Tandem, quoniam multiplici experientia confirmati eramus, infusum cicutæ in pertinacissimis ulceribus adhibitum, mox sanationem adtulisse, id quoque his casibus in usum vocabamus.

Quater per diem lintea carpta hoc infuso madida applicabantur; post paucos dies labia cœperunt coire, & intra unam alteramve septimanam firma inducebatur cicatrix.

Hac ratione hos ægros conservavimus, & restituimus; in quibus similes tumores in externa corporis superficie comparuerunt.

Tres vero mortui sunt, quoniam serum per universam corporis superficiem externam antea dispersum subito interiora occupavit.

Duo ex his remittente febre & tumore rheumatico derepente anxii fiebant, & aphoni, soporosi, & mox sublimè respirarunt, nec potuerunt decumbere; pulsus ilico fuit parvus, tremulus, inæqualis, facies livida, extrema frigida; & altero die mors supervenit.

Sectione anatomica in binis his cada-

112 *Febris continua arthritica*,
veribus reperiēbatur copiosissima, flava,
gelatinosa materies inter membranam
pulmones ambientem, & inter ipsos
pulmones, & tota pulmonum substan-
tia in admodum parvam molem com-
pressa est.

Talis materies valde copiosa quoque
intra piam matrem & cerebrum, atque
cerebellum hæsit.

Etiam anteriores cerebri ventriculi si-
mili gelatina pleni fuerunt.

Ambæ cordis cavitates grumoso san-
guine distendebantur.

Tertius æger disparente tumore ar-
thritico coepit difficillime respirare, &
incidit in tussim convulsivam, quæ nullis
prorsus remediis obedivit, unde hic
æger, intra quatuordecim dies, omni-
bus viribus exhaustus, obiit.

In medio pulmonis dextri detegēbatur
sacculus, qui libras quinque feri flavi,
sub aëris reclusit.

Cætera fuerunt sana.

Ad dolores articulorum mitigandos,
sæpe multum valuerunt cataplasmata ex
foliis papaveris erratici vel ex foliis hyos-
ciami, & ex lacte recenti, & pauco
croco parata.

Sicca & aromatica fere semper majores
dolores excitarunt.

In omnibus fere ægris, febre arthritica aut rheumatica affectis, febris & dolores circa vespervas exacerbati sunt, iique plurimam noctis partem perdurarunt.

Quidam ex his ægris mane, dum dolor remisit, sponte tranquillum cœperunt somnum, & leviter sudarunt, & post somnum longe alacriores fuerunt.

Multi autem manserunt vigiles, & debilitati sunt; quapropter his matutino tempore circa doloris remissionem conveniebat paregoricum; nam inde producebatur somnus tranquillus, reficiens, & ægri fiebant iterum aptiores ad dolores vespertinos sustinendos.

In vespertina dolorum, & febris exacerbatione datum paregoricum semper male conduxit: nam ægri admodum inquiete dormiverunt, delirarunt, habuerunt anxia insomnia, sæpe subito evigilarunt, & coacto hoc somno multum defatigati sunt, & toto postero die erant soporosi, subdeliri, & pulsus fuit celer, inæqualis, contractus.

Si tamen ex nimia dolorum exacerbatione tendinum subsultus, & membrorum convulsiones ortæ sunt (quod aliquoties contigit) tunc has opio, per epicrasin dato, licuit mitigare, sopire.

¶ 14 *Febris continua arthritica,*

In magna dolorum exacerbatione ;
urina plerumque prodiit tenuis , pal-
lida , quandoque stranguriosa , decref-
cente autem dolore urina primo pro-
diens erat rufa ; secunda vero turbida ,
& mox foetuit , & posuit sedimentum
furfuraceum , subalbidum.

Quandoque tumores citra articulos
comparuerunt absque magna febre , &
sine multo dolore.

Et his in casibus remedia antiscorbu-
tica plurimum juverunt , unde optimo
cum effectu datum est medicamentum
Nº. 27. vel Nº. 28. aut si alvus fuit im-
morigera Nº. 29.

Si autem ægri valde debilitati sunt ,
& si dolorum exacerbatio quotidie stata
hora rediit ; si hanc prægressa est horri-
pilatio , tremor , & frigus , tunc re-
medium Nº. 30. maximum levamen ad-
tulit.

Dolores quidem integre hac ratione
sopiri non potuerunt , verum reliqua
symptomata , quæ hos dolores conco-
mitabantur , & quæ ægros valde debi-
litarunt , penitus fugata sunt.

Præterea autem his ægris valde utilia
fuerunt infusa radic. pareiræ bravæ ,
foeniculi &c. fol. levistici , ruthæ , roris-
marini , &c. herbæ annodinis , fumaræ ,

chamædrios, absinthii, &c. decoctum radicis sarsaparillæ, chinæ &c. verum magna copia & calide debuerunt assumi.

Plures ægri valida febre rheumatica aut arthritica decubuerunt, & nullus tamen tumor circa articulos, aut circa alias partes observatus est, licet dolores fuerint magni, & fixi.

Pulsus erat plerumque durus, plenus, fortis, celer, sitis magna.

Sanguinis missiones, repetitæ, fuerunt maxime necessariae.

Remedia antiphlogistica ex rob. sambuci, pulpa tamarindorum, & nitro parata similibus ægris maxime conduxerunt; præsertim si tanta copia sunt exhibita, ut alvus leniter esset mota.

Sæpe his solis medicamentis, & debitis venæ sectionibus cessit febris, & omnis dolor.

Subinde autem horum usu, licet febris fuerit facta mitissima, dolores tamen non remiserunt, neque juverunt externa fomenta, nec cataplasmata, nec frictiones.

Unde febre ad justum moderamen redacta locis dolentibus latum vesicatorium adposui; quod, quamprimum incæpit epidermidem elevare, dolores

116 *Febris continua arthritica*,
vel penitus delevit, vel multum dimi-
nuit.

Nullum unquam malum symptoma ex
emplastro vesicante observavi, atque
ideo nullus fere in corpore locus fuit,
ad quem id applicare non essem ausus.

Sic parti capillatæ capitis rasæ, id ob
pertinacissimum dolorem rheumaticum
aliquoties optimo cum effectu apposui,
in binis ægris applicabatur secundum
totam maxillam inferiorem lateris finis-
tri, pluribus positum est in nucha, ad
spinam dorsi, ad lumborum spinas, ad
scapulas, ad costas utriusque lateris,
ad humeros, ad coxendicem, ad fe-
mura, &c.

Ranunculus (herba) recens, &
succulentus in pulvem contusus, & loco
dolenti appositus magnum semper do-
lorem excitavit, & epidermide in vesi-
cam elevata copiosum serum adtraxit,
atque hac ratione morbi dolores penitus
dissipavit.

In pertinacissimis ac inveteratis arti-
culorum doloribus hujus herbæ usum
externum admodum salutarem sæpius
vidi.

Verum observavi ulcus inde ortum
longe diutius stillasse serum acre, &
magis restitisse curationi, quam ulcus

ab emplastro vesicante productum.

Unicus erat in nosocomio æger, qui ex applicatione horum remediorum nullum percepit levamen.

Erat autem febris in principio admodum valida, & dolor ad lumborum vertebrae adeo acutus, ut æger diu noctuque ejulaverit.

Venæ sectiones repetitæ, remedia maxime resolventia, & antiphlogistica, atque externe adplicata emollientia & discutientia cataplasmata nequaquam dolorem mitigarunt; unde quarto die applicatum fuit latum vesicans, verum neque hoc juvit; & quinto die conciderunt vires, pulsus factus est debilis, inæqualis, æger subinde deliravit, mox rubuit, mox palluit, urinam & fæces foetidissimas inscie dimisit, leves & frequentes convulsiones observatæ sunt, sexto die extrema inferiora erant frigida, immobilia, & omni sensu caruere, tandem livido & frigido tumore inflabantur, æger nullum amplius dolorem percepit, & septimo die convulsus obiit.

Sectione anatomica binæ ultimæ lumborum vertebrae ea parte, qua medullam spinalem ambiunt, inventæ sunt penitus putridæ, & in nigrum, foetidum ichorem solutæ.

118 *Febris continua arthritica;*

Quandoque dolor rheumaticus inter-
nam ossium substantiam occupavit, &
tunc ægri externum adtactum, quamvis
satis rudem, sine magna molestia tu-
lerunt.

Febris his in casibus fuit valde mitis,
verum molesta pectoris siccitas, & fre-
quens ac irrita tussis semper observaban-
tur, & vires brevi conciderunt, & ac-
cessit corporis extenuatio.

Remedia penetrantia, sudorifera, aut
calidiora diuretica his ægris maxime no-
cuerunt, & excitarunt majorem tussim &
pectoris angustiam.

Medicamenta emollientissima: ut sa-
turatum decoctum radicis althææ, bar-
danæ, salab. &c. folior. althææ, ver-
basci, malvæ, &c. hic præprimis locum
habuerunt.

Hæc si per plures dies copiose &
calide assumpta sunt, tunc circa arti-
culos coeperunt tumores molles appa-
rere, & ægri, qui antehac fere semper
fuerunt vigiles, & inquieti, placide ob-
dormiverunt.

Morbo jam eo usque mutato non am-
plius emollientia requirebantur, sed erat
necesse simul exhibere remedia leniter
purgantia, & incidentia.

Hinc magno cum ægrorum levamine

tunc præter decocta emollientia datum est medicamentum N^o. 29.

Victus debebat esse mollis, humectans, nutriens.

Serum lactis pro potu ordinario datum semper profuit.

Ad dolorem reliquias integre dispellendas decoctis emollientibus semper optime jungebantur remedia antiscorbutica.

Succi recentes ex herba cochlear, becabung. nasturt. aq. misti sero lactis, & hac ratione copiose hausti erant valde efficaces.

Si tamen antiscorbutica per plures dies usurpata debitos effectus non præstiterunt, tunc fere semper juvit, largus potus decocti lignorum, misti cum æquali copia lactis recentis.

Ægri in longe majori periculo erant positi, si materies rheumatica aut arthritica, vaga, mox externas, mox internas corporis partes invasit; quod sæpius contigit.

Sed aliquoties observavi dolore in membris disparente, ortam esse pectoris anxietatem, cordis palpitationem, & pulsum intermittentem, & redeunte ad membra dolore, hæc symptomata iterum disparuisse; & tunc pulsum paulo

120 *Febris continua arthritica,*
antea tremulum & intermittentem, de-
nuo æqualem, & liberrimum inveni.

Vidi materiam arthriticam, quæ arti-
culos manuum & pedum occupavit, per
universum corpus fuisse dispersam, &
summos excitasse dolores, atque uni-
versalem induxisse rigorem & tetanum.

Sola maxilla inferior (quod mirum
erat) mansit libera; ipsi oculi sanguine
suffusi protrudebantur, & præ dolore
lachrymæ acerrimæ, quæ genas erose-
runt, defluxere.

Verumtamen dato copiosissimo infuso
trium fantalorum, & applicato leni ca-
lore lecti intra binas horas rigor & dolor
per universum corpus remiserunt, mox
autem pectus fuit valde angustum, con-
tractum, & respiratio sublimis, & pul-
sus tremulus, parvus, & æger in pes-
simo suffocationis metu versabatur.

Circa articulos manuum ac pedum
ilico apponebantur sinapismi sat fortes,
injectum est acre enema, & datum co-
piosum infusum florum sambuci.

Post sesqui horam ortus est circa ge-
nua & in carpis manuum dolor ingens,
& respiratio eo momento reddebatur
liberior, & pulsus major, & magis
æqualis.

Tandem subito advertebatur dolor
acutissimus

acutissimus circa umbilicum, dein prodiit enema, antea injectum, cum multis scybalis durissimis, & dolor ad umbilicum disparuit.

Verum inguina tunc pessime affiebantur, & genua versus pectus adtracta sunt.

Ex inguinibus mox dolor transiit ad testiculos, unde æger convulsus in pessimum animi deliquium incidit, & morti fuit proximus; etenim extrema fuerunt frigida, & nullus omnino pulsus potuit inveniri.

Hæc pessima symptomata per septem circiter minuta durarunt, tandem rediit extremorum calor, rediit pulsus, & æger coepit placide dormire.

In somno aderat continuus sudor.

Post tres horas æger evigilavit, & satis bene se habuit; ad carpos manuum, & ad ambo genua levis & mollis tumor advertebatur, dolor fuit exiguus.

Partes tumentes dein calidis sacculis, pauca camphora, & floribus sambuci repletis, involvi, & dein intra octo dies hunc ægrum solo infuso florum sambuci, quo urina copiosissima expellebatur, & fero lactis integre sanavi.

Alius æger validissimo dolore rheu-

122 *Febris continua arthritica*,
matico per universum corpus torque-
batur, febrem autem habuit valde mi-
tem & subinde per tres quatuorve horas
ab omni dolore liber fuit.

Verum quamprimum dolor evanuit,
tunc coepit pulsus post quemlibet ter-
tium ictum intermittere, & spatium
intermissionis æque longum fuit ac il-
lud, quo tres priores ictus perage-
bantur.

Æger sibi semper fuit præsens, ne-
que multas vires amisit, neque unquam
pectoris anxietates, aut cordis palpita-
tiones conquestus est.

Exhibui infusum florum sambuci cum
nitro & rob sambuci.

Quarto die tempore matutino omnia
erant valde mitia.

Circa meridiem ejusdem diei rigor
ægrumprehendit, dein febris exacer-
bata est, dolores vero majores orti non
sunt.

Nox fuit inquieta.

Quinto die mane nulli aderant dolores,
& pulsus ad quemlibet tertium ictum
intermisit.

Circa meridiem redierunt dolores,
& febris prægresso rigore fuit adeo vehe-
mens, ut plurimæ vires inde essent prof-
ratae.

Unde ad usum corticis peruviani ilico confugi.

Nox, dato paregorico, quieta erat.

Sequente die febris inveniebatur mitis, & circa meridiem vix ulla exacerbatio observata est, dolores autem fuerunt æque validi.

Corticem peruvianum tunc cum conservis antiscorbuticis miscui, & magnam quotidie dosin præter infusum florum sambuci, quod cum fero lactis fiebat, exhibui.

Exacerbatio febris tandem penitus suppressa est, dolores autem nequaquam imminuti sunt, aut iis imminutis post quemlibet tertium ictum pulsus siluit.

Cortice peruviano & conservis antiscorbuticis, &c. in duodecimum morbi diem continuatum fuit.

Hoc autem die erupit sudor copiosus, foetidus, subfuscus, tenax, qui ægrum valde debilem reddidit.

Dolores autem penitus evanuerunt, & pulsus naturalis esse cœpit.

Mutavi tunc medicamenta, & dedi elaretum N. 3. & pro potu ordinario serum lactis.

Atque his & diæta molli ac probe nutriente intra aliquot dies redierunt vires, & æger optime convaluit.

Qui dolores rheumaticos aut arthriticos habuerunt absque magna febre, hi fere omnes solo potu diluente, & mistura N. 31. & frictione curati sunt.

Qui autem vera phthisi, & arthritide simul laborarunt, hi nequaquam curati sunt, verum omnes serius aut citius perierunt.



Apoplexia & Paralysis.

AER nebulosus, humidus, & frigidus, qui plerumque febris rheumaticæ aut arthriticæ causa fuit, sæpe quoque produxit apoplexiam & paralyfin.

Qui ex loco calido & sicco sese subito in locum frigidum & humidum contulerunt, aut qui præter consuetudinem in aëre frigido & humido versari debebant, primo senserunt horrorem, dein membrorum languorem, & pondus, quandoque respiratio reddebatur anxia, & caput vertiginosum, oculi caliginosi, dein sequebatur in uno alterove membro, aut in integro latere stupor, tandem omnia videbantur in gyrum agi, & æger concidit, & aliquamdiu sensum & mentis fuit expers.

Febrem plerumque satis magnam habuerunt hi ægri, & respirationem laboriosam, & pulsum plenum.

Unde primum fere semper, & maxime necessarium remedium fuit larga venæ sectio.

Et hæc quandoque debuit iterari.

Postquam aliquamdiu mentis expertes hi ægri jacuere, cœperunt tandem oculos aperire, & vitæ signa dare.

Loquela fuit vel penitus impedita, vel admodum difficilis & balbutiens, & eæ partes, in quibus antea stupor advertebatur, erant immobiles, sensibilitatem autem fere semper conservarunt.

Si æger alvum clausam habuit, tunc multum juvit enema satis acre.

Dein vero leni calore lecti, & infusis diluentibus, lenissime stimulantibus, & levissimis frictionibus, transpirationem, & levem sudorem procreare necesse fuit.

His solis quandoque, dum symptomata non admodum gravia fuerunt, intra aliquot dies multi ægri cœperunt melius habere, & tandem sine multo molimine convaluerunt.

Verum multi habuerunt tussim admodum vehementem simul junctam, unde præprimis pectori erat prospiciendum.

Solum decoctum N^o. 4. largiter haustum, plurimis profuit.

Nam dum copiosa sputa prodierunt, tunc plerumque in membris paralyticis coepit quædam mobilitas observari.

Et non raro accidit, ut pectore ab omni glutine liberato, & tussi sopita, paralyfis quoque evanuerit.

Præter decoctum N^o. 4. remedium N^o. 32. his ægris quoque admodum utile fuit.

Medicamenta stimulantia, acria, & fortes, aromaticæ, spirituosæ frictiones his ægris nocuerunt, & exacerbarunt tussim, & febrem.

Hinc quamdiu febris duravit, & tussis molesta fuit, ab his erat abstinendum.

Si vero cessante febre & tussi, respiratio fuit libera, & si nulla in membris paralyticis emendatio observata est, tunc ad acriora licuit transire.

Mistura N^o. 33. pulcherrimos tunc effectus præstitit; & si majori adhuc stimulo opus fuit, tunc huic misturæ addebatur sufficiens quantitas tincturæ succini, vel spiritus cornu cervi.

Frictiones fortes, quæ pannis laneis, fumo myrrhæ, succini crudi, styracis calaminthæ imbutis, fiebant, hic locum habuerunt.

Quibusdam melius conduxit, si membra paralytica bis per diem probe perfricta, & inuncta sunt remedio N^o. 34. vel N^o. 35.

Quandoque optimo cum effectu aliquoties per diem partes paralyticæ exponebantur vaporibus aquæ ebullientis, in cujus libris quatuor solvebatur uncia una salis ammoniaci; vel eodem cum successu talis solutio instar fomenti potuit applicari.

Hac methodo ex triginta sex ægris, qui tempore autumnali, & hyemali in nosocomio fuerant, integre restituti sunt triginta tres.

Unicus vir, sexaginta quatuor annorum, ex nimia virium debilitate non potuit sputa egerere, & ideo suffocatus est.

Binæ autem vetulæ, tussi quidem liberabantur, verum paralysis quamvis multum emendata fuerit, penitus tamen tolli nequaquam potuit.

Hanc eandem curandi rationem multiplici experientia utilem, & sufficientem vidit optimus meus collega Dominus COLLIN, etenim ea sola multos quoque sanavit.

Et observavimus simul in simili paralyfi ab initio semper plurimum profuisse

emollientia, & expectorantia, nocuisse autem spirituosam, & volatilia.

Etenim aliquot ægri serius ad nostrum nosocomium translati sunt, & ex eorum narratione intelleximus, statim in principio fuisse acrimia, & spirituosam remedia interne externeque adhibita, & inde auctam esse tussim, ortam esse majorem febrem.

Et hi omnes phthisi pulmonali contabuerunt.

Nec mirum! etenim remediis nimium calidis inflammatio pulmonis aucta est, & abiit in suppurationem, & hæc tabem adtulit.

Vidi aliquoties medicamentis nimium spirituosissimis & acerbis, in paralyse adhibitis, ingentem esse ortam febrem, & exanthemata exanthematibus supervenisse, & tandem ægros nimia virium debilitate occubuisse.

Aliquoties etiam in iis casibus, ubi pulsus lentus fuit, & ab omni febre liber, adhibui ab initio decocta aperientia & emollientia, & dein vasis sat repletis, & emollitis acrimia & stimulantia dedi longe tutius & bono semper cum effectu.

Leviores apoplexiæ & inde ortæ paralyfes hac methodo possunt plerumque curari.

Fortes autem apoplexiæ curantur nunquam.

Transferebantur bini apoplectici ad nosocomium, qui tentatis omnibus internis externisque remediis nullum omnino sensationis signum exhibuerunt, respirationem habebant tardam, pulsum fortem, traxerunt ronchos, deglutitio tamen libera fuit.

Unus ex his secundo die obiit, alter autem die tertio.

In primo cadavere invenimus inter cerebellum & medullam oblongatam copiosum sanguinem grumosum.

In secundo autem longe major quantitas sanguinis grumosi intra piam matrem, & lobos anteriores cerebri hæsit.

Quis jam effusum intra cranium, & infra lobos cerebri sanguinem auferret?

Apoplexiam a nimia evacuatione productam, quoque lethalem esse, binis in ægris vidi.

Femina, ex nimia uteri hæmorrhagia, apoplexia prehenditur, & latus dextrum paralysis occupat, & post tres horas inter convulsiones accedit mors.

Latus paralyticum totum glaciei infar fuit frigidum, licet pulsus sat liber & æqualis ad carpum tangeretur, latus

130 *Apoplexia, & Paralysis.*

autem, sanum, naturalem habuit calorem.

Vir sexaginta annorum, sanus alias, præter causam sibi cognitam diarrhæa adeo violenta corripiebatur, ut spatio quinque horarum viginti quatuor pintæ feri biliosi absque ullo dolore ano effluerint, mox autem visum & vocem amisit, genua titubarunt, tandem omnia membra soluta sunt, æger concidit, exspiravit.

Paralyfin post levem apoplexiam a nimia sanguinis copia ortam, solis venæ sectionibus, & remediis antiphlogisticis, alvum leniter subducentibus aliquoties curavi.



Angina.

EODEM tempore, quo febres inflammatoriæ, rheumaticæ, & arthriticæ regnabant, angina quoque frequenter observata fuit.

Levem quandoque deglutiendi difficultatem ægri conquesti sunt, nec magnam habuerunt sitim, nec pulsum valde febrilem.

Dum fauces considerabantur, reper-

ta est plerumque uvula, velum pendulum, tonsillæ & partes circa pharyngem solito magis rubræ, & tensæ absque ullo notabili tumore, quandoque autem hæ partes simul tumuerunt.

Primis statim diebus huic malo facile potuerunt limites poni, etenim si tales ægri decoctum emolliens ex rad. alth. fol. alth. &c. copiose hauserunt, & infuso florum sambuci addita pauca mellis rosacei, & nitri quantitate, gargarizando fauces sæpius humectarunt, tunc intra binos ternosve dies integre liberati sunt.

Verum contra aëris injurias sese debebant probe munire.

Venæ sectione leviori in casu nunquam opus fuit, nisi ægri fuissent valde plethorici.

Purgans antiphlogisticum semper utile & necessarium fuit.

Si autem huic malo non ilico in principio limites sunt positi, tunc res semper in pejus ruit, & partes inflammatæ coeperunt magno cum dolore intumescere, caput vehementer doluit, oriebatur sitis ingens, & magna febris, & prostratæ sunt vires, & prodierunt urinæ flammæ, & deglutitio admodum difficilis, & quandoque penitus impossibilis reddita est;

nam tonsillæ sæpe tanto tumore inflabantur, ut transitus per fauces penitus fuerit interclusus.

Venæ sectiones largissimæ, & pro vehementia pulsus, ac ratione virium, brevi temporis spatio sæpius repetitæ, requirebantur; & ab his magnum plerumque levamen ægri perceperunt, subinde his nihil mutatum fuit.

Balnea pedum mane & vesperi applicata (si ægri situm erectum ferre potuerunt, etenim erant plures, qui sedentes animi deliquium passi sunt) multum juverunt.

Egregium quoque effectum præstitere acria epispastica suris apposita; amavi potius ea suris applicare, quam plantis pedum, etenim omnes fere ægri conquesti sunt ingratum ardorem in plantis pedum, & propterea noctes habuerunt vigiles; quod tamen incommodum non sunt experti ab epispasticis, ad suras positis, & effectum inde æque bonum, aut subinde adhuc meliorem observavi.

Decoctum N. 36. his ægris plurimum profuit, idem decoctum calidum, capite in posteriora reclinato, aliquamdiu, & sæpius per diem in ore optimo cum effectu retentum est, idem gargarisinatis loco quoque inservivit.

Præterea linctu ex mel. ros. , syrup. moror. , & nitr. fauces semper humidæ , & lubricas conservavi.

Collum totum cataplasmate emollientissimo circumdatum est.

Præterea dabatur omni altero vel tertio die purgans N^o. 37.

His malum , quamvis pessimum , sæpe numero feliciter debellavi.

Quandoque vero hæc nihil effecerunt , vel adtulerunt tantum aliquod levamen , quod mox iterum evanuit.

Unde factis debitis evacuationibus , vesicans latum & acre ei plagæ colli applicui , ubi maximus dolor fuit , effectus semper fuit optimus , ardorem quidem magnum ægris excitavit , verum mox diminuit dolorem , tensionem , tumorem , & deglutitionem effecit longe faciliorem , unde dein remediis supra laudatis , reliqua cura potuit absolvi.

Quandoque malum ex una colli parte transivit ad aliam , ibidemque easdem tragœdias eadem cum violentia ludit , & magnam excitavit febrem.

Unde denuo debuit vena secari , & curatio eadem institui , quæ antehac requirebatur.

Sæpius & tunc iterum vesicans debuit apponi.

Si venæ sectiones nimis frequenter fuerunt celebratæ, tunc dolor quidem, inflammatio, & partium rubedo disparuerunt, verum tumor albicans perstitit, qui sensim in scirrhum abiit.

Subinde tertio quartove die in locis inflammatis pustulæ flavescentes ortæ sunt, quæ ruptæ pus fuderunt.

Sæpe hæc pustulæ in unam vesicam confluxerunt, & inde satis magnum ulcus productum est.

Dolor plerumque desiit, dum pustulæ rumpebantur.

Decocta emollientia copiose hausta, & in ore calide retenta, ad emolliendas, maturandas, & aperiendas has pustulas multum contribuerunt.

Præterea tamen externe debebant cataplasmata emollientia applicari.

Et si ruptis pustulis dolor non cessavit, & si partes vicinæ æque tensæ manserunt, tunc necessarium erat in his quoque casibus vesicans apponere.

Magna adtentione opus erat, ut ulcera ex his pustulis orta, pura conservarentur, quod optime fiebat, si infusum N^o. 38. leni vi ope syringæ in fauces & ad loca ulcerata injectum fuit, aut gargarismatis loco adhibitum.

Singula vice, post applicatum infu-

sum N^o. 38. magna cum dolorum allevatione obliniebantur partes exulceratæ medicamento N^o. 39.

Hac simplici methodo plurimi restituti sunt.

Quidam fuerunt, quibus, adhibita quamvis maxima cura, ulcera tamen fordida manserunt, & sensim caro fungosa excrevit.

Unde tunc loco medicamenti N^o. 39. exhibebatur illud N^o. 40. quod brevi carnes fungosas consumpsit, & ulcera munda reddidit.

Quatuor in ægris observavi anginam inflammatoriam brevi in gangrænam abiisse.

Unicus ex his obiit, tres curati sunt.

Morbus incepit leni horrore, & magna virium prostratione, pulsus fuit celer, inæqualis, parvus; crebras anxietates, & vagos calores, & obtusum capitis dolorem hi ægri conquesti sunt, sitis non fuit magna, lingua autem tremula, & plumbea, oculi tristes, urina prodiit cruda, flocculenta, subfusca, & brevi foetens.

Primo statim die in posteriore faucium parte, & circa tonsillas apparuerunt maculæ latæ, purpureæ, hæ maculæ aut eodem adhuc die circa vespas,

aut altero die in centro fuerunt lividæ, aut nigræ, & prodiit ichor, in ambitu autem manserunt profundæ, rubræ, tensæ, dolentes.

Deglutitio erat admodum difficilis.

Neque venæ sectioni, neque remediis evacuantibus locus dabatur; vires debiles debebant erigi, putredo, & gangræna supprimi.

Ad partes igitur lividas aut nigras penicillo omni fere hora applicui medicamentum N. 21. & dein jussi ægros decoctum emollientissimum N. 36. capite in posteriora reclinato in ore calidum retinere, ut hac ratione partes adhuc tensæ & dolentes emollirentur, & corruptum a sano secederet.

Præterea ægris exhibui misturam N. 25. & si hæc mistura in faucibus magnum ardorem excitavit, tunc dedi desuper aliquot uncias decocti emollientis.

His brevi temporis spatio, magna in melius mutatio observata est, etenim illud nigrum sensim secessit, & ubi corrosio nondum profunda fuit, ulcuscula mox pura comparuerunt; ubi vero corrosio major, & profundior aderat, ibi res paulo difficilius cessit.

Quamprimum nigrum & corruptum a sano coepit separari, jussi lenissima manu

infusum N. 38. injici, ut sordes auferrentur, dein partes nudas decocto emolliente fovi, & oblinivi medicamento N. 21.

Si hæc sedulo applicata non sunt, tunc mox iterum ulcera fuerunt sordida, & coeperunt vicinas partes arrodere.

Quamprimum omne impurum separatum fuit, tunc ulcera viva non amplius tulerunt linimentum N. 21.

Unde ea sæpius per diem infuso N. 38. ablui, & dein solo melle rosaceo obduxi.

Et quoniam vires adhuc debiles fuerunt, exhibui alternis vicibus misturam N. 20. & claretum N. 3. ut hac ratione putredini, adhuc timendæ, resisteretur, & erigerentur vires.

In principio morbi noctes fuerunt admodum inquietæ, anxie, licet omni vespera datum fuerit paregoricum.

Dum vero res coepit in melius mutari, tunc unica uncia syrapi diacodii tranquillus, & reficiens somnus potuit conciliari.

Hac ratione tres ægri optime convalescerunt, & intra sedecim dies vires pristinas recuperarunt.

Quartus autem æger tertio morbi die efflavit animam.

Verum præter pessimam anginam , primo statim die aderat diarrhæa putridissima , & maxime defatigans , facies ilico reddebatur lethalis , nec ullum medicamentum adtulit levamen.

Secundo die per universum corpus videbantur maculæ latæ , purpureæ , lividæ , vires erant exiguæ , pulsus minimus , sudor copiosus , foetidus , viscidus , æger anxius anhelavit , & extrema mox fuerunt frigida , mox calida , genæ nunc purpureæ , aut lividæ , nunc frigidæ & pallidæ videbantur.

Diarrhæa nulli medicamento obedi- vit , faucium ulcera partes vicinas cor- roserunt adeo , ut magna frustra gangræ- nosa deciderint sponte.

Tertio die inter perpetua deliria , tendinumque subsultus & convulsiones mors supervenit.

In cadavere reperi plurima intestina gangrænosa , reliqua autem viscera sat bona erant.

Acre quod in faucibus hæsit , non tan- tum consumpsit tonsillas , velum pen- dulum , & uvulam , sed & ossa palleti , & vertebrae colli arrosit.

Cortex peruvianus (remedium alias specificum & contra gangrænam effica- cissimum) ore quamvis & ano copiosif-

sime ingestus, nil mutavit. Neque laudandum liquidum quid boni efficere potuit.

Famulus, qui durante morbo huic ægro inservivit, mox frequenti horripilatione correptus est, coepit nauseam conqueri, & vires sunt prostratae, tandem febre pessima petechiali afficiebatur.

Prostantibus petechiis purpureis diarrhæa sat mala, & admodum putrida orta est, verum hæc laudano liquido SYDENHAMI optime cessit, & reliquus morbus, licet periculosissimus, mistura N. 20. & clareto N. 3. alternatim exhibitis, atque largo potu feri lactis vinosi felicissime curatus est.

Alia, æque mala, anginae species plures in nosocomio ægros detinuit; hi enim ægri non tantum difficillime deglutiverunt, verum simul habuerunt respirationem brevem, densam, & dolentissimam.

Præterea facies livuit, tumuit, oculi rubuerunt, lingua erat arida, tremula, turgida, pulsus durus, admodum febrilis, sitis non delenda.

In faucibus nullus peculiaris tumor videbatur, verum larynx erat valde inflammata.

Eodem statim die, quo hi ægri ad nosocomium devenerunt, venam bis, ter, quaterve (prout symptomata postularunt, & vires admisere) tundi curavi.

Alvum enematibus, & remediis nitrosis, antiphlogisticis fluxilem reddidi, collum totum cataplasmatibus & fomentis involvebatur; præterea vapores aquæ ebullientis continuo faucibus applicati sunt.

His quidem pulsus mollior factus est, verum deglutitio & respiratio æque malæ permanserunt, & ægri debilitabantur.

Hinc rogavi Dominum HAFFNER chirurgum, ut totum collum vesicante acri circumdaret.

Hoc autem tantum habuit effectum, ut elevata epidermide non tantum deglutitio & respiratio fuerint longe liberiores redditæ, sed & ipsa febris, & sitis ilico remiserint, aut desierint penitus.

Neque ab actione vesicatorii decumbentes ardorem aut molestiam conquerebantur.

Postea solis decoctis emollientibus, & nitrosis, hi ægri intra paucos dies integre sanati sunt.

A solo igitur vesicante emplastro, debito tempore applicato, salus pependit.

Hoc autem diu differri non debet, secus inflammatio nimium violenta abit in gangrænam, quæ prostratis ægrorum viribus est lethalis.

Angina inflammatoria serosa frequenter quoque observata est; tonsillæ utriusque lateris, velum pendulum, & uvula sub flavo tumore distendebantur; dolor in deglutiendo erat æque acutus, ac in angina inflammatoria sanguinea.

Pulsus plerumque durus & plenus sæpius repetitas venæ sectiones postulavit, & integra reliqua cura eodem modo perficiebatur, quo in angina inflammatoria sanguinea.

Quandoque hæ partes flaccido œdematoso tumore afficiebantur, & in tantam molem accreverunt, ut omnem fere transitum interceperint, his in casibus dolor nunquam erat acutus, neque pulsus febrilis.

Hinc purgantia hydragoga omni alterno vel tertio die debebant exhiberi, & optimo cum eventu dabatur pulvis N. 41. vel haustus N. 42.

Facta evacuatione requirebatur gargarisma adstringens, ut N. 43.

Fomenta sicca circa totum collum ,
ut & frictiones aromaticæ erant his
ægris valde utiles.

Et si præterea infusis aromaticis, con-
tinuus & lenis sudor excitatus fuit, tunc
intra paucos dies deglutitio liberrima
facta est.

Quandoque tonsillæ , uvulæ , & ve-
lum pendulum leviter tantum intumue-
runt, muco autem adeo copioso & te-
naci involvebantur, ut deglutitio inde
fuerit multum impedita.

Post validam coryzam frequenter tales
anginæ mucosæ sequebantur.

Gargarisma N. 44. omni tertia hora
applicatum , hos ægros subinde cito
juvit, subinde autem gargarisma N.
45. celeriores effectus præstitit.

Purgante raro opus fuit.

Ablato muco fauces erant plerum-
que valde sensibiles, & ab omni fere cibo
& potu aut ab ipso aëre acutus dolor
excitabatur.

Huic autem irritabilitati , & nimix
sensationi mox medebatur gargarisma
N. 46.

Idem gargarisma utilissimum quoque
fuit , dum a tussi phthysicorum, vel ab
alia violenta tussi fauces exsiccatae sunt,
aut a sputo acriori leviter excoriatae.

Febris Hæmorrhoidalis.

MENSE februario & martio hæc febris admodum frequens fuit.

Primo die omnes ægri obtusum capitis dolorem, & vagas horripilationes & calores conquerebantur.

Dein rigor & dolor tensivus nucham occupavit, & vagus calor formicando totam dorsi spinam sæpius perrepfit.

Tandem ortæ sunt præcordiorum anxietates, & molestæ hypochondriorum tensiones; quandoque supervenerunt vomendi conatus, & enormes colici dolores, & venter contractus est; quandoque autem absque magno dolore colico, & sine omni vomendi conatu venter intumuit.

Urina plerumque flammea fuit, & raro, atque iis tantum in casibus, ubi nimis vehementes erant dolores colici, tenuis & cruda deprehensa est.

Alvus erat pertinaciter clausa, & non nisi repetito enemate pauca scybala potuerunt educi.

Subinde ani sphincter inveniebatur adeo constrictus, ut tenuis canula vix potuerit introtrudi.

Sitim fere omnes hi ægri magnam habuerunt, & pulsus fuit celer, inæqualis, quandoque dicrotus, quandoque intermittens, attamen vix non semper plenus ac durus.

Nox fuit inquieta, & anxiis insomniis turbata.

Secundo die remisit dolor ventris, & hypochondriorum anxietas ac tensio, & pulsus fuit magis æqualis & liberior, sitis mediocris.

Verum circa lumbos ortus est dolor gravans, dilacerans, & rigor; accessit alvi tenesmus, & urinæ retentio.

Nuchæ autem dolor sese versus verticem & tempora extendit, atque capitis motum valde difficilem & dolentem reddidit.

Nox iterum inquieta fuit, & cor per vices solito fortius palpitavit.

Tertio die tantus circa vertebrae lumborum & os sacrum dolor ortus est, ut ægri se nequaquam movere potuerint; anus fortissime contractus est.

Nox quartum diem præcedens fuit omnium inquietissima; hac autem transacta ægri melius habuerunt.

Nam quarto die fere penitus desinit lumborum, nuchæ, & ossis sacri dolor,
&

& tubercula diversæ magnitudinis circa anum comparuerunt.

Hæc tubercula quandoque fuerunt mollia, & ægris nullam molestiam excitarunt, atque tunc quarto die, ortis his tuberculis, febris penitus desiit.

Quandoque autem hæc tubercula fuerunt valde rubra, tensa, & ingentes produxerunt dolores, tormina, tenesmos, vertigines, & membrorum stuporem, & sæpe tantas anxietates, ut ægri inciderint in animi deliquium, & extrema fuerint gelida.

Inter omnes ægros bini tantum fuerunt, quibus quarto die, cessante febre, nulla tubercula circa anum prodierunt, verum effluxit sanguis copiosus absque dolore, & tumore.

Morbus hic molestus & periculosus fuit, & medicamentis perverso modo adhibitis, potuit lethalis fieri.

Etenim quamvis cognitum fuerit, febrem esse hæmorrhoidalem, & crisin versus anum esse futuram, nullis tamen remediis pellentibus, & tumores hæmorrhoidales promoventibus uti licuit; nam hæc febrem & morbum exacerbarunt.

Primo & secundo die, dum pulsus plenus & durus fuit, repetitis vicibus debebat sanguis e vena emitti, his ta-

men naturæ vis non erat nimium debilitanda, secus accesserunt convulsiones; & morbus factus est diuturnus, & anomalus.

Si dein decoctis antiphlogisticis, subacidis, nitrosis alvus leniter aperta, & fluxilis reddita est, tunc morbus cito levabatur.

Qui decocta subacida, & nitrosa ferre non potuerunt, his demulcentia, emollientia, & oleosa profuere.

Nec leve levamen sequebatur, si super toto abdomine mollissima cataplasmata sunt posita.

Enemata emollientissima ut N. 47. leni vi & apta manu ano sæpius injecta multum quoque juverunt.

Etenim horum ope dura & numerosa scybala prodierunt, & intestini recti vasa sunt emollita & apta reddita ad crisin suscipiendam.

Nimii vomendi conatus, dolores colici, & tenesmi, si emollientibus non cesserunt, tunc remediis paregoricis debebant mitigari, supprimi.

Tertio & quarto die vapores aquæ emullientis ano applicati, diminuerunt dolores, & crisin reddiderunt faciliorem.

Quarto die si tubercula hæmorrhoi-

alia apparuerunt, & si omnes dolores, & febris cessarunt, tunc fere nullis amplius medicamentis opus fuit; in sola vivendi ratione erat attendendum, ne acida, adstringentia, aut acria aromatica assumerentur.

His in casibus intra paucos dies sæpiissime perfecta sequebatur curatio, & vasa turgida sponte iterum detumuerunt.

Si autem tumente hæmorrhoidæ novus dolor circa anum ortus est, si tubercula valde rubra, calida, pulsantia, & tensa fuerunt, si sitis increvit, & pulsus major, fortior, ac durior factus est, tunc plerumque repetitis vicibus debebat iterum sanguis mitti, & anus cataplasmatibus probe foveri.

Decocta emollientissima cum paucis nitro hic optime conveniebant, & brevi dolores mitigati sunt, præsertim si hæmorrhoids admisit, ut talia simul enemata injicerentur.

Si adfuit ingens dolor, & tenesmus admodum molestus ac anxius, tunc opio erat utendum.

Hæc eadem remedia optime adhibebantur, dum tumores hæmorrhoidales intra ani sphincterem latuerunt.

Sanguisugæ circa anum iis in casibus

148 *Febris Hæmorrhoidalis.*

necessario debebant poni, in quibus ab hæmorrhoidæ regurgitante fiebant caliginæ, vertigines, sopores, convulsionæ.

Dum urina a dolore hæmorrhoidali retinetur, vitanda sunt omnia fortiora diuretica, solis decoctis ex radice althææ, & glycyrrhiz utendum est, & venter, & partes circa anum debent emollientissimis cataplasmatibus involvi, foveri.

Vidi a dato his in circumstantiis spiritu therebinthinæ urinam magis fuisse retentam, intumuisse ventrem, ortum esse enormem in pelvi dolorem, & ægrum tertio die post multas anxietates, & post crudeles mingendi ac alvum deponendi tenesmos obiisse.

Totum intestinum rectum, & pars vesicæ, huic adjacens, erat inflammata, aut gangrænosa.

Molles & non dolentes hæmorrhoidum tumores, si sponte non abeunt, felicissime dispelluntur unguento N. 48.

Si vero adest tenesmus, & dolor dilacerans absque ulla inflammatione, tunc præfertur unguentum N. 49.

*Morbilli.*

MU L T I pueri morbillis decubuerunt.

Curatio autem nequaquam fuit difficilis.

Decocta emollientia , expectorantia , addito stibio diaphoretico non abluto , & melle puro , vel melle pectorali , vel oxymelle simplici , aut oxymelle scillitico , &c. omni ex scopo satisfecerunt.

Morbilli , licet copiosi & densi quandoque comparuerint , nullum tamen levamen produxerunt , & omnes hi ægri debebant sputis judicari , hæc si non prodierunt , ortum est delirium , anxietas , membrorum inquietudo , sudor defatigans , & pulsus inæqualis.

A quarto die incipiendo omni vespere requirebatur sat forte paregoricum ; etenim absque hoc , nox fuit inquieta , & sequenti die nullum fere sputum educebatur , & tussis erat molestissima , sicca.

Verum quidam ægri continua , irrita & nimium defatigante tussi vexati sunt , & perpetuo jactitarunt membra , delirarunt , & tendines subsultu agitabantur , nullus tamen observabatur sopor ,

unde omni quarta , quinta , vel sexta hora uncia dimidia , vel uncia integra fyrupi diacodii optimo cum effectu his data est.

Soporosis autem vesicantia erant necessaria , & maxime utilia.

Remedio stimulante interno nunquam opus fuit.

*Variolæ.*

QUINQUAGINTA septem ægri tempore quatuor mensium in nosocomio variolis laborarunt.

Plerique magno in periculo versabantur , omnes tamen evaserunt.

Admodum pauci erant , qui leves tantum nauseas , & obtusos capitis ac spinæ dorsi dolores conquesti sunt , & oculos habuerunt solito tristiores.

Hi levi febricula afficiebantur , neque magna siti vexati sunt , & tantas adhuc conservarunt vires , ut tota die extra lectum esse potuerint.

In principio quarti diei , aut sub finem tertii pauca variolarum stigmata in collo , facie , aut pectore comparuerunt , quinto die hinc inde in extremi-

tatibus unum alterum stigma visum est.

Febris tunc omnis abfuit, & prorsus nil mali observabatur, & noctes fuerunt quietæ.

Septimo die ægri levem circa pustulas tensionem & dolorem perceperunt; febris fuit admodum mitis.

Nullus unquam in facie, aut extremis tumor observatus est; decimo aut undecimo die coeperunt pustulæ exsiccari, & pulsus fuit penitus naturalis, & rediit appetitus, & valetudo.

Hic nullo medicamento opus erat, solis tenuioribus jusculis, & simplicissimis infusis herbæ scabiosæ, veronicæ, hederæ terrestris, &c. optime hi ægri conservati sunt, neque paregoricis utendum fuit, quoniam sponte dormiverunt.

Circa alios ægros longe major cura requirebatur, quoniam omnia symptomata mala erant.

Etenim omnes conquerebantur ingentem capitis ac spinæ dorsi dolorem, atque rigorem molestum, ingesta fere omnia anxio vomitu rejecta sunt, epigastrium erat valde tensum, & dolens, oculi fuerunt turbidi, lachrymantes, sitis magna, urina flammea, pulsus ce-

ler , quandoque inæqualis , rarissime tamen adeo plenus aut durus , ut venæ sectio debuerit celebrari.

Nullus horum ægrorum extra lectum se potuit sustinere.

Fere omnibus in principio exhibui misturam simplicissimam N. 50. & præterea dedi copiosum decoctum radicis althææ , foliorum althææ , verbasci , &c. addito pauco nitro , & ex syrupo de althæa quantum satis erat ad gratam dulcedinem.

Ob nimium capitis dolorem plantis pedum applicabatur emplastrum de ladanio.

Si vomendi conatus a materie in ventriculo hærente producebantur , tunc ilico data est sufficiens ypecacuanhæ dosis.

Verum nimix & irritæ vomituritiones , a solo inordinato nervorum motu excitatæ , paregoricis sopitæ sunt.

Quidam jam primo aut secundo morbi die delirarunt , quidam soporosi jacuerunt.

Tertio die circa vesperras pauca plerumque variolarum stigmata in facie , aut collo comparuerunt.

Quarto die jam aderant copiosiora , & cutis rubuit , hæc autem rubedo fuit

inconstans, etenim frequenter abiit, & rediit.

Hoc die remisit febris.

Iisdem medicamentis semper continuatum fuit, & vesperi datum est pectoricum.

Quinto die stigmata in exiguas pustulas elevata sunt.

Sexto die hæ pustulæ fuerunt majores, & cutis cœpit tendi, dolere.

Circa vespertas sexti diei quidam ægri anhelarunt, & debiles facti sunt; unde medicamento leniter stimulante, & nervino opus fuit, mistura N. 51. egregios præstitit effectus.

Qui autem vires sufficientes conservarunt, ii tali medicamento non habuerunt opus.

Septimo die pustulæ elevatæ sunt, & cœperunt circa apicem flavere, albescere.

Qui tunc debiles erant, utebantur mistura N. 51. & qui vires sat magnas retinuerunt, iis suffecit mistura N. 50. vel decoctum emolliens, aut infusum diluens, antiphlogisticum.

Octavo die pustulæ inveniebantur pure plenæ, & intermedia cutis aut læte rubuit, aut naturalem habuit colorem.

In multis autem pustulæ in medio conciderunt, & fuscam recluserunt materiam; & cutis interposita hinc inde sublivida fuit, aut purpurea, & pulsus valde debilis; atque hi ægri continuo sudarunt, & mox frigida erant extrema, mox calida, & facies mox rubuit, mox palluit.

Quamprimum mala hæc signa observata sunt, ilico dabatur mistura N. 25. præterea necesse fuit omni quinta vel sexta hora laudani liquidi SYDENHAMI guttas X. vel XII. vel XV. exhibere.

Nono die omnes fuerunt inquieti, & facies valde intumuit, & oculi ob nimium palpebrarum tumorem quandoque clausi sunt.

Haud raro variolæ in unam crustam confluxere, & hac ratione facies tota quasi fusco corio tecta apparuit, aëris transitus per nares intercludebatur, & respiratio fuit difficilior, pulsus celer, attamen sat æqualis, urina autem ardorem excitavit, subinde quædam pustulæ ruptæ sunt, & materies tenuis, subfusca, effluxit, & brevi scetuit, & partes nudas arrosit.

Quare necesse erat sæpissime faciem totam tensam, & tumidam lacte calido abluere, humectare, emollire.

Palpebrarum concretio plerumque potuit impediri, si eæ lacte calido, in quo pauca quantitas seminum cydon. coquebatur, sæpissime fotæ fuerunt.

Decimo die eadem prorsus symptomata deprehensa sunt.

Ii, qui variolas melioris notæ habuerunt, vires autem debiles misturam N. 51. continuarunt; ii vero, qui malis variolis decubuerunt, adhuc usi sunt mistura N. 25. & magna laudani liquidi SYDENHAMI copia.

Dies undecimus fuit plerumque anxius, malus, eo tamen finiente omnia symptomata iterum in melius mutata sunt, & tumor faciei imminutus est, & pustulæ cœperunt exsiccarri.

Duodecimo die ii, qui benignis variolis decubuerunt, nulla amplius febre vexati sunt, & omnia signa erant bona, & pustulæ exsiccabantur in facie, & collo; in extremitatibus vero manserunt adhuc molles, & purulentæ.

In iis autem febris continuavit, qui peioris notæ variolas habuerunt; verum cutis intermedia inter pustulas, quæ antea semper purpurea aut sublivida fuit, nunc læte rubuit, & hinc inde ex facie quædam lamellæ crustacæ separabantur.

Loca tunc nuda debebant lacte te-

pido, vel decocto emolliente frequenter
ablui, & foveri, secus serum acre,
quod profuxit, profundas toveas, &
fœda ulcera formavit.

Cavendum erat præterea, ne ægri
unguibus faciem multum læderent.

Decimo tertio die facies tota detu-
muit, & secesserunt magnæ crustæ, &
omnia fuerunt satis bona.

Decimo quarto die febris penitus
cessavit, & rediit appetitus, & incre-
verunt vires.

Quamvis nunc ægri extra omne fere
periculum esse viderentur, misturam
tamen N. 25. sedulo exhibere perexi.

Verum decimo septimo die nullum
amplius medicamentum requirebatur,
quoniam omnes extra lectum federe,
vel ambulare potuerunt, & nil con-
questi sunt.

In bonis variolis dedi decimo quinto,
aut decimo sexto die purgans antiphlo-
gisticum.

In malignis autem die vigesimo, aut
si vires adhuc debiles fuerunt, die vi-
gesimo quarto, aut tardius.

Durante morbo alvus in aliquibus
ægris quotidie sponte solvebatur, in
aliquibus vero retenta est, unde si tor-
mina, & tensiones, ac borborygmi &c.

supervenerunt, eam enemate emolliente sollicitavi; si similia symptomata observata non sunt, & si æger cœteroquin sat bene habuit, eam sæpius in tertium quartumve diem intactam reliqui.

Urina erat inconstans; etenim mox naturalem habuit colorem, mox rubra, aut flammea fuit, & crassam ad fundum nubem dimisit, mox turbida, crassa, jumentosa, crassum & inæquale sedimentum posuit; mox tenuis & subviridis in superficie gessit cuticulam salinam multis coloribus variegatam, & tetrum odorem sparsit.

Ab octavo aut nono die usque ad morbi finem sæpius observavi, copiosissimum & verum pus cum urina profluxisse.

Nullam post variolas malam sequelam vidi.

Binos pueros, & unam puellam in nosocomio habui, qui admodum discretis variolis laborarunt, febris tamen die quarto (ut alias contigit) non remisit, & die sexto vires fuerunt debiles, & respiratio anxia, & accessit delirium.

Septimo die proruperunt petechiæ, coloris purpurei, variolæ autem erant optime elevatæ, & ex flavo albæ.

Vires manserunt debiles, verum ces-

savit delirium , & pectoris anxietas.

Pro medicamentis præter paregorica , quæ omni sexta hora exhibebantur , dedi alternis vicibus misturam N. 25. & claretum N. 3. & his augebantur vires , & ægri omne periculum superarunt.

Decimo quarto die omnia symptomata erant valde mitia , unde tunc vesperi solummodo paregoricum dabatur , in reliquis vero strenue continuatum est.

Decimo septimo die cessavit febris , & dein integra sanitas rediit.



De Morbis Chronicis.

Febres intermittentes.

OMNIS generis febres intermittentes hoc anno iterum in nosocomio observatæ sunt.

Febres autem tertianæ duplicatæ frequentissime occurrerunt , & eorum paroxysmi adeo fuerunt protracti , ut inde febris continua remittens fere semper fuerit orta.

Rigor spinæ dorsi , aucta pulsus celeritas , sitis major , extremorum frigus , dum stata hora ægros aggredierentur , speciem similibus febrium determinarunt.

Quotidianam duplicem quoque pluries vidi.

Methodum, quam in anno primo medico descripsi, hoc quoque anno secutus sum, & ægri cito & sat facile liberati sunt.

Tempore vernali omnes fere, qui febre intermittente laborarunt, vomitorio opus habuerunt.

Dedi in principio remedia digerentia, diluentia, purgantia &c. nullum tamen inde effectum expertus sum, nam manserunt continuæ præcordiorum oppressiones, nausæ, & vomitus, & oris amaror, sordities, & ructus amari, foetidi, ovum putridum redolentes, quandoque spirantes acidum.

Sæpissime unicum vomitorium febrem sat violentam sustulit, quandoque tamen id debuit aliquoties repeti.

Cortice peruviano numquam opus habui, nisi casus fuerint admodum periculosi.

Uti contigit in aliquibus ægris, qui post primum & secundum paroxysmum erant adeo debiles, ut nequaquam se sustinere potuerint; etenim nimis largo & foetidissimo sudore vires omnes conciderunt, & facies facta est moribunda.

Et hic magna copia tempore interca-

lari debebat assumi cortex, ut certus sequeretur effectus.

Fuit vir triginta trium annorum, qui omni alterno die circa nonam matutinam per totum corpus sensit horrorem, dein frigus ingens, tandem pectoris summam angustiam, & pulsus deprehendebatur admodum febrilis.

Remittente frigore ingrata aderat faucium siccitas, & titillatio, hanc tussis siccissima, & violentissima excepit, intumuit facies, livuerunt labia.

Tandem tussi prodiit copiosissimus, spumosus sanguis, & mox cessavit titillatio, pectoris anxietas, & æger longe melius habuit, & sensim siluit tussis, & sputum sanguineum.

Finito paroxysmo nullam omnino molestiam æger conquestus est, nec respiratio videbatur difficilis, & vires fuerunt satis bonæ, viguitque appetitus.

Postquam tres tales paroxysmos observavi, dedi intra triginta tres horas unciam unam cum dimidia corticis peruviani.

Effectus fuit optimus, & nullum amplius paroxysmi signum rediit.

Per plures dies parvam adhuc quotidie corticis dosin exhibui, æger autem inde optimam sanitatem obtinuit.

Etenim brevi temporis spatio pinguis factus est, liberrime respiravit, neque in ambulando, neque in ascendendo scalas ullum in pectore incommodum sensit, nec ulla tussi deinceps vexatus est.

Puer, novem annorum, quotidie circa secundam pomeridianam pessimis totius corporis convulsionibus excruciatu-
tus est, & his cessantibus tetanus universalis supervenit, qui autem post octo circiter minuta sensim desiit, & ægro rediit mens, & sequebatur largus sudor.

Omnes ægri in eodem cubiculo decumbentes, quoniam hunc epilepticum crediderunt, ejus consortium evitarunt.

Tentavi diversissima remedia in his convulsionibus decantata, & alias optimo cum effectu exhibita, verum in omnibus frustra fui, & æger intra sex dies omnibus fere viribus orbatus est.

Quare tempore intercalari drachmas sex extracti corticis peruviani in mistura præbui.

Altero die nullæ convulsionem observatæ sunt, verum æger ea hora, qua paroxysmus debuisset reverti, fuit multo debilior, anxius, & faciei color sæpius mutabatur, post lenem autem sudorem æger dormivit, & melius habuit.

Dedi dein adhuc per octiduum quoti-

die unciam dimidiam extracti corticis peruviani, & quotidie ægri vires auctæ sunt, & nullum amplius convulsioneis vestigium visum est.

Post sex menses vidi hunc puerum adhuc integre sanum, robustum, & ab omni convulsione immunem.

Plures erant ægri, quibus quotidie, prægressa horripilatione, pulsus longe celerior factus est, deinde accessit major sitis, & mox per totum corpus maculæ sublividæ, prurientes eruperunt.

Post binas ternasve horas pulsus iterum ad naturalem statum rediit, ægri sudarunt, & maculæ disparuere.

Multi solo infuso herbæ fumaris, & usu conservæ N. 27. vel 29. restituti sunt.

Si autem his febris non cessit, & si post repetitos paroxysmos ægri valde debiles fuerunt, tunc adhibenda erat conserva N. 30. qua semel aut bis assumpta nullus amplius paroxysmus rediit, nec maculæ amplius visæ sunt.

Verum torpor in membris remansit, & lassitudo, quæ præsertim matutino tempore post somnum observata fuit.

Has autem reliquias continuatus usus conservæ N. 27. & largus potus infusi fumaris sustulerunt.

Alii in nosocomio ægri decubuerunt, qui quotidie determinata hora per omnia membra senserunt formicationem, dein dolorem tensivum, dilacerantem, tandem tota cutis coepit albo, flaccido tumore inflari; & orta est magna pectoris anxietas, sitis ingens, & pulsus fuit parvus, inæqualis, intermittens.

Sub paroxysmo aderat anxium delirium, & continua membrorum jactitatio.

Talis exacerbatio plerumque quinque vel sex horas duravit, dein ægri sponte dormire coeperunt, & copioso sudore perfusi sunt, & tumor totus iterum disparuit.

Post somnum pulsus fuit lentus, parvus, & ægri fuerunt valde debiles, appetitus languit.

Saturata infusa amaricantia herbæ absinth., centaure. min., chamædr., fumar., card. bened. &c. rad. helen., pyreth. gentian. &c. his in casibus multum effecerunt, & his solis plerique curati sunt.

Quidam tamen post paucos paroxysmos vires plurimas deperdiderunt, quapropter cortice peruviano opus fuit, qui tantos ilico præstitit effectus, ut non tantum febris cessaverit, sed & omnis

tumor disparuerit, & brevi redierint vires & sanitas.

Sub usu corticis peruviani quoque infusa amaricantia exhibita sunt.

Frictiones tempore paroxysmi applicatae febrem & anxietates auxerunt.

Verum cessante febre ad tumoris reliquias dispellendas multum contulerunt.

Binos habui in nosocomio ægros, qui febre intermittente quartana laborarunt; tempore apyrexiae pulsus fuit fortis, æqualis, & ægri appetierunt, & tantas habuerunt vires, ut citra omnem molestiam extra lectum esse, & ambulare potuerint.

Calor febrilis post quamlibet exacerbationem desiit absque ullo sequente sudore, vel notabili transpiratione.

Adhibui diversa remedia, & in cujuslibet usu aliquamdiu perstiti, ut verum effectum experirer; nil autem potui immutare.

Febris mansit vehemens, & ægri coeperunt vires amittere, & emaciati sunt.

Hinc ad corticem peruvianum transcendendi, & primo intervallo integram unciam cuilibet ægro ingessi.

Verum neque hæc corticis dosis paroxysmum reddidit mitiorem, imo frigus videbatur longe majus, & molestius.

Dedi igitur altero intervalli spatium corticis peruviani selectissimi unciam unam cum dimidia ; & neque hac dosi quidquam mutatum fuit.

Tertio intervallo tentavi extractum corticis peruviani, & id in mistura ad unciam unam & mediam exhibui : effectus denuo nullus inde sequebatur.

Remedia sudorifera omnis generis tentata nullum sudorem potuerunt elicere ; sudorem tamen judicavi esse necessarium, quoniam omnis paroxysmus febrilis sudore alias solvi solet, & quoniam aliæ excretiones ad morbi allevationem nihil contulerunt.

Urina copiosissimum lateritium sedimentum posuit sine levamine.

Frictiones igitur ad sudorem elicendum tunc applicui, & eo tempore, quo lenes inceperunt horripilationes, integram spinam dorsi, & os sacrum jussi aliquamdiu pannis laneis, calidis, & camphora probe imprægnatis, perfricari, dein super totum dorsum tales pannos, camphora imbutos, apposui, & ægrum lecti stragulibus probe tegi curavi.

Corpus præterea infusis theatis implevi.

Intra breve temporis spatium calor

per omnia membra urens secutus est, qui autem mox in largissimum sudorem mutabatur.

Sudorem infusis & jusculis tenuioribus, & leni lecti calore per integras tres horas conservavi; & hac ratione paroxysmus admodum mitis fuit.

Dum adverti pulsum ad statum naturalem redire, & exacerbationem ad finem tendere, exhibui haustum paregoricum, quo brevi somnus blandus productus est, & ægri inde multum reficiebantur.

Unus ex his, eo tempore, quo alter paroxysmus debuisset reverti, levissimas tantum horripilationes & dolorem capitis conquestus est, alter autem mansit æque alacer, agilis, & nil omnino incommodi sensit.

Hunc igitur reliqui sine medicamentis, ut viderem, an hoc modo unica vice febris esset suppressa.

Priori autem exhibui copiosa infusa, applicui frictiones, & eum denuo ad sudores disposui.

Verum mox sponte cœpit dormire, & copiose sudare, nec paroxysmi violentiam percepit.

Neque postea ullum amplius febrile signum habuit.

Hic igitur binis frictionibus, & alter unica a pertinacissima febre liberatus fuit.

Ab eo tempore, quo coeperunt frictiones applicari, & sudor comparere, nulla urina amplius sedimentum lateritium deposuit, sed omnes fuerunt naturales.

Solis nutrientibus postea hi ægri integre convaluerunt; & erant adhuc fugata febre per binas septimanas in nosocomio, & ea omnia, quæ iis offerebantur, comederunt, & nullam recidivam passi sunt.

Hauftus N. 72. si dimidia hora ante febris insultum exhibeatur, sæpe pertinacissimas febres intermittentes jugulat, fugat.

Verum qui hoc remedio utuntur, pulmones integros habeant, necesse est.

Ego in fugandis febribus, quæ contra ipsum corticem peruvianum rebelles erant, optimos ab hoc haustu effectus aliquoties observavi.

Autumno & hyeme admodum numerosi ægri in nosocomio decubuerunt, qui febre intermittente pectorali laborarunt.

Hi ægri nil conquesti sunt, verum erant debiles, pulsum habuerunt mol-

lem, plenum, celeritate naturali fere æqualem, quandoque undulantem, appetitus fuit admodum exiguus, sitis nulla, respiratio naturali paulo brevior, verum neque anxia, neque laboriosa, facies autem fere semper fuit rosea, & cutis leni sudore maduit, urina prodiit cruda, flocculenta, subviridis, aut valde tenuis, alvus fuit immorigera.

Hi ægri frequenter gemuerunt, nulla autem tussi vexati sunt, screateu quandoque gluten rejecerunt.

Quotidie determinata hora senserunt horripilationes, frigus, & dein ortus est magnus calor, cui jungebatur tussitatio, & sitis, & pectoris anxietas, & respiratio celeris, facies fuit magis incensa, urina prodiit flammea, caput vehementer doluit, pulsus factus est durus, valde febrilis.

Horripilationes & frigus ultra horæ quadrantem nunquam durarunt, calor autem & sitis & anxietas per binas, tres, & quandoque per quatuor horas continuarunt.

Definente calore secutus est largus sudor, qui ægros multum defatigavit.

Ob magnam ægrorum debilitatem sæpissime corticem peruvianum, ad hanc febrem fugandam exhibui, nullus autem unquam

unquam effectus observatus est, paroxysmi eodem tempore, & eadem vehementia reverterunt; imo anxietates quandoque post usum corticis majores ortæ sunt.

Qui non plures tales ægros viderunt, non poterant facile cognoscere malum in pectore latere, quoniam ægri rogati semper responderunt, pectus esse omnino liberum, & quoniam nulla fere tussis observata est.

Remedia antifebrilia nil juverunt, decocta autem emollientia, expectorantia his ægris maxime conduxere.

Quamprimum sputum copiosum coepit prodire, symptomata omnia leviora facta sunt, & paroxysmi, qui febrem intermittentem mentiebantur, sensim evanuerunt.

Paregorica vespertina magnum levamen adtulerunt, etenim sine his noctes fuerunt vigiles.

Sub finem hujus morbi secuta est quandoque diarrhæa glutinosa, quæ mox restituit appetitum, & levavit præcordiorum angustias.

Adhibita quamvis omni cura, tres tamen ægri, hac febre affecti, contabuerunt.

170 *Febres intermittentes.*

Sub finem intumescere pedes, dein manus & brachia.

Hi ægri nunquam potuerunt supine jacere, ilico enim anxii fiebant, & fere suffocati sunt, haud raro e somno subito evigilarunt.

Post mortem pulmones reperti sunt flaccidi, mucosi, & multum gluten subflavum gelatinæ instar, intra membranam, pulmones exterius ambientem, effusum hæsit.

A materia rheumatica, arthritica, scorbutica, podagrica, venerea, &c. variæ febris intermittentis species quandoque producuntur, & veræ sunt apyrexia; nihilominus tamen remedia antifebrilia non juvant, sed requiruntur talia, quæ in his affectionibus fere specifica sunt.



Hydrops.

HAUD paucos numeravimus in nosocomio, qui hydrope decubuerunt.

Ascites raro sola observata est, etenim huic anasarca plerumque jungebatur.

Eadem methodo, quam in anno medico primo laudavi, & explicui, plurimi ab hydrope integre liberati, & per-sanati sunt.

Li tantum hoc morbo obierunt, qui alio simul malo affecti erant, qui laborarunt phthisi, aut qui aliquod viscus corruptum, aut adeo induratum & obstructum habuerunt, ut nullo medicamento quidquam effici potuerit, aut qui jam adeo debiles, & emaciati ad nosocomium intrarunt, ut palliative solummodo cum iis fuerit agendum.

Neque ego solus hac medendi ratione felix fui, verum & optimus meus Collega COLLIN iisdem prorsus medicamentis usus, plures quoque ex periculissimo hoc morbo eripuit.

Lætabamur sæpissime invicem, dum videremus ægros jam fere morituros, ope remediorum denuo reviviscere, & penitus convalere.

Hac ratione evidenter experti fuimus naturam aberrantem non tantum ad rectum tramitem quandoque posse redigi, sed & cogi ad bene operandum.

Paracentesis abdominis audacter instituebatur, dum nimirum medicamenta secundum artem & rationem adhibita nil effecerunt, aut dum ab iisdem ægro-

rum vires multum imminutæ sunt sine morbi levamine.

Paracentesi abdominis tres ægri hoc anno integre ab hydrope liberabantur, & sex septimanis ab operatione (etenim quemlibet tamdiu retinui, ut viderem annon metus esset morbi revertentis) sanissimi ex nosocomio discesserunt.

Sola ascite laborarunt, cæteroquin sanissimi.

Medicamenta nullam prorsus in tumore mutationem effecerunt, & usu acriori vires imminutæ sunt.

Id autem in his ægris maxime animadvertendum videbatur, quod tumor abdominis ad certam altitudinem elevatus, non amplius increverit, & sub eodem volumine semper perstiterit.

Primus horum ægrorum erat vir 44. annorum, qui eandem abdominis molem a binis annis gessit.

Morbi causam ignoravit, etenim venter sine ulla molestia sensim intumuit.

Paracentesi educæ sunt quadraginta octo libræ feri limpidissimi, inodori, abdomen post peractam paracentesin fuit fasciis probe ligatum.

Neque ullum malum symptoma supervenit.

Secundus æger fuit juvenis novem-

decim annorum , qui ex nimio corporis motu vehementer sudavit , & subito frigidam haufit.

Quo facto ilico per totum corpus fenfit horrorem , rigorem , ventriculus acute doluit , & venter cœpit tendi. Sudor derepente fuppreffus eft , & intra viginti octo horas vix uncia una urinæ prodiit , idque anxio cum tenefmo , & molefto ardore.

Vires mox prostratæ funt , & venter fpatio feptem dierum in ingentem molem accrevit.

Hoc in ftatu in noftrum nofocomium hicce æger ingerebatur.

Datum purgans alvum quidem copiofam eduxit , moles tamen & durities ventris nequaquam mutatæ funt.

A remediis diureticis urina aut penitus fuppreffa eft , aut facta ftanguriofa.

Demum quo plura medicamenta data funt , eo pejora accefferunt fymptomata , & appetitus , qui antea vigit , deletus eft , anxius fuit æger , & noctes habuit infomnes , ructibus diu noctuque excruciabatur , flatus per inferiora penetrare non potuerunt , unde continui borborgmi dolores colicos excitarunt.

Æger tandem ab omnibus medica-

mentis abhorrui, unde conclusi paracentesi aquam educere.

Dominus HÄFFNER chirurgus hanc operationem felicissime instituit, & effluerunt sexaginta duæ libræ limpidissimæ, & insipidæ lymphæ.

Illico a peracta operatione æger nil omnino conquerebatur, & pulsus fuit liber, sat æqualis.

Verum post horæ circiter spatium cœperunt extrema frigere, facies pallere, ortæ sunt anxietates & vagi calores, & supervenerunt frequentes leipothimix, & tormina; pulsus interim fuit inæqualis, parvus.

Iuscula tenuiora frequenter exhibebantur, & præterea sæpius datum est cochleare unum vel alterum vini generosi austriaci, ut hac ratione refocillarentur vires.

Postquam æger magnas anxietates, & fere lethale frigus per aliquod tempus perpeffus est, cœpit vomere materiem æruginosam, & prodiit simul alvus copiosa biliosa, admodum foetida, & dein dolores & anxietates remiserunt.

Hæc dum mitiora fiebant, conquerebatur æger magnum ardorem circa penis glandem & in urethra; dein secutus est dolor valde acutus in inquinibus.

& toto hypogastrio, & omnes partes vicinæ cœperunt tendi, dolere, inflari.

Applicata igitur sunt fomenta, & cataplasmata emollientia, quibus dolor mox mitigatus fuit, tensiones desierunt, & dein intra aliquot minuta prodierunt novem libræ urinæ limpidissimæ.

Postea æger blandissimo somno prehendebatur, ex quo post quatuor horas evigilans se ab omni dolore, & anxietate liberrimum esse affirmavit.

Ab eo tempore nil mali amplius observatum est, æger longe majorem sanitatem post hunc morbum obtinuit, quam ea fuit, qua antehac fruebatur.

Per tres septimanas omni octiduo huic ægro dedi scrupulos duos pulveris cornachini, ut hac ratione recidivam impedirem.

Dum elapsis sex septimanis e nosocomio discessit, rogavi, ut ilico me adiret, si minimam in ventre molestiam adverteret.

Verum non rediit; hinc eum adhuc sanum judico.

Femina, 27. annorum, tempore suæ ultimæ graviditatis, ventrem habuit triplo ampliorem, quam antehac his in circumstantiis habere solebat.

Vagas anxietates subinde animadvertit,

& alvum semper habuit pertinacissime clausam, cæteroquin tota graviditate optime valuit, & robusta fuit.

Emenso graviditatis tempore puerum peperit sanum, omnes autem circumstantes augurabantur plures foetus.

Partu peracto ventris moles fere æque magna fuit, ac antea; verum fluctuatio tunc observabatur.

Lochia optime processerunt, alvus autem mansit maxime immorigera, & urina fuit tenesmoidea. Cæteroquin totum puerperium ægra felicissime absolvit, & vires conservavit.

Finito puerperio de ventris mole cogitatum est, & quoniam ex fluctuatione manifeste patuit aquas latere, data sunt omnis generis remedia purgantia, diuretica, &c.

Hæc autem quamvis longo usu fuerint continuata, malum non levarunt, & ægræ potius fuerunt molestæ.

Octodecim septimanas post puerperium hæc ægra ad nostrum nosocomium translata est.

Quoniam vero ex narratione intellexi, plurima remedia sine omni bono effectu fuisse assumpta, transivi ilico ad ventris paracentesin.

Novemdecim mensuras aquæ subtur-

bidæ prodierunt, & ægræ neque sub ipsa operatione, neque postea quid mali accidit.

Altero die urina copiosior sponte fluxit, & alvus sine auxilio soluta est; erat autem tunc coloris plumbei, consistentiæ pultaceæ.

Per integrum octiduum hanc ægram absque medicamentis tunc reliqui, & solummodo cibis levioribus & probe nutrientibus, atque vino austriaco montano, sæpius parca dosi dato, vires conservavi.

Postea tamen, licet sana videretur, per quatuordecim dies exhibui vinum scilliticum N. 52. ut hoc modo omnes viæ excretoriæ liberæ redderentur.

Excedens e nosocomio sana fuit, & post trimestre spatium vidi eam adeo robustam, ut onus centum librarum ex tergo facile portaverit.

Paracentesin abdominis pluribus in casibus celebravimus, neque unquam infelices fuimus, etenim omnes ægri inde levati sunt, & tali modo horum vita nostra arte prolongata fuit, quæ cæteroquin vi morbi fuisset abbreviata.

Hæc igitur cura palliativa est summa necessaria, etenim quamvis sæpissime prævideamus, ægros inde non sanari,

eam tamen debemus administrare, ut miseris saltem aliquod levamen adferamus.

Habuimus multos ægros, qui eandem operationem repetitis vicibus subierunt, & ipsimet, dum se ab aquis suffocandos viderent, rogarunt, ut hac operatione aquæ tollerentur, præsertim quoniam prima peracta operatione observarunt, nullum adesse periculum, & fere nullum a perterebratione oriri dolorem.

Si igitur medicamentis nil efficitur, cur hæc operatio differatur, aut negligatur penitus?

Eos ægros non juvat, qui adeo vitata habent viscera, ut arte illud vitium tolli nequaquam possit, aut quorum massa humorum est penitus corrupta, aut ubi totus sanguis in serum solvitur.

Dum vero talia vitia non observantur, tunc semper licet multum sperare, quamvis in eodem ægro hæc operatio, quandoque pluries debeat iterari.

Erat femina viginti annorum, quæ pessimo ventris hydrope affecta ad nosocomium venit.

Medicamenta, quæcunque antea exhibita, nil profuerunt, & ventris moles

aucta est, & anxiosa fiebat respiratio, & erat metus suffocationis.

Hinc perforatione abdominis aquæ subflavæ mensuras 24. eduximus, unde hæc femina ab omni anxietate liberata fuit, & recuperavit majores vires, & bene habuit.

Peracta operatione dedi conservam N. 53.

Verum sexto die venter iterum intumuit, licet copiosissima alvus fluxerit.

Hinc ab hac conserva abstinui, & ejus loco substitui vinum scilliticum N. 52.

Attamen & sub hujus usu venter intra viginti & unum dies ita increvit, ut prior suffocationis metus redierit.

Hinc denuo ad paracentesin fuit confugiendum.

Prodierunt 16. mensuræ aquæ subrubellæ, & postea ægra iterum maxime levata videbatur.

Remedia alia tum purgantia, tum diuretica &c. tentata, nil effecerunt, & intra octodecim dies idem malum ad priorem gradum ascendit.

Sexies hac ratione in eadem ægra cogebamur paracentesi aquas elicere.

Et post sextam paracentesin venter

tamen denuo intumuit, & multa aqua collecta est.

Verum longe tardius id evenit, neque venter in tantam, ut antea, molem accrevit, & cœperunt medicamenta exhibita meliori cum effectu agere.

Etenim conserva N. 53. quæ alias alvum citra levamen movit, nunc cœpit copiosissimam urinam pellere, & hac ratione tumor, qui post sextam paracentesin sequebatur, multum imminutus fuit.

Verum ægra jam ab conserva N. 53. abhorruit, unde dedi misturam N. 54. cujus efficacia tanta quotidie urinæ copia profluxit, ut brevi tempore tota fere ventris moles sublata esset.

Sub finem exhibui aliquoties drachmam unam pulveris cornachini, unde venter ad molem naturalem reducebatur, & ægra integras vires, formam, & sanitatem intra binas septimanas recuperavit.

Jam octo menses nunc præterierunt, quo ex nosocomio sana abiit, & adhuc dum sanam paucis abhinc diebus vidi.

Quandoque hydrops sola vi naturæ curatur, dum medicamentis nil potest præstari.

Puer, 10. annorum, pessimo hydrope

anasarca , & ascite affectus a nullo prorsus medicamento levamen percipit , & malum in dies in pejus vertitur , ita quidem , ut ex omnibus signis jamjam moriturus videretur.

Removi igitur omnia medicamenta , & gratum solummodo julapium cardiacum præscripsi.

Verum miser nil potuit assumere , & pessimis symptomatibus adhuc dirissima totius corporis convulsio supervenit , quam omnes credidimus certo certius interempturam debilem ægrum.

Ast hæc salutem adtulit.

Etenim durante convulsione per anum & urethram copiosissima aqua prodiit , & intra horæ spatium omnis fere tumor disparuit , & dein cessarunt convulsiones , & ægrum blandissimus somnus occupavit.

Erat autem somnus fere octo horarum.

Evigilans vires sat bonas habuit , fuit agilis ; eorum autem nequaquam recordabatur , quæ ante somnum acta fuerunt ; mox appetiit , & pulsus prehendebatur liber , & fere naturalis , circa ossa vero , & tendines dolorem conquerebatur.

Conservæ antiscorbuticæ , & alia lenia diuretica reliquum tumorem , qui

circa artuum extrema adhuc aderat, facile dissiparunt.

Quarto die ægri vires jam tantæ fuerunt, ut ultra quatuor horas citra omne incommodum extra lectum federe, & famuli auxilio ambulare potuerit.

Ad laxas fibras roborandas fasciæ, & lenes frictiones aromaticæ optimo cum successu applicabantur.

Post octodecim dies sanissimus ex nosocomio abiit.

Salutares quamvis hoc in casu fuerint convulsiones, alium tamen casum in nosocomio habui, ubi nil juverunt.

Erat puella quatuor annorum, quæ adeo malo hydrope anasarca decubuit, ut moles cujuslibet pedis & manus molem pedis aut manus robustissimi viri superaverit.

Ventris circumferentia fuit unius & dimidiæ ulnæ, in cavitate abdominis nulla aqua hæsit, tumor fuit mere intercutaneus, pudendorum tumor infantis caput magnitudine adæquavit.

Facies & totum caput enormiter intumuerunt, palpebræ præ tumore fuerunt clausæ, omnis autem tumor erat mollis, albus.

Ano vermes lati prodierunt.

Hinc dedi medicamentum N. 55. &

lene infusum folior. levistici, & florum sambuci.

Copiosissimi vermes inde expellebantur, ut & multum gluten ac serum ex ano fluxit, urina autem fuit stranguriosa, & pauca.

Tumor intercutaneus nequaquam diminutus est; licet per plures dies idem medicamentum fuerit continuatum.

Hinc tentavi remedia diuretica primum leniora, dein paulo acriora.

Verum ab his brevi iterum erat abstinendum, quoniam mox orta est sitis, & urina fuit penitus retenta, & accesserunt convulsiones, quæ miseram puellam multum debilitarunt, & tumor auctus est, & epidermis circa pudenda coepit rumpi, & acre serum fundere, & morbus multo pejor reddebatur.

Pulsus fuit semper parvus & celer, verum respiratio non erat admodum læsa.

Propter mala hæc symptomata, & ob vires admodum debiles nullum fere remedium huic puellæ per plures dies tunc exhibui, solo victu leniori, & grato julapio cardiaco eam reficere conabar.

Dein autem, viribus aliquantulum

auctis, præscripsi pulverem N. 56. qui bonos ilico effectus præstitit; etenim ejus ope prodiit urina copiosissima, & mox tumor rugosus & mollior factus est.

Quamprimum adverti tumorem incipere diminui, statim totum corpus pannis laneis fumo succini multum imprægnatis, involvi, & iisdem pannis singulo trihorio omnia membra, & ventrem leniter fricari jussi.

Ex his tantum sequebatur levamen, ut quinto die pedes jam fere naturales fuerint, & reliquus tumor jam ultra medietatem abierit.

Iisdem igitur continuavi, & spatio quindecim dierum puella ab omni hydrope fuit libera.

Ubi epidermis secessit, & lenis aderat erosio, ibi optimo cum effectu applicatum est unguentum N. 48.

Hydrope jam penitus dispulso præbui per octiduum vinum medicatum martiale, ut visceribus & fibris restituere-
tur debitum robur.

Nunc jam per integrum fere annum hæc puella sana in nostro nosocomio alitur.

Dum vires constant, & pulsus sat æqualis, & liber est, & respiratio faci-

lis manet, tunc non adeo multum timendum est iis, qui anasarca laborant.

Dum vero respiratio fit difficilis, anhelosa, & dum pulsus supprimitur, dum noctes fiunt anxiae, & dum subitæ oriuntur vigiliæ, & sitis supinus impossibilis redditur, certa mors plerumque prædicenda est.

In hydrope thoracis incipiente medicamenta juvant; verum talis difficulter cognoscitur.

In hydrope thoracis, inveterato medicamenta raro juvant, & plerumque pertinaciori usu nocent.

Largi fonticuli, setacea in cavum penetrantia levant, subinde juvant.

Paracentesis in hoc morbo ambigua est & admodum incerta.

Quandoque in ipsis pulmonibus mucus, aut gluten colligitur, quod eadem fere symptomata producit, quæ fiunt ab aqua in pectoris cavum effusa; similes tamen paulo pleniore pectore tussunt, & tussi auditur strepitus glutinis, in pulmone latentis; & si sputa prodeunt, ea levamen adferunt.

Unde frequenter accidit, ut tales ægri, licet hydrope anasarca, aut ascite simul laborent, perfecte sanentur.

Medicamenta, quæ sputa solvunt,

& promovent, & tumores aquosos discutunt, hoc in casu optima sunt; hinc vino scillitico N. 52. aut vino N. 69. aut clareto N. 13. aut conserva N. 53. multos restitui.

Erat in nosocomio femina, quæ anasarca & ascite simul laboravit.

Exhibebantur longo tempore optima diversi generis remedia citra ullum levamen; imo ægra semper pejus habuit, & tandem sitim conquesta est, & afficiebatur febre & vera peripneumonia.

Hinc Dominus COLLIN ter venam secuit, & dedit decoctum emolliens N. 4.

Quod non solum peripneumoniam brevi solvit, sputa copiosa eduxit, verum & tantam urinæ copiam promovit, ut & anasarca, & ascite, intra duodecim dies penitus evanuerint.

Hinc leviora sæpe juvant, ubi fortia non profunt.

Dum vidi in morbis chronicis medicamenta secundum rationem adhibita debitos effectus non præstare, tunc sæpius ægros sine medicamentis reliqui, aut tantum talia præbui, quæ vires conservarent, & symptomatibus maxime urgentibus obviam irent.

Evenit tunc sæpissime, ut natura

sponte cœperit bene operari, & monstrare viam, qua morbus remediis simplicissimis citra difficultatem potuit curari.

*Tympanitis.*

SÆPIUS vidi post validam diarrhæam tympanitidem secutam esse, etenim totus venter intumuit, & percussus dedit tympani sonitum.

Flatu & ructu frequenter expulso ægri magnum levamen perceperunt.

Hi vero si interclusi sunt, tunc oriebantur magnæ anxietates, venter ad rupturam tensus est, brevis & laboriosa fuit respiratio, & pulsus debilis, inæqualis, celer, alvus & urina retinebantur, noctes fuerunt vigiles, aut admodum turbatæ, anxæ.

Dum tales ægri sitim ingentem habuerunt, & linguam siccam; dum genæ rubuerunt, & a levissimo adtactu in ventre dolor valde acutus excitatus est, & si simul pulsus fuit parvus, inæqualis, & intermittens, & vires exiguæ, malum erat: etenim intra unum alterumve diem hi ægri interierunt.

Post mortem fere omnia intestina gangrænosa reperta sunt.

Perverſa diarrhæam curandi, & ſopiendi methodus frequens hujus mali cauſa fuit.

Quandoque vero idem ab acri intestina nuda arrodente & inflammante productum eſt.

Si ſitis abſuit, ſi ventrem citra dolorem licuit tangere, & comprimere, ſi vires non fuerunt nimium dejectæ, optima curationis ſpes ſupererat.

Motus corporis hic fuit ſummo neceſſarius, ſi vires & ventris moles eum admifere.

Frictiones, quæ pannis laneis fumo myrrhæ, ſuccini crudi, & croci aſtriaci &c. impregnatis fiebant, ut & fomenta ſicca, calida, aromatica toto ventri continuo applicata, expellendo flatus morbum ſæpe cito allevaverunt.

Si alvus fuit nimis pertinaciter retenta, tunc enemata ex ſolo ſaturato ruthæ infuſo optime conduxerunt.

Præterea his ægris utiliſſima fuit miſtura N. 57.

Hac ſola methodo per plures dies continuata, multi feliciter reſtituti fuerunt.

Si vagi dolores colici, & ſpaſmi, a

solo inordinato spirituum nerveorum motu oriundi, simul observentur, tunc misturæ N. 57. adduntur guttæ XX. vel XXX. laudani liquidi SYDENHAMI, unde mox dolores sedantur, solvuntur spasmi, flatibus aperitur via, & venter detumescit.

Post partum si lochia nimis copiose fluxerunt, tunc sæpe membra intumuerunt, atque venter flatu distentus & in magnum tumorem elevatus est.

Frictionibus aromaticis, & medicamento N. 58. similes ægræ plerumque sanatæ sunt.

Acidum in primis viis oberrans subinde intestina debilitat, flatus generat, & producit tympanitidis speciem.

Pulvis N. 59. hoc in casu optime discutit flatus, & in tumorem tollit.

Dein vero necesse est, ut ad robur fibræ laxis restituendum exhibeatur medicamentum N. 58. vel N. 60.

A fluxu menstruo impedito sæpius quoque vidi, ventrem flatulento tumore attolli, ortos esse dolores acutos, spasmos, & vomitus, nequaquam tamen nimia sanguinis copia hæc symptomata produxit.

Mistura N. 61. & enemata emollientia plerumque effecerunt, ut menses

prodierint, & venter iterum, cum levamine omnium symptomatum, detumuerit.

Binas ægras valde plethoricas juvit unica larga venæ sectio in brachio instituta.

Hæ autem pulsum habuerunt durum, inæqualem, remittentem, caput vehementer doluit, & respiratio fuit angusta, suppressa.

Unicam habui feminam, quæ a suppressis mensibus continuum ardorem in hypogastrio conquesta est, & pulsus fuit durus, celer, & sitis magna, & venter in magnam molem resonantem accrevit.

Inflammationis signa aderant; ideo aliquoties venam secui, & exhibui decocta antiphlogistica, resolventia, emollientia.

Verum ardor non remisit, & ægra coepit contabescere.

Circa vesperras omnia exacerbata sunt, nox fuit inquieta, & ortus est sudor copiosus, tenax, & defatigans.

Decoctis emollientibus tunc addidi magnam copiam lactis recentis.

Post binas septimanas ardor remisit, utero prodiit pus bonum, copiosum, & venter fiebat mollior.

Decocta emollientia, quæ prius dedi, adhucdum continuavi.

Præterea autem præscripsi pilulas N. 62. & feci desuper hauriri infusum agrimonix cum tertia parte lactis.

Magna puris boni copia quotidie exstillavit, venter detumuit, & febris vespertina multum remisit, & noctes fuerunt quietæ sine opio.

Tandem pulsus fuit fere naturalis, siluit febris vespertina, cessavit sudor nocturnus, increverunt vires & appetitus.

Hinc pilularum loco tunc exhibui ter quotidie guttas sex opobalsami.

Mox flatus sursum deorsumque explosi sunt, puris quantitas diminuta fuit, & sensim integra valetudo rediit.

Habui juvenem 18. annorum, cujus venter plenus erat scirrhis indurationibus, quæ originem duxerunt a febre tertiana, qua hicce æger binis abhinc annis in ungaria decubuit.

Fugata febre ultra sesqui annum labores dueros, non obstantibus his tumoribus, facile & citra molestiam peregit, dein vero tensiones in ventre advertit, & alvus, quæ alias quotidie prodiit, segnis facta est, & tantum omni tertio

quartove die inter magna molimina solvebatur.

Post unam alteramve septimanam venter intumuit; scirrhi in abdomine latitantes coeperunt acuto dolore affici, orta est simul febris continua, admodum vehemens, quæ circa vespervas, prægressa horripilatione, quotidie exacerbata fuit.

Venter percussus tympani sonitum reddidit. Ob pulsum elevatum, durum, plenum, repetitis venæ sectionibus, debebat sanguis emitti, alvus enematibus emollientibus & oleosis elicitæ est, toti ventri applicata sunt catasplasmata emollientissima, & quoniam inflammatio ventris manifestissimis signis sese prodidit, data sunt decocta emollientia, resolventia.

Vomitibus aderant simul admodum frequentes, & defatigantes, unde interdum paregoricis utendum fuit.

His medicamentis per tres integros dies sine ullo fere levamine continuavi.

Quarto die coepit umbilicus rubere, inflammari, protuberare, & valide dolere; nihilominus sedulo continuavi catasplasmata, & in usu priorum medicamentorum perexi.

Quinto

Quinto die umbilicus pugnum virilem magnitudine superavit, & leviter premendo manifesta fluctuatio percepta est.

Sexto die sua sponte rumpebatur umbilicus, & effluxit copiosum pus, cum multo flatu & strepitu.

Paulo post concidit ventris moles, & æger passus est frequentes leipothymias.

Tactu deprehendebantur omnes ventris indurationes minores, molles.

Quoniam autem scirrhi suppuratione consumendi videbantur, judicavi necessario internis externisque remediis emollientibus esse continuandum.

Magna quotidie puris copia partim sponte per umbilicum prodiit, partim molli manu premendo expulsa fuit.

Intra paucos dies omnis fere febris evanuit, & exacerbationes vespertinæ fuerunt longe mitiores, appetitus cœpit redire, sitis penitus desiit, & pulsus fuit liberior; verum simul lenis diarrhæa sequebatur.

Decimo octavo die æger extra lectum per plures horas se potuit sustinere, pus fere nullum amplius visum est, umbilicus sensim rediit ad molem naturalem, & ejus apertura cœpit minor fieri, &

coire ; scirrhi erant minores , molles ,
& ventris tumor valde exiguus.

Vigesimo primo die inveniebatur umbilicus penitus clausus , æger bene habuit , & tota die extra lectum ambulavit.

Cum tamen adhuc reliquiae quædam ex ventris indurationibus supere-rant , jussi , ut decoctis solventibus ex rad. tarax. , gram. , scorzon. , tragapogon. , &c. aliquandiu uteretur , & præterea præscripsi pilulas ex sapone veneto, gum. ammon. terra foliat. tart. &c. & commendavi diætam humectantem , lacteam.

Vigesimo quinto die æger denuo pejus habet , conqueritur capitis & spinæ dorsi dolorem , sitit , nec amplius extra lectum esse potest.

Tandem ingens dolor lumbos , & inguina occupat, intumet hypogastrium, & magno cum dolore retinetur urina , æger est valde inquietus , anxius.

Cataplasmata tunc toti ventri , & hypogastrio applicata , enemata oleosa ano injecta post plures horas tandem id effecerunt , ut urina copiosa , attamen tenuissima , prodierit ; unde hypogastrium paulisper detumuit.

Verum remansit ingratisissimus min-

gendi tenesmus, & dolor tensivus & dilacerans lumbos & inguina pertinaciter tenuit.

Haussit æger copiosum & meracum decoctum radicis althææ, & foti sunt lumbi, & totum hypogastrium mollissimis remediis.

Altero die fluxit urina crassa, quæ post pauca minuta adeo copiosum & puriforme sedimentum dimisit, ut medietas vitri, in quo urina asservabatur, pure plena esset visa.

Eodem igitur decocto radicis althææ, addita sub finem coctionis pauca quantitate radicis fœniculi & glycyrrhizæ rasæ, deinceps æger uti continuavit.

Febris autem & dolores penitus cessarunt, increverunt vires, nec ulli tenesmi observati sunt; urinæ autem erant variæ, quandoque enim deprehendebantur tenues, aquosæ, acrem odorem spargentes, quandoque vero erant crassæ, & multum pus ad fundum deposuerunt.

Post quatuordecim dies æger se in balnea badensia contulit, & inde rediit omnino sanus fuit, & nil duri in ventre amplius inventum est, & vires fuerunt iterum sufficientes ad duos labores subeundos.

Jussi tamen, æger aliquamdiu aquas fetteranas biberet, ut hac ratione omnes viæ excretoriæ liberæ redderentur.

Juvenis 12. annorum, eodem fere morbo laboravit, & postquam venter multum tumuit, ruptus quoque est umbilicus.

Prodiit tunc copiosa materies purulenta, & ventris moles concidit; verum æger nullum levamen percepit.

Altero die pus foetuit, & mistum erat materie foeculenta; & alvo quoque similis materies purulenta coepit comparere.

Pulsus ægri debilem, inæqualem, & quandoque intermittentem apprehendi, sitis fuit magna, vires exiguæ.

Tertio die ea, quæ ore assumebantur, vix mutata per umbilicum iterum prodierunt, fæces, ano expulsæ, fuerunt nigræ, foetidæ, & involuntariæ; frequenter animo linquebatur æger, venter subito iterum intumuit, & eodem die mors supervenit.

Omentum partim scirrhosum, partim suppuratione consumptum reperiebatur; intestina ubique cum peritonæo cohæserunt, & a materia purulenta erant arrosa, & in regione umbilicali penitus pervorata.

Intestinum cæcum erat in magnum volumen distentum, & gangrænosum.

Æger, dum ad nosocomium advenit, vires habuit admodum debiles, & vix amplius loqui potuit, hinc morbi prægressi historiam ex eo colligere non licuit.

A nimia ventriculi & intestinorum laxitate haud raro tympanitidem observavi.

Sub initium audiuntur continui borborygmi, & venter sensim distenditur, respiratio fit solito difficilior, & accedit cordis palpitatio, præcordiorum angustia, oculorum caligo, capitis & objectorum vertiginosa rotatio.

Quidam ex his ægris alvum frequenter dejecerunt paucam, crudam, alimentis quandoque commistam.

Et his flatus sine strepitu prodire, magnum autem foetorem sparserunt, & circa anum excitarunt ardorem.

Quidam vero habuerunt alvum admodum segnem, & tantum tertio quartove die scybala dura, ex fusco nigra, magna cum molestia expulsa sunt.

Neque tunc flatus libere penetrarunt, etenim plerumque dum pervenere ad sinistram iliacam regionem, ortus est dolor acute punctorius, & mox flatus

cum strepitu versus hypochondria recesserunt, & quandoque copiosi ructus explosi sunt.

Intestinum colon, ea parte qua tendit in rectum, fere semper tangebatur nodosum, inæquale, coarctatum; licet reliqua intestina fuerint valde ampla.

Curatio sat feliciter sequenti methodo dirigebatur.

Ubi alvus frequens & cruda fuit, dedi pulverem N. 63. eundemque omni secundo vel tertio die toties iteravi, donec intestina ab acri & incocto libera viderentur, præterea iussi, sæpius per diem ægri aliquot uncias infusi florum chamomilæ, & seminum contusorum foeniculi biberent.

Primis viis sufficienter purgatis, exhibui vinum medicatum N. 58. & suasi, ut ægri, quantum possibile esset, ambularent, & pannis laneis, fumo aromatico imbutis, probe & diu fricarent ventrem.

Intra paucos dies alvus comparuit magis cocta, & minus frequens, borborygmi fuerunt longe pauciores, venter minor, vires majores.

Qua de causa eodem remedio per plures septimanas continuatum est, & ægri integram sanitatem obtinuerunt.

In iis casibus, ubi alvus erat pertinaciter clausa, pulvis N. 63. nullum effectum præstitit, & magnas anxietates & tormina produxit.

His melius conducebat mistura N. 9.

Verum in ejus usu non erat diu persistendum, mox enim licuit ad vinum N. 58. transire.

Sub usu hujus vini quotidie injectum est enema ex saturato infuso florum chamomil. & ex unciis quatuor olei lini.

Hac ratione flatibus pandebatur via, & impediiebatur simul, ne dura in intestino recto scybala colligerentur.

Postquam per decem aut duodecim dies hæc sedulo sunt applicata, tunc sine enemate cœpit alvus figurata prodire, & eruperunt simul flatus, & ventris moles imminuta est.

Neque tunc aliis amplius medicamentis opus fuit, etenim solo hoc vino medicato, motu corporis, & frictione venter ad statum naturalem redactus est, & intestina debitum officium iterum rite exsequebantur.

A cibis autem duris & flatulentis summopere erat cavendum.

Multo peior oritur tympanitis, quando pars tantum cujusdam intestini laxa-

tur, & reliquum arcte constringitur.

Post diuturnos borborygmos exlargit subinde in quadam ventris plaga tumor oblongus, inæqualis, farciminofus, quandoque rotundus, globosus.

Tactu percipitur magna tensio, & elasticitas, majori pressione & frictione tandem tumor fit mollior, minor, gignuntur borborygmi, qui vel superiora, vel inferiora petunt, & hac ratione ægris magnum levamen adfertur.

Post aliquot dies tumor in eodem loco iterum apparet, & fit ægro molestus, & nec frictioni nec pressione fortiori absque dolore cedit; enemata tunc multum juvant, & medicamenta, quæ flatus discutunt, & alvum apertam tenent.

Nihilominus malum sensim augetur, & alvus fit admodum difficilis, borborygmi & flatus retenti ægros angunt, tenditur totus venter, respiratio inhibetur, cor palpitat.

Flatibus si via panditur, tunc hæc symptomata levantur; tumor vero totus non disparet, & post unum alterumve diem prius malum redit.

Tumor tandem immaniter augetur, ægri contabescunt, & morbus fit lethalis.

Roborantia & adstringentia remedia his in casibus nocent, licet ratione partis laxatæ indicarentur; alvus etenim eorum usu retinetur, venter inflatur, & præ dolore adtactum non fert, & sensim febris excitatur, & quandoque oriuntur inflammationes.

Pulvis N. 59. similibus ægris plurimum profuit, & ejusmodi remediis vita potuit multum prolongari.

Verum tamen omnibus his ægris longitate, & pertinacia morbi alvus coepit retineri, & tandem penitus intercludi, & tunc pessimus sequebatur ileus, & demum inter millenas miseras mors exoptata.

In intestino colo plerumque similia vitia reperiuntur.

Sæpe hoc intestinum in pluribus locis in enormes saccos distentum est, in aliis vero locis quasi filo ligatum, & arctissime contractum deprehenditur.

Simili tympanitidi subinde supervenit hydrops pectoris, subinde hydrops anasarca.

Tympanitidem uteri binis in feminis observavi.

A pluribus annis ambæ pessimo fluore albo laborarunt, & materies effluens fuit penitus ichorosa, putridissima, &

adeo acris, ut totam vaginam & pudendorum labia corroderet.

Urina semper erat stranguriosa.

Multis tandem & variis medicamentis, quæ partim a vetulis, & agyrtis suadebantur, partim vero a medicis peritissimis præscripta sunt, id effectum est, ut in una ex his feminis fluor cessaverit, & ulcera vaginæ & vulvæ coierint; in altera vero fluor reddebatur minus frequens & minus molestus.

Ambæ tamen hæc feminæ continuum ardorem, & dolorem rodentem, pungentem in hypogastrio adverterunt.

Variis intervallis conquestæ sunt magnas anxietates, tenesmos uterinos, & dolores tendentes versus inguina & uteri vaginam; post has anxietates & tenesmos ortum fuit leve animi deliquium, & dein plures foetidissimi flatus magno cum strepitu & summa cum violentia per anteriora ex utero explodebantur, & mox sequebatur materies saniosa, flocculenta, ignis instar urens, corrodens.

Brevi autem hæc materies iterum cessavit fluere.

Post unum, binos vel ternos dies (incerta enim erant intervalla) eadem denuo symptomata redierunt, erupere

iterum flatus , & materies pessime foetens vi quasi propulsa est.

Dum hæc per plures septimanas observata sunt , tunc coepit tumor in hypogastrio comparere , qui valde durus , & subrotundus fuit.

Hic autem tumor post quamlibet flatuum & materiei per anteriora explosionem minor videbatur , mollior , & erat valde elasticus.

Moles hujus tumoris sensim aucta est.

Verum , quo major fiebat tumor , eo minus frequens fuit flatuum explosio ; imo sensim hæc penitus cessavit ; & tunc tumor longe citius & manifestius increvit.

Ambæ hæ ægræ continua febricula affectæ erant , circa vespertas autem habuerunt magnas & frequentes horripilationes , & secutus est ingens calor & febris valida cum siti non exstinguenda. Et inde somnus fuit inquietus , & supervenerunt deliria , & tendinum subsultus.

Symptomata in binis his ægris erant prorsus simillima.

Remedia plurima , quamvis summa cum cura fuissent adhibita , nil omnino profuerunt ; & omnia quotidie pejora facta sunt , & tandem post diuturnam

corporis extenuationem anima efflabatur.

Alvus erat toto morbi tempore libera, urina vero fuit semper tenesmoidea, stranguriosa, foetida.

In prima femina, cujus fluor ex usu medicamentorum penitus cessavit, sectione anatomica inventus est uterus durus, elasticus, & magnitudine caput viri adæquans.

Postquam chirurgus scalpello in cavum penetravit, aër summa cum violentia prorupit, & tantum excitavit foetorem, ut unus ex adstantibus mox in animi deliquium inciderit, & æruginosa vomuerit.

Ulteriori sectione reperiebatur materies saniosa, foetidissima in cavo uteri.

Uteri autem substantia erat tenuis, membranacea, lamellæ internæ erant omnes exulceratæ, sphacelo corruptæ.

Os uteri fuit penitus induratum, concretum, ea autem ex parte, qua cavum spectabat, corrosum.

In vagina deprehensæ sunt variæ excrescentiæ fungosæ, & innumeræ cicatrices.

In altero cadavere inventus est uterus inflatus, elasticus, mole autem multo minor, quam in cadavere priori, ceteroquin in ejus cavo fuit similis mate-

ries saniosa, & copiosissimus aër, valde foetens.

Cavum uteri erat quoque penitus exulceratum, corrosum, foeda quoque ulcera in vagina reperta sunt.

Os uteri hoc in cadavere non erat concretum, verum obstruebatur sanguine grumoso, polyposo; præterea a sanie erat valde exesum.

Vagina tota, & vulvæ labia erant undequaque corrupta, exulcerata.

In ambabus his feminis morbus a lue venerea originem duxit.



Fluor albus.

MULTÆ feminæ ad nosocomium venerunt, quæ faciem habebant pallidam, & corpus totum fuit inflatum tumore albicante.

Difficulter simul respirarunt, a minimo motu senserunt cordis palpitationes, appetitus erat penitus deletus, & ingesta pondus & præcordiorum anxietates, ac nauseas & vomitus excitarunt.

Pulsus fuit parvus, inæqualis, celer.

Urina prodiit tenuis, subviridis, cruda, flocculenta, & crassam nubeculam,

aut mucosum sedimentum ad fundum deposuit ; alvus autem erat tarda , dura , referens scybala.

Quibusdam ex his continuo exstillavit ex uteri vagina humor lentus , tenax , albicans , inodorus , nequaquam vero acer.

Quædam vero talem humorem tantum eo tempore adverterunt , ubi sanguis menstruus debuisset prodire.

Fluxus tunc sat copiosus per quinque , sex , septem , octo , novem dies , & quandoque diutius duravit , postea vero iterum desit.

Sanguis autem nullus prodiit ; aut striæ tantum sanguineæ muco mixtæ comparuerunt.

His in casibus erat lentum & mucosum incidendum & evacuandum ; quapropter exhibui conservam N. 29. aut si hæc sufficienter alvum vel urinam non movit , dedi conservam N. 53.

In usu similium medicamentorum proportionem symptomatum & virium aliquamdiu perseveravi.

Verum quamprimum vidi tumorem esse minorem , molliorem , jussi ut mane & vesperi totum corpus pannis laneis , fumo succini imprægnatis , probe fricaretur.

Intra breve tempus magnam tunc in melius mutationem adverti; etenim pulsus fuit liberior, rediit appetitus, & tumor est multum imminutus.

Morbo jam eousque mutato, exhibui vinum N. 58., & suasi, ægræ corpus leni ambulatione frequenter exercerent.

Hac methodo multas ægras spatio sex, septemve septimanarum restitui; & fluor albus penitus cessavit, & tempore menstruo sanguis sanus prodiit.

Aliæ feminæ habuerunt fluorem album, absque eo, quod reliquo corpore tumuerint.

Facies tamen semper fuit pallida; cæteroquin autem nil conquerebantur.

His exhibui misturam N. 73.

Sub initium fluor inde augebatur, & major materie albæ, glutinosæ copia effluxit. Posthac vero materies longe tenuior, & parcior prodiit, & sola hac mistura aliquamdiu continuata fluor quandoque penitus sistebatur.

Quandoque autem integre sisti hac mistura non potuit, licet multum fuerit imminutus, tunc autem pulvis N. 63. aliquoties alterno die datus, morbo finem imposuit.

Quædam fluore albo laborantes cor-

pore erant extenuatæ , & tussicula sicca simul vexabantur.

Decocta emollientia , replentia , & mistura N. 73. his optime conduxerunt.

Hac ratione & pectori consulebatur , & illud quod in vasis uterinis stagnavit , solutum est , & benigno fluore evacuatum ; neque inde vires debilitatæ sunt.

Contigit tunc sæpe , ut tussi sputa glutinosa cum magno levamine prodierint , & fluxus albus sensim integre desierit (suppono autem hic semper fluxum album simplicem , mitem , nulla acrimonia venerea &c. mistum.)

Etenim quæ fluore venereo affectæ erant , & simul in pulmone labem habuerunt , eæ semper valde difficulter curatæ sunt , aut sensim tabe obierunt.

Si vero decoctis emollientibus pectus humectatum fuit , & glutinosum , quod in pulmonibus hæsit , sputis ita eductum , ut respiratio fuerit libera ; & si tunc fluor albus sine ulla erosione adhuc continuavit , poterat & his aliquoties exhiberi pulvis N. 63.

Si autem ægræ hoc pulvere N. 63. debilitatæ sunt , & si fluxus non siluit , tunc optato cum successu datum est vinum N. 58.

Solo hoc vino reliquæ floris albi

penitus sublatae sunt, & ægris rediit robur, color, & integra sanitas.

Si fluor albus (quamvis benignus) sibi nimis diu relinquatur, aut negligatur, tunc tota sanguinis massa destruitur, & materies ex utero effluens incipit foetere, & partes vicinas arrodere.

Circa vespertas opprimitur pectus, fauces fiunt siccae, vox rauca, sitis magna, pulsus celer; unde noctes admodum inquietae.

Decoctum radicis althææ, scorzone-
ræ, bardanæ, lapathi acuti, quod sero lactis fiebat, magna copia haustum his in circumstantiis plurimum iuvit.

Aquæ felteranæ, quibus addebatur tertia pars lactis asinini, vel caprini, quoque admodum proficuae fuerunt.

Diæta probe nutriens, demulcens, humectans simul requirebatur.

Oryza lacti incocta, cremor avenæ, hordei mundati &c. saturatum panis decoctum hic erant optima.

Externe autem ulterior partium corrosio facillime evitabatur, dum sæpius per diem materies acris & in plicis stagnans anatica parte lactis recentis & aquæ rosarum abluta fuit, & dum plagæ arrosæ, excoriatae, aut exulceratae post ablu-
tionem unguento N. 48. inunctae sunt.

Si his aut similibus remediis secundum artem & rationem exhibitis mala hæc symptomata non cesserunt, tunc omnia sensim in pejus ivere, & febre lenta tales ægræ consumptæ sunt.

Feminas habui, quibus verum pus ex utero effluxit, & aderant signa abscessuum in utero latentium.

Febrem si magnam & continuam simul habuerunt, tunc eam decoctis emollientibus & emulsis refrigerantibus antea diminuere, & mitigare tentavi.

Dein exhibui pilulas N. 62. & qualibet vice desuper hauriendas dedi uncias sex infusi agrimonix; pro potu ordinario datum est serum lactis, vel lac tripla aquæ copia dilutum.

Hac ratione fere omnes restitutæ sunt.

Binæ tantum cœperunt tumere, & tabe obierunt.

In omni fluxu uterino observavi, mala semper sequi symptomata, si remediis roborantibus & adstringentibus fluxus retineatur, antequam materies effluens fuisset satis attenuata, & uteri vasa a mucosis & crassis libera.

Hæc si remediis sufficienter præstari non potuerunt, balnea in usum vocabantur, quæ emolliunt, solvunt, dis-

cutiunt ; balnea Badensia , & Rodaunensia quandoque mira præstant.

Feminæ , si non integre curentur a fluore albo , antequam nubant , admodum proclives sunt ad abortiendum.

Etenim secundo tertiove graviditatis mense sentiunt materiem ex utero prodire , quæ loturæ carnis similis est ; paulo post prodit sanguis crassior , dein excernuntur grumi , tandem post multos dolores & tenesmos sequitur abortus.

Si tunc acre , in uteri vasis stagnans , aptis medicamentis aut balneis non tollitur , & si femina iterum concipit , manet eadem abortiendi dispositio.

Motus violentior , ira , & nimia corporis agitatio plerumque causæ sunt , abortum excitantes.

Potest tamen foetus & in similibus casibus quandoque ad maturitatem deduci ; si omnes causæ irritantes , quantum possibile est , evitentur , si alvus servetur libera , quod commode fieri potest , si omni vespera ex pulvere N. 64. drachma dimidia vel integra in leni emulso assumatur.

Et si nimia uteri irritatio advertitur , si oriuntur spasmi , aut tenesmi , tunc ilico paregoricis , opiatis , & quandoque leniter adstringentibus succurrendum est.

Tales autem feminæ pariunt plerumque infantes crassos, pingues, robustos, & hi tales manent per plures menses, postea vero emaciantur, lassi fiunt, & membra pendula gerunt, tandem subsequitur pessima rachitis, quæ raro hucusque sanari potuit.



Morbus venereus.

INFELICES proles, quæ a parente vel parentibus hoc malo affectis generantur.

Et licet malum hoc remediis sublatum subinde videatur, aliquid tamen semper in sanguine, aut liquido, quod sanguine longe subtilius est, remanet, quod transfertur in filios, & nepotes, vel in seram quandoque posteritatem.

Hinc posterius habent, quod avoram, protavorumve &c. delicta quandoque luant.

Morbus autem venereus duplex est; unus, qui oritur a nimium frequenti actu & seminis deperditione, alter vero, qui ab acri contagioso originem habet.

Ambo si jungantur, tunc morbus fit fere lethalis.

Mala , a nimio coitu aut alia nimium frequenti seminis dejectione orta , innumera fere sunt.

Phthisis aut consumptio inde frequenter manat.

Sub initium hi ægri circa os sterni sentiunt tensiones , & continuum ardorem ; pectus præterea siccum est , & subnascitur sicca tussitatio , oculi fiunt concavi , album oculorum flavum , aut subfuscum apparet , ventriculus & hypochondria tenduntur , inflantur , oriuntur ructus , flatus , & spasmi , & tandem naturæ stimulus incipit languere.

Hoc in statu quidam seipfos carpunt , & delictorum memores vitam nimis severam subito ambiunt , fugiunt omne consortium humanum , sunt tristes , fiunt hypochondriaci , melancholici , tandem adeo religiosi , ut nec sibi nec proximo utiles sint.

Quidam vero , libidine nimium absorpti , utuntur cibo , potu , & remediis excitantibus , quibus quidem subinde natura ad operandum erigitur , verum vires adeo debilitantur , ut ægri in phthisin , aut tabem dorsalem , aut in sudorem colliquantem incidant , & pe-

Sæpiissime ab his pessima haimoptoë
producitur.

Caro depascitur , capilli defluunt ,
membrum virile penitus evanescit.

Subinde vero post nimios coitus ori-
tur continuus fluxus humoris albicantis
per urethram , qui quidem nullum exci-
tat dolorem , verum visum hebetat ,
producit vertigines , memoriam inanem
reddit , inducit membrorum tremorem ,
& genuum titubationem , & omnes
tandem vires consumit , atque ipsa ossa
incipiunt dolore excruciaci , nec adtac-
tum patiuntur ; curatio tunc est admo-
dum difficilis , lenta , anceps.

In principio juvat abstinentia & diæta
humectans , ac probe nutriens.

Hinc jusculis meracis , sed facillimæ
digestionis , corpus replendum est.
Oryza jusculis vel lacti incocta , cremor
avenæ , hordei mundi &c. lac recens
summam hisin casibus utilitatem habent.

Verum in exhibendo id est observan-
dum , quod hæc frequenter , & parca
semper dosi debeant præberi , ne ventri-
culus obruatur , & concoctionis vires
adeo occupentur , ut subigendo non
sufficiant.

Si hæc (ut quandoque in malo mul-
tum progresso contingit) adhuc nimis

fortia sint , & ventriculus talia non ferat citra magnas anxietates, tunc lac nutricis in usum debet vocari; quo sæpe solo per plures septimanas assumpto a pessima tabe tales ægri restituuntur.

Subinde quidem ventriculus ingesta citra modestiam recipit, ea concoquit; & vasa chylo denuo replentur, verum vires tunc deficiunt, quæ hunc in circulum agerent, & in bonum sanguinem converterent.

Hinc debilitatis fibræ stimulus, & robur addendum est.

Vinum medicatum N. 58. hoc in statu mira præstat, nec relinqui debet ilico, dum id ægri in principio iterum evomunt.

Quamprimum æger tantas habuit vires, ut se sustinere, & paulisper deambulare potuerit, tunc juvit multum, si in aërem rusticanum, purum, montanum sese contulit.

Hoc modo citissime tales ægri reficiebantur, verum in regimine victus, & naturæ adtendendum erat summopere, ne error committeretur.

Tabes dorsales, pessimas & diuturnas leucorrhæas, atque consumptiones, nocturno sudore admodum pertinaces ac

periculosas, hac methodo sæpius feliciter debellavi.

Si vero vires jam adeo erant exhaustæ, ut ventriculus & intestina nec levissima juscula, nec lac maternum potuerint retinere, & pro parte saltem subigere, tunc nil omnino a remediis sperandum fuit, pauci humores, qui adhuc in corpore erant, corrupti sunt, in cute diversæ pustulæ, & maculæ comparuerunt, aderat continua febricula, & sudor foetidus pruritum per totam corporis superficiem excitavit, urina pauca, foetida, ardens prodiit, & in superficie crustam salinam, multis coloribus variegatam, gessit, alvus erat frequens, liquida, cruda; etenim quæ ore ingerebantur, mox ano iterum prodierunt; hoc modo tales miseri inter summas anxietates extenuati interierunt.

Si jam in maxima hac virium prostratione acre venereum, contagiosum, junctum sit, annon pejora adhuc erunt symptomata? annon mors celerior?

A materia autem acri, venerea, contagiosa, varia mala variis in locis generantur.

Gonorrhæa sæpissime observatur, eaque subinde admodum maligna.

Pauca puris copia si exstillat, & si
urina

urina absque magno ardore profluit, tunc cura plerumque facilis est, & brevis.

Unico dato purgante, & solo decocto radicis bardanæ aliquandiu largiter potato, tale malum fere semper sublatum fuit.

Quandoque autem magna copia puris subviridis, & corrupti prodit, membrum incurvatum acute dolet, & urina fit stranguriosa, pulsus celer, durus, & sitis magna.

Hinc venæ sectione opus est, remediis diluentibus, ac refrigerantibus, ut vis febris, & inflammationis progressus inhibeatur.

Mitigata tunc febre datæ sunt pilulæ N. 65. & copiosum decoctum radicum graminis, althææ, bardanæ &c.

Pilulæ si alvum nimis copiosam eduxerunt, tunc earum usus per unum alterumve diem interruptus est; decoctum vero continuabatur.

Postquam usu harum pilularum fluxus virulentus multum erat emendatus, tunc nullum fere purgans deinceps requirebatur; verum solis decoctis leniter diureticis reliquum malum integre cessit.

Quandoque autem remedia purgantia

Storck Ann. II. Tom. I. K

nequaquam levamen adtulerunt , & ægri sunt debilitati ; unde his in casibus præter copiosissima decocta dedi misturam N. 66.

His sæpissime gonorrhæa virulenta cito curata fuit.

Subinde tamen fluxus nequaquam poterat supprimi , licet omnis urinæ ardor cessaverit , & materies benigna & tenuis comparuerit.

Accidit tunc aliquoties , ut post gonorrhæam virulentam benigna ob nimiam partium laxitatem supervenerit.

Et hanc vinum N. 58. sanavit.

Quandoque vero in urethra manserunt , ulcera admodum rebellia , quæ copiosum & lentescens serum continuo fundebant.

Essentiæ , tincturæ , & remedia balsamica ac adstringentia hic raro profuerunt , his enim alvus sæpe retinebatur , & novus iterum in mingendo ardor excitatus est.

Remedium vero N. 67. & decoctum radicis bardanæ omne acre , in massa sanguinea latitans , emendarunt , aut quacunque data via expulerunt , atque consolidarunt ulceran.

Injectiones adstringentes , consolidantes , & præsertim saturninæ summa

cum cautela evitanda sunt, hæ enim pessima symptomata producant.

Etenim testiculi inde sæpius intument, fiunt scirrhusi; oriuntur bubones inguinales.

Vidi a gonorrhæa, hac ratione suppressa, exulceratum esse umbilicum, & eandem ibi prodiisse materiem, quæ antea per urethram exstillavit.

Si contagiosum venereum in sanguinem reprimatur, & miscetur, tunc lues pessima generatur.

Quandoque vero hoc acre venereum mox ex massa sanguinea iterum separatur, & in quamdam corporis plagam deponitur.

Oriuntur tunc dolores acuti, qui tempore vespertino in lecti præsertim tempore magis exacerbantur, & postquam ægros per plures horas acerrime divexarunt, fiunt mitiores, & sequitur somnus, qui raro reficit, hinc tales ægri incipiunt emaciari.

Post aliquod tempus partes dolentes tument, rubent profunde, & sensim in ulcera maligna, fœda mutantur.

Sæpe hæc materies articulos occupat, & nascitur arthritis venerea.

Scrophulas venereas, anginas, oph-

thalmias, ozænas admodum frequenter in nosocomio habuimus.

Leviores casus solo decocto hordei crudi, vel rad. lapath. acut. scorzoner. bardanæ, althææ, consolidæ majoris &c. & datis quandoque purgantibus, pauco mercurio dulci mistis, curabantur.

Si purgantia ægros debilitarunt, tunc præter decocta dabatur mistura N. 66. quæ egregios effectus præstitit.

Supra bubones, ut resolverentur, positum est emplastrum de ranis cum mercurio; vel ut in suppurationem abirent, varia cataplasmata applicata sunt.

Si vero lenioribus nec resolvi, nec in abscessum mutari potuerunt, tunc remedium N. 67. adhibitum est, cujus usu citra notabilem evacuationem sensim evanuerunt.

Hoc idem remedium N. 67. fere omnibus in casibus venereis præstantissimum fuit, multa autem decocta simul debent hauriri.

Fuerunt in nosocomio plures ægri, quorum malum & horrendum & triste erat visu, omnes enim articuli, omnia extremitatum & capitis ossa erant pessime exulcerata, in ipsis partibus mollioribus ulcera latuerunt putrida,

profunda, & membrana pinguedinosa corrupta, inque frusta corrosa sponte excidit.

Fœtor vel eminus erat intolerabilis.

Nihilominus decoctis lignorum, quibus tertia pars lactis recentis addebatur, & remedio N. 67. omnes hi ægri sanati sunt; unica aderat femina, in qua nihil efficere potuimus; hæc vero pessimo hydrope simul laboravit, & jam prostratis omnibus viribus ad nosocomium translata est.

Ulceræ bis quotidie decocto saturato lignorum, cujus libris quatuor unciaæ sex ex remedio N. 67. addebantur, abluta, & linteis carptis, eodem decocto madidis, repleta sunt.

Plures ex his ægris antea jam salivationem subierunt, nil vero inde levaminis habuere, imo vires debilitatæ, & humores corrupti sunt.

Hinc patet, quanta sit efficacia remedii N. 67.

Sunt tamen ægri, qui hoc minus ferunt. Etenim qui pectus siccum habent, qui tussi vexantur, quorum systema nervorum admodum mobile est, qui hæmorrhagiis subjecti sunt, &c. his citra detrimentum hoc præberi non potest, licet multa decocta desuper bibantur.

Et sunt quandoque mala venerea , quæ huic remedio per plures menses adhibito non cedunt , aliis vero præparatis mercurialibus facilius curantur.

Sic plures ad nostrum nosocomium venerunt , qui jam in aliis locis decumbentes hoc remedio per plures menses absque ulla mutatione usi sunt ; credidi tunc in exhibendo fors errorem fuisse commissum , aut diætam minus laudabilem ægros observasse , hinc magna cum cura & debitis cum cautelis idem iterum præbere cœpi , & expertus sum , me quoque hoc remedio actum agere.

Tentavi dein misturam N. 66. & haud raro celerem & bonum effectum vidi.

Aliis neque hæc mistura profuit , verum saturatum decoctum radicis bardanæ , in cujus libris quatuor duo grana mercurii præcipitati rubri soluti sunt , optime juvit.

Hac methodo pertinacissimos venereos furunculos , qui aliis remediis nequaquam cesserunt , aliquoties curavi , externe solum emplastrum diachyl. cum gummi adpositum est.

Hoc decocto multi a scabie venerea restituti , & liberati sunt.

Ophthalmiæ venereæ, quæ sæpe nec salivatione, nec usu fortissimi sublimati corrosivi potuerunt emendari, solis pulveribus N. 68. curatæ sunt.

Verum in omnibus casibus decoctis semper copiose utendum est.

Sæpe plurima mercurii præparata sensim in eodem ægro tentavi, & tamen nullum reperi, quod malo sufficienter restitisset.

Et tunc meraca lignorum decocta quandoque juverunt.

Dum ægri erant macilenti, tunc his decoctis magna lactis recentis quantitas debuit addi.

Decoctum radicis sarsaparillæ aliis quandoque longe efficacius deprehensum est.

Femina bubonibus venereis affecta, sese balneatori committit, qui applicato unguento tumores intra biduum dispulit.

Verum ab eo momento ortus est ingens dolor in infimo ventre, qui versus vesperras magna cum febre, & prægressa horripilatione quotidie exacerbatus fuit, nox inde fuit anxia.

Paroxysmus semper copioso sudore finiebatur.

Tempore matutino fere omnis dolor abfuit, & pulsus erat naturalis; post

meridiem autem statim hora dolor iterum increvit, orta est febris cum horripilatione, &c.

Tali in statu hæc ægra ad nosocomium translata est.

Solam febrem intermittentem tunc conquerebatur, & prægressam morbi historiam, rogata licet, reticuit.

Hinc remedia febrifuga adhibui; verum hæc nihil effecerunt; ipse cortex peruvianus, ad unciam unam & dimidiam tempore intercalari exhibitus, nullam mutationem adtulit.

Demum cum ægra vidit se variis medicamentis sine levamine vexari, sponte morbi originem fassa est.

Dedi tunc copiosum, & meracum decoctum radicis bardanæ, & misturam N. 66. unde secundo die jam febris & dolor erant mitiores.

Hinc iisdem remediis per binas septimanas continuavi; verum major in melius mutatio observata non est.

Quare tentavi remedium N. 67. hoc autem in sterno ingentem ardorem, pectoris siccitatem, sitim, & capitis dolores excitavit, unde illud removi.

Purgantia mercurialia præter copiosa decocta emollientia, diluentia nequaquam profuerunt, & vires imminutæ sunt.

Atque ideo præcipi decoctum meracissimum radicis sarsaparillæ, quo id effectum est, ut quarto die per urinam multa materies subfusca, tenax prodierit; quinto autem die erat urina tenuis; verum per uteri vaginam acris, crassa, & fœtens, subfusca materies exstilla-
vit.

Dolores & febris tunc multum remiserunt.

Post binas septimanas nil amplius ex utero prodiit, febris & dolores penitus siluerunt, vires sunt quotidie auctæ, & ægra tandem optimam sanitatem recuperavit.

Nihilominus tamen suasi, ut decocto minus meraco per aliquot septimanas adhuc uteretur, ne quid in sanguine latitans novas denuo tragoedias foveret.

Vir 34. annor. ante quatuor annos trophum venereum in brachio sinistro habuit; usu emplastri ulcus inde sordidum excitavit.

Omnis generis remedia mercurialia tentata, nil mutarunt, decoctum autem meracum radicis sarsaparillæ copiose haustum, & externe supra ulcus appositum multa ossis fragmenta separavit, & intra binos menses ulcus rebelle penitus sanavit.

Ulcus venereum inveteratum in osse sterni hac ratione quoque curatum est.

Idem decoctum in arthritide venerea sæpissime profuit.

*Vermes.*

REMEDIUM N. 55. quod in primo anno medico contra omnis generis vermes laudavi, hoc quoque anno multis ægris non tantum a me, verum & a doctissimo Medico COLLIN datum fuit optimo cum successu & integra curatione.

Unica femina, viginti quinque annorum, licet hoc remedio usa fuerit, & innumeri lumbrici sursum deorsumque fuerint expulsi, nihilominus tabe obiit, nec signa evanuerunt, quæ vermes in intestinis latitantes indicarunt.

Verum sectione anatomica invenimus intestina variis in partibus penitus arrofa, inflammata, corrupta, & microscopio infinita oblonga insecta visa sunt.

Intra ipsam substantiam intestini jejuni (intra membranas nimirum) latuerunt tres lumbrici, quorum quilibet longitudine quatuor pollices superavit.

Excidi hanc intestini partem, infla-

vi, & hac ratione vermes intra membranas optime distinguebantur; dum vero in libero aëre reliqui, ut bene exsiccaretur, innumeri vermiculi nati sunt, & totum præparatum mox corruptum in furfures concidit.

Circa scabiem, arthritidem, erysipelas, asthma, scorbutum, diarrhæam, &c. hoc anno idem observavi, quod in anno primo retuli; hinc non credidi necesse esse ut ea hic repeterentur.



SECTIONES ANATOMICÆ.

CADAVER PRIMUM.

FEMINA, 24. ann., triennio abhinc valida febre continua, dolore in hypochondrio dextro acutissime pungente, & magna siti afficiebatur.

Venæ sectionibus, remediis antiphlogisticis, & cataplasmatibus emollientissimis febris undecimo die siluit, & dolor acute punctorius in obtusum & gravantem mutatus est.

Nihilominus increvit appetitus, augebantur vires, & malum in hypochondrio latitans videbatur adeo leve,

ut ægra id flocci fecerit, & se denuo ad priores suos labores contulerit.

Post binos circiter menses respiratio fiebat solito difficilior, & oriebatur tussis sicca, admodum molesta.

Ufu diuturno variorum remediorum, tandem sputum glutinosum, tenax, largum prodiit.

Verum respiratio inde nequaquam emendata est.

Imo ortæ sunt magnæ pectoris anxietates, noctes fuerunt minus tranquillæ, & ægra sine molesta tussi ac summa pectoris angustia lateri sinistro incumbere non potuit.

Dolor in hypochondrio dextro circa æris & tempestatis mutationes erat paulo acerbior; reliquis autem temporibus valde mitis & vix perceptibilis.

Per duos & dimidium annos ægra, variis afflicta miseriis, vitam languidam duxit, ita tamen, ut assumptis multis & optimis remediis quandoque binis ternisve septimanis belle se habuerit.

Dein vero per plures iterum dies difficilius respiravit, & molestiori tussi exagitata est, & fuit admodum debilis.

Tandem coepit emaciari, & circa vesperras exsiccatae sunt fauces, pectus

fiebat anxium, tussis frequens, sitis magna, & prægressa horripilatione, supervenit febris ingens; unde mox reddebatur inquieta, infomnis.

Hæc symptomata quotidie pejora videbantur; omnia remedia erant frustra; ægra citra suffocationis metum nec dextro nec sinistro lateri potuit incumbere.

Sudor nocturnus, acer, pruritum molestissimum excitavit, & vires magis prostravit.

Demum hypochondrium dextrum valde tensum prominuit, & ex minimo adtactu vehemens oriebatur dolor.

Dein bilis per universum corpus diffusa est; & ægra foedo colore, ex flavo nigrescente, tingebatur.

Paulo post supervenit pessima dysenteria; unde mox respiratio fuit sublimis, sitis non delenda, tussis brevis, frequentissima; venter intumuit, & vera observabantur mortis præsagia.

Hoc in statu moribunda ad nostrum nosocomium devenit, & prima statim nocte interiit.

Pulmo sinister inveniebatur totus scirrhosus, in unam molem concretus.

Dum is scalpello secabatur, exhibuit cavum, quod undique erat arrosus, &

ichoris foetidissimi libram unam & uncias tres continuit.

Cor erat adeo parvum, ut ovum galinaceum magnitudine vix adæquaret.

Hepatis lobi omnes quoque in unum scirrhum coaluerunt, in cujus medio ulcus cavum, omnia depascens, & quibusdam in locis ad extimam hepatis membranam penetrans, detegebatur.

Hoc in cavo liquor niger, foetidus, acer latuit.

Vesicula fellea paucam quidem, sed profunde tinctam & gelatinosam bilem gerebat.

Cætera viscera videbantur sana.

CADAVER SECUNDUM.

VIR, 46. annor., præter causam sibi cognitam subito horrore corripitur, fit anxius, & linguatur animo.

Dum iterum ad se redit, sentit acutissimum, ardentemque dolorem in medio thoracis sinistri, cor palpitatur vehementer, facies livet, sitis oritur ingens.

Mox repetitis vicibus secatur vena, dantur remedia copiosissima diluentia, antiphlogistica, externe locus dolens continuo fovetur.

Nihilominus symptomata manent æque vehementia, nec dolor remittit, nec sitis; observantur anxietates & crebræ leipothymix, æger nec decumbere potest, nec præ dolore dormire, verum cogitur erecto trunco sedere; respiratio est densa, sublimis.

Quarto die oriuntur frequentes horripilationes, cutis, alias sicca, madescit, & dolor in thorace sinistro paulisper remittit, manet tamen ardor magnus, continuus.

Æger ea nocte supinus per plures horas dormivit, & mane videbantur omnia mitiora.

Verum circa vesperras novæ & validæ horripilationes ægrum pervadunt, augetur sitis, calor, anxietas, cor quandoque tremit, quandoque inordinata & valida palpitatione agitur, circa mediam noctem sequitur viscidus, foetidus & copiosus sudor, symptomata tunc remittunt, & æger incipit somno occupari.

Post somnum erat iterum alacrior, & præter anxietates & ardorem in pectore sinistro conquerebatur nihil.

Lateri sinistro nequaquam potuit incumbere, in dextro fuit admodum anxius, supinus situs erat omnium facil-

limus, licet & hic fuerit molestus.

Circa vespervas exacerbantur iterum omnia symptomata, prægresso ingenti horrore, & sudor copiosus, nocturnus iterum defatigat ægrum.

Remedia quæcunque adhibita nil profunt; & mala symptomata omni vespertino tempore redeunt, augentur.

Demum vires labuntur, carnes evanescent, & morbus fit in dies periculosior.

Hinc æger fertur ad nostrum nosocomium.

Symptomatibus rite combinatis & tota mali historia partim ex ipso ægro, partim ex ejus adstantibus collecta, facile conclusi, in thorace circa vitalia hæerere abscessum.

Pulsus tunc omni momento mutabatur; mox enim erat tremulus, mollissimus, exiguus, mox fortis, plenus, inæqualis, dicrotus, remittens, nunquam vero perfecte intermisit.

Cordis motus admodum inæqualis & inordinatus tactu percipiebatur.

Arteriæ carotides adeo vehementer pulsitarunt, ut collum totum continuo tremuerit.

Magnam circa hunc morbum curam adhibui, & varia tentavi remedia, quæ

partim emollirent, partim sanguinem a corruptione conservarent, atque pus latens per urinæ vias sensim exterminarent.

Verum plurima ægro erant magis molesta quam utilia.

Infusum N. 70. omnium optime conduxit.

Etenim ejus ope coepit sputum purulentum prodire, urina crassa, posuit sedimentum puriforme, copiosum; & respiratio videbatur paulisper emendari, & pulsus fieri æqualior.

Ast vires auctæ non sunt, & vespertinæ exacerbationes fiebant sensim validiores, & sudor largior.

Postquam per septem circiter dies quædam symptomata meliora esse putavimus, mox derepente omnia iterum in pessimum statum devenerunt.

Pulsus tangebatur minimus, & sæpe penitus evanuit; respiratio erat anxiosa, laboriosissima; sputum retinebatur, urina prodiit limpida, tenuis; intumuit scrotum, & omnia extrema; tandem æger mox friget, mox calet; & sub finem totus lividus suffocatione interimitur.

Aperto thorace reperiiebantur pulmones nigri, tenues, penitus compressi,

Pericardium vero magnitudine caput humanum fere superavit, & tactu fluctuatio in eo percepta est.

Unde discissum fudit puris boni libras sex.

Interna pericardii lamella ab exteriori secessit, & saccum ingentem efformavit, qui ruptus pus in cavum pericardii dimisit.

Cor & cætera viscera fuerunt sana.

Venæ duræ-matris autem varicosæ, sanguine grumoso distentæ.

CADAVER TERTIUM.

HOMO, 25. annor., debilissimus, anxius, totus macilentus, fertur ad nosocomium.

Facies erat livida, & pulsus parvus, inæqualis, & plerumque antequam arteria sese contraxit, duo, tres, quatuorve dilatationis ictus observati sunt.

Ex iis, qui hunc ægrum ad nosocomium comitabantur, sequentem morbi historiam adnotavi.

Hicce homo erat alias semper sanus, verum biennio abhinc validas cordis palpitationes conquerebatur, ita quidem, ut sine animi deliquio corpus

fortiori motu exercere non potuerit.

Unica larga venæ sectio tunc omne malum sustulit, & per integros novem menses sanitas erat optima, nec ullus motus nocuit.

Postea autem cordis palpitatio iterum subito ægrumprehendit.

Venæ sectio tunc quidem malum reddidit mitius; minimus autem corporis motus illud iterum resuscitavit.

Imo accesserunt pectoris anxietates, frequentes leipothymia, & extrema plerumque frigida fuerunt.

Tentata plurima & optima remedia, celebratae plures venæ sectiones malum quidem per aliquod tempus inhibuere, verum tollere id non poterant, & ægrum semper debilitarunt.

Intra paucos menses morbus adeo altas egit radices, ut æger jam continuo debuerit lecto inhærere.

Etenim levissimus motus summas excitavit anxietates, & per totum corpus induxit lethale frigus.

Symptomata uno subinde die erant mitiora, altero autem adeo iterum valida, ut æger nec manus, nec pedes citra summas cordis palpitationes movere potuerit; & mors omni momento erat præ foribus.

His in miseriis cum æger non amplius haberet, quo se aleret, ferebatur ad nosocomium.

Quoniam ex narratione tunc percepi, quod æger jam per plures dies nullum omnino somnum habuerit, dedi eadem vespera duo grana opii, ut hac ratione quies conciliaretur, campescerentur spasmi, animus redderetur hilarior, & reficeretur corpus.

Successus voto respondit: etenim nox fuit quieta, somnus bonus, & postero mane æger lætissimus infinitas pro tam egregio medicamento gratias egit.

Per diem tunc dedi remedium N. 71. & serum lactis pro potu ordinario, pro cibo autem juscula vitulina, & tenues panatellas.

His malum longe mitius redditum est, & æger non tantum in lecto se potuit movere, sed & extra lectum subinde ambulare.

Nec ulla amplius animi deliquia supervenerunt.

Cor valida palpitatione non amplius agitatatum fuit, ejus tamen motus erat admodum inordinatus, tremulus, & pulsus inæqualis, parvus, atque frequenter observatum est, arteriam iterato ictu dilatari, antequam iterum contraheretur.

Per septem circiter menses æger sat commode vixit, appetiit, & vires augebantur.

Dein vero omnia momento citius præter causam manifestam in pejus ruerunt, secutum est animi deliquium, evanuit pulsus, accessit lethale frigus, facies livuit, tumuit, & spatio trium horarum vita finiebatur.

Partes carnosæ, & omnia viscera erant pallida, flaccida.

Pericardium multo sero limpido, inodoro, insipido repletum.

Cor inveniebatur difforme: nam sinister ejus ventriculus magnitudine fere duos pugnos viriles adæquavit, & ejus substantia in tenuem fibrosum saccum extensa fuit; in ejus cavo latuerunt multi polypi; tres ex his erant magni, albi, rotundi, nuces juglandes magnitudine superantes; unus, duos pedes longus & parvum digitum crassus, serpentis instar circumvolvebatur circa musculosa hujus ventriculi lacerta; alius polypus tres pollices longus, & unum cum dimidio crassus in arteriam aortam penetravit, & obstruendo totum cavum, sanguini ex corde exitum interclusit.

Dexter cordis ventriculus erat plenus

grumoso sanguine, & vasa pulmonum ac cerebri simili quoque sanguine turgabant.

CADAVER QUARTUM.

FEMINA, 30. annorum, jam a longo tempore solito difficilius respiravit, & tussitatione inani ac frequenti est vexata.

Variis intervallis cœpit angi, facie livere, & tunc inhibita respiratione fere suffocabatur.

Morbus pro malo hysterico tunc habitus est.

Unde & remedia antihysterica varii generis fuerunt tentata, & usu longo adhibita.

Verum hæc morbum plerumque exacerbant, & juverunt nihil.

Venæ sectio in summis anxietatibus quandoque levamen adtulit.

Respiratio quotidie fiebat pejor, facies tumuit, livuit, oculi lachrymantes protuberarunt, & ægra nec decumbere, nec ambulare potuit, sensim manus & pedes inflati sunt.

His in miseriis ad nosocomium devenit.

Pulsus inveni inæqualem, parvum,

respiratio erat sublimis , brevis , & expirando conquerebatur ægra pulmonem quasi in pectore natare , & vi versus superiora trahi : vox erat minima , anxiosa.

Remediis paregoricis huic ægræ tunc magnum levamen adtuli , respiratio enim reddebatur facilior , pulsus liberior , sequebatur somnus , interruptus quidem ob insomnia , & anxietates , quæ sæpe & subito oriebantur , attamen reficiens.

Altero mane ægra liberius loquebatur , & sputa glutinosa , crassa rejecit , nec adeo anxiosa fuit.

Sputum igitur remediis incidentibus , & mellitis promovere conatus sum , & præterea omni quinta, sextave hora dedi grana quatuor massæ pilularum de cynoglossio , ne novi iterum spasmi malum denuo exacerbarent , & sputum retinerent.

Similibus remediis effectum est , ut vox fuerit multo melior , respiratio plenior , pulsus sat æqualis , fortis , sputum largum , & extremorum tumor longe minor , mollior.

Demum ægra extra lectum iterum potuit ambulare.

Verum minima aëris mutatio mox om-

nia symptomata iterum pejora reddidit ; & hæc ægra erat verum vivum barometrum.

Malum licet multum levatum ægræ & mihi videretur , pulmonis tamen conditio non potuit mutari.

Etenim ægra semper conquerebatur pulmonem in pectore natare, & repetitis vicibus vi versus fauces elevari.

Noctu ægra subinde potuit supina dormire ; verum subita & anxiosa suffocatione sæpius expergefacta est.

Quandoque pulsum durum & plenum reperi , & tunc anxietates erant multo majores , & respiratio brevior.

Venæ sectio hoc in statu debebat institui , & semper morbum mitigavit.

Verum sensim malum iterum in pejus ivit , suppressum est sputum , & remedia expectorantia , & paregorica , quæ hucusque optimos præstiterunt effectus , nequaquam profuere.

Infusum tamen N°. 70. sputa iterum mobilia reddidit , & opiatæ vespertinis tranquillæ somnus potuit induci.

Unde ægra iterum multo melius se habuit , præsertim dum aër serenus , & tempestas sicca fuit.

Dum vero , elapsis circiter sex septimanis , subito tempus humidum , nebulosum ,

losum, & frigidum ortum est, ægra de-
nuo pessimis symptomatibus affligebatur;
non tantum extrema, sed & totum reli-
quum corpus œdematoso tumore subito
turguit, vox suppressa est, & pulsus
tantum tremulus, & minimus potuit
summa attentione distingui. Respiratio
erat pessima, suffocans.

Hinc tertio die vis vitæ extincta est.

Aër per totum pulmonem diffusus re-
periebatur, & membrana cellulosa hinc
inde in vesicas, viri pugnum magnitu-
dine æquantes, ab aëre summe elastico
elevabatur, hinc inde tales bulæ cellu-
losæ minores detectæ sunt.

Pulmo in frustra dissectus, & in terram
projectus magna vi, & elasticitate resi-
luit.

In pluribus tabidorum cadaveribus
aërem hac ratione in bullas, & per sub-
stantiam pulmonum diffusum, & e suis
vasis egressum inveni, & quoniam nulla
in pulmone peculiaris cæteroquin vitia
reperiebantur, tota morbi, consumptio-
nis, & mortis causa in hunc aërem ex-
travasatum transferri potuit.

Videtur igitur dari phthisis, seu con-
sumptio aërea.

Ex multiplici observatione sat firmus
fiebam in hoc morbo dignoscendo.

Storck Ann. II. Tom. I. L

Verum licet optime cognoscatur, curari nunquam potest; rationem facile concipit ille, qui respirationis organa, & modum, atque aëris qualitates probe novit.

In eodem hoc cadavere hepar, licet colore, mole, figura, & mollitie sanissimum, casu fortuito per medium lenta manu discindere tentavi, & dum semi-pollicis profunditatem scapello attigi, serum copiosum versus me profiliit.

Hinc sectionem majori adtentione curavi institui ab nostro expertissimo chirurgus HAFFNER.

Et tunc detegebatur in medio hepatis saccus albus, membranaceus, plenus sero limpido, insipido, inodoro.

Huic sero innatabant septem corpuscula rotunda, pellucida, alba.

Tria ex his ovum gallinaceum magnitudine paulisper superarunt, reliquorum vero quodlibet simile erat nuci juglandi.

Hæc corpuscula nec sibi invicem, nec partibus vicinis adhæserunt, sed liberrime fluctuarunt.

Neque inveniebatur quædam cicatrix aut quidam locus, qui ostendisset, ea ullibi antea adhæsisse.

Hæc corpuscula constabant ex membrana , quæ erat simillima ei , qua ovorum testa interius ambiuntur; in hac membrana recludebatur serum inodorum , insipidum , tenue , subflavum.

Mirum ! qua ratione talia generentur.

CADAVER QUINTUM.

FEMINA , 25. annorum , phthysi , hydrope ventris , & uteri deterrimo fluore adeo debilitabatur, ut quarto die, quo in nosocomio fuit , interierit.

Materies , ex utero prodeuns , erat lenta , alba , subinde granulosa , calcaria , admodum copiosa , nequaquam tamen acris , nec foetida.

Sectione anatomica vidimus pulmones adeo exesos ab acri ichore , ut nil nisi membranam crassam , flaccidam, exulceratam referrent.

In abdomine latuit serum copiosissimum , nigrum , foetidum , quod totum omentum in frusta consumpsit , & intestina , atque ventriculum partim arrosit, partim adeo mollia , & flaccida reddidit , ut minima vi in pultem potuerit conteri.

Uterus , & uteri vagina videbantur vere gangrænosa.

Ovarium autem utrumque erat pugno viri majus, tuberosum, durum.

Hæc tubera discissa continebant materiam albam, duram, vere cretaceam.

Etenim erat friabilis, & cum acidis effervuit.

Vesica ea ex parte, qua uterum, & vaginam spectat, erat quoque arrosa, semi-putrida.

CADAVER SEXTUM.

FEMINA, 28. annorum, sana alias, & admodum robusta, eo tempore, quo menses fluebant, præter causam sibi cognitam vomitu violentissimo corripiebatur, & mox fluxus menstruus retentus est, & oriebatur summa pectoris angustia, extrema frigebant, & cor inordinato motu, & palpitatione agitatum fuit.

Applicabatur ilico enema, & larga venæ sectio est instituta, & data sunt medicamenta, quæ vomitum violentum compescerent.

Sub initium hac nihil profuerunt, postea vero sequebatur summa virium prostratio, & ægra cœpit dormire.

Post somnum multo melius se habuit, ad rogata respondit, & oblata commode deglutivit, nec ea vomitu rejecit.

Verum tamen mansit anxietas circa præcordia, & cor valide palpitavit.

Sanguis menstruus non amplius comparuit.

Sensim tamen omnia symptomata fiebant mitiora, & vires redierunt, & ægra extra lectum leni ambulatione potuit corpus movere.

Fortior autem motus ilico induxit extremorum frigus, anxietates, & animi deliquium.

Ad fundum ventriculi percipiebatur continua pulsatio, quæ cordis motui correspondebat.

Ab assumptis plerumque orta est magna anxietas, cordisque palpitatio.

Varia remedia, ab optimis medicis præscripta, nil juverunt.

Altero mense, quo sanguis ex utero iterum prodire debuisset, nil comparuit, licet circa os sacrum & ad inguina ortus sit magnus dolor.

Tunc autem temporis pulsatio in epigastrio erat longe violentior, anxietas major, & tactu poterat percipi infra

ventriculum quidam tumor, renitens, pulsans.

Venæ sectio tunc in brachio celebrata, magnum levamen adtulit, & ægra per tres septimanas iterum extra lectum fuit, ambulavit, & cibos citra magnas supervenientes anxietates assumpsit, tulit.

Postea malum iterum auctum est, tumor pulsans, erat multo major, vires debiles, ægra stando vel ambulando, ingratum, & anxium pondus in epigastrio sensit, quod minus molestum erat, dum ægra erecto, & in anteriora inclinato trunco in lecto sederet.

Nullum jam remedium superesse videbatur, unde ægra ad nosocomium transmissa est.

Inveni hypochondria tensa, & totum epigastrium durum, pulsus erat inæqualis, & alvus non prodiit, nisi enema injiceretur.

Noctes fuerunt plerumque insomnes.

Dedi pro medicamento rob sambuci admodum copiosum, cujus unciiis quatuor addita est una drachma salis polychresti, pro potu ordinario exhibui serum lactis, vel emulsum ex quatuor seminibus frigidis, & qualibet vespera remedium opiatum.

His alvus reddebatur libera, tensio hypochondriorum remisit, & noctes fuerunt magis quietæ.

Ægra cœpit appetere, & cibos sine molestia ferre, redierunt vires, & vix ullæ cordis palpitaciones amplius observatæ sunt, pulsus ærat magis æqualis.

Per tres & dimidium menses ægram hac ratione conservavi, & subinde tumor in epigastrio minor molliorque tactu percipiebatur.

Postea vero ægra subito debilitata est, accesserunt vomitus æruginosi, & alvi fluxiones biliosæ, acres; tumor subito increvit, nec ullum medicamentum quid levaminis adtulit, unde intra paucum tempus aderat summa macies, extremorum frigus, mors.

Omentum, ventriculus, intestina erant e suis locis emota, & compressa.

Pancreas autem mole admodum magnum & adeo grave, ut tredecim libras civiles pondere excesserit.

Sectione detegebatur, id in saccum esse extensum, qui plenus erat sanguine partim grumoso, partim adeo coagulato, & membranaceo, ut in lamellas potuerit separari.

An violento vomitu arteria in medio pancreate rupta, continuo fudit sangui-

nem , & sensim pancreatis substantiam in faccum distendit , & tantæ molis tumorem produxit ?

CADAVER SEPTIMUM.

HOMO 45. annorum , a binis , & dimidio annis tussiculam siccam , & admodum defatigantem habuit , nec sinistro lateri sine majori tussi & summa anxietate incumbere potuit.

Sola paregorica remedia quandoque tussim inhibuerunt , & malum reddiderunt per aliquot horas mitius ; reliqua magis molestiæ quam utilitati fuerunt.

Sputum nullum prodiit , nisi tenue , aquosum , spumosum.

Vires sensim omnes conciderunt , defluxere capilli , evanuerunt carnes , supervenit sudor nocturnus copiosus , acer , tandem mors.

Pulmo dexter erat faccus membranaceus , qui octo libras feri foetidi , acris , subfusci recluserat.

Cætera fuerunt sana.



CADAVER OCTAVUM.

HOMO 39. annorum , a novem mensibus conquerebatur acutissimum dolorem in anteriore dextra capitis parte.

Dolor circa vespervas quotidie exacerbatus est cum delirio , cui plerumque violentæ totius corporis convulsiones jungebantur.

Quamvis nihil fuerit intermissum , quod vel externo , vel interno usu prodesse potuisset , malum tamen in dies in pejus ruit.

Æger sæpius æruginosa vomuit , tandem extenuatus convulsione obiit.

Inveniebatur anterior cerebri lobus dexter fere totus in foetidissimam putrilaginem dissolutus.

Intestina omnia erant penitus contracta , nodosa ; ventriculi substantia digitum crassa , ejus autem cavum adeo parvum , ut vix libram dimidiam receperit.

CADAVER NONUM.

FEMINA 40. annorum , octodecim ab hinc mensibus in diarrhæam incidit , quæ

vires multum diminuit, & appetitum delevit.

Alvus erat frequentissima, verum pauca, plumbea, liquida.

Nullum medicamentum juvit.

Adstringentibus quidem fœces retentæ sunt, mox autem intumuit venter, & sequebatur vomitus materiæ subnigræ, qui ægram debilitavit, & in mortis periculum conjecit.

Postquam per integrum annum hoc morbo ægra defatigata, & extenuata fuit, & dein non amplius habuit, quo vitam sustentaret, transivit ad nosocomium.

Summum in hac ægra curanda sedulitatem & attentionem adhibui, & omnes mutationes scrupulose observavi.

Vidi autem remedia leniter tantum adstringentia pessimos effectus produxisse.

Opiata soporem profundum adtulerunt, & tendinum subsultus excitarunt.

Usus oleosorum summus in ventriculo ardor sequebatur, & orti sunt ructus erodentes, rancidi.

Verum decoctum saturatum radicis salab, & serum lactis, cujus libris quatuor uncia una spiritus nitri dulcis adjiciebatur, pro libitu potatum morbum adeo

levem reddiderunt , ut ægra iterum
coeperit cibos appetere , eosque dige-
rere ; & alvus tantum bis terve per diem
prodiit.

Color autem fuit semper plumbeus ,
foetor fere nullus.

Urina erat copiosa , semper tenuis ,
subviridis , inodora ; relicta per biduum
non corrumpebatur , tertio autem die
turbida gessit in superficie pelliculam
pinguem , splendentem , & foeruit.

In sextum mensem morbus sat mitis
fuit , vires tamen auctæ non sunt , nec
carnes creverunt , & ossa flaccida tan-
tum pelle tegebantur.

Sub finem sexti mensis supervenit tuf-
fis violentissima , prodierunt sputa sub-
nigra , foetida , non levantia , aucta
iterum est diarrhæa , & coeperunt cibi
crudi , plumbeis foecibus misti , pro-
dire.

Medicamenta iterum varia tentavi ,
& malum subinde videbatur emendari ,
levari ; verum tale levamen non diu du-
ravit.

Ex nimio alvi fluxu tandem sputa
suppressa sunt , & vox est penitus de-
leta ; unde anima exsuccum corpus de-
seruit.

Pulmones erant flaccidi , exesi , nigri.

Nigrum quoque fuit pericardium ; pleura , diaphragma , omentum ; ventriculus , omnia intestina , vesica urinaria , peritonæum , uterus , uteri vagina , & ipse cerebri meninges.

Cerebrum , cor , hepar , lien , renes , omnes partes musculosæ , & integumenta corporis externa naturalem colorem habuerunt.

Plumbeo autem , & nigrescente colore erat quoque tincta pancreatis substantia , & ejus succus.

Mirum certe ! unde hæc mutatio.

CADAVER DECIMUM.

VIR 56. annorum , a pluribus annis habuit dolorem obtusum in lumbis.

Hicce dolor erat in latere sinistro longe vehementior , quam in dextro , & se subinde ad unguina extendit , & retinuit urinam.

Quoniam autem ad fundum vasis , in quo urina asservabatur , sabulum rubrum , copiosum semper inveniebatur , orta est suspicio : an non in renibus lateret calculus ?

Data sunt propterea omnis generis remedia lithontriptica , urina inde co-

piofior fuit , & facilior , & dolor circa renes est multum imminutus.

Imo per integros menses subinde malum adeo leve erat , ut æger omnes suos labores absque ulla molestia potuerit perficere.

Dolores quidem semper sensit obtusos & gravantes in lumbis , nihilominus ii leves erant , & urina sine impedimento prodiit.

Tempore tamen humido & frigido , dolores paulisper exacerbati sunt.

Et urina paucior fuit , & prodeundo excitavit ardorem.

Per integros septem annos hac ratione æger se conservavit.

Posthac vero oriebatur in hypogastrio ex latere sinistro dolor acutissimus , qui se ad lumbos usque extendit , & mox retenta est urina , supervenit magnus calor , & sitis , & ingens febris.

Cataplasmata loco dolenti ilico sunt applicata , sanguis repetita venæ sectione est emissus , & data sunt copiosa decocta.

His sensim prodiit pauca , flammea urina , & dolor acutus paulisper remissit ; verum tensio mansit admodum molesta ex unguine sinistro ad lumbos usque.

Æger sæpius vomuit, & tunc sensit vesicam urinariam ex chorda quasi suspensam versus lumbos trahi.

Remedia urinam pellentia, quo erant fortiora, eo magis malum exacerbarunt & urinæ exitum interclusere.

Decoctum radicis althææ, & glycyrrhizæ ægrum maxime levavit.

Tandem dolor quoque in latere dextro ortus est, qui a lumbis ad inguen dextrum se extendit.

Retenta est urina per binos dies, dein iterum prodiit guttatim & magno cum ardore.

Dolores circa lumbos, & in toto infimo ventre, præsertim vero ex latere sinistro aucti sunt.

Supervenerunt tormina, & anxii vomitus, qui læthale frigus induxerunt.

Variis remediis hæc tandem iterum mitigata sunt, & prodiit pauca urina.

Demum æger ad nosocomium est translatus.

Pulsum tunc inveni debilem, inæqualem, corpus emaciatum, pedes tumidos, circa lumbos quoque mollis tumor observabatur, urina prodiit pauca, albicans.

Dolores ex inguine versus renes in utroque latere æger conquestus est, in

lumbis autem tensionem dilacerantem.

Dedi tunc mane & vesperi drachmam dimidiam pulveris uvæ ursinæ, & desuper feci hauriri uncias sex decocti saturati radicis althææ.

Melius inde habuit, prodiit urina copiosior, nec tanti percibiebantur dolores.

Tumor tamen lumborum & pedum, increvit.

Et post quatuor circiter menses urina subito iterum retenta est, nec ulla amplius gutta prodivit.

Totus venter tendebatur, orti sunt enormes dolores colici, vomitus singultus, æger factus est soporofus, deliravit, & quarto die moriebatur.

In cavo thoracis & abdominis latuit multa aqua subflava.

Ambo uretheres inveniebantur in varias flexuras incurvati, & adeo ampli, ut diameter sinistri quatuor pollices superaverit, dextri autem unum, & dimidium.

Renis utriusque substantia erat penitus destructa, & in faccum tenuem, membranaceum extensa, quorum sinister magnitudine caput pueri, quatuor circiter annorum, adæquavit, dexter autem habuit molem duorum pugnorum.

In uretheribus , & in faccis renalibus continebatur serum subflavum , inodorum.

Eo in loco , ubi sinister urether vesicæ inferebatur deprehensa est callosa durities instar nucis avelanæ , quæ uretheris cavitationem penitus obstruxit & urinæ transitum abolevit.

Dexter autem urether in distantia pollicis a vesica erat firmissime constrictus , inflammatus , semi-gangrænosus.

Vesica urinaria fuit dura , & in minimam molem contracta.

Aderat igitur pessimus renum hydrops.

Huic sectioni interfuit doctissimus medicus castrensis KOLLMANN , & Dominus LEBER , nosocomii civici chirurgus optimus.

CADAVER UNDECIMUM.

HOMO 29. annorum , a decimo ætatis suæ anno cœpit dolorem pungentem in latere thoracis dextro circa quintam costam veram percipere.

Hic dolor per vices abiit , & rediit iterum cum vehementia.

Post sesqui anni spatium jungebatur huic dolori tussicula sicca.

Applicatis variis externis internisque remediis, tussis & dolor iterum filuerunt, & æger per octo annos fere nihil advertit.

Subinde tantum ex violentiori risu, sternutatione, aut celeri, ac vehementi corporis motu priori in loco quidam dolor acute pungens observabatur, qui vero mox iterum conquievit.

Elapso octo annorum spatio tussis denuo oriebatur admodum valida, & tunc dolor punctorius quoque resuscitatus est.

Remediis expectorantibus sputa promotebantur.

Tussis fiebat mitior, unde & dolor pungens imminutus fuit.

Nunquam tamen penitus evanuit, sed mansit continua ejus loci tensio, & ardor.

Per vices sine causa excitante ægrum tussis siccissima subitoprehendit, quæ adeo molesta, & anxiosa fuit, ut tota facies tumuerit, livuerit & æger fere fuisset suffocatus.

Dein hæc per plures septimanas iterum mitia fuerunt.

Sic disparuerunt, & redierunt morbi symptomata.

Verum sesqui anno abhinc tussicula

mansit continua, juncta cum acutissimo dolore punctorio, & continuo ejus loci ardore.

Sæpius per diem tussis exacerbata est, & dolor adeo acutus redditus, ut æger fere exanimis ceciderit.

Ex tussis vehementia, & doloris acerbitate, subinde convulsiones productæ sunt.

Hunc ægrum nullum medicamentum juvit, appetitus, qui antea bonus erat, deletus est, respiratio reddebatur anxia, vires debiles.

Dum miserrimus hicce æger ad nosocomium venit diversissima quoque medicamenta adhibui, verum nil effeci; solis opiatibus fortioribus quandoque dolorem, & tussim mitigavi, & somnum trium quatuorve horarum conciliaui, quo æger multum reficiebatur.

Nihilominus corpus totum sensim extenuatum est, & respiratio fiebat adeo laboriosa, ut æger jam non amplius potuerit decumbere; sed erectus debebat stare, aut sedere.

Tusses suffocativæ, & convulsiones totius corporis frequenter observantur.

Sputa nulla prodierunt, aut si quid visum est, illud erat aquosum, spumo-

sum, striis sanguineis variegatum.

Post multas luctas æger tandem succubuit.

Thoracis cavitates, & pericardium continebant copiosissimum serum.

Pulmones erant in quibusdam locis flaccidi; in aliis autem aëre elastico, & e suis vasis egresso, distendebantur.

Eo in loco, quo percipiebatur dolor punctorius, erat pleura partim callosa, partim inflammata, gangrænosa, exulcerata.

Ex pulmone huic loco adjacente prodiit cuspis osseus aciculæ instar acutus, & sectione detegebatur in ipsa pulmonis substantia os tres pollices longum, & $\frac{1}{4}$ pollicis crassum.

Hoc igitur officulum irritavit pleuram & tussim adeo validam, & lethalem induxit.

CADAVER DUODECIMUM.

FEMINA 36. annorum, a triennio fere omnia, quæ assumpsit, vomitu rejecit.

Nec ullum medicamentum ei adtulit levamen.

Hinc contabuit, & est mortua.

Hepar, mole ingens, pondere novem libras civiles superavit, & componebatur ex infinitis steatomatibus, quæ racematim sibi invicem adhærebant.

Vesicula fellea erat penitus compressa, rugosa, & præter paucam granulofam bilem nil continuit.

Ex fundo ventriculi lata radice hæsit scirrhus inæqualis, durus, capite infantis major.

Pilorus crassus, durus, exiguum tantum aperturam habuit.

CADAVER DECIMUM TERTIUM.

FEMINA 64. annorum, longo tempore difficili respiratione angebatur, & ex paulo fortiori motu eam palpitatio cordisprehendit.

Venæ sectiones repetitæ, & remedia purgantia eam per plures annos sat bene conservarunt.

Dein vero hæc potius auxerunt malum, & ægra debebat lecto inhærere.

Tussi nullum sputum prodiit? absque opio nullus sequebatur somnus; pulsus fuit semper parvus, inæqualis, quandoque intermisit, sæpe autem ita eva-

nuit, ut extrema facta fuerint frigida, & supervenerit magnum animi deliquium postea tamen quidam calor rediit, & pulsus iterum cœpit comparere.

Extrema manuum ac pedum semper erant subfrigida, licet ægra in pectore continuum ardorem conquereretur.

Cordis motus fuit semper inæqualis, & sæpissime tremulus.

Tandem ægra iterum validissimo animi deliquio derepente correpta est, nec amplius incaluit, & per tres dies relictæ nullum vitæ signum dedit.

Observabatur cadaverosus odor, & putridum liquamen ore, & naribus prodivit.

Hinc sectio anatomica instituebatur.

Pulmones erant nigri, graves. In ventriculo dextro cordis paucus sanguis grumosus repertus est.

Sinister autem inveniebatur in magnum saccum membranaceum extensus, in quo unicus erat polypus, qui uncias quatuor pondere paulisper excessit.

Arcus arteriæ aortæ fuit perfecte osseus, crassus, transitus autem adeo angustus, ut nec parvus digitus intramitti potuerit.

CADAVER DECIMUM QUARTUM.

FEMINA, 24. annorum, die 16. Januarii 1760. ex loco calido in frigidum se contulit corpore non admodum bene tecto.

Subitas tunc sensit horripilationes, dein dolorem acutissimum in latere sinistro, tandem calorem magnum, & sitim enormem, unde frigidam avidissime hausit.

Paulo post difficillime respiravit, anxia cordis palpitatione vexata est, & conquerebatur summum in thorace sinistro ardorem.

Sanguis ilico larga copia ex vena missus est, & data sunt copiosa decocta, aliaque remedia.

Verum nil levaminis inde sequebatur, vires omnes sunt prostratæ, & symptomata semper in pejus ruerunt.

Tunc ægra miserrima deferebatur in nosocomium.

Pulsus erat minimus, facies livida, oculi concavi, respiratio sublimis, densa, sitis immanis, extrema frigida.

Ægra erecto corpore debebat sedere;

dum enim supina decubuit, anxiosa fuit, & fere suffocata est, idem contigit ex situ in latere dextro: dum vero in latus sinistrum se vertit, ortus est dolor acute punctorius, & mox supervenit animi deliquium.

Optima quamvis medicamenta interne externeque adhibita fuerint, symptomata tamen semper pejora facta sunt, & anxietas tanta, ut ægra nec loqui, nec ejulare, nec gemere potuerit, pulsus quandoque penitus evanuit, extrema fuerunt gelida, respiratio erat semper pessima. Die 22. Januarii subita mors finem miseris imposuit.

Pulmones erant intus, extusque ruberrimi, quasi materie ceracea injecti.

Pericardium, valde distentum, replebatur pure tenui, & ejus membrana interna erat penitus corrosa.

Cor, ea ex parte, qua anteriora spectat ad magnam profunditatem suppuratum inveniebatur, & versus basin penitus gangrænosum.

Arteria aorta ex suo principio ad pollicis longitudinem suppuratione quoque affecta fuit.

In vasis majoribus latuerunt numerosi polypi.

CADAVER DECIMUM QUINTUM.

FEMINA, 35. annorum, inter continuos vomitus æruginosos tota frigida, & exhausta fertur ad nosocomium, & spatio dimidiæ horæ moritur.

Venter erat magnus, tensus, subcæruleus.

Intestina omnia inflammata, aut gangrænosa.

Super his, & inter giros reperiebatur multa materies flava, crassa, tenax, crustæ inflammatoriæ simillima.

In intestino jejunio latuit volvulus, sesqui spithamam longus; ubi nimirum intestinum inferius, a superiore cum suo mesenterio receptum, firmissime strangulabatur.

CADAVER DECIMUM SEXTUM.

FEMINA, 33. annorum, hydrope ventris, & pessima phthisi interimitur.

Pulmo dexter erat partim scirrhusus, partim a sanie acerrima exesus.

Sinister

Cadaver decimum sextum. 265

Sinister autem abscessulis refertus firmissime cum costis concrevit, & ibi saccum efformavit pure plenum, quod sensim pleuram ibidem consumpsit, & arrosit costas, atque per partes membranaceas egit fistulam usque ad renem ejusdem lateris, & hunc quoque leni suppuratione jam coepit afficere.

In abdomine fluctuavit multum serum flavum, turbidum.

Omentum, pollicem fere crassum, cartilagineam duritiem habuit.

Saccus cæci erat suppuratus, & intestina reliqua hinc inde livida, semigangrænosa.

Hepar naturale, fellis autem vesicula gessit centum quinquaginta tres calculos, quorum quilibet pisum magnitudine adæquavit.

CADAVER DECIMUM
SEPTIMUM.

FEMINA, 60. annor. remed. N. 69. aliquoties in nostro nosocomio a ventris hydrope liberata fuit, ita tamen, ut ablata ex ventre aqua, qualibet vice in hypogastrio quidam durus tumor remaneret, qui nullo medicamento potuit emendari.

Storck Ann. II. Tom. I. M

Hinc denuo post paucas septimanas datis quantumvis optimis remediis hydrops semper rediit.

Demum fiebat respiratio anxiosa, coepit pes, manusque sinistra œdematoso tumore inflari, habebantur vires, & noctu ægra subita extincta est.

In aspera arteria & in bronchiis multus sanguis grumofus extravasatus continebatur.

Et in utroque pectoris cavo copiosissimum serum pulmones in parvam gravemque molem compressit.

Pericardium mediante quadam crusta alba, duas lineas crassa, arctissime cum cordis substantia coaluit.

Abdomen replevit aqua limpida, inodora.

Ex ovario sinistro oriebatur hydatis magna, quæ ultra libram liquoris pellucidi continuit, huic alia parva hydatis adhæsit.

Ovarium dextrum solito majus, & durius in multas cellulas perfecte cartilagineas dividebatur, quibus inerat liquor pellucidus.

Ad fundum hujus ovarii repertum est officulum rotundum, piso majori par.

Uterus paulisper distentus gessit cor-

Cadaver decimum octavum. 267

pus glabrum, carnosum, & fundo intime accretum, quasi unam cum eodem substantiam faceret.

Hæc femina toto morbi tempore po-
ruit supine, & in utroque latere jacere,
dormire citra magnam anxietatem.

Nec unquam tussivit, nec subitas, &
suffocantes e somno evigilationes passa
est, quæ iis, qui hydrope pectoris affi-
ciuntur, valde communes sunt.

CADAVER DECIMUM
OCTAVUM.

HOMO, 25. ann., valida diarrhæa
per duodecim dies vexabatur, quæcun-
que assumpsit, nullum levamen dede-
runt.

Tandem agyrta præbuit pulverem,
qui in ore, & ventriculo ardorem adf-
tringentem excitavit, & mox alvum re-
tinuit.

Ardor per totum ventrem extende-
batur, & ortæ sunt magnæ anxietates,
& singultus.

Altero die venter in molem inæqua-
lem elasticam elevatus est, & supervenit
sitis ingens, & delirium.

Unde æger ad nosocomium defer-
batur.

Nec medicamenta interna, nec ex-
terna quidquam in melius mutarunt.

Enemata nequaquam poterant injici,
etenim paulo supra ani sphincterem
hæsit obstaculum, nulla arte amoven-
dum.

Demum quæcumque ingerebantur ea
summa cum anxietate, & virium prof-
tratione æger revomuit.

Ventris moles semper aucta est.

Et quarto die vita finiebatur.

Ventriculus erat crassus, parvus, hinc
inde inflammatus.

Intestina tenuia omnia in tenuem
chordam contracta reperiiebantur.

Intestinum cæcum formavit ingentem
saccum aëre elastico plenum.

Intestinum colon in septem locis
quasi filo arctissime constrictum erat,
quodlibet spatium autem, quod inter
has constrictiones intercessit, in molem,
capite infantis majorem, extensum fuit.

Ligamenta longitudinalia hinc inde
manifeste rupta conspiciebantur.

In his cavis adeo amplis præter aërem
inodorum, & valde elasticum nil conti-
nebatur.

Circa loca vero angustata hæsit mu-

cus tenacissimus, subfuscus, quem gustando chirurgus & ego acerbum, & vi maxime adstringente, præditum invenimus.

Intestinum rectum erat rugosum, firmissime clausum.

CADAVER DECIMUM NONUM.

FEMINA, 48. annor., ante biennium ex tussi violenta sensit acutissimum dolorem in capitis parte dextra, hunc dolorem sequebatur continua pulsatio in eodem loco, externe tamen nihil visu aut tactu potuit percipi.

Venæ sectiones, fomenta, & remedia diversi generis nullum fere auxilium præstiterunt.

Præter hanc pulsationem, & dolentem partis dextræ tensionem ægra prorsus nihil conquerebatur.

Post anni spatium comparebat circa os temporale dextrum quoddam tuberculum elasticum, pulsans, & partes externe incipiebant cum dolore tendi, & oculus ejus lateris rubuit.

Nascebatur inde aneurismatis suspicio; hinc vena repetitis vicibus aperta

est, data sunt remedia alvum continuo moventia, externe quoque varia a variis chirurgis apponebantur.

Nihilominus tumor pulsans altior, & amplior sensim factus est, tota facies sinistra subrubente & lividis striis variegato tumore tendebatur, & maxillæ inferioris motus fiebat dolens, summe difficilis.

Cæteroquin autem femina videbatur sana, appetiit, vires habuit sat bonas, nec quidquam conquesta est.

Spatio quatuor mensium tumor ovum gallinaceum adæquavit.

Quoniam autem labores suos more solito peragere non potuit, introivit tunc in nostrum nosocomium.

Pulsus erat fortis, æqualis, vires bonæ, appetitus magnus, mens hilaris, somnus tranquillus.

Quamvis omnem curam possibilem impenderim, ut malo limites ponerentur, intra sex tamen menses tumor pulsans ad unius, & dimidii pugni magnitudinem accrevit.

Pulsus semper mansit æqualis, respiratio libera, vires bonæ, oculus dexter multum rubuit, sinister autem erat sanus, vivus.

Dominus COLLIN sæpius mecum

mirabatur, quod tantus in capite tumor pulsans non pejora produceret symptomata, nec somnum turbaret.

Pulsatio in tumore cordis & arteriarum pulsui correspondit.

Hæc tamen pulsatio fiebat eo mollior, & minor, quo majus incrementum tumor cœpit.

Postquam hæc ægra per octo menses sat commode in nosocomio vixit, tunc subito collabebantur vires, pulsus factus est debilis, inæqualis, tumor pulsans mole minuebatur, appetitus evanuit, & noctes fuerunt inquietæ.

Ægra tamen præter tensionem dolentem in parte dextra nullum dolorem, nullam sitim conquerebatur, vox mansit distincta, clara, & memoria semper firma.

A cibis autem omnibus ægra abhorruit; unde intra quatuor septimanas contabuit.

Post mortem tumor erat mollis, nec multum eminuit.

Hujus tamen tumoris portio pugno virili major, acumine obtuso versus interiora cranii penetravit, & totam cerebri dextri substantiam compressit.

Nullum in tota plaga dextra cranium

inveniebatur, etenim omne os in membranam redactum est.

Tumoris materies, variegata, atheromate, concreto quasi sanguine, & quadam veluti carnositate constabat.

Tumor parte sua inferiore removit capitulum maxillæ inferioris ab ejus cum osse temporum articulatione, & replevit pollicis latitudine intermedium ibidem locum.

Maxillæ capitulum erat totum excisum, ut & capsula, & cartilago intermedia.

Ex eodem latere dextro erat corrosum os jugale, pars maxillæ superioris, pars palati ossei postici una cum processibus pterygoideis, plus quam media pars ossis petrosi per universam ejus longitudinem.

Simul deerat antrum hygmori, os spongiosum inferius, & fere totum os multiforme ex latere dextro.

In oculo dextro erat nervus opticus emarcidus, cornea opaca, lens crystallina, plana, dura, flava.

In media futura sagittali reperiebatur foramen rotundum, veluti trepano factum, penetrans per totum cranium.

Ad finem hujus futuræ simili foramine erat os exesum.

In osse bregmatis sinistri quoque rotundum foramen detegebatur, hoc autem externam cranii laminam non penetravit, licet eam jam rodere cœperit.

Mirum! ex tanta partium consumptione, ex cerebri adeo profunda compressione, nullam apoplexiam, paralyfin, nullos motus convulsivos, epilepticos &c. esse secutos.

Mirum! mentis functiones omnes semper mansisse bonas, integras.

CADAVER VIGESIMUM.

FEMINA, 35. annorum, pessima peripneumonia quarto morbi die necatur.

Pulmo erat totus sphacelo consumptus, & levi manu poterat in foetidam putrefactionem comprimi.

In abdomine latuit tumor steatomatosus, concretus cum fundo uteri, & quasi ex eo prodiens, qui pondere habuit viginti tres libras civiles.

Poplite dextro similis tumor steatomatosus adhæsit, qui pondere octodecim libras civiles paulisper excessit.

Novi hanc feminam sanam, hilarem, agilemque, antequam in peripneumoniâ incidit.


274 *Cadaver vigesimum.*

Tetigi hos tumores, ea nullum dolorem conquerebatur, alvum habuit liberam, appetitum magnum.

Vidi eam currendo scalas ascendisse, & varios exercuisse motus, nec impediebatur ab his tumoribus, nec unquam claudicavit.

Mirum! naturæ & consuetudinis opus.





FORMULÆ

IN NOSOCOMIO USITATÆ.

1) R. NITR. antimon. dr. β.

syrup. rub. id. unc. ij.

rob. ribes, unc. j. β.

acet. vin. unc. j.

vin. boni austriac. unc. iv.

decoct. hordei libr. ij.

M. S. Sumat æger omni trihorio uncias tres.

2) R. Lact. recent. lib. iv.

vin. austriac. unc. viij.

Bulliant simul per momentum, dein, colostro lactis per colaturam ablato, serum albumine ovorum purifica, & exhibe pro potu ordinario.

3) R. Claret. fact. ex conserv. flor. cordial. lib. j.

syrup. diacod. unc. j. β.

spirit. sulph. per camp. q. f.

ad grat.

M. S. Sumat æger omni bihorio vel trihorio duo cochlearia.

- 4) R. Rad. alth. unc. ij.
 fol. alth. m. ij.
 flor. verbasc. m. j.
 confcis. coq. f. q. aq. per $\frac{1}{2}$ horam
 sub finem adde
 rad. fænic. unc. j.
 & relinq. adhuc vase clauso per $\frac{1}{4}$
 hor. in fervid. infus.
 dein colat. lib. iij.
 adde
 stib. diaph. non abl. dr. j. β .
 oxymell. scillit. unc. ij. β .
 syrup. diacod. unc. j.

M. S. *detur omni trihorio vasculum un-*
ciarum quatuor calide.

- 5) R. Mass. pilul. de cynogl. gr. viij.
 solv. in aq. flor. rhæad. unc. ij. β .
 dein adde
 syrup. flor. rhæad. unc. β .

M. S. *Sumat æger singula dimidia hora*
cochleare unum.

- 6) R. Semin. melon. unc. j.
 — papav. alb. unc. β .
 f. c. decoct. hordei emuls. colat. lib. j.
 adde
 nitri puri gr. xx.
 syrup. papav. alb. unc. j.

M. S. *Sumat æger omni hora unc. ij.*

- 7) R. Nitr. pur. gr. xx.
 mucilag. gum. traga dr. β .

syrop. diacod. unc. j. vel unc. j, β.

aq. flor. rhæad.

— — til. aa. unc. ij.

M. S. Sumantur omni hora duo cochlearia.

8) ℞. Camphoræ gr. xv.

mucilagin. gum. tragacan. dr. ij.

in mortario vitreo diu tritis & subactis

adde miscendo

syrop. menth. unc. β.

— diacod. unc. j.

aq. menth. lib. j.

nitr. antimon. dr. β.

liquor. anodyn. mineral. gtt. xv.

M. S. Sumatur omni bihorio vel trihorio cochleare unum.

9) ℞. Aq. laxat. disp. vien. unc. vj.

aq. meliss. unc. ij.

sal. sedliz. dr. vj.

syrop. cort. aurant. unc. β.

liq. anod. mineral. gtt. x.

M. S. Sumat æger omni dimidia hora unciam unam, donec probe purgetur.

10) ℞. Rad. ypecacuanh. gr. xx.

tart. emet. gr. j.

sal. polychr. gr. x.

m. f. pulv. pro unica dosi.

11) ℞. Stib. diaph. non abl. dr. j.

oxymell. simpl. unc. ij. β.

syrop. flor. rhæad. unc. j. β.

m. f. linct.

12) R. Gum. ammon. acet. scillit.
solut. dr. ij.

oxymel. scillit. unc. ij.

aq. fænic. unc. viij.

tinct. helen. dr. β.

spirit. nit. dulc. gtt. xx.

M. S. *Detur omni bihorio uncia una.*

13) R. Claret. fact. ex conserv. flor.
cordial. lib. j.

fyrup. diacod. unc. j.

oxymell. scillit. unc. ij.

kerm. mineral. gr. x.

M. S. *usus, ut prioris misturæ.*

14) R. Stib. diaph. non abl. dr. j. β.

Kerm. mineral. gr. xx.

m. f. pulvis tenuissimus, cui exacte
miscendo adde

conserv. fumar. unc. j.

— nast. aq.

— becabung. aa. unc. j. β.

fyrup. de erysim. unc. j.

M. S. *Sumatur omni bihorio parvum
cochleare.*

15) R. Stib. diaph. non abl. dr. j.

oxymel. scillit. unc. iiij.

fyrup. diacod. unc. j.

m. f. linct.

16) R. flor. benzoin. gr. xx.

stib. diaph. non abl. dr. j.

oxymell. scillit. unc. j. β .

aq. meliss.

— menth. aa. unc. ij.

— flor. samb. unc. iiij.

tinct. croc. dr. β .

M. S. Detur omni hora cochleare unum.

17) \mathcal{R} . Stib. diaph. non obl. dr. j.

kerm. mineral. rite parati gr. xv.

facch. cand. alb. unc. j.

m. f. pulvis tenuissimus.

M. S. Sumat æger omni trihorio parvum cochleare.

18) \mathcal{R} . Laud. pur. gr. j. ver j. β .

ol. lin. purissimi unc. iiij.

m. f. haustus vespertinus.

19) \mathcal{R} . Flor. samb. m. iiij.

consciss. infund. f. q. feri lact. ferv.

per $\frac{1}{2}$ horam colat. lib. ij.

adde

nitr. pur. dr. j.

rob. samb. unc. j. β .

syrup. s. rad. aperient. unc. ij.

M. S. Sumat æger omni bihorio unc. iiij. calide.

20) \mathcal{R} . cort. peruv. unc. j.

syrup. flor. chamom. unc. ij.

aq. flor. chamom. lib. j.

vin. bon. austriac. unc. j. β .

M. S. Sumatur omni hora cochleare unum.

21) ℞. Mell. rosac. unc. ij.
 syrup. viol. unc. j.
 spirit. sal. acid. gtt. xxx.
 m. f. linct.

22) ℞. Rad. salab. dr. iij.
 sciss. coq. f. q. aq. per $\frac{1}{2}$ hor.
 colat. lib. j.

adde

stib. diaph. non abl. dr. j.
 syrup. diacod. unc. j. β.

M. S. *Dentur omni trihorio unc. iij.
 calide.*

23) ℞. Ol. amygdal. dulc. recenter
 express. unc. β.

mucilag. gum. traga. dr. ij. β.

in mortario vitreo diu tritis & subactis

adde miscendo

syrup. diacod.

— capill. vener. aa. unc. j.

m. f. linctus.

24) ℞. Fol. salv. m. iij.

sciss. infund. f. q. feri lactis ferv.

per $\frac{3}{4}$ hor.

colat. lib. ij.

adde

syrup. salv. unc. j. β.

— diacod. unc. j.

M. S. *Dentur omni trihorio diei unciae
 quatuor calide.*

25) ℞. Extract. cort. peruv. unc. β.

solv. in aq. flor. sambuci unc. x.

dein adde

syrup. diacod. unc. j.

— cort. aurant. unc. β.

vin. generos. austr. unc. j. β.

spirit. sulph. per camp. gtt. xxx.

M. S. Sumat æger omni bihorio unc. ij.

26) ℞. Nit. pur. gr. xx.

sal. polychr. dr. j.

rob. samb. unc. v.

M. S. Detur quater per diem uncia dimidia.

27) ℞. Sal. polychr. dr. j.

conserv. nasturt. aq. unc. v.

M. S. Usus ut prioris.

28) ℞. Terr. fol. tart. dr. j.

succ. cochlear. recent. express.

— nast. aq. — —

aa. unc. ij.

syrup. de succ. pomor. unc. j. β.

M. S. Sumat æger omni trihorio unciam unam.

29) ℞. Sal polychr.

pulv. rad. jalap. aa. dr. j.

conserv. nast. aq. unc. iv.

syrup. fumar. unc. j.

M. S. Sumat æger omni bihorio parvum cochleare.

30) ℞. Sal. polychr. dr. j.

pulv. cort. peruv. unc. β.

conserv. nast. aq. unc. ij. β.

syrup. flor. chamom.

— fumar. aa. unc. j.

M. S. *Absumatur tempore apyrexiae.*

31) R. Sapon. venet. unc. β.

solv. in aq. fumar. lib. j.

dein adde

syrup. fumar. unc. ij.

rhei elect. dr. j. β.

M. S. *dentur omni bihorio duo cochlearia.*

32) Terr. foliat. tart. dr. j.

oxymell. scillit.

conserv. nast. aq. aa. unc. ij.

M. S. *Sumat æger omni hora parvum cochleare.*

33) R. Spirit. sal. ammon. dr. j.

acet. ruth. q. s. ut fiat perfecta saturation.

aq. ruth. unc. iij.

syrup. gran. kerm.

— de erysim. aa. unc. β.

M. S. *Detur omni bihorio cochleare unum.*

34) R. aq. majoran. lib. j.

spirit. cochlear. unc. j.

— therebint. dr. ij.

M. S. *Inungantur & probe perfricentur hoc remedio partes affectæ bis terve per diem.*

35) R. Ol. amygd. dulc. unc. iv.

spirit. sal. ammon. dr. iij.

M. S. *Usus ut prioris.*

36) R. Rad. alth. unc. j. β.

fol. alth. m. ij. β.

flor. alth. m. j.

consciss. coq. f. c. q. aq. per $\frac{1}{2}$ hor.

colat. lib. ij. β.

adde

syrup. moror. unc. ij.

mell. rosac. unc. j.

sal. prunell. dr. j.

M. S. *Dentur omni trihorio unciae quatuor calide.*

37) R. Sal. sedliz. unc. j.

mann. elect. unc. ij.

aq. flor. samb. lib. j.

spirit. nitr. dulc. gtt. xx.

M. S. *Sumatur omni dimidia hora uncia una, donec alvus probe laxetur.*

38) R. Herb. agrimon.

— virg. aur. aa. m. j.

consciss. infund. f. q. aq. ferv. per $\frac{1}{2}$ hor.

colat. lib. j.

adde

mell. rosac. unc. j. β.

sal. polychr. dr. j.

m. f. gargarisma.

39) R. Nitr. pur. gr. xxx.

mell. rosac. unc. ij. β.

mucilag. sem. cydon. aq. rosar.
extract. unc. β.

m. f. linctus.

40) ℞. Sal. polychr. dr. j.

mell. rosac. unc. ij. β.

ung. ægyptiac. unc. β.

41) ℞. Scammon. gr. xij.

resin. jalap. gr. v.

sal. polychr.

facch. alb. aa. gr. x.

ol. still. foenic. gtt. j.

m. f. pulv. tenuissimus, pro unica dosi.

42) ℞. Sal. polychr. dr. j.

syrop. de spina cerv. unc. j. β. vel
unc. ij.

m. f. haustus.

43) ℞. Rad. torment. j. β.

sciss. coq. f. q. aq. per horam
colat. lib. j.

adde.

mell. rosac. unc. j. β.

sal. polychr. dr. j.

spirit. vin. unc. β.

m. f. gargarisma.

44) ℞. Sal. ammon. dr. iij.

acet. scillit. unc. β.

oxymell. scillit. unc. ij.

aq. flor. samb. lib. j.

m. f. gargarisma.

45) ℞. Sapon. Venet. unc. j.

in Nosocomio usitatae. 283

solv. in aq. flor. samb. lib. j. β .

dein adde

syrup. de erysim. unc. ij.

sal. polychr. dr. ij.

m. f. gargarisma.

46) \mathcal{R} . Sem. cydon. leviter contus.
unc. β .

Affunde aqu. rosar. ferv. lib. j. &
relinque vase clauso in ferv. infus. per
 $\frac{1}{4}$ hor. dein colat. adde

mell. rofac.

syrup. violar. aa. unc. j.

m. f. gargarisma.

47) \mathcal{R} . Decoct. emoll.

ol. verbasc. aa. lib. β .

m. f. enema.

48) \mathcal{R} . Ung. nutrit dr. iiij.

— popul. dr. j. β .

m.

49) \mathcal{R} . Opii pur. gr. iiij.

ung. nutrit.

— popul. aa. dr. ij.

m.

50) \mathcal{R} . Pulv. bezoard. alb. scrup. ij.

nitr. antimon. scrup. j.

syrup. flor. rhœad. unc. j.

aq. flor. till. unc. iiij.

*M. S. Detur omni hora vel omni bihorio
cochleare unum.*

51) \mathcal{R} . Nitr. antimon. gr. xx.

fyrup. menth. unc. j.
 aq. menth. unc. iv.
 Laud. liquid. sydenh. gtt. xx.
 liq. anod. mineral. gtt. xv.

*M. S. Sumatur omni bihorio cochleare
 unum.*

52) R. Scill. recent. unc. j.
 pulv. cort. cinnamom.
 — — winter. aa. unc. β.
 vin. bon. austriac. montan. lib. ij.

*M. & relinque in leni digestionem per
 24 horas, ut fiat vinum medicatum,
 dein colat. adde*

fyrup. 5. rad. aperient. unc. iij.
 spirit. nitr. dulc. unc. j.
 — menth. dr. j. β.

*M. S. Sumat coger omni trihorio unciam
 dimidiam sensim augendo dosin.*

53) R. Pulv. rad. helen. dr. j.

— — jalap. dr. ij.
 sal. ammon. dr. j. β.
 conserv. nast. aq. unc. v.
 fyrup. de spin. cerv. unc. j. β.

M. S. Detur omni trihorio drachma una.

54) R. Lap cancr.

acet. vin. aa. dr. iij.

terr. fol. tart.

borac. venet. aa. dr. j.

fyrup. alth. unc. ij.

aq. foenic. unc. viij.

spirit. nitr. dulc. dr. β.

M. S. *Detur omni trihorio uncia una.*

55) ℞. sal. polychrest.

pulv. rad. jalap.

— — valerian. five phu. aa. dr. j.

oxymell. scillit. unc. iv.

M. S. *Exhibeatur adultis quater per diem uncia, dimidia junioribus vero drach. j. vel drach. ij.*

56) ℞. Scammon.

succin. ppt. aa. dr. β.

tert. fol. tart. dr. j.

milleped. ppt. dr. ij.

sacch. cand. alb. dr. j. β

m. f. pulv.

M. S. *Dentur omni bihorio gr. xv.*

57) ℞. Sacch. alb. dr. ij.

ol. still. menth. gtt. v.

in mortar. vitr. bene subactis adde

syrup. menth. unc. j. β.

aq. menth. unc. x.

spirit. menth. dr. j. β.

M. S. *Sumat æger omni bihorio cochleare unum.*

58) ℞. Limat. mart. non rubig.

cort. peruv.

— cinnamom.

— winter. aa. unc. β.

m. f. pulv. cui affunde vini generos.

austriac. lib. ij.

Relinque in leni digestionem per 24. horas, dein colaturam per inclinationem exhibe.

M. S. *Detur ter de die cochleare unum sensim augendo dosin.*

59) R. Scammon.

myrrh. aa. dr. β.

lap. cancr. dr. ij.

fem. foenic. dr. j. β.

magnes. nit. unc. β.

m. f. pulv.

M. S. *Sumat æger quater per diem dr. j.*

60) R. Pulv. rad. helen.

limat. mart. non rubig, aa. dr. j. β.

conserv. menth. unc. ij.

syrup. menth. unc. j. β.

M. S. *Detur omni quarta hora parvum cochleare superbibendo aliquot uncias infusi foliorum trifolii fibrini.*

61) R. borac. venet. dr. β.

succin. præparat. gr. xx.

syrup. menth. unc. j.

aq. meliss. unc. iv.

— ruth. unc. j. β.

tinct. croc. austr. gtt. xx.

laud. liq. sydenhami gtt. xvj.

M. S. *Detur omni bihorio cochleare unum.*

62) R. Sarcocoll.

oliban.

oliban.

mastic. aa. dr. j.

mucilag. gum. tragac. q. f.

m. f. pil. gr. iij.

S. Dentur omni trihorio tres pilulae.

63) \mathcal{R} . Rhei elect. scrup. ij.

myrobalan. citr. scrup. j.

ol. still. cumin. gtt. j.

m. f. pulv. pro unica dosi.

64) \mathcal{R} . Scammon. dr. β .

pulv. antispasmod. disp. Vien. dr. \mathfrak{ij} .

magnes. nitr. unc. β .

m. f. pulv.

S. Sumatur omni vespera. dr. j.

65) \mathcal{R} . Scammon.

resin. jalap. aa. dr. β .

mass. pil. extract. cath. dr. j.

spirit. vin. q. f.

m. f. pil. gr. iij.

S. Sumantur mane & vesperi tres pilulae.

66) \mathcal{R} . Mercur. dulc. gr. xij.

solv. in aq. fumar. lib. j.

dein adde

mell. rosar.

syrup. fumar. aa. unc. j.

M. S. Detur quater per diem uncia una.

67) \mathcal{R} . Mercur. sublim. corros. gr. vj.

solv. in spirit. frument. lib. j.

S. Detur mane & vesperi uncia dimidia.

Storck Ann. II. Tom. I.

N.

68) ℞. Scamm. gr. vj.
 milleped. ppt. dr. β.
 stib. diaph. non abl. gr. xv.
 m. f. pulv. parentur tales N. viij. &
sumat æger mane & vesperi unum.

69) ℞. Fol. absinth.
 — eupator. cannab. aa. unc. j.
 confciss. affunde
 vini boni Austriac. lib. iij.
 relinq. vase clauso in ferv. digest.
 per duas horas, dein colaturæ leviter
 expressæ,

adde

oxymell. scillit. unc. iij.
 spirit. nitr. dulc. unc. j.
*M. S. Detur omni trihorio cochleare
 unum sensim augendo dosin.*

70) ℞. Stipit. dulc. amar. unc. ij.
 sciss. & leviter contus. infund.
 f. q. æq. ferv. per $\frac{1}{2}$ hor. dein mo-
 mento ebull.
 colat. lib. j. β.
 adde
 oxymell. simpl.
 syrup. fl. rhæad. aa. unc. j.
M. S. Dentur omni trihorio uncia tres.

71) ℞. Nitr. pur. dr. j.
 rob. samb. unc. iv.
 syrup. diacod. unc. j. β.

M. S. Sumatur quater per diem uncia dimidia.

72) R. Syrup. diacod. unc. β.

aq. fl. rhæad. unc. ij.

spirit. sulph. per campan. dr. β.

m. f. haustus.

73) R. Lap. ancr.

acet. vin. aa. unc. β.

syrup. g. rad. aper. unc. j.

aq. flor. samb.

— feenic. aa. unc. iij.

terr. fol. tart. dr. β.

liq. anod. mineral. gtt. vj.

M. S. Dentur omni trihorio duo cochlearia.

Finis Tomi I.

